


Inches

centimeters



|    | 1     | 2     | 3      | 4      | 5      | 6      | 7     | 8      | 9     | 10    | 11(A) | 12    | 13    | 14    | 15    |
|----|-------|-------|--------|--------|--------|--------|-------|--------|-------|-------|-------|-------|-------|-------|-------|
| L* | 39.12 | 65.43 | 49.87  | 44.26  | 55.56  | 70.82  | 63.51 | 39.92  | 52.24 | 97.06 | 92.02 | 87.34 | 82.14 | 72.06 | 62.15 |
| a* | 13.24 | 18.11 | -4.34  | -13.80 | 9.82   | -33.43 | 34.26 | 11.81  | 48.65 | -0.40 | -0.60 | -0.75 | -1.06 | -1.19 | -1.07 |
| b* | 15.07 | 18.72 | -22.29 | 22.85  | -24.48 | -0.35  | 59.60 | -48.07 | 18.61 | 1.13  | 0.23  | 0.21  | 0.43  | 0.28  | 0.19  |

D50 Illuminant, 2 degree observer

Density 0.04 0.09 0.15 0.22 0.36 0.51 0.75 0.98 1.24 1.67 2.04 2.42

Density

Colors by Munsell Color Services Lab


Golden Thread

Don Williams









L2PR







4125087  
05/01  
FII

LA  
PYROTECHNIE.

OU ART DV FEU, CONTENANT  
DIX LIVRES, AVSQUELS EST AMPLEMENT

*traicté de toutes sortes & diuersité de minieres, fusions &  
separations des metaux: des formes & moules pour get-  
ter artilleries, cloches & toutes autres figures: des  
distillations, des mines, contremines, pots, bou-  
lets, fusées, lances, & autres feuz arti-  
ficiels, concernans l'art militaire,  
& autres choses depen-  
dantes du feu.*

Composée par le Seigneur Vanoccio Biringuccio  
Siennois. Et traduite d'Italien en François,  
par feu maistre Iaques Vincent.



A PARIS,

Chez Guillaume Iullian, pres le college de Cambray.  
à l'enseigne de l'Amitié.

1572.

AXB 129







A TRESHAVT ET TRESPVIS-  
fant Seigneur Iean de la Marche, cheualier de l'or-  
dre du Roy, Seigneur de Iametz, Capitaine de  
cinquante hommes d'armes, des ordon-  
nances dudit Seigneur, Claude  
Fremy son treshumble ser-  
uiteur salut.



*A Pirotechnie ( dite l'art du  
feu ) cheue en mes mains , &  
communiquée à mes amis , &  
gens tels , que par bons iugemens  
ils pouuoient congnoistre le suget  
d'elle: Ont tous cōclud que la na-  
tion Francoise meritoit bien l'a-  
uoir en sa langue traduite: pour  
le bien & utilité que ladite na-  
tion en pourroit auoir , tirer & recouurer: à cause des diuerses  
& plus belles œuures de feu & nouuelles inuētions y cōtenues.  
Et apres auoir esté stimulé & prié de mesdits amis pour les  
choses dessusdites, & aussi que de tous temps, ie porte bon vou-  
loir à ma nation , i ay mis la main à l'œuure, faisant traduire  
ceste Pirotechnie. Et outre, Monseigneur, oyant la renommee  
qui pullule en vostre vertu & bonté, aimant toutes vertus  
& arts, & les inquireurs d'icelles, par l'aduis de mes amis,*

Et mesmes par le recit de Iehan de Barade argonnois, gentil-  
 homme de bon iugement Et sçauoir, Et de meilleure reputa-  
 tion, nepueu de feu René de Guelphes Cheualier, Seigneur de  
 Vassincourt, sçauant Et expert en ces matieres Et art du feu,  
 i'ay pris la hardiesse de dier ceste Pyrotechnie à vostre Seigneu-  
 rie, ne sachât personne à qui elle meritaist mieux d'estre dediée  
 qu'à vous. Combien que le contenu en icelle vous soit si familier  
 Et congneu, qu'il n'y a homme viuant (comme l'experience  
 des actes belliqueux de vous, voz predecesseurs Et parens, en  
 la defense de ce royaume, dont auez acquis renom Et los im-  
 mortel l'a demonstrel) y sçeu assseoir iugement plus veritable que  
 vous, Recenez donc monseigneur vostre Pirotechnie, pour sous  
 voz aelles sauuegarde Et protection estre defendue des igno-  
 rans, qui souuent detraictent des arts, desquels ils ne peuent  
 auoir congnoissance. Que si ie scay la traduction d'icelle vous  
 plaire, me tirerez à vous faire present d'autres œures mieux  
 polis. Car l'ouurier en ouurant deuient maistre. L'endroit ou ie  
 supplieray vostre seigneurie auoir pour aussi agreable laditte  
 traduction, comme de bon cœur Et treshumblement ie la vous  
 presente.

T A B L E

La Maniere des graver sur fer  
 acier, sur cuivre, sur plomb  
 Un gros de subtilité. C'estif me  
 subtilité de Mercure

**TABLE D'VN CHACVN LIVRE DE**  
*la Pirotechnie, contenant les principales matieres*  
*dont en icelle est faite mention.*

L I V R E P R E M I E R.

|                                      |          |    |
|--------------------------------------|----------|----|
| Proëme. De toute miniere en general. | Feuiller | 1  |
| Chap. 1. De la miniere de l'or.      |          | 8  |
| 2 De la miniere de l'argent.         |          | 20 |
| 3 De la miniere du cuiure.           |          | 22 |
| 4 De la miniere du plomb.            |          | 26 |
| 5 De la miniere de l'estain,         |          | 28 |
| 6 De la miniere du fer.              |          | 30 |
| 7 De la pratique de faire l'acier.   |          | 33 |
| 8 De l'art de faire le leton.        |          | 34 |

L I V R E S E C O N D.

|  |            |    |
|--|------------|----|
| 1 De l'argent vif & de sa miniere.                     |            | 38 |
| 2 Du soufre & de sa miniere.                           |            | 42 |
| 3 De l'antimoine & de sa miniere.                      |            | 45 |
| 4 De la margasite ou se trouuent les metaux.           | 45. pag. 2 |    |
| 5 Du vitriol & de sa miniere.                          |            | 46 |
| 6 De l'alun de roche & de sa miniere.                  |            | 48 |
| 7 De l'arsenic, orpiment, & reagal.                    |            | 51 |
| 8 Du sel commun & autres.                              |            | 52 |
| 9 De la calamine, du safre, & margasite.               |            | 55 |
| 10 De la calamite.                                     |            | 56 |
| 11 De l'ocre, du bolarmenic, de l'emeril, & du borras. |            | 57 |
| 12 De l'azur & vertazur.                               |            | 58 |
| 13 Du cristal & autres pierres precieuses.             | 58. pag. 2 |    |
| 14 Du voirre & autres moyens mineraux.                 |            | 62 |

L I V R E T R O I S I E S M E.

|  |    |
|--|----|
| 1 La maniere de faire essay de toutes les minieres de metal, & mesmement de celles qui tiennent en soy or, ou argent.            | 66 |
| 2 Le moyen de preparer les metaux auant que de les fondre.   | 68 |
| 3 La forme des casses & fourneaux pour fondre les mines,   | 70 |
| 4 Comme lon doit proceder aux fusions des mines des metaux.  | 73 |
| 5 Moyen de separer le plomb du cuiure, & en tirer toute substance d'argent ou d'or, qui est contenue en iceluy.                  | 75 |
| 6 Le moyen d'affiner l'argët avec sa coupelle, & de faire les essays de l'argent & de l'or, qui sont reduits en masse de metaux. | 76 |

# T A B L E.

|    |  |    |
|----|--|----|
| 7  | La façon de faire cendrée pour afiner argent en quantité.        | 77 |
| 8  | La façon de conduire le côfrustagno en cuire fin & maniable.     | 81 |
| 9  | La maniere de fondre la ghetta, pour estre reduitte en plôb fin. | 82 |
| 10 | De la force & difference du charbon.                             | 83 |

## LIVRE QUATRIESME.

|   |  |    |
|---|--|----|
| 1 | La façon de faire l'eau forte commune pour departir                              | 86 |
| 2 | Moyen de faire essay d'une quantité d'argent tenant or.                          | 88 |
| 3 | Moyen & propre pratique de separer l'or de l'argent en quantité avec eau forte.  | 89 |
| 4 | Le moyen de retirer l'argent, & la bonne eau de la purgation de l'eau forte.     | 91 |
| 5 | Aduertissement qu'on doit auoir lors qu'on veut departir avec l'eau fort.        | 92 |
| 6 | Le moyen de separer l'or de l'argent par le moyen du soufre, ou d'antimoine.     | 93 |
| 7 | Le moyen de cimenter l'or & de le rendre à son dernier point de bonté & finesse. | 94 |

## LIVRE CINQUESME,

|   |  |            |
|---|--|------------|
| 1 | De l'aliage de l'or.                   | 96         |
| 2 | De l'aliage de l'argent avec le cuire. | 97         |
| 3 | De l'aliage du cuire.                  | 97         |
| 4 | De l'aliage du plomb & estain.         | 97. pag. 2 |

## LIVRE SIXIESME.

|    |  |             |
|----|--|-------------|
| 1  | De quelle qualité doit estre la terre à faire les moules & formes pour getter & mouler en bronze.                                  | 100         |
| 2  | L'ordre & moyen qu'on doit tenir en general à faire moules & formes pour y getter & mouler en bronze                               | 101         |
| 3  | De la difference des canons & de leurs mesures.  | 101. pag. 2 |
| 4  | L'ordre & moyen que particulierement il faut tenir pour faire le moule à la figure, qui se doit faire de bronze.                   | 103         |
| 5  | Les moyens pour faire les formes d'artilleries en particulier.   | 105         |
| 6  | Comme se doivent faire les ames aux formes de l'artillerie.  | 108         |
| 7  | Moyen pour faire la 3. partie des formes & moules de l'artillerie, appellées le raportemét & façons pour luter le cul de la piece. | 109         |
| 8  | Moyen de faire la roue pour donner soustenement aux noyaux au milieu des formes de l'artillerie, sur la partie du chef.            | 109         |
| 9  | Moyen de consolider les ames ou noyaux posées sur les pieds des formes de l'artillerie.  | 110         |
| 10 | Des gets & petits trous des formes en vniuersel.   | 110         |
| 11 | De recuire les formes pour getter bronze   | 111         |
| 12 | Aduertissement & respect qu'on doit auoir faisant l'artillerie.  | 115         |

# T A B L E.

- 13 Le moyé de faire les moules des cloches, mortiers, & autres vases  
semblables de toute grandeur & mesure. 114
- 14 Reigle pour congnoistre de quelle pesanteur doiuent estre les ba-  
tails selon la grandeur des cloches. 118
- 15 Le moyen d'attacher les grosses cloches, tellemét qu'on les pour-  
ra facilement mouuoir pour les faire sonner. 119
- 16 Ordre & moyen de soulder les cloches fendues. 120

## L I V R E S E P T I E S M E.

- 1 Comme on doit faire les fourneaux à reuerberer pour fôdre bron-  
ze & tout autre metal. 121
- 2 La façon de fondre à creseul & autres diuers moyens à cōuertir &  
reduire en liqueur metaux avec charbons & soufflets. 123
- 3 Le moyen de fondre en casse. 124
- 4 La façon de fondre en creseul. 124
- 5 La maniere de fondre avec fourneau à vent. 125
- 6 Des fusions de bronze & autres metal en general. 125
- 7 De la bronze & metaux cōposez & alies en vniuersel. 127. pag. 2
- 8 Le moyen de faire diuers engins pour accommoder les soufflets  
pour fondre metaux. 127
- 9 De la disinition de l'artillerie & ordre des chariots. 129
- 10 Moyen pour faire par l'aide des fusions les boulets de l'artillerie,  
tant grosse que petite. 131

## L I V R E H V I T I E S M E.

- 1 Diuers moyens de faire poudre pour getter dans la bronze gar-  
dant l'art de getter. 132
- 2 La façon de preparer le sel pour dōner l'alaison aux poudres, afin  
de receuoir mieux l'impresion du moule. 133
- 3 Le moyé & ordre de faire les casses, ou instrumés de bois pour mou-  
ler petites figures, ou lō doit mettre la poudre pour les y getter. 133
- 4 La façon de faire pour mouler tous metaux en terre humide: & la  
maniere de l'accoustrer en forme deuë. 134
- 5 Le moyen de mouler diuerses sortes de relief. 134
- 6 D'aucunes matieres qui ont proprieté de faire fondre & courir  
les metaux. 135

## L I V R E N E V F I E S M E.

- 1 De l'art d'alchumie en general. 136
- 2 De l'art distillatoire en general avec les moyens d'extraire eaus,  
huilles, & faire sublimations. 137
- 3 Discours & aduertissemés pour ceux qui vueillent ouurer, & met-  
tre la main à leur auantage, sur yne zecche ou monnoye. 144
- 4 De l'art des orfeures. 146



# TABLE.

|    |   |             |
|----|---|-------------|
| 5  | De l'art de ceux qui besongnent de cuiure.  | 147         |
| 6  | De l'art de ceux qui besongnent de fer.   | 147         |
| 7  | De l'art de ceux qui besongnent d'estain.   | 149         |
| 8  | La pratiq de recuire l'or, l'argêt, le fer, le cuiure & letô en fil.  | 149         |
| 9  | Le moyen d'approprier l'or pour filer.  | 151         |
| 10 | Comme on vient à dedorer l'argent & tout autre metal.   | 151         |
| 11 | Moyé de tirer toutes substâces d'argêt ou or des loupes, mōceaux de mines, rongneure de mōnoye, de bateurs d'or ou d'orfeures, & d'autres substâces metaliques que peuuēt cōtenir les minieres. | 152         |
| 12 | La pratique pour faire les miroirs de metal.  | 152. pag. 2 |
| 13 | Comme on fait les creseuls & petites couches pour fondre les metaux.  | 153         |
| 14 | Discours sur l'art qu'on doit suyure pour faire les pots avec aucuns de ses secrets.  | 153. pag. 2 |
| 15 | La pratique de faire chaux & brique, & pour quelle raison la chacune d'elle fut trouuée.  | 154         |

## LIVRE DIXIESME.

|    |  |            |
|----|--|------------|
| 1  | De la nature du salpetre, & comme il vous faut y proceder.   | 156        |
| 2  | De la poudre qu'on met en œuvre pour faire tirer l'artillerie.   | 158        |
| 3  | Des moyens qu'il fault vser voulant charger l'artillerie, & faire qu'elle vienne à tirer iustement.  | 160        |
| 4  | Des mines & cōtremines par l'aide desquelles avec le feu on vient à ruiner les forteresses imprenables, & desquelles on ne peut approcher l'artillerie.                    | 161        |
| 5  | En quelle façon se doiuent faire les trôpes à feu pour defêdre ou offenser les forteresses & ponts: pour brusler munitions & faire festes pour se resiouyr aux assemblées. | 162        |
| 6  | Moyens de faire boulets de metal pour tirer au milieu d'vne bataille, qui se mettent en plusieurs pieces.  | 163        |
| 7  | Moyens de faire lâgues à feu pour getter ou il vous plaira, attachées à la pointe des lances.  | 164        |
| 8  | En quelle façon s'ordonnent les pots & boulets à feu pour tirer à la main.   | 164 pag. 2 |
| 9  | La façon de faire plusieurs compositions de feux appelez par le vulgaire feux artificiels.   | 165        |
| 10 | Moyé d'approprier le feu artificiel aux festes & triumphes.  | 166        |
| 11 | Du feu qui consume & ne rend point de cendres, beaucoup plus puissant que tout autre, & duquel on dit estre forgeron le grād fils de Venus.                                | 167        |



I  
LE PREMIER LIVRE DE LA  
PIROTECHNIE, OV DE L'ART DV  
Feu, du Seigneur Vannoccio, gentilhomme Senois, dedans  
lequel est traicté generally de toutes les sortes de mi-  
nieres, fonderies & autres choses, à messire Bernardin de  
Moncelesi de Salo.

PROLOGVE.



O v s ayant promis d'escrire la nature des  
minieres & mines en particulier, ie suis cō-  
trainct de vous en dire en general quelque  
chose, & principalemēt des lieux & instru-  
mens seruans en cest affaire, pour sçauoir  
de quelle sorte ilz sont. Parquoy il faut en-  
tendre que les minieres se treuuent en plu-  
sieurs & diuerses parties du monde, selon que ceulx qui cher-  
chent, sont industrieulx: que les minieres se demōstrent quasi  
par mesme mode, comme les vaines avec le sang sont dedans  
le corps des animaulx: ou comme les rameaulx d'arbres diuer-  
sement esendus. Et pourtant les diligens chercheurs des mi-  
nieres, voulans monstrier en quelle sorte les minieres sont de-  
dans les mōtagnes, ont figuré vn arbre grand, tout plein de ra-  
meaulx, planté dedans le profons d'une montagne, & que de  
son principal tronc diuers rameaulx son diuisez, l'un gros, l'au-  
tre menu, proprement comme se presentent les vrais arbres  
dedans les anciennes forestz, & veullent que tel arbre croisse  
& deuienne gros, & se tire en hault deuers le Ciel, en conuer-  
tissant continuellement les matieres plus disposées & prochai-  
nes en sa nature, iusques à ce que les sommetz ou coupeaulx  
penetrent au dessus de la montaigne, & se mōstrent avec clai-  
re apparence, gettant dehors au lieu de fleurs & de fueilles fu-

mines de ferland  
hors des mon-  
tagnes de mine  
d'azul

mées d'azur, ou de verde couleur, ou margasite, avec de petitiz filétz de mine pesante, ou quelque autre composition de taincture, ou de couleur, par lesquelles choses on peut faire certaine coniecture, qu'une môtaigne quād elle monstre telles choses, est minerale: & selon les demonstrations qu'elle fait, selon le plus ou le moins, ainsi est plus abondante & riche, ou priuée de matiere minerale. Parce donc les diligents chercheurs de telles choses selon les signes qu'ils trouuent, prennent courage & avec l'esperance & seureté du gain se mettent à fouir & cauer les choses par tels signes à eux monstres. Car quelque fois sont minieres de telle sorte & qualité, que iusques au ciel exaltent, & par telz moyens avec les yeux de la consideration, & avec bon iugement penetrent dedās les môtagnes, & voyent les quātitez & lieux quasi proprement là ou telles veines sont, vers lesquels lieus dressent leur cauerne: car autrement ils chemineroient à l'aduenture: par ce que là ou il y a miniere pour certain, les hommes autrement ne le sçauoiēt trouuer, combien qu'ilz fussent de tresbon iugement, & qu'avec grande diligence cherchassent: & pour autant est de necessité aller en se certifiant peu à peu avec les signes, cherchant de tousiours en trouuer le plus qu'on pourra, ayant les yeux & les oreilles attētiues en tout lieu ou il a eu, ou peut auoir quelque indice, & principalement à pasteurs, ou à gens qui d'ancienneté habitent les pays. Et vous di cecy, parce que ie me persuade que ce n'est pas assez que le bon iugement, par la premiere veüe de la môtaigne, laquelle ou par grande sterilité, ou par asperité, ou par eauës qui y naissent, peult donner signe certain qu'il y aye en luy miniere telle qu'ilz se mettent, avec despēce grande & trauail corporel, à cauer. Et dauantaige pour tant que ie ne croy pas qu'un homme soit suffisant, combien qu'il soit diligēt & fort, d'aller chercher les môtagnes d'une ou de plusieurs prouinces, par le menu en un pays incongneu, là ou il y pourroit auoir miniere: car à grand peine la pourroit voir un: combien qu'il y a ia quelques vns qui certes pour trouuer tels secrets, vsent de la magie, ou art diuinatoire, laquelle par ce que  
ie l'ay



ie l'ay pour chose fabuleuse & faulse, & par ce que ie ne sçay quelle elle est, ne la veulx ne louer ne blasmer: par ce que si ce qu'ils en dient estre vray, qui font, estoit vray, seroit vne bõne besoigne, mais ie vouldroye que telz diuineurs ou negromantiens, me dissent les minieres, & pour quoy c'est qu'ilz n'usent de leur art, depuis qu'ilz ont commencé à se mettre en œuvre avec elle: Pourquoy ilz n'en executent les commencemens, les moyens, & la fin, lauand la miniere, & la reduisant à ses fusions & à purité de ses separations. Car pour certain filz auoyent puissance de faire l'un, ilz auoyent pouuoir de faire le autre. Mais par ce que telz moyens sont paradianture, tant espouuentables & horribles, qu'ilz ne se doibuent faire, & paradianture tous homms n'en vouldroient pas vsfer, & aussi parce que telle chose est peu congneue, ie ne voy point qu'on en vse. Mais d'auantage raisonnement se doit croire, qu'en tel acte d'vsfer de telles choses, on laisse ce qui a de coustume au commencement de toutes choses, & principalement en chercher & cauer minieres, d'estre requis, qui est Dieu & sa grace, à celle fin qu'il soit en ayde, de leurs douteuse & laborieuse œuvre: là ou en lieu du diuin ayde, ilz viendroient à inuoyer celuy du diable d'enfer, & quant à mon aduis, laissant telz moyens d'hōmes bestiaux & intrepides, ie conseille que pour les vouloir trouuer nous prenōs la pratique des signes, que la nature nous à baillé par sa bonté, & qui sont fondez sur verité, & celle qui de tous les practitiens en tel arrest approuuée par experience, laquelle comme l'on veoit, ne consiste point en parolles ou en promesses de choses incomprehensibles & vaines, avec laquelle vous irez en cherchant les riuages des vallées, les ouuertes & materielles dispositions des pierres, les dos ou hautes extremités des montaignes, semblablement les fons & cours des riuages, regardant en leurs arenes, ou dedans les ruines ou ouuertes des fosses, ausquelles souuēt se voit de la margasite, ou piece de miniere, ou autre diuerse couleur metalique, par lesquelles choses on peut auoir facilement indice que là enuiron y a quelque miniere, & on trouue droitement là ou elles,

*margasite se  
trouue en miniere  
ou se trouue  
on l'on l'appelle  
margasite*

font, regardât par le menu de là ou sont séparées & destachées telles margasites ou pierres, & matieres marquées, & depuis cela vn signe general, qu'il y a quelques minieres en toutes montaignes & lieux, là ou vous verrez souldre & sortir grande abondance d'eauës cruës, & qui ont en soy (combien qu'elles soient claires) quelque saueur minerale, & qui par chacune faison muent leur qualité, en se faisant l'hyuer tiedes, & l'esté froides. Et d'autant plus deurez croire quand vous verrez l'aspect de telz monts rudes, sauuaiges, & sans terre, ou arbres dessus, & s'il y a quelque petit de terre, ou il y ait quelque fillet d'herbe toute palle, & sans la couleur de sa verdure, se voit estre (combien que dedans les montaignes qui ont quelques terres & arbres fructiers) aucunes minieres se trouuēt neantmoins elles sont plus communement en celles que deia vous ay dit, & des autres on peut auoir peu de signes, sauf qu'en chercheant par le menu, les riues de leurs costez, desquels sur tous signes le plus vray & de la plus grand' certaineté qui se puisse dōner est, quand sur la face de la terre, ou haut ou bas, la miniere appertement se monstre. Il y en a quelques vns qui pour vn signe bon approuuent certains signes d'eauës, les demeurans desquelles arrestez & quelques tēps demeurans en repos, & souuent des rayons du soleil rechaufez, demonstrent en quelque partie de leur reste diuerſes couleurs de substāces minerales. Quelques autres sont qui ont de coustume de prendre en ceste eau là en vn vaisseau de terre, ou de voirre, ou d'autre matiere, & la font par euaporation du tout euacuer en la desechant, & telles choses terrestres grosses, qui demeurent pour lie au fond, avec le gouſt, ou avec l'essay ordinaire du feu, ou en quelque autre sorte à leur plaisir, font l'essay par le moyen d'un essay, combien qu'ils n'ayent pas le vray du tout, s'approchent à certaine congnoissance de ce que c'est, & ainsi avec ces moyens & avec le plus qu'il est possible, premier que de commencer à cauer, & de se mettre en despence, afin qu'elle ne fust perdue, vous fault certifier que la miniere soit suffisante, bonne & abondante, & ce fait ce doit avec la plus grand' diligence du monde considerer cher-

la qualite des  
eaus et des  
montaignes

herbe palle

minier  
recherche  
la face de la  
terre sans  
ou bas

rer, cherchant les lieux prochains aux racines des montaignes voisines, ou aux extremitez d'une mesme montaigne: & ainsi en tout lieu là ou la pierre se trouue de sa nature descouuerte, ou par le cours de l'eau: faisant ceste proposition qu'il est quasi du tout impossible que telles mōtaignes ayēt quelque miniere, & qu'il n'en monstre dehors quelque apparēce par leur exhalation, combien que s'ilz ne le faisoient, bien pourroit estre à cause de la bonté de la miniere par nō estre de nature euaporable, ou par peu de quantité, ou que le mont fust grand, & la miniere fort au profond, estant dedans, que sa fumosité n'eust encores peu paruenir iusques au dehors, ou qu'il y eust entre la miniere & la superficie quelque pierre dure, comme seroit pierre blanchastre, ou marbre noir, ou blanc, de nature dur & resistāt, qui gardast que iusques à la sommité ne peust sortir, & par cela y pourroit auoir des arbres, & des herbes parce que la terre lors retiēt sa vertu, & peult pour n'estre point brulée ou encēdrée par les chaudes & veneneuses vapeurs, nourrir leurs racines. Et pourautant l'eau ne la peut emporter, comme aux lieux ou elle la treuve brulée, & de telles mōtaignes i'ay beaucoup veu, là ou il y a des chastaigniers dessus, & terres labourées & grandes forets de hestres & arables, tellement que par l'asperité de la montaigne, cela n'oste pas que les autres lieux ne puīssēt auoir minieres, & que l'on n'y doīue chercher. Mais pourautant que les signes sont selon les natures des minieres, & que par cela ie vous diray d'iceux plus à plain au lieu de leur propre miniere, icy i'en ay voulu dire en general seulement, pour vous en donner quelque premier signe ou cōnoissance. Et semblablement pour vous rendre plus attentifz, ie vous dis que toutes les minieres, lesquelles par tel signe vo<sup>r</sup> trouuerez, ou qnī par quelconque occasion vous seront cogneuēs, soient en pierre, en terre ou arene, outre le premier aspect, qu'il vous monstrent espeece de metal, vous deuez considerer le poix, lequel tant plus est grief, & plus de perfection monstre & meil leur mistion de substance, & plus grande quantité de mine, & presuppasant que par les signes ou autrement vous ayez trou-

ué les montaignes, & par la congnoissance ayez la miniere,  
 mais vous ne sçavez au vray l'espece qu'elle tient particuliere-  
 ment: de laquelle pour congnoistre quel metal aye en soy telle  
 miniere ou quelle quantité ou purité y en aye, ou quel malice  
 & deffault, il fault premieremēt que vous despendez quelque  
 chose pour la congnoistre au vray, faisant l'essay vne ou plu-  
 sieurs fois, comme ie vous enseigneray au tiers liure. Et ainsi  
 estant certain que c'est miniere, & quel metal c'est, & quelle  
 qnantité y entre, & trouuant par voz raisons & comptes qu'el-  
 le vous sauue la despenſe, ie vous admonneſte de vouloir cou-  
 rageuſement donner commencement avec toute la diligence  
 poſſible, & vous mettre à cauer ou tirer: vous promettāt que  
 de quelque ſorte de mineral, ſoit à la meſme proportion que  
 fuſt ce dōc vous feiſtes l'essay, en la ſuperficie, vous trouueriez  
 avec beaucoup d'auantage beaucoup meilleur ce qui ſera de-  
 dans le mont: ainſi attirez par la certaineré que vous a rendu  
 l'essay, & par la quantité de la choſe qui par les ſignes ſ'y mon-  
 ſtre, & par quelconque autre lieu, vous vous deuez diſpoſer a-  
 uec toute la diligence qu'il eſt poſſible à la faire, afin que toſt  
 en puiſſiez auoir le fruit, & que ſi en ce lieu là ne ſe trouue vo-  
 ſtre bonne fortune, vous la puiſſiez trouuer en vn autre. Mais  
 pour cecy faire il fault premierement eſlire la place, là ou vous  
 ferez voſtre caue, en prenant garde que ce ſoit le plus qu'il ſera  
 poſſible à l'auantage & commodité des gens que vous y met-  
 trez à beſongner, & ſur tout qu'ils viennent à bien arriuer de-  
 dans la montaigne, pour y pouuoir entrer, avec auantaige &  
 briefueté de temps & de pris, au deſſoubz du ſigne que vous  
 auez pris, traueſant avec le iugemēt, & avec l'œuure par droi-  
 te ligne, iuſques à tant que la groſſe maſſe de la miniere ſe tou-  
 che, coupant avec le cours de voſtre eaue toute compoſition  
 de pierre forte, qui ſe puiſſe rencontrer, tenant neantmoins,  
 avec le quadrant touſiours les ſignes, cōme par dehors ſi mon-  
 ſtrent, pour arriuer au lieu deſdictz ſignes, & oultre à tel lieu là  
 ou vous auez deliberé faire l'entrée & commencement de la  
 caue, deuez faire election d'un autre lieu, ou vis à vis au deſſus,  
 ou à



ou à costé, ou il y aye, ou vne, ou deux, ou plusieurs maisonnettes, ou burons pour accommoder voz ouuriers, l'une pour le dormir, l'autre affin que vostre facteur y demeure pour pouoir à toute heure solliciter les ouuriers au labeur: & pour leur distribuer viures, & les serrer, & pouruoir à leur necessité, l'autre pour faire vne fabre ou forge à fer, pour racoustrer leurs instrumens gastez, & en faire de neufz, pour pouuoir tousiours donner à qui n'en a point, ainsi comme en labourât ou besongnant continuellement se gastent & se rompent, & ayant cecy fait avec bonne prouision de viures, & trouué le nombre des ouuriers vsitez, & de qui vous voulez seruir, & ayant preparez tous les instrumens necessaires à rōpre & cauer pierre, & pour la porter dehors. Au nom de Dieu, & de la bōne auenture, faites benistre par le prestre la montaigne, & tout vostre astellier, & baptizer ou repurger la caue, disant la messe comme il est acoustumé, ou de la sainte Trinité, ou de nostre dame, ou au nom de quelque saint, auquel vous ayez deuotion, inuocant sa protection, & ainsi courageusement donnerez commencement à cauer avec pensément de suiuir telle caue, & de non iamais labandonner, tant que vostre possibilité pourra porter les fraiz, ou iusques à ce que vous ayez passé les termes dessus norez & dictz.

AV NON DE  
DIEV AMEN  
IESVS MARIA



Et faut aduertir tousiours de commencer le principe de vo-

estre caue, le plus bas que vous pourrez, au pied dela racine du mont, en telle sorte & ordre que la caue cheminant par droite ligne, voise à trauers le filon de la miniere, par la plus seure & briefue voye qui soit, laquelle caue, combien que souuent est bien cōmencée, est souuent par les carriers mal suyue, ou par non sçauoir l'art de la maintenir, à ce que faut auoir grande auertance, parce que allechés de l'esperance de petits rameaux de miniere qui souuēt en chemin se treuuēt, laissent la droite ligne: & parce cōbiē que tels rameaux se peuuēt & doiuent suyuir: neantmoins iamais l'ordre du chemin proposé ne se doit laisser, mais tousiours aller auant & oultrē aux autres ordōnances, aies ceste cy, qu'autāt qu'il est possible, euites à tailler pierre lasche & mollesse, par ce qu'ils font d'agereux de ruiner, & iamais, ou peu souuent se trouuent en eulx minieres, mais les rencontrant & voyant, ne les deuoir fouir, ie vous cōseille ou telle peur se montreroit, que pour vostre seureté de ne perdre la depēse de la caue, & pour la vie de vos ouuriers, vueilles vser de toute diligence à bien armer ou estançonner, vouter ladite caue, avec ars de muraille, & avec trehz ou gros bois trauerfans, ou avec gros & forts estançons, cōme de chesne ou autre arbre fort, & telle est la mode, avec laquelle il faut proceder pour cauer les minieres, pour pouuoir auoir fruit de vostre labeur & entreprise. Et pour autāt cōme il se voit par les vielles caues abandonnées, les anciens vserēt d'une autre mode en lieu de commēcer à bas à la racine de la montaigne, cōme font les modernes, eulx commençoient la caue en la partie superieure du mont, la miniere avec le temps leur apparoiſſoit, & cauant droict à bas à maniere de puiz la suyuir au profond & maintenant ça, & maintenant là, selon qu'elle alloit se demonſtrant, la suyuoient, de laquelle chose m'a semblé estre à propos faire mention: pource qu'à beaucoup de gens telle mode sēble estre meilleure, & plus seure à trouuer, que de la tirer par les costez: pource qu'on a tousiours deuant soy icelle miniere, ou peu ou assez comme vn fil pour trace à le pouuoir suyuir, & aller avec seureté à trouuer la grosse masse comme si on la voyoit. Mais  
qui cōn-

si on la suie  
il faut se  
garder de

mode pour  
la suie

mode au  
que on le  
que on le  
suyue

qui considerera bien telle chose, congnoistra que les modernes ont mieulx entendu l'vtilité de telle chose ayant esgard, comme on voit à beaucoup plus de commodité & seureté que rend ce moyen icy, plus que l'autre : comme sont les difficultez de descendre & monter dans la caue & par le peril de s'estouper, à cause des plus faciles ruines, outre la plus grand fascherie de tirer hors la mine & les aultres fragmens de pierres rompues en cauant. Et sur toute aultre difficulté est difficile bien tirer & vuyder l'eau, laquelle bien souuent si fort abonde qu'elle multiplie au maistre de l'œuvre despence & travail à cause du grand nombre des aydes qui luy sont necessaires, & d'auantaige pour faire roües, pompes canals, detournemens, & autres semblables instrumens pour tirer dehors les eaux, & avec tout cecy bien souuent ne peult pas tant faire que les eaux ne les gaignent : & par fine force sont contraincts d'abandonner leurs honnora-  
*plus grande*  
*pour ça*  
bles & vtils entreprinſes, tellement que pour conclusion (comme bien pouuez veoir) il est assez meilleur & plus seur de commencer à cauer d'abas du pied de la montaigne, & venir peu à peu, qu'il n'est pas du sommet, ou de la plus haulte eschine, pour rendre facile la vuidange des eaux se portent ainsi les ou-  
*plus grande*  
*pour ça*  
riers, que par chacune espace de dix roises, voient en hausant petit à petit iusques à demy bras, obseruant neantmoins tousiours le but des signes qui dehors apparoissent, en vsant avec le timon ou guide du quadran vsité aux mariniers, pour veoir tenir tousiours la caue en droit chemin, & en cecy mettre en euvre l'esprit & l'art, pour estre conduit au lieu de la grosse masse, & là ou est la cause, qui vous à monstré les fumosites & signes mineraux, iusques à la superficie. A ce propos ne veulx pas fail-  
*plus grande*  
*pour ça*  
lir de vous dire comme dedans la duché d'Autriche entre Inspruc & Hala, i'ay veu (il y à long temps) vne grand vallée enui-  
*plus grande*  
*pour ça*  
ronnée de grand nombre de montaignes, par laquelle il passe vn fleuve avec abondance d'eau, & en ces môtaignes qui sont alentour, quasi en toutes, se tire quelque miniere, desquelles la plus part sont d'arain, ou de plomb, combien que quasi en toutes se trouue quelque partie d'argent, & entre les autres dictes

montaignes, i'en veis vne dedās laquelle certains paisans du lieu, incitez par la veue de beaucoup de signes, commencerent par la maniere susdictē à cauer vne, & cauants cheminerent, à mon iugement, peu moins de deux mille pas, premier qu'ilz veissent aucune scintille ou vmbre de miniere. Et estant quasi arriuez, auecques la caue perpendiculaire, souz les signes, rencontrerent vne veine de pierre blāche, qu'aucuns aux ardoisieres, nomment le moyne, trēsdure, forte, & espoisse de plus d'une toise & demie, laquelle veine auecques fers plus durement asserez, que n'estoit dure la pierre, la rompirent auec grand labeur, & feirent tant que ilz la passerent, laquelle passēe se rencontrerent en vn filou ou veine de mine d'arain, trēsgrosse & de telle sorte, que quand i'y fu regardant entre l'une & l'autre, i'y vis estre deux murailles dudit albazzan ou pierre blanche, entre lesquelles en vn trēsgrand lieu vuyde, estoient plus de deux cens hommes tous ensemble à traualier, en hault, & en bas: n'ayant autre lumiere que de lampes, faisant en tous les lieux ou leur apparoissoit mine, diuerses trenchées & ouuertures, & ainsi continuellement iour & nuict y traualloient à continuel changement. Chose qui estoit vrayement merueilleuse & grande, comme il me sembla: mais d'auantaige voir chose que ie regarday à la gueule ou entrēe de la caue, là ou il y en auoit vne grande quantité, tant esleuē comme à eslire, & entre les autres pieces y en auoit vne toute ensemble & solide, qui estoit de pure miniere si trēsgrosse & d'un si gros pois, qu'une couple de fors cheuaulx ne l'eussent sceu remuer de la place auec vne charrette, tant s'en fault qu'ilz l'eussent menēe ou trainēe. Ceste mine (comme i'ay dit) estoit d'arain, mais pour la magnifier, ilz la nommoient d'argent, pource qu'en soy tant en contenoit, que toute la despenſe deffroyoit, & pour auantaige auoit l'arain qui estoit auec l'argent, en telle sorte (comme ie sceu comprendre) on en tiroit vne grande vtilité. D'auātaige ie vous veulx enseigner, comme il y auoit dedans le milieu de la caue vn canal, qui receilloit toutes les eaues qui cheoient par diuerses fractures en icelle, & continuellement couroit en si grande quantité, qu'il auroit facilement suffy à faire mouldre quelque grād moulin que



que f'eust esté, en telle sorte qu'en allant, & en retournant de ladicte caue, tant par en hault comme par en bas, autant fus mouillé, comme si ie fusse passé soubz vne grosse pluye. De ce que ie ne m'esmerueillay, pour autant que i'auois tousiours entendu que la premiere compagnie des metaulx, ou minieres, est l'eau, & que d'auantage, parauanture qu'elle est premiere occasion de leur substance, dont ilz procedent. de ce que, comme desia vous ay dict, ceulx qui s'y entendent, prennent argument & donnent cōme vne reigle vniuerselle, que tous les montz ou montaignes, dont sourdent les eaux, sont abondantes en minieres, en ce que pensant vins à considerer la grandeur d'un tel effect, & en moy-mesme commençay à dire, si à ceulx icy qui sont maistres de ceste caue eust despleu la despence, ou à cause de la longueur du chemin, ou par la peur de ne trouuer rien, ou par vne pusilanimité eussent le tout abandonné, & de telle chose desesperez, ou que ilz se feussent arrestez, sinon plus tost à ceste grosse masse de pierre dure, vainement eussent ietté au vent toute leur despēse, avec tous leurs labeurs & traux, tant de corps comme d'esprit, & ne seroient pas deuenuz trefriches & abondans de toutes commoditez, comme ilz estoient deuenuz: & n'eussent pas donné ayde à leurs Seigneurs, à leurs parens, à leurs amys, au païs, dont ilz sont nez: ne à pauures ne à riches qui feussent là ou ailleurs, n'eussent peu faire plaisir, ainsi comme (moyennant la force de leur bon courage & de leur sçauoir & volonté) auoient faict. Et pour autant ie prins conclusion en moy-mesme, que quiconque entreprend telles choses, les doit avec grand cueur poursuyuir, allans pour le moins iusques là ou il peult coniecturer par les signes veuz, que la chose soit avec cōtinuelle esperance, allant en auant, que le iour ensuyuant (comme facilement peult aduenir) sera celuy qui luy descouurira ce que c'est, & sera celuy qui le rendra riche & content: ce que (comme vous pouuez veoir) est chose qui peult aduenir, parce que les matrices & fons de toutes les plus estimées richesses du monde, sont les montaignes, ausquelles si (avec l'aide de la bonne fortune & de vostre esprit) vous sçaurez ouurir la voye, nō seulemēt ny a doubte aucune d'arriuer

au ventre ou telles choses sont cachées. Mais d'auantaige aussi riches ou plus qu'eulx, soit d'honneur ou d'autorité, ou de quelque autre commodité qu'aportent les richesses, seriez pour certain adornez, considéré que la benignité de la nature libéralissime, à qui les cherche largement, donne & baille. & parce tous hommes qui desirer richesses se deuroient plustost adonner de toute leur intention à tirer dedans les minières que à la guerre plaine de tous tourmens, ou à la marchandise allant, à courir le monde, ou à autres choses fascheuses, & parauanture peu licites à gens de bien, ou à aller en longs & fascheux voyages, & entre gens estranges & incongneues, & souuent d'une bestialle nature, ou vraiment entendre à la fabuleuse pierre philosophale alchimique, comme beaucoup font, avec l'esperance d'arrester ou congeler leur seruiteur fugitif, ou faire lune fixe, ou particuliers sophistiques & autres legieres choses & vaines, & sans fondement. Et combien que ie croy que ce soit grace especialle de Dieu, trouuer miniere, si fault il chercher ou aller au lieu là ou la nature l'a produitte, & en cherchant la trouuer, & l'auoir trouuée avec le fruit, cauer & receuoir la grace, ou present, aydant la disposition de sa fortune, & l'inclination avec la volonté, & avec le bon iugement naturel. Et n'est pas assez, par ce que oultre est de necessité, pour pouuoir commencer & suyuir, d'estre pecunieulx, affin que si on ne peult faire tout ce qu'on veult avec l'œuvre propre de foy-mesme, on puisse avec l'œuvre d'autrui & mercenaire, s'ayder. Mais pour le present laissons le parler de telles choses, & presupposans que vous ayez faict la caue, & que vous ayez trouué non seulement la miniere; mais d'auantaige que vous en ayez tiré dehors grande quantité, il vous est de besoing apres cecy, & est vn des premiers pensemens, & qui deuant tous est requis, que premierement que vous commencez à cauer, considerez & bien examinez les commoditez des choses occurantes, & la necessité qui est requise, comme sont les boys de toutes sortes les eaues & les viures. Car de chacune desdites choses fault qu'il aye abondance, & premierement de boys, duquel fault auoir grande quantité, propre pour telz affaires, premier pour le charbon à fondre, à pa-

rer, ou

rer, ou rostir, à affiner, & autres vsages de brusler, sans celuy qui est necessaire pour armer & soustenir les caues, & pour edifier caissettes ou cabanes, & autres choses: par apres on doit penser là ou lon fera les edifices pour les bien situer, qu'ilz soient en bon air abondans d'eues qui ayent bon cours, & pour la commodité du charbon, non seulement qu'il soit pres mais accommodé aux minieres, mais sur tous les inconueniens, celuy des eues se doit euer, pour autant qu'à telle œuvre c'est chose tresimportante: par ce qu'avec la force des eues, on accommode roües & autres instrumens ingenieux pour pouuoir facilement haulser grands & puissans soufflets, pour renforcer & faire grands feux pour faire battre tresgros marteaux, pour tourner meules & choses semblables, desquelles le secours (comme lon veoit) est en lieu de hommes: parce qu'autrement voulant à telz effects paruenir, seroit chose impossible, par ce que plus fait de labeur, & est plus forte la leuée d'une roüe, que ne seroit la force de cent hommes: & parce il fault auoir à tel effect vne grande consideration, non seulement pour faire telles choses dedans l'edifice, mais de les faire fortes & puissantes, autant qu'il est besoing, & aussi commode à y conduire la mine & le charbon: afin qu'en chacun de ses instrumens ou artifice, on espargne temps, labeur & despens, pour autant que ce sont choses desquelles vne chacune relieue de grand peine, & d'autant plus comme plus sont ensemble. Mais pour autant que tout, à tout sou-hait, ne se peult pas auoir à la commodité, & doit on bien penser lequel des deux pourra plus porter d'utilité, ou auoir aupres des edifices, le charbon, ou la miniere, & à ce autant qu'il est possible se fault approcher de celle qui est la plus commode, si les caues le permettent. Et si il estoit possible, il seroit bon que les edifices, le charbon, & la mine feussent ensemble tout en vn pourpris. Mais il se fault accommoder à ce que l'occasion donne, maintenant faisant conclusion de ce que ie vous ay dict de trouuer les minieres, de les tirer & de toutes les autres considerations. Je vous veulx d'auantage dire, & vous prie que vous les mettez en effet dedans vne miniere, qui soit vostre, par ce que vous trouuerez moyé avec elle, de vous soufleuer

aux plus haultes richesses qu'il est possible, & que vous pourrez par voz merites desirer. Et par ce ie vous admoneste qu'ayant trouué la montaigne vous alliez courageusement, ayant commencé à cauer la miniere, vsant de bon iugement & constance, par ce qu'à telle entreprinse ilz vous seruiron d'œilz, pour penetrer là ou l'œil n'en peult atteindre:& ne croyez pas ce que beaucoup dient & croient, que par cas fortuit en cauant telles choses se trouuēt. Car cōbien qu'il peust aduenir, l'homme se doit plus arrester à l'art & à la bonne pratique, qu'à la fortune: & entrant dedās la mōtaine à cauer, prenez biē garde que vous cōduisiez le cours de vostre caue à trauers le filon ou veine de la mine. Car il pourroit estre que long temps suyuant le chemin de son cours, le poursuiuissiez à la grosseur d'un doigt, ou moins, & ainsi facilement le pourriez perdre sans iamais plus le retrouver: le mesme vous pourroit aduenir, si vous commencez vne caue, & par pusilanimité l'abandonnez, vous plaignant de la despenſe: comme il est aduenu à beaucoup d'autres, qui par non auoir trouué du premier coup (comme ilz vouloient) desesperez de pouuoir trouuer la miniere, l'ont laissée non seulement comme chose inutile, mais dōmageable: se reputāt de faire beaucoup de gaing en n'y despendant pas d'auātaige:& ainsi cōme furieux, s'ostent de l'ētreprinse, & ne pensent pas qu'ilz peuuēt auoir laissé le fruiēt de leur entreprinse, à vn autre qui suiura leur entreprinse, duquel labeur le fruiēt parauātūre, ou à vn bras, ou à vn dour, ou à vn doigt, ou parauātūre en la premiere superficie se retrouuoit, & ainsi beaucoup de gens peuuēt abandonner leur felicité, cōme à beaucoup de gens est aduenu. Et par ce fault biē pēser premier que de cōmencer à cauer, qu'il fault avec toute cōstance, poursuyuir, dechassant de soy toute pusilanimité, & ne craindre difficulté de chemin, mettant tout son pouuoir à l'extremité avec la diligence qu'il sera possible, sans repentance, si vous voulez en lieu de dommage &, deshonneur, en receuoir prouffit & honneur: & ie vous dicts si iamais vous faictes cauer, qu'oultre les preceptes que ie vous ay donnez, que vous vsez de telle diligence à faire cauer continuellement iour & nuiēt, ordonnant entre voz caueurs, les changemens de six en six heures



heures, ou de huit en huit, selon le nombre de voz gens, remettant continuellement hommes nouveaux à labourer, à celle fin que plustost pouuez arriuer au terme proposé: car en cecy y a grand auantaige & heureux contentement, à qui veult posseder les choses qu'il desire: parce vous admonneste y vouloir courir à bride aualée. Et pource qu'à telle entreprinse sont requis beaucoup d'vtenfiles, desquelz on ne peult (sinon en general parler) considerant que selon les necessitez des lieux & la sorte de la miniere, il fault diuersifier lesdictz instrumens & ferremens, car il fault qu'il y aye difference à tirer de dedans le marbre, ou de dedans la pierre tiburtine, ou de tiuoli, quastre, ou de dedas le moyne ou albazzan, & dedans semblable pierre dure, & tirer ce qui se treuve en pierre molle & tendre: car l'un veult les outtilz fortz & puissans: comme sont grosses massues & maillets de fer, grosses houes, grosses & longues barres de fer, pour releuer hoyaux & picz, poinçons, ou barres pointues avec manches, & sans manches, & semblables instrumens de fer, tout d'un tresfin acier, & bien temperé. quand est des autres minieres, ausquelles on se sert desdictz instrumens pour tirer des pierres tendres, il n'en fault point faire mention, parce que les communs outtilz suffisent à la necessité, & les occasions enseignent que c'est qu'il fault faire, combien que la plus part d'iceulx sont marteaux à vne main, longs d'une paulme, poinçons semblablement longs, houes honnestes, pelles, & choses semblables.



Mais de toutes les sortes en fault auoir grande abondance, tant pour les pierres dures, que pour les tendres, pource que cela faict que les gens ne perdent point le temps, & somme toute cela fait grand bien au maistre. Il fault d'auantaige auoir abondance de corbeilles, paniers, manequins, petitiz sacz de cuir cru & non tanné, des charrete ferrée, avec roües & sans roües, pour porter dehors la vuidance, semblablement fault auoir des liqueurs bonnes à bruller en lampe ou autrement, comme sont huilles d'olües, de noix, de semence de lin, de cheneuiz, ou de resine d'arbres, comme de pin, sapin, & autres, ou bien gresses tirées d'animaulx terrestres, ou de poissons : car on ne scauroit trauailler soubz terre sans lumiere de feu. Et tel ne se peult tenir vif si la caue n'a quelque souspiral d'air, ou par le moyen de quelque canal de boys, ou de quelque autre ouuerture.

*De la miniere de l'or & de ses qualitez en particulier.*

*Chapitre premier.*

**P**OUR autant que l'or est vne minerale composition, laquelle tant par les philosophes, comme par quelque personne de bon iugement, est esprouuée estre de tresgrande perfection entre les metaulx & mineralles matieres, pour laquelle cause, & aussi pour sa grande beaulté, tout le monde croit qu'en iceluy soyent vertuz excellentes pour ayder aux hommes. Et pour ceste raison entre toutes les choses qui sont en ce monde, sauf les choses viues, est le plus estimé. Au moyen dequoy ie veulx pour luy faire honneur, commencer premierement à parler de luy, que de nul des autres metaulx, & en particulier reciter sa conception & ses plus apparentes qualitez : combien qu'il soit metal trescongneu, & combien qu'il soit de toutes sortes de personnes desiré & requis. Ie ne congnois pas beaucoup de gens qui se soucient de scauoir de quelle substâce ou de quelle nature il est formé, mais à celle fin que vous ne soyez au nombre de ceulx qui seulement par nom le congnoissent, ou par la seule similitude apparente qu'il nous monstre, ie vous dy que sa matiere propre & originale, n'est autre que la substâce des elements proportionnée

l'vne

l'une avec l'autre, avec egalle quantité & qualité & tres-fort purifiée, & parce estant conioinctes telles parties ensembles, parce qu'elles sont de pareille force, il en n'aist en eulx vne tresparfaite mistion. Et depuis qu'ensemble ont fait leur leuain & decoction, finalement se rendent fixes & pardurables, & vnies par telle conioction, que telles parties sont quasi inseparables, en telle sorte que soit la vertu du Ciel, du temps, ou de l'ordre de sa tressage nature, ou de tous ensemble, telles matieres se conuertissent en ce corps metallique, qui est appelé or. Lequel, comme dit est, par sa tresparfaite complexion, tresparfaite & vnies mistion, se rend espois & solide, & de telle solidité, que non seulement elle luy donne la commune duration, mais d'auantaige quasi vne incorruptibilité, & cause qui ne peult retenir en soy nulle superfluité, combien qu'elle soit petite & subtile. Et de la vient que combien qu'il soit en terre ou en eau, iamais ne produit rouille en soy pour quelque lōg temps que ce soit. Car ne l'une, ne l'autre (c'est à dire ne rouille, ne long aage) ne peuuent en luy vser de leur corruptif pouuoir, non pas mesmement le feu qui a force de resouldre & mettre en cendre toute chose cree. Et non seulement avec sa vertu d'iceulx se defend, mais continuellement se purifie & deuiet beau. Et semblablement sa prediſte vnion parfaicte, faict que son corps est sans fleume, & sans aucune vnctuosité superflue: de là ou procede qui dure tousiours en son estre beau & cler, & en vne mesme couleur, & estant frotté ne laisse aucune couleur, ny noire, ny iaulne, aux choses dont il est frotté, cōme sont quasi tous les autres metaux. Et en soy n'a odeur ny saueur quelconque, qui au sentir n'y au goust se puisse appercevoir. Et d'auantaige, si on en mange par volonté ou par erreur, il n'est iamais venin à la vie, comme sont quelques vns des autres. Mais au contraire est medecine qui ayde contre beaucoup de maladies. Tellement que la nature par vn singulier priuilege, luy a donné de conforter contre la debilité du cœur, & y amener soulas & ioye, en le disposant à magnanimité & haultesses d'entreprises. Et veulent beaucoup de sages que telle grace luy soit concedee par la benignité du soleil. Et que pour ceste cause il soit tant agreable,

& qu'avec si grande puissance il ayde, & principalement à ceulx qui en ont les grands sacs & coffres plains. Et pour conclusion ce metal est vn corps traictable & de luisante couleur, quasi semblable à celle que le soleil nous monstre. Et a en soy certaine intrinseque maniere d'attirer: tellement qu'incontinent qu'on le veoit, il dispose les cœurs à le desirer. Et par telles vertus à luy appropries que des hommes est tenu si precieux. Combien que beaucoup de gens contre luy crient en l'accusant, plustost pour la semence de la pestilentielle & monstrueuse avarice, & plustost pour causes de beaucoup de maux, que pour secourable le blasme. Mais laissons aller ceste dispute, combien il face plus de mal, ou de bien, par ce que ce seroit trop longue & inutile question comme desia vous ay dit, & de nouuean le replique. Les dignitez qui sont en luy, m'ont faict premier de luy que des autres parler. Et d'autant plus qu'il me semble que l'ordre de ce mien traicté, veult que ie commence à luy, afin que ie le puisse mieulx monter & paruenir au degré des autres metaulx, a celle fin que cestuy nostre pays d'Italie, à vous ou à autre quelque bonne fortune vous donast d'en venir à la pratique, au moins vous n'en feussiez sans quelque memoire de congnoissance. Et l'ay volontiers faict, afin que vous puissiez acquerir tant plus de sçauoir: parce que ie suis certain que les nouuelles cōgnoissances engēdrēt tousiours inuentions nouuelles dans les esprits, avec enrichissement desdictes congnoissances. Et d'auantaige ie suis certain que ce sont les clefz de faire esmerueiller les esprits: & s'ilz vueillent les faire arriuer à lieux certains, ausquels non seulement sans le fondement de cecy n'y paruiendroient, mais n'en pourroient approcher. Et parce outre ce que ie vous ay dit en general, ie vous diray d'auantage de sa generatiō particuliere & nature: & les signes des lieux ou il se produit & engendre, afin que ie ne laisse rien en oubly. Et puis vous diray comment il se doit purifier de sa terrestre superfluité, vous ayant dit premierement comment on en peult trouuer la miniere. Mais parce que ie n'ay pas veu les montaignes qui en soy cōtiennent telles minieres, ny les lieux ou la pratique d'y besongner se faict, ie vous diray seulemēt ce que m'a esté de personnes



sonnes dignes de foy recité, ou ce que i'ay en lisant quelques bōs auteurs recueilly, desquelz i'ay pour tresuray entendu qu'il s'en treuue plus en la Scithie, & aux parties par nous appellees orientales, que autre part, parauanture parce que le soleil estend plus sa vertu en telles regions: desquelles prouinces l'Indie, ainsi que on dit, est la premiere. Et principalement les isles que les armées du Roy de Portugal & de l'Empereur ont trouuées: lesquelles comme i'entens sont nōmées les Moraches & le Peru & autres. En Europe encores on treuue de l'or, comme en la Aslesia & en Boemia en diuers lieux, en Ongrie dedans le Reno & dedans Apfa. Pline dit qu'en Autriche & en Portugal iadis s'en trouuoit, & que les Romains en tiroient chacun an 23. poix de liures. Et pour parler de ce precieux metal, ie pense qu'il s'engendre en tous les pays, là où l'influence celeste donne l'origine, disposant les elementales causes. Et vous voulant d'iceluy narrer autant comme i'en ay entendu, ie dy qu'il s'engendre en diuerses especes de roches & pierres dedans les grandes montaignes, qui de terre, d'arbres, & d'herbes sont toutes desnuees, Et de telle maniere la meilleure est vne pierre azurée ou bleuë, appelée lapis lazuli, qui a sa couleur azurée semblable au Saffir, mais non pas si tresparente, claire, ne si dure. Et d'auantage on n'en treuue dedans l'or pimët, mais beaucoup en la compaignies & mines des autres metaulx. Et outre beaucoup s'en treuue dedans les arenes des fleuves en beaucoup de prouinces. Ce qui s'en treuue dedans les montaignes est en sorte de filon ou de veines, cōme entre deux bendes vny avec la pierre azurée & fort meslé en icelles. Et telle mine est affermée estre tant meilleure cōme elle est plus pesante & de plus forte couleur, dedans laquelle beaucoup de taches d'or apparoiſſent. D'auātaige, ilz disent qu'il s'engēdre en vne autre pierre semblable au marbre falegno ou arborise. mais il est vn peu plus obscur, ou de couleur morte. Et en vne autre qui de sa couleur est iaune avec taches rouges par dedans. Et d'auātaige qu'on en treuue en diuerses pierres noires separées sans ordre, comme sont les cramas & cailloux d'vn fleue. Outre qu'il y en a en vne terre tenante comme glu, & semblable en couleur à l'argille, telle terre

est fort pesante, & a fort grand odeur de souffre, & que l'or qui là dedans se trouue est fort beau & quasi tout affiné, mais qu'il est fort difficile à le tirer & nettoyer: parce qu'il est de tresmenues parties, & quasi semblables aux atomes ou corps indiuisibles. En telle sorte qu'à grand peine l'œil les peult discerner. Et n'y peult on faire comme au lapis Lazuli, ou en autres pierres mineralles, ou comme l'on faict dedans les arenes des fleuves quand il se rencontre. Et d'auantage difficilement en lauant va au fond. Et par la fusion avec sa mere & abondante matiere terrestre, il se vitrifie ou se congele & empaste. Toutesfois finalement avec longue patience, par l'un moyen & par l'autre, & finalement avec le Mercure ou vis argent, se tire. Et comme i'ay deuant dit il s'en trouue dedans les arenes de beaucoup de fleuves, comme en Espagne dedās le Tago, en Tharce dedās l'Ebro, en l'Asie dedās le Patolo, en Indes dedans Ganges, en Hongrie, en Boesnie, & en l'Aslesie en diuerses riuieres, en Italie dedans l'arene du Thesin d'Abdua ou Adda & du Pau. Toutesfois on n'en trouue pas dedans tous les riuages de leurs cours, mais seulement en certains lieux, là ou à certaines arenes decouuertes, sur lesquelles les eaues au temps des inuidations du plat país, laissent vne certaine couleur belletre, liée aux arenes, avec laquelle ledict or est melle en forme de menues paillettes ou escailles, ou cōme vn petit bout d'un grain de blé. Les payfans en hyuer les ayans prinſes apres la retraicte des eaues, le portent dehors du cours du fleuve, afin que l'eau retournant grosse ne les emmeine, & en font des monceaux. Depuis en esté avec vne certaine patience en tour le lauent & purgent de sa terrestreité. Et ainsi ont la pratique. Ilz accoustrent certaines tables ou ays de tremble ou d'ormeaux, ou de noyer blanc, ou d'autre boys, qui depuis la sie demeure cheuclū, & qui ou de la sie, ou de la race, sont ainsi accoustrées, cōme tout estoupeuses. Et les ayant couchées avec vn peu de pendant, jettent les arenes dessus avec force eauc, vsant à ce de pelles concauées ou cruchées, qui prennent arenes & eau ensemble. Ce que faisant, l'or qui est dedans, comme matiere plus pesante entre au fond des sieures estoupeuses, & s'attache: & ainsi demeure pris & separé de

paré de la compagnie des arenes, duquel voyât qu'il en soit quelque peu demeuré, diligemment le cherchent & recueillent. Et l'ayant recueilly finablement le mettent en vn vaisseau de bois semblable à vne nauette, là ou on laue le linge en sauonnant, que nous pourrions dire vn auget: ou sut vn grand tranchoir creulé au milieu, & de nouueau tant qu'ilz peuuent le relauent, & finablement le mettent ensemble avec l'argent vis, & le passent ou par vne bourse de cuir, ou par l'alembic, & ainsi demeure l'or estant euaporé le mercure semblable à vne menue arene au fons. Ce qui estant ainsi demeuré, avec vn peu de baurac ou de selnitre, ou de saou noir accompagné, se fond & se reduit en son corps, & on luy donne depuis vne forme de verge, ou aultre selon qu'on veult. Cecy est de poinct en poinct le moyen accoustumé de tirer l'or des arenes des riuieres, de laquelle operation ceulx qui le cherchent tirent en certains temps de l'an grandissime vtilité, & d'autant plus que ce moyen pour le nettoier n'a pas de besoing comme les autres de si grande despence, comme pour auoir l'ayde de tant d'hommes, de tant de murailles, de tant de feux, & de tant d'autres artifices, mais seulement à ce moyen icy, est suffisant vn homme & vne table avec vne pelle, avec vn peu de vis argent & abondance d'eau. Ce que pour plaisir bien souuent en esté se cherche. Et depuis se qu'il s'en retire, soit peu ou beaucoup, vous sçaez incontinent qu'il vault. Mais laissons maintenant à parler de telle chose, pourautant que parauanture, ou par vous, ou par autre, pourroit estre demandé de la cause d'ou tel or en telles arenes est amené, & si y est conduit de l'eau, ou s'engendre esdittes arenes. Sur ce que j'ay beaucoup de foys avec vne mienne grâde admiration pensé. Et principalement sur celles du Pau, du Thesin & d'Adda: pour autant que ie ne suis pas encores certain, combien que ie vous aye dit au parauant, que les grandes abondances d'eaues l'y portent de là ou il puisse prendre, par ce qu'il n'y a nulle miniere d'or, ne d'autre metall là aupres, au mois qu'on sache. Et pourautant i'en demeure confuz, parce que j'ay leu quelques auteurs qu'ilz vueillent dire qu'il s'engendre au lieu mesme là ou il se trouue. Que si ainsi estoit, il seroit, fault.

que l'eau l'eust porté. Mais beaucoup plus m'est difficile à comprendre comment il se peult engendrer, pour autant que ie n'en ten point si se produit, ou par la vertu de l'eau, ou de la terre, ou du Ciel: parce qu'il me semble raisonnable que si quelqu'une de ses causes le produisoient en le cherchant par tout le cours de tel fleuve, on y en trouueroit en tout temps. Et si l'influence du Ciel, comme chose de soy puissante, est cause d'un tel effect, il me semble qu'il faudroit qu'elle besongnast fort immédiatement: pour ce que autrement on n'y pourroit obseruer l'ordre que la nature a accoustumé d'vser en la generation des metaulx. Comme ainsi soit quelle le produise premierement au decouvert, en lieu là ou cōtinuellement abonde vn cours d'eau. Outre qu'il seroit besoin que telle cause fust puissante pour oster les matieres terrestres de lieu en lieu, & d'y mesler tresgrande imparité ou inequalité de froidure & d'humidité. Et posé que telle chose composée & autre, commence par l'eau du fleuve, ne print alteration, il me semble que les pluyes qui viennent au dessus deuoient rompre & gaster quelque chose qui y fust principiée. Et d'auantage ie vouldroye que quelqu'un me dist si telle chose s'engendre là, parquoy en ce lieu là seulement & non aux autres, ainsi aduient: & pourquoy semblablement l'argent, l'arain, ou le plomb ne s'engendre aussi bien comme faict l'or. Pour ce que ce sont matieres, quant à leur nature, de plus facile formation que n'est l'or: à cause de plusieurs concordances ou armonies, & des extremes perfectiones, qui sont audit or. Combien qu'en beaucoup de lieux de la campagne de Rome dedans les arenes de quelques petites riuieres, on trouue de la miniere de fer menu, de couleur noire, & dauantage parce que cecy est propre en certains particuliers lieux du fleuve, & non pas par tout, pour lesquelles raisons & effects apparens, il semble qui luy soit plustost porté de l'eau, que qu'il s'y engendre. Mais toutesfois la verité ne se peult trouuer par telle nostre dispute & contradictions: pour autant parlant entre nous ainsi domestiquemēt, & non pas par ferme resolutiō, m'à semblé de vous dire ce que ie pense. Je vous dis que ie suis en vne de ces deux fantasies: L'une que cecy seulement aduient dedās les grāds fleuves



fleuves qui reçoivent en grande abondance d'eaux de fontaines, de fosses, ou d'autres fleuves : de là ou, comme souvent aduiét, que par le degel ou fonte des neiges, ou par les grâds pluies, ils lauent les riuës & toutes les dependences ou vallées des montaignes voisines, ausquelles peult estre qu'il se trouue des terres qui de leur propre nature tiennent de la substance d'or: ou vrayement qu'en tel lieu il y ait minieres ordonnées en quelque coupeau ou sommet de montaignes, là ou les hommes n'ayent pas encores eu le soing d'aller : ou bien qu'on n'y puisse aller facilement, & qu'il soit au decouvert, ou du rebatre du soleil, ou de la froideur de la neige, ou vrayement que de l'eau soit masseré: pour autant que quelque chose que ce soit avec la grande quantité de pluies, est suffisante & donne commodité à la grater & racle, & porter dedans les fleuves. Ou bien il pourroit estre que telles terres soient dedans les lieux propres, prochains des montaignes, ou vrayement soient du mesme principal cours. Et parce que iamais ne se seiche & ne cesse du commun cours des eaux: & pour autant le fond est tousiours en noz yeux caché, il n'est pas de merueille si en si long temps la vraye congnoissance & origine de telle chose n'a des voisins & prochains & habitans iamais esté congneue: finalement soit la chose cōme elle vouldra estre, il est certain que dedans les arenes de beaucoup de fleuves on trouue de l'or. Et principalement selon que i'ay congnoissance dedans les susdicts. Dont si de telle chose me suis esmerueillé, ie merite excuse: par ce que là ou il y a faulte d'entendre les choses par raison, ou bien la certainté du fait apparente, tousiours il y a cause de doubter, & en est iuste cause d'admiration. Mais bien d'auantage apres ceste cy me vient à plus grande merueille ce que i'ay ouy beaucoup de fois pour choses tresurayes, dire à diuerses personnes qu'en quelques lieux d'Ongrie en certains temps à la semblance d'herbettes hors de la terre, l'or finissime s'est trouué auoir germé & creu, estant entortillé comme petits fillets autour des plantes, lesquelles sont de la grosseur d'un fil à couldre & grosset, & de longueur de quatre doigts, & quelques vns d'un anpan. De laquelle chose ou d'une semblable, il semble que Plin au



liure trentetroisiesme de ses histoires naturelles, parlant des minieres, vueille toucher que de son temps le mesme aduenoit en Dalmacie. Que s'il estoit vray les laboureurs de telle campagne seroient moissonneurs des fruits celestes, & non de terrestre semence: & se deuroient tenir bien heureux, puis que de Dieu, du ciel, ou de la nature leur seroient produit sans leur labour, ou art, fruits tant agreables & precieux: & seroit vne singuliere grace depuis que dedās si grande quantité de terres, & en si grāde nombre de possessions, lesquelles sont ordonnées aux viuans pour la cure de telle recette, toutes les autres, sauf ceulx icy, fussent indigens. Mais que dirons nous de ce qu'escriit Albert le grand en ces liures des mineraux, la ou il dit auoir veu qu'en la teste d'un homme mort, il s'engendra de l'or. Là ou il dit que estant ceste teste enfouye dedans terre, & que par cas fortuit trouuée beaucoup plus pesante que ordinairement vn tez ne doit estre, on veit qu'elle estoit pleine d'une arene tresmenue, Laquelle à cause de sa ponderosité, ceulx qui la veirent penserent que ce fust metal: Et trouuerent finalement par experience que c'estoit or finissime. Et à la verité il me semble que ces parolles ne vueillēt dire autre chose, sinō que la grande dispositiō de telle matiere & la grande influence du Ciel, eussent là dedans engēdre tel metal. Ce que à la verité est chose qui ne se peut croire sans grande difficulté, quant à moy elle me semble incredible. Mais pourautant que l'ay ainsi entendue, ainsi vous l'ay voulu dire. Et neantmoins considerant celuy qui le dict, & combien grandes sont les forces superieures & celles de la nature, on peut laisser passer cela, en vsant de la foy & de l'opinion du sçauoir de ceulx qui le dient: puis que de nous-mesmes nous sommes insuffisans pour entendre profondement les raisons de telles choses. Et depuis que i'ay commencé à vous reciter tels effectz, ie ne vueil pas laisser derriere vn cas dauantage, lequel i'ay entendu estre aduenue au pays de Hongrie, par aduenture en ce lieu la mesmes dedans lequel l'or croist comme l'herbe. Ce qui ne donne point de esperance à qui cherche miniere d'en trouuer. Et à qui en a trouuée rend vn certain aduertissemēt & cōmodité de pouuoir pour-  
suyuir,

fuyuir, & en trouuer des autres. Le cas est tel qu'il fut vne femme rustique long temps à, qui auoit accoustumé d'aller lauer la buée en vne fosse, là ou il courroit vn peu d'eau, & là dessus vne pierre qui y estoit, qui luy sembloit plus à propos, frotoit ses drapeaulx: là ou par sa bonne aduenture, à trauers de telle pierre trouua vne petite veine d'or, grosse comme vn fil accoustré. Lequel pource quelle l'auoit fort frotté, s'estoit faict clair & apparent à la veüe. Ce que voyant & ne sachant que c'estoit, s'en alloit fort emerveillée de telle chose. Et l'ayât vn iour conseré avec les hommes de sa maison, & estant d'iceulx telle chose considérée, se delibere-  
rent d'y mener ceulx d'entre eulx qui mieulx s'y entendoient. Et ainsi pour conclusion trouuerent que c'estoit vne veine d'or trespur, qui s'estoit decouuert au iour, & que la piece de ceste pierre là, trauersoit le cours de l'eau dudit fossé. Parquoy incontinent ayans tiré l'eau de son cours, & l'ayans enuoyée par vn autre chemin, ils commencerent vaillamment à tirer tellé miniere. Et ainsi iusques aujourd'huy on la poursuit, & sont desia parauanture depuis ce temps là passez plus de cent ans que continuellement on y à tiré de l'or. Et ainsi c'est cela qui amande non seulement ce pays là, mais d'auantage bonifie tout le reste de la Chrestienté. Et pourautant ie vous ay voulu dire cecy, pour vous aduertir que iamais vous ne failliez de vouloir entendre que toute chose du monde qui peult ayder, combien que ce fust vn vmbre, si luy doit on tousiours prester l'œil & l'oreille, & ne se doit nulle chose depriser: comme aussi il fault craindre toutes les choses qui peuvent nuire. Pource que comme vous voyez, si on n'eust adiousté foy aux parolles de la vieille, & depuis si on n'y eust bien pris garde, pour tout certain on n'auoit iamais alors trouué vne chose si vtile, ne parauanture iamais depuis. Dauantage le courage ne faillit à ceulx qui commencerent à cauer, combien que la chose feust encore en foy de peu d'aparence & ne leur faillit le courage pour faire vn autre cours au fleuve qui la couuroit, estant tirez de raisonnable esperance pour faire telle depense, & la poursuyuir. Consideré que l'or & l'argent, combien qu'il soit peu, quasi tousiours à cause de de sa value, rend tant de profit qu'il passe toute la

despenſe. Et d'autant plus qu'on entre dedans le roc ( comme auſſi aduient en toute miniere ) d'autant on en trouue plus grande quantité. Combien que de celle de l'or, ceulx qui ont accouſtumé de la chercher, diſent que iamais ne ſ'en trouue trop grande abondance, n'en ſi grande quantité comme des autres. Et paraduanture diſent vray. Toutesfois ſi ne doit on pas croire que là ou ſ'engendre le peu, le beaucoup ne ſ'y puiſſe engendrer. Car ſi ainſi eſtoit, ce ne ſeroit point de merueille qu'il fuſt plus cher que l'autre. Quant à moy il me ſemble que la bonté de nature en donne beaucoup au môde, & qui ſ'en treuve, & ſ'en eſt touſiours trouué entre les hommes grande quantité. Conſiderant en combien de lieux tous les iours continuellement on en tire, ſoit dedans les montaignes, ſoit dedans les arenes des fleuves, ou en la compagnie des autres metaulx. Et de cecy on fait teſmoignage, conſiderant ce qu'en conſomment les paintres pour l'ornement de leurs peintures & labeurs. Conſiderant auſſi les ouurages que font les orfebures de pur or, & ce qu'ilz en deſpendent à dorer & couurir les autres metaulx. Et d'auantage ce qui ſ'en met en tiſſure, tant de drap d'or comme de toilles d'argent, & ce qu'en gaſtent les femmes pour la braueté de leurs ornemens. Et ce qu'avec la force du feu, & avec la puiſſance d'autres choſes materielles, eſt par les alchumiſtes deſpendu & deſſaict. Dauantage combien eſt par auarice dedans les murailles ou ſoubz la terre couuert, ou qui par la multitude des clefz avec toute induſtrie, ſe reſerre dedans les fors & ferrez coffres, outre ce qui ſ'en va eſpandu par le monde, & qui touſiours chemine par l'vniuerſelle communauté des affaires mondains, pour commodité de la marchandiſe. Ce que conſiderant qui dira que peu ſ'en produit? Voire au contraire qu'au monde y en a grandiffime quantité, combien qu'il y en ait peu qui en ayent en telle quantité qu'ilz ſ'en puiſſent ou vueillent eſtancher la ſoiſ. Et en particulier pour dire de l'Italie, combien qui n'y en ſoit iamais apparu miniere, neantmoins de tous temps elle en à eſté plus riche & abondante que quelconques autres pays, ainçois que ſouuent aye eſté par diuerſes nations deſnuée & ſaccagée, comme elle eſt encores auourd'huy

d'huy par les cruelles guerres, & des Barbares, qui depuis quarante ans en ça y sont entrez. Mais qui sçait si encores, comme iadis feirent noz tresualeureux ancestres, Dieu nous donnera de nouveau occasiõ de les chastier, & d'aller en leurs maisons pour nous faire à double vsure noz biens restituer ! Ou s'il ne permet cela, paradventure voudra qu'on y trouue quelque abonbante miniere d'or : Car considerant & voyant ceste nostre habitation d'Italie, estre toute pleine d'autant & si grandes excellences, comme le Ciel en peult conceder à lieux habitables, ie ne puis croire que celle de l'or luy doie defaillir, comme ainsi soit qu'elle soit de toutes autres minieres abondante & riche, sauf que de celle de l'or & de l'estain, Et me semble estre raisonnable que ie croie que ces deux ici y soient aussi bien comme les autres. Mais que elles ne sont encores venuës à congnoissance des hommes. Et ceci me persuade ce que dedans les fleuves dessusdicts en apparoit audit pais. Et dauantaige les demis mineraux qui y sont, de quelque vns desquelz (comme vueillent ceulx qui sont experimentés) comme de leur naturelz agents procedent lesdits metaulx, donnent certain indice qu'il y en ait. Mais iusques à tant qu'on les trouue & touche à la main, on ne peult dire qu'il y en ait ou non. Et iusques ici est verité, que seulement par vne des deux voies, sauf celle des marchâs, se trouue de l'or en nostre pais. L'une des arenes des fleuves, l'autre est de la trefutile industrie de departir l'argent neuf, ou qui tient de l'or ou des aultres metaulx qui en contiennent, duquel comme j'ay dict, y en à bien peu qui n'en tienne quelque partie avec eulx, combien que plus ou moins selon leur mistion, & selon la fixe ou dure consistance de leur matiere, ou selon la force & qualité des planettes qui leur donnent l'influence. Et cela en somme est l'or qui se trouue en Italie, sauf toutesfois qu'il y eust quelque Philosophe experimenté en l'art alchumique, qu'il en feist telle & si grande quantité, comme leurs liures (plustost de recettaires non entenduz que de philosophes) en promettent à leurs credences. Car à penser de telle chose plus m'y attraiçt l'autorité de quelques vns, que raisons que iamais i'aye entendue. Ausquelz tant plus ay d'egard, tât



plus ie trouue leur art d'eulx tāt exaucée, & des hōmes tant desirée, estre vne volonté vaine & vn pensemēt imaginé, auquel soit impossible d'arriuer, si on ne trouuoit quelqu'vn qui fust seigneur de quelque esprit, ou qui par propre diuinité operast. Considerāt l'obscurité de leur principes, les termes & concordances des choses qui leur sont nécessaires pour venir à la maturité de leur fin ou lapis, ie ne sçay si iamais on pourroit raisonnablement croire que telz artifices ou artistes puissent iamais rien faire de ce qu'ilz dient ou promettent. Et que ainsi soit qu'on regarde tant de philosophes doctissimes & entendans, tant par consideration comme par pratique les choses naturelles, qui sans escrire de ce ont esté au monde, tant de grands princes qui avec leur richesse & puissance ont euforce d'operer & de donner commodité aux esprits à tel art adonnez, lesquelz pour à tel port arriuer, ont mis voiles au vent avec rames industrieulx, & avec le quadran ont nauigé & cherché tous moyens possibles, tant que finalement submergez & perduz croient à l'impossibilité de tel art, & n'y est iamais (comme ie pense) arriué homme du monde. Combien que entre les hōmes credules on die de beaucoup, en amenant pour cecy plus d'autorité que de raison de la possibilité ou effects qui se puisse demonstrier. Entre lesquelz y en a qui citent Hermes, & qui Arnault de Villeneuue, & qui Raymond Lulle, qui Heber, qui Ockan, qui Craterrus, qui Lescot, & qui saint Thomas d'aquin, qui le Parisien, & qui ie ne sçay quel Elie de l'ordre saint François. ausquelz ou pour la dignité du sçauoir, ou par la sainteté vueillent que on ait certain egard de foy: ou que qui les escoute, comme vn ignorant, se taise, ou qu'il approuue ce qu'ilz dient. Mais toutesfois tels diseurs ne persuadēt pas à qui bien raisonnablement considere, que leur art alchumique soit vraye, parce que on voit souuent que par desir d'auoir trop de richesses s'auenglēt en trop croyant: & en cherchant de vouloir semer tel art pour vraye dedans les autres avec l'effect de leur apparente paureté, s'ostent à eulx mesmes ladicte credulité. Et d'auantage qu'ilz ne amenant pas en liure autentique, la sentence de l'Aristote tresdiuin scrutateur de toutes les sciences & des choses secretes de  
la nature



la nature : ne celles du tres excellent commentateur d'iceluy, ne d'aucun des anciens & tant approuuez Philolophes, lesquelz ne se sont iamais nourriz sinon de la speculation & haulteur de la philosophie, non celle de Pline, ou Albert le grand (qui soit en aucun vray liure de luy) lesquelz avec toute diligence & continuellement cherchant comme braques pour trouuer & entendre les choses admirables de la nature, en toutes les parties du monde sont allez tousiours cherchant. Et puis que ie suis cheu en ce discours comme vne roüe violẽtement esbranlẽe combien qu'elle soit lasse, ne s'arreste pas. Aussi ie ne me puis tenir que ie ne poursuyue en auant, pour vous dire amplement ce qu'à mon iugemẽt de telle chose i'estime. Combien que ie ne sçay que beaucoup de gens en cecy affectionnez, si parauanture viennent à lire ceste mienne presente escripture, m'auront pour suspect, en m'accusant d'ignorance ou de presumption. Ce que patiemment consentiroye si ie ne l'entendoye, pour ne debatre point avec eulx. Et soient telles gens, quant à eulx en cecy sçauans & intelligens, quant à moy pour leur beatitude, ie ne leur porte point d'enuie. Et pourautant ie vous dy qu'avecque diligẽce i'ay veu beaucoup de liures contenant telles choses. Et d'auantage ie me suis estudiẽ de conuerser seul avec beaucoup de ceulx qui sont les plus grands practiciens. Et d'auantage pour en entendre plus ay essayẽ de faire quelque effect, & me suis trouuẽ à ouir l'opinion de beaucoup de sages & industrieux hommes, & si les ay escoutez subtilement disputer, si telles choses sont vrayes ou bien fauleuses imaginations. Et en somme prenant tous les fondemens de l'alchumie, & vis à vis mettant l'ordre de la nature, & contrepesant le proceder de l'un & de l'autre, il ne me semble point qu'elles ayent proportion en leur puissance, considerẽ que la nature procede dedans les choses intrinsequement, & que toute la substance radicale passe toute dedans tout, & l'art tresdebile, quand au regard de nature, la suit, pour veoir si elle la pourra imiter. Mais c'est par moyens exterieurs & superficiaux, tresdifciles sinon du tout impossibles pour penetrer dedãs les choses. Et presupposant qu'aux hommes par tel art fust concedẽ, & d'auantage,

de pouuoir auoir des matieres premieres & propres dequoy la nature compose les metaulx: Je voudroye qu'ils me disent comment ils pourroient auoir l'influence des cieulx à leur commandement, desquelles toutes les choses inferieures qui sont dedans la concauité de ce bas monde dependent. Et comme d'auantage iamais sçauoient les hommes avec l'art purifier icelles substances elementaires, ou proportionner les quantitez necessaires l'une à l'autre. Et finalement comme fait la nature les conduire à perfection, & en faire des metaulx. Certainement nul n'est suffisant, combien que les hōmes feussent non seulement ingenieux mais anges terrestres. Et ne puis croire que telle chose peussent iamais arrester. Pourautant selon mon opinion, ceulx-la sont en erreur qui mettent en telle despense leur richesse, & avec les longues & continuelles sollicitudes tousiours sont ardens tant par le desir comme par le fait de l'operation plus que n'est le charbon allumé dans leurs fourneaux, pour veoir s'ils pourroient conduire à maturité l'adamantine durté de tel fruiet. Ce que pleust à Dieu qu'ils peussent faire: pource que s'ils sçauoient faire telle chose, non seulement se pourroient appeller hōmes, mais dieux: Et ceulx qui au monde pourroient & auroient estainte l'insatiable soif de l'auarice, & par l'extraordinaire excellent de leur sçauoir, surmonteroient beaucoup dauantage la puissance de la nature mere & ministre de toutes les choses crees, fille de Dieu, & ame du monde, en vsant des moyens, lesquels parauenture elle n'a pas mis en estre. Et si elle les a, parauenture elle ne les met pas en oeuvre en tel effect. Mais pour certain ie ne seray deceu en cecy, que ie ne voye en cest effect les matrices, ausquelles ils vueillent estre contenue leur generation, auoir les ventres de voirre artificiel, & les matieres en lieu de spermes ou semence, estre choses composees & accidentales, & semblablement les chaleurs dont ils vsent, qui ne soient discontinuels & inegaux & fors dissemblables à ceulx de la nature, avec faulte de certaine proportion de substance propre pour faire nourrir & croistre. Et dauantage ainsi aduiant du tēps, & des poix & mesures necessaires à telz effects, Et qui doubte que les principes que telles gens vueillent

vueillent mettre en œuvre ne soient matieres secondes, & choses meslées & composées, là ou la nature selon les philosophes naturels, ne met autre chose en œuvre sinon que purissime substance, Mais quelle folie pourroit estre plus puerile que de croire que les hommes, avec l'industrie puissent abreger le temps aux fruits des choses que la nature voulant faire parfaites, ne le peut pas faire elle mesme, pourautant que parauanture il leur est requis vne longueur determinée qu'elle leur a donné. Autrement pour certain il seroit beaucoup meilleur qu'au temps cher, ilz reduissent le fromēt à perfection, pour secourir aux humaines necessitez. Mais la cause qu'ilz disent le comprend tresbien, par ce que nostre aage ne peut attendre longueur du temps, ainsi nourissent les credules d'esperance, parce qu'ils abregerent le temps, & leur disent qu'avec leur art ils font restourner arriere les determinez effects de nature, & les reduisent aux premieres matieres: & qu'ils separent les esprits des corps, & à leur vouloir les y font retourner, comme le cousteau dans la gaigne. Et combien que les substances, lesquelles dans les choses s'appellent esprits, il soit aucunement possible avec la violence du feu tirer & reduire en vapeurs, si est-ce que ie croiray iamais qu'on les y puisse reduire. Car vn tel effect ne seroit autre chose, sinon faire resusciter les morts. Et pour plus se magnifier, disent qu'avec leurs arts, ils surmōtent la nature, non seulement en reanimant ou rendant l'ame aux choses defaictes, mais que dauantage il leur donne la puissance vegetable avec pouuoir de faire viure les aultres. Ce que parauenture pour ne l'auoir peu ou sceu, iamais la nature ne le feist. Et cecy me semble tant plus difficile, d'autant que ie vous ay dict que les metaulx reduits à leur derniere perfection. sont raisonnablement tels qu'on doit croire qu'ilz soient arriuez à tels termes, qui sont dehors de l'ordre de leur matiere, & que la radicale humidité pour arriuer à son terme, est en maturité cōuertie. Et par aduenture pour auoir passé par dedans la violence du feu, quand elle fut purgée, il est impossible qu'il luy ait rompu la ligne de la vie, & qu'elle ait prins autre disposition que premierement n'auoit. Lesquelles choses en mon entendement considerant, ie de-

meure confuz, comment ces pauvres credules peuvent demourer, tant de la veuë eblouis que telles choses si vrayes & apparentes, comme la raison voudroit, se puissent discerner. Mais la grande cupidité qui ont de se faire riches, les faict cheminer avec la veuë eslongnée, & ne les laisse pas veoir les choses interposées, tandis qu'ils pensent seulement à l'effect de leur but, en demeurant malades en tel vmbre de felicité, laquelle ilz penseroient tirer de ce, & par laquelle veritablemēt, si elle venoit à effect, comme ils la pensent, ilz se pourroient appeller bien heureux. Pour autant qu'ilz possederoient les moyens de pouuoir paruenir à l'effect, quasi de tout possible appetit, surmontant la grandeur de quelconque grand Prince qui soit au monde, soit avec la force des armes, soit avec la grandeur de magnificence des bastimens, ou soit avec la vertueuse & magnanime liberalité, faisant benefices à diuers pais, ou vrayement par guerre, surmōtant les Turcs, exalter la sainte foy Chrestienne iusques à sa celeste haulteur, ou avec autres semblables œuures excellentes, se pourroient rendre glorieux & immortels. Et quel plus grand erreur pourroit estre aux hommes que perdre temps à suyuir les autres sciences & arts, & laisser d'apprendre ceste cy tant vile, & tant digne, ou plustost diuine & supernaturelle, qui a force & moyen de produire choses si precieuses & plus parfaittes, & avec plus grande quantité & commodité & felicité que ne faict la nature! mesmes ce seroit vrayement vn art d'acquérir, si nous voulions seigneuries & royaumes, & dōneroit la grace apres la mort d'acquérir le Ciel, en faisant aumones, edifiant monasteres, hospitalaux & eglises. Et aidant tousiours à son prochain, non seulement luy faire plaisir avec les richesses, mais d'auantage le guerir quand il est malade, & si est viel de la viellesse, le faire retourner à la ieunesse, & en plus grand perfection qu'il n'estoit auparauant: & ainsi d'auantage à ceux qui sont desia mortz avec tel art leur rendre la vertu vitale. Et ceste telle leur operation, maintenant appellent la quinte essence, maintenant la pierre philosophale, autrement l'or potable, avecques laquelle art, ils s'offrent de donner tel fin qu'ils voudront à tout effet naturel: comparant  
la quinte



la quinte essence à la puissance des cieulx & de nature, & des plus nobles estoilles. Et disent l'or potable estre semblable à l'esprit & à l'ame des choses, & la pierre au pouuoir de la grande nature. Mais avec tout cecy les peres & inuenteurs de tel art, & qui avec tant de louanges l'ont exaltées tous sont morts, & n'ont pas seulement eu fruition d'une (tant s'en fault de deulx ou trois) ieu- nesse. Et ie ne sçay pas encores, comme ils disent, qu'ils sont re- suscitez certainement. Ce seroit chose glorieuse & d'un grand contentement à ceulx qui auroient en leur puissance tel art. Se trouueroit en leur chambre vne aiguiere, fiole, ou autre vaisseau plein de liqueur, ou de pouldre, ou de chose puluerisée qui eust la force avecques grandissime abondance, & avec certain & con- tinuel cours d'engendrer ou conuertir l'argent vif en or, ou en argent, ou en quelque metal qu'ils voulussent, multipliant quel- que petite quantité, qu'ils en eussent quasi en infiny. Pource qu'en tirant autant qu'on voudroit, iamaïs ils ne vueillent que or ne ar- gent leur peust iamaïs faillir, & pouuoir ainsi faire avecques rou- tes autres vertus excellentes, tel art le promet au pauvres gens credules. Pour autant que si ce qu'ils disent estoit vray, on pour- roit dire auoir en prison dedans vne bouteille de voirre, non pas ce qu'ils appellent ainsi, mais Dieu mesme createur de toutes choses. Et en bonne verité ils se pourroient bien moquer de la nature, comme ils font quand ils disent qu'ils vueillent avec leur medecine corriger les defaulx d'icelle, reduisant les metaulx im- parfaits à telle perfection qu'elle ne les a pas peu pour sa debilité conduire. Et pour dire ainsi ie n'enten pas de vouloir tollir ou di- minuer ces vertus si l'y auoit quelqu'un qui en eust. Pource que finalement si bien l'en ay dit mon aduis, ie m'en raporte à la ve- rité du fait. Combien que ie pourroye dire hardiment que de tel art transmutatoire ou alchimique en cherchant tresdiligemmēt, ne par mon œuvre, ne par celle d'autrui, iamaïs ie n'ay sceu auoir la grace d'en voir au moins chose qui d'eust estre approuuée de gens de bien, ou bien qu'il n'est besoing la laisser imparfaite par diuers accidens premier qu'on en sceust arriner à la moitié. Et pource ie merite d'autant plus en auoir iuste excusation : & d'au-

tant plus que ie suis par raisons tresfortes tiré, & parauanture par  
 naturelle inclinatio conduit à suiure le chemin des minieres que  
 de l'alchumie, combien qu'il soit de plus grans trauaulx de corps  
 & d'esprit & de plus grande despenſe que n'est l'autre. Et qui de  
 premiere apparence & de parole promet beaucoup moins: Et  
 doit obseruer autant comme il luy est possible plus la nature que  
 l'art: & plus celle qui est en effet que celle qu'on pense qui soit. Et  
 pource d'autant plus que ie pense en tels œuures alchimiques,  
 d'autant plus le cœur m'y fault. Parce que ie ne cōgnoy, ny croy,  
 qu'encores ils ſçachent les vrayſ moyens de baſtir leurs fonde-  
 mens, voyant ceulx, qui tel art tiennent pour vraye, diuerſement  
 les entreprendre. Et d'auantage parce que ie congnois la grande  
 debilité de nos entendemēs, de laquelle procedent tous erreurs.  
 Et premierement pour ne pouuoir congnoiſtre les interieures  
 vertus & puiffances particulieres des choſes. Et auſſi par ce que  
 on ne ſçauoit proceder à adminiſtrer les ſapeurs qui ſoyent du  
 tout ſemblables aux naturelles. Et plus pour n'auoir point d'or-  
 dre de proueoir avec bons remedes aux empeschemens infinis,  
 leſquels interuiēent ſans qu'on pense au long & trauailleux che-  
 min de telle operation: deſquels empeschemens ſi quelques vns  
 auient au maniment de quelque autre choſe du monde, ils  
 ſuperabondent en ceſte cy, pour autant que tel art eſt obligée à  
 fort grande diuerſité d'effects: comme ſeroient de feuz terminés  
 à propos (poſé le cas qu'ils ſe le peuſſent faire) & comme ſeroyēt  
 fourneaux & vaiſſeaux propres. Et d'auātage les choſes materiel-  
 les, puiffantes trespurgées & tresſubtiles: & faire bonnes calchi-  
 nations, reſolutions, putrefactions, & diſtillations: & ſemblable-  
 ment les miſtions, decoctions, & incinerations, & toutes par le  
 menu proportionnées comme en telle choſe eſt requis. Et ainſi  
 pour faire que telles choſes arriuent à leurs propres termes, il eſt  
 de neceſſité de faire diuers mineraulx & autres ſimples, comme,  
 eaues, huilles, & autres diuerſes ſublimateſ: leſquelles choſes  
 fault que du tout elles ayent leur perfection. Auſquels effects, ſi  
 par cas fortuit vn vaiſſeau à diſtiller ſe rompt, ou ſi les feus ne ſont  
 deument continuez, & ſelon les temps oportuns diminuez ou  
 augmen

augmentez: ou bien que les choses prinſes pour fondement, de-  
faillent en leur vertu, ils defauidrôt encores en leur perfectiō. Et  
me ſemble du tout impoſſible qu'en toute les choſes deſſusdictes  
on ne faille: pource que faire du tout ſon labeur ſans quelque faul-  
te, il ſemble que ce ne ſoit pas choſe humaine. O de combien d'al-  
chumiſtes il me ſouuient auoir ouy les lamentations, l'un pour au-  
oir par mal auenture rependu toute ſa compoſition dedans les  
cédres: l'autre pour auoir eſté trōpé de trop grād feu: parquoy la  
ſubſtance de ces materiaulx'eſtoit bruſlée. Quelqu'un par ce que  
par mal eſgard, les eſprits luy eſtoyēt exhalez: & quelqu'un pour  
auoir eu mauuaiſes & debiles matieres. Et en ſomme les vns par  
vn cas, & les autres par vn autre, pour couvrir ou leur ignorance,  
ou leur fraude, iamais ne faudront de ce defendre, ou d'aporter  
excufe de leur art. Et pour finalement conclurre, ie penſe que  
leurs liures ſont vmbres de maſques compoſées de quelques her-  
mites herboliftes, pour acquerir bruit & renom, ou de quelque  
autre gens oyſeuſe, ou bien de quelques alchumiſtes, pour cōdui-  
re les auaricieux en ſi grande creance, qu'ils leur viennent à ſecou-  
rir en leur neceſſité. Et pour donner authorité à leurs beaulx re-  
ceptaires, il les intitulent avec le nom de tel autheur, qui non ſeu-  
lement onc n'en eſcriuit, mais parauanture iamais en tel art ne  
penſa. Et pour autāt ie vous dy & conſeille, cōme ie le croy, qu'il  
eſt meilleur de ſ'adreſſer à l'or & à l'argent naturel, tiré des minie-  
res, qu'il n'eſt à l'archumique. Duquel non ſeulement ie ne croy  
pas qu'on en trouue, mais qu'il n'y euſt hōme iamais qui en veiſt.  
Combien que beaucoup diſent en auoir veu. Pourautant qu'on  
en ſçauoit ſçauoir les cōmencemens, comme i'ay dit deſſus: &  
qui ne peult entēdre les cōmencemens, il eſt impoſſible d'enten-  
dre les fins. Et quāt à ce, ie vous dy que ie ne ſçay ſi ingenieux al-  
chumiſtes ou philoſophes, qu'ils me puiſſent faire à croire qu'ils  
ayēt telle puiſſance, qu'ils puiſſent tirer, ou d'un corps metalique,  
ou d'un autre, & puis en la meſme choſe le remettre. Et ainſi ce  
qui n'eſt pas de ſa nature vegetable, le faire deuenir. Et qui eſt ce-  
luy qui iamais croira que le pain & le vin & les herbes, puiſſent e-  
ſtre cōuerties en chair par art: comme faiēt la nature? Et finale-

mēt cōment le boys brulé est cōuertý en charbō, cōme font les cédres des metaulx, à cause qu'ils ont passé par les grands feuz de fusion, puissent de nouveau pulluler & deuenir vers, & en engendrer d'autres. Et combien que ie sache qu'à toutes ces choses icy font responcez telles quelles, comme ie vous laisse à penser, il m'a neantmoins semblé maintenant bon de vous monstrier les forces de leurs probations, en laissant à part leurs responcez. Qu'ils cherchent donc maintenant de prouuer la possibilité de l'art, plus par exemples que par raisons, en mettāt en auant les petites semences des herbes, l'enter des plantes, la multiplication d'une scintille de feu, le leuain en la masse de la paste assemblée par eue, & entirent à leurs propos, les operations que font ceulx qui suyuent la nature. Et des medecins qui guarissēt les malades, & beaucoup de telles apparences des choses. Et dauantage qu'ils mettent en auant vn dict de la saincte escripture, en faueur de leur pouuoir & sçauoir besongner, là ou est escrit: *Omnia subieciisti sub pedibus eius*. Interpretant que Dieu a dōné puissance & autorité à l'homme; outre le domaine & seigneurie de toutes les choses de ce mode; de pouuoir entendre & operer toutes les choses qui sont en iceluy. Entre lesquelles estant la generation des metaulx, vueillent que non seulement ilz l'entendent, mais comme la nature mesme les mettent en œuvre. Dauantage pour corroborer leur dire, ilz mettent en auant vne sentence d'Aristote, de la quadrature du cercle (pour monstrier qu'elle est vraye à qui la voudra nier) là ou il dit que combien que precisement selon la geometrie, elle ne soit encores trouuée, ce n'est pas à dire qu'elle ne puisse estre, & qu'il ne soit possible de la trouuer. Et ainsi la nature des metaulx estant naturellement, il est (ainsi qu'ils concluent) possible à l'alchumie y arriuer à les faire. Et avec ceste & avec beaucoup d'autres telles raisons, ilz vueillent faire à croire que hors du ventre de la mere, vn homme puisse estre formé, & ainsi de tous autres animaux avec la chair, les nerfs, les os, & leur donner l'esprit, avec toute autre perfection à eulx deuë. Et semblablement faire naistre les arbres & herbes sans la semence naturelle par la seule art: & ainsi les fruits separement des arbres, leur dōnant leurs perfe-

ctions



ctions & formes, cōme couleurs, odeurs, saveurs, ainsi cōme aux vrayes & naturels, de ce que ie ne me sçauois passer de leur dire que ie n'en croy rien. Et aussi que ie n'en responde à ceulx qui dient qu'ils transmuent & ne creent pas: Car transmuier vne chose en vn autre, ne se peult faire sans totale destruction de celle que on veult transmuier. Et finalement pour conclure, laissant telle dispute, ie dis que ie croy que si telles gents amēnent quelque chose à perfection, que autrement ne leur en aduient que feroit de la chaux à ceulx qui massonnent. Car ilz voudroient pour tenir mieulx la muraille & lier mieulx, qu'elle retournast à estre vne fois pierre: comme on peult veoir auoir esté l'intention de celuy qui l'inuenta. Mais parce que ie ne veulx pas à parler de ce est art cōsommer plus de temps, ne vous fâcher en disant d'auantage, ne aussi rendre du tout offensez les alchumistes, (combien que comme les chiens estant à la chasse me delectant en cecy aurois encores beaucoup de choses à dire, qui m'incitent mettre en auât tout en troupes voulât toutes sortir à qui sera la premiere) neantmoins ie ne veulx pas laisser le cours, pourautant que ie sçay que les alchumistes ont despit qu'on parle mal de leur art. Et combien que ie sache que vous estes personne qui sçaez combien de bon fruit pourroit apporter d'aider à quelqu'un des miens inexpers, les admonnestant qu'ils ne gastassent pas ainsi leur biens à bride auallée, comme font beaucoup d'autres, ie suis cōtent de leur auoir fait ce peu d'iniure. Et d'auantage en suis cōtent, parce qu'il aduiendra vouloir parauenture à quelque grand philosophe alchumiste, montrant les raisons manifestes de leur art, de descouurir mon ignorance. Et ainsi depuis la clarté de tel art, tous les bons esprits viendront à faire de l'or en grande abondance, & faire les hōmes riches & ioyeux, tellement qu'en quelque sorte que i'eusse offensé les alchumistes par les causes dessusdites, ie seray cause comme ie pense, qu'ils rendront à beaucoup de gens profits grands. Et pour ne m'en aller en infins discours, ie suis content metre icy fin à ces miennes opinions & discours, dedans lesquels parauēture vous semblera que trop me suis estendu. Et vous dis bien que ie ne m'en retire n'y lassé, n'y content.

Mais parce que c'est chose qui m'a faict de la proposée matiere trop eslongner, à laquelle retournant combien que ie vous aye desia dit amplement de la generation de l'or, ie vous veulx maintenant dire, comment il le fault purger de sa terrestre superfluité: & principalement celle qui se trouue en la veine de la miniere de l'or. Et combien que ie n'aye pas veu les edifices & moyens que on vse pour le tirer, neantmoins ce que i'en ay congneu par l'autrui faict, vous en diray: à celle fin que si iamais vous venoit occasion de les mettre en oeuvre en Italie, vous en ayez quelque instruction. Et premierement ayant la miniere tirée & bien eleuée, il fault considerer en qu'elle sorte de pierre elle est engendrée. Et estant en icelle qui s'appelle lapis lazuli, il en fault tirer l'or, & en garder la pierre. Car de telle pierre se faict l'azur parfaict, lequel les paintres appellent d'outre mer, & l'estiment beaucoup, & le payent estant bien accoustré d'un grand pris. Et pour faire cecy il fault premieremēt la bien piller, & en faire de la pouldre. Et apres la mettre en vne nauette ou auget de bois, & la lauer avec l'eau, & apres la brouiller & remuer bien avec le vis argent, iusques à ce que tout l'or soit attaché & incorporé avec ledit argent vis. Et ainsi la pierre sera purifiée & separée de l'or. Puis faisant passer l'argent vis, par cuir, bourse, ou chauffe, ou par alembic, l'or demeure separé du mercure quasi tout pur. Et qui ne se soucieroit de garder la pierre, il faudroit vser du moyen de la commune experience, le faisant fondre au font ou en baing de plomb. Et venant bien l'experience, il fault poursuiure. Autrement fault chercher d'entēdre les moyens dōt vsent ceulx qui auioird'huy y besongnent. Mais selon mon opinion, le meilleur moyen pour la reduire à sa purité, seroit de faire rostir la miniere à petit feu, & à four ouuert, & à la faire bien euaporer, moyennant qu'elle fust en pierre qu'on ne vueille pas garder. Et en apres à vn molin, ou avec des pillons appliquez par vne rouē, la faire bien & subtilement piller. Et pour luy mieulx oster toutes les superfluites, la bien lauer, & en apres comme par vn grand ciment, ou en coupelle bien chaude la fondre, arrestāt ou cōsommant le plomb, & reduisant l'or à sa purité. Et en ceste sorte non seulement en l'or,

ou en

ou en sa miniere, mais en toute autre si vous voulez le pourrez faire. Et vous ay voulu monstrier telles sortes de fusions en ce lieu icy. Car au lieu des autres minieres, n'en parleray en general. Je ne pense pas en parler dauantage.

*De la miniere d'argent & de ses qualitez.*

*Chapitre. 2.*



Ly a selon que i'ay ouy dire par gens à ce congnoissans, diuerſes opinions, à ſçauoir ſi l'argent a propre miniere ou non. Les raiſons minerales, & l'opinion plus commune, m'ont perſuadé qu'il en ſoit: non tant ſeulement pource qu'on n'en voit la matiere, mais dauantage parce que dedans les caues de l'or, & de l'airain, plomb, & autres metaulx, on n'en trouue de pur & ſans aucune miſture. Et de l'argent, de l'airain ou cuiure, i'ay entédu qu'il s'en eſt trouué de fines pierres, conduictes par la nature à ſouueraine perfectiō. Et cecy cōforme George agricola Allemāt, lequel dit qu'en Saxone ſe trouua iadis vne pierre d'argēt minerale ſi grande que le duc de Saxe, prince & Seigneur de tel lieu, en ſeitt faire ſans eſtre aucunement par orfeure, ne augmenté, ne ouuré, vne bien grand table, à l'Allemande & quarrée, ſauf les treteaulx, propre pour y manger, par laquelle choſe, il ſe vantoit d'auoir en telle choſe plus d'excellence quē l'Empereur. Quand eſt de moy, à la verité ie n'en ay iamais veu, fors que du cuiure metal aucun qui ſoit trouué pur ſans ſa miniere. Si eſt-ce que ie croy bien qu'il ſoit poſſible d'en trouuer. Parce que ie congnois la puiſſance de la nature, pourtant qu'elle ne tend à autre fin qu'à la perfectiō & purité. Et diſ dauantage, que la pluſpart de minieres que i'ay veu, n'ont pas eſté ſans quelque miſture, & non pas ſeulement de ſa terre, mais des autres metaux. Et principalemēt en celle que i'ay ouy nommer d'argēt plus qu'aux autres, ſauf que ce ne fuſt à celle qu'on tire à Schir *in vigentina*. Et pour autant que telles dubitatiōs naiſſent, non pas ſans vmbre de grāde raiſon appārete, ie croy cōme i'ay dit parauant que l'argēt peult auoir propre miniere. Pource que toute ſubſtāce qui ſe cōuertit en metal,

peult estre à par soy en son espece, comme elle est separée à part, encores qu'elle soit avec les autres meslée : comme on veoit en vn mesme corps qu'en chacun il s'engendre son metal. Et par ainsi beaucoup de fois, aduient que qui parle de la miniere de l'argent en vne mesme parole, sans faire distinction, parle de celle de tous les autres métaux : pource qu'il est bien peu de minieres qui ne soient meslées. Mais pourautât que tousiours les choses plus nobles, ont ceste prerogative que leur nom couure cestuy des autres, là ou il n'y a argent ou or, elles ne sont pas appelées d'arain, de plomb, ou de fer, cōbien qu'elles en soient la plus part, mais d'or ou d'argent sont nommées, sinon que la quantité beaucoup dauantage les surmontast. Mais laissant maintenant à part telles choses, ie vous dy pour autant que i'ay veu que telles minieres sont meslées de diuers métaux, d'autant plus elles montrent leurs fumositez & tainctures diuerses. Lesquelles sont signes & argumens à nos yeulx, là ou sont lesdicts métaux, & de quelle purité. Pour autant que chacune selon sa nature, fait sortir dehors sa couleur en demonstrent hors de la pierre, l'une d'azur, ou de bleu, l'autre de ver, l'autre ianne, ou de couleurs meslées, selon les compositions & mistures des premieres matieres des métaux. Et ainsi sont les couleurs plus & moins, selon la quantité qui s'en trouue la assemblée. Et pour parler proprement de ce metal appelé argent, les philosophes speculateurs des choses naturelles, disent qu'il s'engendre de substance, qui a plus d'eau que de feu : & toutes les autres parties estre semblables & pures, non pas toutefois tāt comme sont celles de l'or. Et pour autant il est de moindre perfection, & encores d'autant plus debile cōme l'influence de la Lune est moindre que celle du soleil : cōbiē qu'à nous elle nous soit beaucoup plus proche. Ceulx qui sont experimētez disent qu'il s'engendre volontiers en vne pierre semblable à l'aubereau dit Albassan, duquel ay parlé cy dessus. Et aussi en vne autre pierre de couleur grise obscure & noire. Et bien souuēt se trouue à vne pierre semblable au treuertin, ou dedans le treuertin mesmes. Sa miniere est fort pesante, & bien souuent a le grain luisant & cler. Lequel  
d'autant



d'autant plus qu'il est menu & semblable aux pointes d'eguilles, d'autât plus il est en perfection: pource qu'elle demontre purité & fixation. Et quand elle se trouue en vne pierre blanche & plombeuse, elle est beaucoup meilleure: pourautât que ladicte miniere facilement se purge tant de sa pierre que de sa terrestrité, & ainsi quand on la trouue separée quasi deffoubz l'escorse de la terre quasi comme truffes. Ils disent aussi qu'elle est parfaite, combien qu'elle n'ait pas à l'œil certain splendeur comme ont les autres. Ils disent dauantaige qu'il s'en engendre vne terre grise obscure: & que quand il y en a en telle terre on y en trouue en tresgrande quantité, & de grand perfection. Et que beaucoup y en a au dedans de la montaigne, & qu'elle seroit d'autant meilleure, d'autant plus elle seroit luyfante & de couleur rousatre ou rouge. Et afin que vous entendez mieux les signes des minieres du metal susdit, il fault que vous sachiez comment tousiours ensemble avec les minieres, premier qu'elle se trouue, ou apres l'un l'autre, ou ensemble qu'il y a avecques elles de la margasite semblable à l'or. Laquelle d'autât plus qu'elle est de telle couleur painte, d'autant plus elle monstre d'adustion & de calidité: Chose qui est cōtre la nature de son metal. Parquoy selon les degrez de telle couleur on peult quasi iuger, combien sera grasse ou maigre ladicte miniere. Alors celles qui dōnent de soy bonne esperance, se doiuent au plus pres qu'il est possible suiuir, & doiuent estre de grain menu, & non pas en grande quantité. Et cecy est vne reigle generale sur toutes les margasites, que d'autant qu'elles sont plus deliées & menues, d'autant plus monstrent leurs minieres excellentes, De ceste mine d'argent on trouue souuent vne veine grande & grosse, mais quant à la vertu & bonté est si mauuaise qu'elle ne peult pas rembourser les frais de la tirer, Pource que combien qu'il y ait grande quantité de matiere, elle est dedans quelque roche dure comme l'albereau ou moyne, qui est quasi impossible à rompre. Quelquefois se trouue en compagne de cuiure ou du plomb: là ou semblablement elle se peult à grand peine esgaler à la despence. Et combien que tous ces trois metaulx souuent se trouuent ensemble, neantmoins il ne fault ia sincommoder de

fy arrester. Que sil aduenoit qu'on se trompast à ce, il fault vsér de la prudéce & industrie de l'art. Et supposé que nous vueillions separer l'argent, il faudroit augmenter le plomb. Et si vous ne vous souciez de reseruer l'argent, il faudroit augmēter le plomb. Et si vous ne vous souciez de reseruer l'argent ne le plomb, mais seulement le cuiure, il y fault proceder avec longueur & grande force de feu iusques à ce que les matieres plus debiles se consomment. Mais telle chose aduient plus souuēt aux minieres qui ont du fer. Et finalement ny de l'une ny de l'autre on ne peult donner reigle en particulier, mais selon leur qualité & nature est necessaire prendre party, & d'autant plus qu'on les voit meslées avec quelque terre aride, avec quantité d'antimoine ou d'arsenic, qui sont matieres toutes euaporables & fortes à reduire. Et pour autant souuent les maistres se trouuent las & vaincuz d'icelle, comme chose inutile, & l'abandonnent. Dequoy souuēt on pourroit donner la coulpe à leur imprudéce pour les longs & extraordinaires feux qu'ils luy donnēt. Et qui ensuit ceste voye communement, sil ne l'accompagne avec choses qui la defendēt de feu, elle deuient inutile. Et leur aduient ce que dessus est dit. Dont là ou il y a abondance de telles matieres adustes, ou trop aqueuses qu'ils nommēt, l'un soufre, l'autre mercure ou vif argent, non pas encore arresté ou fixe, ou arsenic, il fault que l'un qui est le soufre, brusle l'argent, l'autre l'en emporte qui est le mercure, & ainsi souuēt de la miniere n'en demeure que la partie terrestre, & bien souuent infusible ou impossible à fondre. Donc il fault pour sauuer ladiēte miniere vsér d'art de patience & de moyens conuenans. Et premierement comme par voye commune on les doit euaporer, ou sans les euaporer les bien piller, & depuis les mouldre & bien lauer, & finalement sinon par le moyen des grands feux, au moins par baings de plombs les nettoyer. Et pour faire tel effect, si on peult il fault essayer sur la mesme meule ou elles sont mouluës si avec l'argent vif se peuuent assembler & malaginer ensemble. Lequel moyē est tresbō, si la matiere est de nature essuyée & seiche. Et sçay que beaucoup en vsent y trouuāt grāds profits. Et principalement de la miniere dont vous ay auparauāt parlé

parlé qui se tire en Vigentine, a Schio, à Ricca & à Buoua. Et parce, vous dis que vous les prenez: car toutes sortes de minieres ne s'attachent pas. Et de telle dont vous ay dit, ay entendu sy estre trouuée telle piece qui auoit le quart d'argent, & qui plus que la moitié. Et ceste cy estoit quasi à la superfluité de la terre, & en trouue-lon en la place, & quelquefois selon qu'ay entendu, on en a trouué sous les racines des arbres arrachez de bien parfaite. Tellement que combien qu'en aye veu beaucoup en la seigneurie de Venise, comme en la Cargnole, & en beaucoup d'autres, & en autre lieux, ie n'en veis iamais de meilleure, combien qu'il y en ait beaucoup de minieres, i'açoit qu'elles sont plus de cuiure que d'argent: entre les autres au mont d'Auanzo y en a vne, là ou avec quelques gentils-hommes i'ay eu charge, & y estant receu à faire pour quelque temps labourer, ayant sur moy toute la charge, trouué occasion d'aller voir d'autres. Et ainsi deux fois passay en Allemagne, pour voir celles qui sont en ce pais-là: & pour m'en faire plus certain, maintenant y enuoyant pour m'informer, maintenant vsant de la veuë, cerchay d'entendre, & quelquefois de ceux qui en scauoient, & en auoient la pratique. Tellement que i'ay prins telle congnoissance, qu'elle me seruit à celle-là ou nous auions commencé, en sorte que nous en eussions bien fait vn grand gain. Car elle renoit plus de trois onces & demie d'argët, pour chacun cētenaire de miniere, si n'eust esté qu'il fourdist vne grosse guerre entre la seigneurie de Venise & l'Empereur Maximiliam, laquelle guerre feit que les lieux de Carquaole & de Friuoli, ne se peurent habiter. Et ainsi nous contraignit à abandonner nostre entreprinse, & à gaster tous les preparatifs qui estoient faicts: & pour autant que ladicte guerre dura long tēps, nostre cōpaignie se deseist, de là ou ie prins autre chemin. Mais toutesfois i'ay tousiours pēsé en cecy & l'ay suiuy. Dōt estant aduenü que ie retournay, vne autre fois en la haulte Allemagne, ie cherchay plus diligemment qu'auparauant de m'en enquerir & d'en voir, & fut à Sbozze, à Plaiper, à Inspruch, à Halla, & à Arotinbergh. Et depuis ay esté en Italie en beaucoup de lieux. Et pour conclusion ie n'ay iamais trouué de meilleures, ne

qui tiennent plus d'argent que celle de Vigentine en certaine pierre grise, comme i'ay dit dessus. Et maintenant pour generale admonition, ie ne veux faillir à vous dire, que si paraduéture vous mettiez à tirer miniere, & que vous rencontraissiez margasite & miniere ensemble meslées, vous vous ostiez de l'entreprise. Car c'est signe que la mine est pres de la superficie de la terre, & est de peu de qualité. Et pour le present de telle miniere d'argēt, ie n'en sçay ne puis dire autre chose, sauf que ie demonstasse le moyen de la purger de sa terrestrité, & la reduire en son metal. Mais pour autant que i'ay deliberé d'en dire amplement en son lieu, disant des fusions ie m'en iray outre à present sans en dire autre chose.

*De la naissance & nature du cuiure, & de sa miniere.*

*Chap. 3.*

**I** O V T homme qui s'entend de ceste miniere d'airain, dit qu'on en trouue en diuerses parties du monde, & principalement l'Italie en estre tresriche: comme bien qu'on en tire peu: parauenture plus par faulte d'une pusillanimité d'auarice Italienne, qui a pouuoir de nous faire paresseux & tardifs à la resolutiō de ces nobles haulx & beaux desirs, qui par raison nous deuoyent faire courir en haste à telles entreprises: ou parauenture parce que nous sommes accoustumez sinon aux gains accoustumez, & de faire entreprise, en laquelle se demonstre certaine assurance de retirer avec vtilité ses deniers. Il pourroit estre que ce fust en partie par les communes facultez & moyens des particuliers, qui sont petites, au regard de telles entreprises, qui ne se peuuent cōduire sinon avec grand despence: & dauantage sont doubteuses, par ce refroidissent les courages, & au lieu de les eschauffer, y introduisent la crainte du dommage, craignant qu'on y perde avec le temps les labours, & les despens qu'on y feroit. Adonnez-vous y donc, vous persuadant la difficulté de la trouuer, l'impossibilité de l'auoir, & avec les forces des biens & des hommes pensez qu'il vous fault tirer des tresdurs os des montaignes les minieres à ce qui se peult adioindre. Dauantage ce que beaucoup de gens craignent, que cōmenceant



mençeat telles entreprinſes, on ne ſoit de certains ignorâs mocquez, leſquels penſent qu'il ſoit meilleur de ſe faire louer d'eſtre deuenus riches par force vſures, pilleries populaires & choſes vituperables, que de ce mettre en vne choſe iuſte à peril de blaſme de tels ignorans : comme ainſi ſoit qu'ils ſont beaucoup plus à blaſmer. Et cecy eſt vn erreur plus inutile, que celui de telles perſonnes, qui par tel eſgard ſ'en gardent : & principalemēt comme ſont Princes & perſonnes puiſſantes & riches, qui ont occaſion & commodité de pouuoir non ſeulement comencer, mais pourſuiure vn ſi vtile & louable effect, comme à tirer les minieres : & ſeulement par puſillanimité ſe tirent en arriere: ou bien qu'ils preſtent les oreilles aux abais des ignorans repreneurs, ou par leur propre volonté, veulent eſtre priſonniers de la vilaine & deteſtable auarice, & de l'erreur des deſſusdits. O combien eſt beaucoup plus grand ledit erreur, que pour acquerir richèſſes, ils ne craignent point les tres perilleuſes & profondiſſimes eaves de la mer, ne la violence & contrariété des vents, ne les continuelles moleſties & inquietudes tant de corps que d'eſprit, ne les euidens dangiers de perdre la vie, ne les intollerables malaiſes & afflictions de chault & de froid, & d'infinies autres choſes. Leſquelles au penſement & non ſeulement à la veuë, deuroyent rendre quelque raiſonnable & fortiſſime courage que ce fuſt tout eſtonné, outre la continuelle anxieté, qu'on a de la crainte & paour d'eſtre là prins des courſaires ou infideles, ou autres ſemblables gens. Parce que bien ſouuent aduient que ſ'ils vueillent eſchaper la vie, ou ſe ſauuer en liberté, il ſe faut bien ſouuent ietter entre les bras & miſericorde des treshorribles vndes de la mer monſtrueuſe, qui bien ſouuent ſont plus cruels ennemis que ne ſeroit leur cupide chercheur. Et en telle leur entreprinſe n'ont aucune-fois aſſeurance que de la groſſeur de deux doigts de bois, & bien ſouuent moins. Mais ie diray dauantage d'un mechant clou, ou bien d'un peu d'eſtoupe poixée. Auſquels ſil auient que quelqu'vnes de ſes malencontre luy deſaillent, bien ſouuent payent la fraude & l'vſure de leur temerité, avec vne telle repentance, eſtans tout en vn coup abyſmez & la perſonne & les richèſſes

ensemble, en la grand gueule & profondite d'un tel monstre sans aucune esperance d'en eschaper. Et si parauenture telle chose ne leur aduient, telles gens sont continuellement au chemin de mal repos, ne regardant qualite de temps ne faisons, ny le iour, ny la nuit, ny plus les vents contraires que les prosperes, avec lesquels l'hyuer outre les grans froidures qu'il leur apporte, sont avec eulx en continuelle bataille. Et au contraire en esté parce qu'ils leur faillent, ils se trouuent sous la reuerberation des grandissimes chaleurs du soleil quasi pour vaincus dedans la bonasse ou repos de la mer, desquels & des chaleurs excessiues sont destruits. Lesquelles choses susdittes & beaucoup d'autres, combien qu'ils se voyent, & de iour en iour le prouuent, neantmoins il y a des personnes tellement tirées d'auarice, qu'ils ne s'en scauroiēt abstenir. Sans considerer que combien qu'ils arriuent au lieu designé, ils se trouuent estranges en pais incongneu, & entre gens plus bestiale qu'humaine, & là ou on n'vse point de leur langue, & qui de tout sont de nature & de coustumes differentes aux beaux vsages que raison a fait nourrir dedans nos pais & provinces. Et pour cecy voyant comment ils laissent icy tant de richesses & de graces singulieres toutes comme perdues & abandonnées, & comme si elles estoient telles, qu'elles ne peussent à leur cupidité suffire : ou bien que difficilement & qu'autrement n'en peussent iouyr, sauf qu'avec les moyens dessusdits, il m'a semblé pour descharger vn peu ma cholere contre telles gens de faire ceste digression, vous disant ce que ie dy. Et principalement parce qu'à tels on peult dire que les tresors que ie dy leur soient en la sorte que i'ay dit assemblez en leurs coffres iusques sur leurs propres parens. Et despouillant les hospitaux & lieux dediez à dieu & des eglises, desrober les choses sacrées & les publiques de leurs pais mesmes quand ils le peuvent. Et dauantage ie congnois qu'il s'en treuuent de tels que non seulement font faulte vers aultruy, mais à eulx mesmes, non pas seulement aux vestemens & autres commoditez, mais de leur viure necessaire & conuenante, ne congnoissant ne consciēce, n'y pitié, n'y autre chose, soit la raison, soit chose licite ou illicite.

illicite. En telle sorte que souuēt il ne se soucie de difamer la générosité & clarté de leur lignée, en ce demettans quelquefois à tels exercices que quelconque homme pour vil qu'il soit, deuroit auoir horreur & grande honte non seulement de l'auoir fait, ains de l'auoir pensé. Mais combien dirons nous qu'est grand le nombre de ceulx qui s'appellent marchans, lesquels seulement pour acquester donnent leur facultez acquises à personnes que iamais n'ont veües. Et ne sçauent sinon par breuet ou par lettres qu'ils sont, lesquels incontinēt qu'ils ont telles choses en leur pouuoir, ou ils les iouent, ou les dépendēt en yurôgnerie & en paillardise. Parquoy toute chose contraire qui leur aduient est pour vn leur propre chastiment, puis qu'ils cōmettent tel erreur que de laisser ceste voye naturelle iustissime & bonissime du labour, & tirer de la terre, qui est le plus grand fruiēt qui se puisse trouuer, puis que si liberalement la nature pour nostre seruice la produit. Et ne pésent pas les aueugles & gros ignorās, combien tels affaires sont louables & vertueulx. Et comment par moyen de tirer telles minieres, il pourroit aduenir qu'en vn seul iour, voire en une seule heure, non pas avec leur propre peril & labour, mais avec celuy seul de leur ouuirers & mercenaires, sans aucuns dangiers, facheries, outrages, ou autres empeschemens des chemins, ils pourroient deueuir tresriches, & auoir de l'or & de l'argent beaucoup plus grand'abondance que n'en sçauroit iamais rendre la vituperable vsure, ou la dangereuse nauigation, ou quelque autre sorte que ce soit des peu raisonnables & pernicieuses entreprinſes. Parquoy ie dy & conclud que ces dons de si excessiues graces que le Ciel concede, iceulx laissant à la posterité des futurs siecles, & ne les meritent pas & defaillent à eulx mesmes, & à la patrie & prouince là ou ils sont nez, à cause des grandes vtilitez & commoditez qui s'en ensuiuent. Et dauantage defaillent à la nature, parce que les choses qui sont d'elle produittes, ne sont de telles gens autrement estimées, que si en tel lieu elle n'eust rien ou bien quelque chose inutile produit. Dont on pourroit dire dauantage qu'ils defaillent & font iniure à tous les viuans autant presens comme aduenir: pour autant qu'ils n'aydent pas autant cōme nous sommes

tous obligez à la generation vniuerselle. O de combien grande peine & reprehension seroient dignes les laboureurs, si quand les fruits de la terre sont en maturité, en lieu de lesrecueillir ils les laissent pourrir aux champs & du tout perdre, comme font ceulx icy? Et pour tout certain on voit, & ceulx icy fils vouloient, veroient aussi le grand erreur qu'ils se commettent, principalement estant des richesses tant cupides comme ils sont. O quel grand erreur font ceulx qui mettent du tout leur soin & cure à tirer les minieres, dedans lesquelles toute despence qui se met bien peu souuent aduient qu'elle ne retourne au double, sans le peril d'estre rompuë en mer, ou des autres dangers, lesquelles en tous les autres chemins, va querir richesses, ont coustume aduenir, & outre aux choses predictes, encores que lesdits dâgiers n'aduinent pas. Les moissons & recreutes ne viennent sinon vne fois l'an, comme de la labourieuse agriculture, mais en ceste cy continuellement, de toute saison, & de tout temps & à toutes heures. Et dauantage souuent en telle quantité, qu'ils vueillent les recueillent, s'ils vueillent mettre en œuvre le pouuoir, l'esprit la patience, & le vouloir de continuer iusques à tant qu'à ceux qui cherchent, se donne la voye de paruenir, là ou la chose de faict se retrouve. Mais laissant maintenaut telle digression, combien qu'il me semble d'en pouuoir dire dauantage, ie m'en vueil retourner à l'ordre de nostre chemin, duquel non pas sans cause grande m'estoye destourné. Et maintenant ie vous dis ainsi que la miniere de l'airain, comme les autres, s'engendre dedans les pierres des montaignes, d'une substance elementaire terrestre avec peu d'acquosité, avec proportion des autres qualitez & des substâces nécessaires, qui sont nourris de l'influence deuenus, avec les qualitez generatiues & productiues, que la nature luy concede. Et pontant qu'elles ne sont pas de si grand purité & si subtiles, elles ne peuuent pas encore faire si bonne decoction ou miction, comme celles de l'or, ou de l'argët. L'airain en sa particuliere nature, est iugé par les philosophes estre chaut & sec: & en sa generation sa substance est quelque peu aduste & qui rechaufe. De ce que procede la rougeur de couleur. Et parce que les autres substances



substances à cause de leur impurité ne sont pas bien conioinctes ensemble, elles le sont estre imparfait. Les maistres qui en labourent, quād il est seul, l'apellent metal malade, terrestre & pailleux: & à cause de telles imperfections ignoble, & principalement parce qu'en labourant se conuertit en chiasse, & dedans le feu facilement se calcine & resolut en pouldre, & sa facilité d'estre tiré, tant contraire à la nature des choses trop terrestres, ils vueillent qu'elle procede de la grande vnctuosité mineralle qui est en luy. Lesquelles choses de speculation mettant à part, ie vous dy que la miniere se monstre de diuerfes couleurs, & aussi s'engendre en diuerfes sortes de pierre, & avec luy quelques fois la nature produit l'argent, & quelques fois le plomb. Mais le signe qu'il demonstre en ses fumositéz, quel miniere, c'est à la voir non pure, elle les fait azurez & iaunes, & les lieux ou telle miniere s'engendre, souuent se congnoissent par la rupture de sa pierre, pource que (sauf que de l'or) là ou ce metal s'engendre, il le rompt & brise plus qu'aucun autre des metaux. Ce que fait semblablement celle de l'argent vif. Et croy que de cecy soit cause son aduste substance, laquelle ensemble avec sa grande chaleur enerue & destruit l'humidité des parties conioinctes dedans les pierres. Laquelle parce qu'elle est pleine de feu, chassée de l'humidité & frigidité des eaues inferieures pour fuir les natures cōtraires, cherche de se retirer en hault, & quasi à force comme elle entre par tout, ainsi comme dedans les pierres, elle les va viuifiant & derompāt comme i'ay dit. Lesquelles choses quand elles se voient, sont manifeste indice, non seulement qu'elles ont en soy miniere, mais qu'elle est d'airain, & qu'il y en a grande abondance. Mais par ce que l'on ne peult avec l'œil penetrer dedans les choses interieures, il faut venir à la congnoissance du vray essay. Et par ce faut cauer quelque peu de ladicte miniere qui se monstre au decouuert, & diligemment vne & plusieurs fois en faire essay. Et si elle est de couleur bleu en pierre ou roche grise, avec quelque petite veine de vert, ou de couleur iaune, on en peut estimer vn grand proufit: parce qu'elle donne indice d'y en auoir beaucoup. Encores on en trouue quelquefois d'autres de mesme couleur,

mais non pas si obscur qu'elle semble noire, qui sont aussi bonnes & faciles à reduire: & en somme sur toutes autres celle qui se trouue dedans le moyne ou labereau, de couleur verdoyant sur le bleu, c'est la plus pure & la meilleure. Et donnez-vous de garde que là ou vous la trouuerez de debile couleur, ou dedans la dicte pierre, ou dedans l'autre, elle sera de peu de substance. Et à celle fin que vous ayez plus de certaineté, là ou telle miniere soit, outre à beaucoup d'autres signes que ie vous ay monstré: ie ne vueil faillir à vous dire que vous ayez esgard pour mieux la trouuer aux rocs & pierres descouuertes aux montaignes, entre lesquelles vous verrez quelques parties reluisantes comme de talche, & aux eaues qui des monts descendent. Lesquelles outre qu'elles ont en soy certaine verueur, rendent au goust vne metalique faueur: & le temps d'esté sont tresfroides, & l'hyuer tiedes. Et souuent là ou elles s'arrestent, font vn liét de putrefaction verte, grosse & gluante. Par lesquels signes les hommes practiciens prennent non seulement esperance, mais quasi vne certaineté de deuoir là enuiron trouuer miniere d'airain. Laquelle comme ay susdit tirée, & comme ie diray preparée & fondue, si vous en auez grande quantité, vous aurez contentement de tout vostre desir. Parce que posé, qu'elle ne fust en toute perfection, la quantité recompense: par ce que la nature benigne nous en produit & donne. Et à celle fin que nous en accordons à nostre besoing, elle l'a faicte flexile & ployable, & disposée aux fusions: & aussi a fait la commodité d'en faire infinies compositions pour ouurages. Et est quasi tout le fondement des sophistiquaux alchumistes, ains c'est leur anatomie, comme aux philosophes alchumiques le mercure. Et en tous les païs du monde l'airain se met facilement en cœure, & facilement se tient en couleur iaune, avec la callamine ou turie, & bien souuent de telle couleur qu'à l'encontre d'icelle, l'or l'accompagnant se calcine, avec pouldre de soufre, ou avec sel alteré, & se fait de rouge blanc, en la meslant avec l'estain & avec l'arsenic, ou quelque autre sorte de venin, que vous le fondez. Il y en a quelques vns qui dient qu'avec le moyé de certaine leur art par cimens, & autres preuues materielles,

ils en

ils en tirent quelque partie d'or. Que s'il est vray qu'il en contiennne, ie croy que ce soit bien peu. Par ce que ie ne congnois en luy mission qui se conforme avec l'or, neantmoins si ainsi est qu'ils le facent, d'autant plus le faut estimer entre les belles oeuvres de Dieu & de la nature.

*De la minire du plomb & de sa generation.*

*Chap. 4.*



E pousuiuray maintenant en ce chapitre à vous parler du plomb, dedans lequel, parce qu'il y abonde beaucoup de partie aqueuse, & pourautant qu'il a encores les autres substances concurrentes à sa composition fort mal meslées estant en icelle grande impurité. Et est dit metal imparfait & lepreux, & peu fixe, comme il demonstre apertement par sa facile fusion. Et parce qu'il se conuertit facilement pour la plus grand part en chiasse quasi terrestre: Outre à la peinture qui le laisse aux choses là ou on le frotte. Neantmoins considerant ses effets nous iugerons qu'il est metal, auquel nous sommes tenus d'auoir grande obligation: Pource que la nature nous a donné dedans les cœurs si grand soif & desir d'auoir or & argent en grande quantité, & aussi les pierres precieuses. Lesquelles choses si nous n'auions le plomb, ou vrayement nous ne les congnoistrions point, ou bien nous trauailleriõs en vain pour les auoir: parce que sans son moyẽ il ne seroit possible d'auoir sceu tirer de l'airain l'argent & l'or, & aux pierres precieuses oster ce voile terrestre & pierreux, qui leur beauté & clarté couure & obscurcist: ne finalement sans iceluy les eussions sceu rendre polliès ou quarrées, ne leur donner la perfection de leur splendeur. Et pour conclusion si la nature tresliberale de ces excellences ne nous eust donné ce metal, comme elle à fait, nous pourrions parauanture dire que nous serions priuez de toutes le choses: lesquelles ou par leur beaulté, ou par la difficulté de les auoir, ou parauanture par quelque leur excellente vertu, si precieuses nous estimons: & parce cõme chose vtile nous le deurions auoir en pareil prix & estime comme nous auons les choses que tant estimons, puis qu'il est comme

i'ay dit, la cause & moyen que nous possédons tant les pierres précieuses, comme le plus parfait des métaux. Et avec la féurté & faueur d'iceluy, nous nous osons enhardy d'aller iusques dedans les entrailles des tresdures montaignes, à trouuer dedans les regions & lieux desers & sauuages les autres metaulx, & de cestuy cy ainsi comme il cherche tousiours d'accommoder les effets de tous les autres, aussi la nature en a donné grande abondance. Tellement qu'il y a peu de lieux mineraulx, là ou il ne se trouue de sa miniere: quasi comme s'il se vouloit offrir au parauant pour ayder à nos necessitez, comme ainsi soit que les substances des minieres qui en soy ont or ou argent, iamais ne scauroient estre sans luy separées: Pouraunt que sont choses à nos yeux incomprehensibles. Et que comme on voit, autrement ne seroient en soy vnies. Que comme les esprits sont dedans les corps viuans, ainsi comme il appert en diuerses mistions de métaux cōuenans l'un à l'autre, comme l'argent, l'or, le cuiure, le plomb, & parauenture le fer. Et dedans les minieres fondues souuent tous quatre se trouuēt ensemble meslez, & n'est possible par autre moyen les voulant tous conseruer, de les separer chacun à par soy, sauf avec le plomb: Et depuis tant de nobles vtilitez. Dauantage il ne cesse par ces autres vertus d'aporter beaucoup d'autres commoditez aux humains, parce que iusques aux medecins, qui en beaucoup de medecines s'en seruent. Et en particulier les dames luy sont fort obligées, puis qu'avec l'art il se dispose à certaine blancheur comme de ceruce, laquelle a puissance en leur faisant masque, de couvrir toute leur apparente & naturelle noirceur: & faire en telle sorte qu'elles trompent la sainte veuë des hommes, en se monstrant de noires blanches, & de tres-laidés belles, au moins non pas si laidés. Mais laissant à present de reciter toutes ces particulieres vertuz pour n'estre trop long, ie vous dy retournant à nostre chemin, que la miniere qui produit & engendre tel metal, se trouue en beaucoup & diuers pais, & en diuerses pierres & terres, & quelques vnes se trouuent meslées d'argent, & quelques autres meslées d'or & d'argent ensemble. On trouue communemēt en telles minieres vne pierre spongieuse appelée colombine,



colombine, qui est de couleur blâchatre, semblable au treuertin, avec certaines pointes dedans qui sont fort dures à tirer. Or on trouue encore en vne autre espece de pierre de couleur rouge quasi semblable à la pierre ferrugineuse rouillée qui auroit esté en l'eau. Et dauantage on en trouue en certaine pierre de couleur cendrée, comme en Andalusie Aggioaga. La meilleure miniere entre toutes, ainsi que l'experience se trouue, est celle qui naist dedans le roc blanc dessusdit. Principalement celle est de menu grain & claire, ou en vn certain terrain, lequel seulement en le lauât quasi se purifie. De ce metal toute miniere en quelque lieu qu'elle soit facilement se tire, & estant tirée dauantage facilémēt se purge de la superfluité terrestre. Il se fond avec peu d'art par soy seulement, & encores souuent avec d'autres minieres pour euitier labeur & despence: ou bien pour disposer les autres qui feussent dures à plus facile fusion: ou pour defendre de la grande ardeur du feu, afin qu'il ne laisse brusler l'argēt par l'arsenic, ou de paour qu'il ne l'éporte. On fait pour cecy (quand il est pur) pour le fondre vn fourneau quarré, ouuert par dessus, grâd & hault, selon le vouloir du maistre, de forme semblable à cestuy là qui se fait pour fondre auant de l'air. Et au moins quand il aduiendroit qu'on eust bonne quantité de miniere, faire vn quarré de trois ou quatre bras. Et apres au plain de la terre à trois quars de bras, ou peu plus. Et en lieu de griles de fer y faire autant de petits ars comme en peult tenir la capacité du lieu, les faisant d'vn doigt pres l'vn l'autre: & au fond faire à trois faces, comme vn taiz de pol dedans vne terrine. Lesquelles feissent par leur dependance vn canal: & l'autre face & celle de deuant faudroit laisser ouuerte pour l'entrée du vent, & pour la sortie du plomb. Ce pendant qu'en ce fondant il chet, la laisser ouuerte. Et ainsi par telle forme que ce fond estant semblable à vn canal, le plomb courant puisse arriuer en vn receptacle grand fait par derriere, ou du costé de la bouche que ie vous ay dit, qui se laisse ouuert par le ventre, & pour tirer le brasier qui chet de la terre de la miniere. Et ainsi de ce plomb purgé qui va dedans le receptacle, le laissant en iceluy refroidir: en vne autre forme on en faict de grands pains de tel

poix que lon veult. Et cecy est la voye commune qu'on a accoustumé de tirer le plomb, par laquelle aussi on pourroit tirer les autres minieres, si elles n'estoient trop aigres: & à celle fin que mieulx vous pouuez cōprendre la forme que veult auoir le fourneau, ie vous l'ay icy le mieulx que i'ay peu en peignant demonstté. Auquel quand vous voudrez faire labourer, au dessus des arches se met vn liēt ou renc de boys, & puis se couure de charbon, & au dessus se met vn liēt de miniere, & ainsi puis vn autre liēt de boys de charbon & de miniere: & ainsi emplissent le fourneau iusques en haut, & y mettent le feu, le laissant de soy mesme peu à peu labourer. La miniere qu'on met dedans, doit estre en petites pieces ou bien pillée, & bien lauée ainsi que vous voulez, ou que vous cōnoissiez qu'il est de besoing, & la laissant en ceste sorte là biē escouler, & en bien laisser sortir le plomb, la terre demeurera toute seiche sur les arches, ou bien entre les charbons, & dedans les cendres se trouuera cheutte inutile, si par aduenture il ne tenoit autre metal. Et en ceste maniere il s'en peut continuellement fondre, en adioignant ainsi comme les lices vont, abaissant nouuelle miniere avec boys & charbon: & en ce cas que la miniere fust de nature de roch, ou tint autre sorte de miniere, tellement que par sa durté, la miniere dessusdictē ne peust seruir, vous prendrez miniere bien pillée & bien lauée, & ferez vn receptacle à la mode d'un ceneracio ou de cendrée de terre d'argille, de cendres & feuilles, grand ainsi que vous voulez, & en ice luy bien serré & bien battu ou pillé, & finalement recuit & fait bien chault avec charbon bien allumé, vous mettrez dedans vne quantité de plomb bien purgé. Et puis avec boys & charbons que vous y aurez mis, quand vous le verrez biē chault, vous irez mettant de la miniere, à celle fin que peu à peu eschaufée elle voise choir au milieu du bain, & se fondre. Auquel donnerez à costé vn peu de sortie, à celle fin que selon le plomb se fondant il puisse sortir dehors, & avec vn fer tiendrez le bain net de la chiasse ou escume. Et en cas que ceste sorte: si deuāt declarée par la forte mistiō de la miniere, ou par l'adustion de la pierre ne pust seruir, & y faillust mettre le feu plus fort, vous vserez de la maniere ou long tuyau

tuyau comme on fait aux autres metaux. Combien que si vous venez à tel effect par necessiité, ce ne sera pas miniere de plomb, ains seront matieres de quelque odeur de fer sauuages & dures. Et pour autant qu'il est possible que vous ne sachiez pas, & desirez de bien sçauoir la maniere de telle fusion dedans les choses consequâtes, & aux procedures du liure vous sera declarée. Mais par ce que ie vous ay dit qu'il est bon de fondre toute miniere de plomb avec celle de l'argent, ie vous dy qu'en ceste sauuage plus qu'en autre est vray, par ce qu'elle attét vn peu plus le feu, & s'empaste l'vne avec l'autre, & l'vne par l'autre se fondét en vn temps & l'argét se defend mieux du feu. Et que telles minieres qui ainsi font, doyuent ainsi faire, non seulement s'est veu & peut voir continuellement l'experience, mais la raison apparente y est. Pour autant qu'entre les metaux & la pierre, la nature a fait certaine colligance d'vion amiable, par laquelle l'humidité du plomb & l'aridité, & le chaut avec le froid se conioignent ensemble, & ainsi se temperent ensemble, & celle qui est dure se fait moyennement molle & apte à fusion: & tost sort du tourment du feu, & plustost qu'elle n'auoit pas fait de par soy mesme. Parquoy l'argét se vient à conseruer, par ce que le plomb est metal qui avec tous autres se lie: mais avec nul ne se lie, tellement qu'il ne se puisse separer, sauf avec l'estain. Parquoy les ingenieux maistres y ont non seulement trouué la deffence de l'argent en sa fusion, mais le moyen de le separer des autres metaux, & le purger de toute autre compaignie. Et les alchumistes aussi se seruent fort de luy en leurs operations, maintenant le calcinant par soy seul, maintenant avec l'estain, par le moyen de tresfors & puissans feux de reuerberation, combien qu'avec le soufre, le sel commun & l'arsenic, se calcine. Mais il me semble que sa calcination faicte par feu de rabat ou de reuerberatiō fait vn merueilleux effet, & digne de n'estre obmis par silence, par ce qu'on trouue en effet. Car ils croissent huit ou dix pour cent de poix plus qu'auant la calcination. Dont considerant qu'elle est la nature du feu, lequel toutes choses diminuant leur substance consumé, c'est chose admirable d'ou procede cela que deuant diminuer le poix, on le trouue

creu. Car ayant long temps esté au feu, il semble qu'il se doit consumer vne partie. Ce qu'on voit au contraire. Parauenture que ce seroit par la nature du feu elementaire, qui là dedans se consume. Et pour rendre raison à tel affaire, on dit que le corps tant plus est dense en sa nature, tât plus est gref (ouy bié croissant de poix) & de telle composition de plomb luy estant leué du feu, comme à metal mal meslé, les parties acrées & aqueuses deuiennent solides: parce qu'estant rencloses, l'air qui les tenoit en quelque legieresse est dechassé. Et ainsi comme chose abandonnée chet en soymesme, & ainsi vient à demourer plus en sa grauité ou pesanteur. Comme encores on voit aduenir le mesme à vn corps d'un animal mort, lequel en verité pese beaucoup plus que le vif. Car comme on voit estant resoubz les esprits qui le soustiennent en vie il chet. Et ne sont lesdits esprits (qu'on puisse comprendre) autre que substance avec qualité d'air que le soufflieuent vers le Ciel & l'alegierissent, laquelle substance separée, les forces accroissent aux choses graues qui le tire vers le centre. Et ainsi se resout le doute que i'ay proposé.

*De l'estain & de sa miniere.**Chapitre. 5.*

Vi seulement par la veue prendroit l'occasion de considerer l'estain de sa blancheur, pour certain il croyoit que ce fust argent trespur, ou quelque chose à sa nature bien prochaine. Et ce tant plus dauantage comme estât manié est trouué de plus grande durté que le plomb, avec lequel il y a plus grande & plus prochaine semblance. Mais qui avec la vraye experience cherche, congnoist que de tous les autres metaux il ny en a nul qui moins avec luy conuienne, considere que l'argent se mesle avec tout metal, & aussi fait l'or & s'vnissent l'un avec l'autre, & ainsi font les autres, & sauf leur couleur ils changent peu leur nature. Mais là ou cestuy cy se trouue, les empoisonne & corrompt, non autrement que feroit vn fort venin, & fait tel effect non seulement avec grande quantité de luy, mais pour petite qu'elle soit. Ains  
ce seroit



ce seroit assez à l'or & à l'argent pour se corrompre, l'odeur seulement du lieu, là où il aye esté fondu, & ainsi au fer & à l'airain: car tous les rend fragiles & suiets à rompre. Et ainsi d'autant que en plus grande quantité se trouue, tant plus fait en iceulx tels effects. Les contemplateurs des choses naturelles disent que cela procede de sa grande aquosité, subtile & mal cuite, & quasi semblable à celle de l'argent vis, avec laquelle moyennant sa subtilité qui se conioint avec eulx, il s'espend en icelle matiere onctueuse & visqueuse qui est dedans iceux metaux, & ainsi les rends mols & affoiblis, destruit & rompt en telle sorte, qu'il les conuertist en vn autre nature, sauf le plomb. Lequel combien qu'il altere, on ne voit pas qu'il y face si grande mutation, pource qu'avec luy tient quelque conuenance proportionnée de nature. Parquoy les alchumistes le nomment le blanc plomb. Et comme vous sçauiez il est metal fort congneu. Parquoy l'humain vsage s'en sert à faire diuers ouurages. Pourant que là où il s'engendre on en trouue assez: & parce que aisement se fond à tout feu & à peu de peine. Luy pur & meslé avec plomb s'estend fort bien sous le marteau, tellement que quelquefois se rend plus subtil que papier. On fait d'iceluy communement vaisseaux à menger ou garder choses liquides. Et combien qu'il ait quelque odeur de metal, neantmoins iamais ne l'espend si fort qu'en quelque chose qu'il reçoie se puisse sentir, ne par l'odeur ne par le goust. On congnoist tel metal estre d'autant plus pur, d'autant que plus monstre sa blancheur, ou que estant rompu comme l'acier se monstre grainelü, ou en le ployant en quelque endroit subtil: ou le mordât on sent vn certain cry comme seroit de l'eau congelée du froid. Sa miniere, combien que ie ne l'aye iamais veu, pourant qu'il s'en trouue en peu de lieux, neantmoins selon ce que i'en ay ouy dire aux plus experimentez, le plus & le meilleur qui se trouue en l'Europe est celuy qui se tire en Angleterre. Et ay ouy dire qu'on en trouue encores en Fládre, en Boesme, & en la duché de Bauiere. Mais à cause des noms estranges ie ne puis reciter les lieux. Mais pour le peu d'interest cest assez que vous congnoissiez sa miniere, qu'elle s'engendre cōme celle des autres metaux

és montaignes tresfres en certaine pierre blanche. Et disent qu'en quelques autres pierres tirantes vn peu sur le iaulne, & en vne autre de couleur gris obscur, Et quelques autres en vne pierre de couleur incertaine toute spongieuse & quasi semblable à celle d'ou se tire le plomb. Mais la pierre est plus tendre & toute pleine de veines, & lignes rouges & grises. A ce que i'entens, il ne se tire point autrement de sa partie terrestre que faict le plomb, c'est à sçauoir à four ouuert. Et comme ie vous ay dit, c'est vn metal qui corrompt les autres quand il s'incorpore avec eulx tellement que qui vne seule partie mettroit entre cent d'airain, de fer, d'argent, ou d'or, il leur oste leur couleur & leur traictable douceur. Et est vray ce que beaucoup disent qu'il n'a point de son de soy mesme, mais en endurcissant les autres metaux les red resonans, non autrement que s'il y mettoit l'esprit & leur viuifiast les substances, faisant par telle composition, comme de deux corps foibles, vn tiers qui n'est plus ne l'vn ne l'autre, ains est du tout diuers, frangibles & beaucoup plus dur, qui n'estoit premierement nul des deux. Ce que par aduenture aduient, parce que les parties de l'estain affoiblissent & rompent les parties de l'airain. Et avec cecy par la diuersité de la nature des susdits metaux, les parties de l'estain ne s'unissent pas si bien ensemble, comme elles estoient. Et semblablement celles de l'airain estant multiplié en eulx l'humide avec l'humide, le sec au froid de l'autre. Et ainsi rendues les parties plus dures & espoisses viennent à sentir plus les coups, & en faisant vn resonement ou cry en l'air, se respendent comme on voit aux cloches. La blancheur que l'airain introduit dedans les autres metaux est, parce que comme chose aqueuse ou subtile en tel effect s'espand, & gaignant estaint la rougeur de l'airain, ou defaut la jaunesse de l'or, de rouge ou jaune rendant tresblanc, de sorte qu'il monstre beaucoup plus grande blancheur que n'estoit celle que premierement l'estain mesme monstroir, laquelle combien qu'il la monstre, il ne me semble pas qu'elle soit. Mais pour autant que l'vn & l'autre ont prins la durté par telle composition, ie croy qu'il la monstre plus grande parce qu'elle a plus forte lumiere, lustre & splendeur, laquelle se tire de la

la poliffure plus grande qui se faiët sur la plus grande durté, & laquelle eftant receuë du tiers corps, procede de ce que la qualité huyleufe tenante & visqueufe qui fait le nerf des metaux, se destrempe & defait, & les rends obeiffans & traictables aux œuures des artifices & ouuriers. Et cecy font les raisons, lesquelles selon mon opinion se peuuent donner de telles choses.


*De la miniere du fer, & de fa nature. Chapitre. 6.*

**E**N beaucoup de païs la miniere du fer est tresabondante, & principalement en l'Italie, là ou non seulement en est de grande abondance, mais de plusieurs & diuerfes sortes. Et en nōz pays icy de Toscane cest chole fort congneuë, parce qu'ils sont situës aupres de l'Eba, laquelle en est tant copieuse & riche, qu'elle surmonte tout autre lieu en qui telle miniere se trouue. En sorte que non seulement tout le païs de la Toscane de ses tels biens rend fertile en grāde quātité, mais prouuoit plus qu'aux deux tiers de l'Italie, de la Sicile, & de la Corse: & parauēture encor en quelque autre lieu estrange. Et outre à cecy telle miniere est de si grāde perfection, qu'elle est cause principale que lon ne se soucie d'en tirer d'autres lieux beaucoup en Italie, là ou il y a si grande quantité, comme par les signes & essays d'icelle se voit: que qui en voudroit tirer en trouueroit grande quantité. Mais voyant la bonté de ceste cy, & la facilité d'en pouuoir finer, outre à la certaineté du coust & despence, de laquelle on fait communement autant comme on veult auoir des choses désirées, faiët qu'on laisse de chercher l'autre. Je ne vueil outre ses autres louanges obmettre à vous reciter de ladite miniere de l'Elbe vne chose merueilleuse, laquelle est que pour la quantité qu'en tant de siecles continuellement s'en est tiré & tire, non seulement les montaignes, mais deux telles isles, comme ceste là, en deuroient estre anichilées & equalies à terre, en a neantmoins, & plus & de meilleure que iamais s'en tire. Tellement qu'on a opinion de beaucoup qu'en certain temps en ce mesme terrein, d'ou l'on la tire, elle soit de nouveau

regenerée. Ce que s'il estoit vray ce seroit grand chose, & se monstreroit vne grande disposition de nature ou son grand pouuoir du Ciel. Et pour vous en dire la verité, ceste miniere est de telle nature que pour en tirer le fer & le reduire à purité, elle n'est point sujette à la violence des grands feux, ou de beaucoup de subtilitez & labeurs extraordinaires, comme les autres, mais seulement la mettant à la fonte deuant la bouche des soufflets avec feu de fusion ordinaire, on en tire le fer trefdoux & traictable. Duquel on peult facilement faire quelconque labeur qui a pouuoir estre fabrique, non autrement que si c'estoit vn argent ou autre metal plus traictable: par les grands effets clairement monstre sa grande purité, & qu'il ne contient odeur d'airain ne d'autre metal nuisant à sa vertueuse qualiré. De là ou procede qu'il n'est point de besoing de feux puissans & de grāds fourneaux pour la nettoyer, comme on a de coustume à beaucoup d'autres, & principalement en Italie à celles qui sont au pais de Bresce en Valcamonique, mais seulement luy est de besoing de vne simple fonte & vne paire de soufflets, non pas beaucoup plus grands que les communs accoustrez au lieu oportun pres d'une petite bute, comme vne montagnette, l'ayant rompue premierement comme noissettes, & luy ayant fait comme vne closture tout alentour des plus grosses pieces de minieres à forme ronde ou d'autres pierres mortes: & non suiettes à se briser & rompre, pour retenir le feu & le charbon estraint & cōtraint. Avec lequel charbon celle que vous volez fondre se couure, & puis avec les soufflets aplicquez à vne rouë agitée par eau avec vn seul feu de huit ou dix heures, se fond & se purge de la matiere terrestre que elle cōtient: Et ainsi comme vne cire purgée demeure au fond: le fer duquel on leue les pierres, & ainsi chault se tire le plus separement qu'il est possible, puis avec masses se rôpt en pieces, lesquelles se portent rechauffer à l'ouurier du marteau, & en fait on barres ou queuzes. Et ainsi faite ceste operatiō, qui se fait deux fois la sepmaine à chacun estalier ou astelier, & s'appelle faire de la cole. A la mesme forge se reprennent lesdites barres ou pieces, ou le premier fer mesmes, & se rechaufe bien. Et ainsi chaut se



traitte avec le marteau, & s'estend, & se fait en telle forme qu'on veut, ou rond ou quarré, laquelle reduitte à sa souveraine perfection, on ne trouue point qu'elle deschet plus de quarante ou cinquante pour cent, que tout le reste ne soit fer trespur. Et parce qu'il en y a bien peu qui soient meslées avec les autres minieres, ou qu'elles ne soient aigres & sauuages, il n'aduiet à nulle autre de si peu dechoir. Car quasi toutes ont soing de passer par le milieu des forts & puissans feux & de grands fourneaux, & d'une grandissime despence de charbon, & de grande multitude d'ouriens: parce qu'autrement leur nature sauuage ne se peut donner, pourautant qu'elle est composée de mauuaises mistions ou d'odeurs des autres metaux. De laquelle quelquefois sont si pleines qu'à grand peine s'en peuuent-ils deliurer. Et estant ieune ie vey par experience en nos lieux de Sienne en la vallée de Bocchegian, là ou du seigneur Pandolfe. P. estoient beaucoup d'escoliers à forger ordonnez: lesquels mettre en œuvre ayant la cure, ie prins des dittes minieres outre à celle de l'Elba, lesquelles voisines d'icelle se trouuoient, & des vnes & des autres ie vins à faire une bonne pratique. Mais de celle de l'Elba ie vous ay assez parlé. Maintenant ie vous diray autant que i'en ay entendu des autres sortes semblables à celle de Biscane de Bresciane & de Buti. Et premierement presupposant que vous ayez trouué miniere, & en tire grande quantité, & recuite, & esleuée & repurgée & lauée, il est de necessité auoir ou un ou beaucoup de fours (Car ainsi s'appellent certaines grandes manches que nous appellons fornaises faites à mode d'une grosse cheminée) qui contiennent beaucoup de charbon, formée à la mode que ie vous monstrey cy depainte.



Et en apres vne grand paire de soufflets appuyez au costé de la dicté fournaise, en mode d'une paire de grâdes aelles, qui soyēt haulx de six à huit bras. Lesquels meus d'une grande & puissante rouë à eau, avec laquelle sont appliquez, font vn tresgrand espace dedans pour faire enfler. Et ainsi avec leur force de souffler, iecte dedans la fournaise entrans à deux bras & demy pres du fond, font fondre la miniere, & selon la sorte de miniere l'une vne fois, l'autre deux ou plusieurs, avant qu'elle soit disposée à bon fer, qui se puisse à la fonte seconde adonner pour estre par le gros marteau disposé : Neantmoins souuent aduient que par quelque diligēce qu'on y face, il n'est pas possible de la reduire à telle douceur qu'elle se puisse mettre en œuvre, à cause des mauuaises compagnies, lesquelles parce qu'elles sont ensemble fondues, sont d'icelle inseparables. Toutesfois sil y a moyen qui luy puisse aider à la separer, cestuy-cy est le plus facile pour la tirer à perfection. De telle miniere on en trouue diuerses sortes, & se purifie en diuerses manieres selon son especē & l'esprit des ouuriers entre lesquels y a grande differēce. Car il y en a tel qui d'une mesme miniere en tirera beaucoup plus que l'autre, & de meilleure. Et dauantage y a tesgrande difference entre les sortes de charbō: comme on voit par experience que celuy d'un boys fait plus d'effet que celuy d'un autre. Et n'y à doute que le charbon de boys doux, ne face le fer doux & nerueux, le cru dur & aspre & plus rompanr.

rompant. Mais qui veut faire le fer doux, & bon par la vertu de la mine, outre le moyen & le charbon, il faut qu'il se pouruoye d'un bon & suffisant esliseur, lequel par vne longue experience sache separer la pure de la non pure, & tant à l'œil cōme aux mains en la rôpant la separe. Et puis au fourneau ouuert la recuise: & estant recuite, la mettre en lieu descouuert, là ou les pluyes la puisse baigner, & le soleil essuyer. Et ainsi y soit quelque temps, & auât que on la conduise à la grande fournaise par le menu, la faut reuoir si elle auroit point escumé, ou ietté quelque signe ou odeur d'autre metal, & ainsi la cuire & recuire, & la bien euaporer auant qu'elle se fonde, on en fait bon, doux & maniable fer. Mais si parauenture aduient que la mine ayant vsé toute diligence, ne rend le fer doux, ains tousiours demeure dur, alors il est bon pour en faire acier, & est meilleur que l'autre. Et pourtant y en a quelques vns qui nomment telle miniere, miniere d'acier & non de fer. Mais à mon iugement ils errent, parce qu'on ne voit pas tant de difference entre le fer & l'acier, qu'on doie faire miniere differente. Je croy bien que telle miniere se puisse nommer de fer propre à faire acier plus que n'est pas le commun, comme en son lieu, aidant Dieu, vous diray. Or comme vous pouuez auoir veu, ie vous ay donné en ce discours la difference par congnoissance des minieres de fer, & les moyens qui s'usent à sa purgatiō, sans lesquels il n'endureroit pas le marteau, ne en le mettant en oeuvre se pourroit tenir ensemble. Maintenant de quelle nature il est, & là ou, & comment il se trouue, ie le vous diray en apres. Mais combien il nous apporte d'vtilité, ie le vous diray au neufiesme liure de ce voulume. Et premierement ie vous dy que telle miniere se trouue dedans les trefrudes & aspres montaignes. Et par les alchumistes ce metal est nommé ignoble plus que nul des autres, parce qu'il est de terrestre substance grosse & forte, de là ou vient qu'au feu est plus propre à se molifier qu'à se fondre, à cause de sa grande siccité. Et à cause de sa mistion & grande porosité se rouille facilement, & en le forgeant se conuertit en chiasse. Et pource s'il est touché de l'estain il deuient fragile & mal maniable: pourautant qu'avec la subtilité de ses esprits facilement penetre

& l'altère & meut de sa nature. Sa miniere se mōstre en plusieurs fortes. La bonne est claire, pesante de grain, ferme, nette de terre & de pierre, & de tout odeur de quelque autre metal, & de couleur brun & noir. Et ceux qui sont de couleur de laymant, valent peu: pource qu'elles ont toutes odeur d'airain. Celles que mieux ie congnois sont de quatre especes. La premiere est la claire que ie vous ay dit, laquelle si elle est pesante est parfaicte. L'autre est vne pierre luisante de graine menue, & qui toute se defait en farine, & n'est pas si bōne. Celle qui est de couleur noire avec gros grain, vaut biē peu; parce qu'elle a quasi tousiours quelque nature d'airain. La quarte est noire de graine menue, plus & moins bonne, selon la pierre ou elle se trouue. Celles qui ont odeur de metal, s'il n'est ainsi que i'ay dit, par la force de long & puissans feux, ne se peuuent purger: parce que ce sont matieres corrompues, & quasi entre elles sont inseparables, desquelles ne les pouuant conduire à plus grande perfection, on fait ballettes, ou boulets d'artillerie, ou autres ourages de fonte. Lesquels selon que plus & moins estoient par leurs odeurs corrompus, sont aussi plus ou moins fragiles. Ceste miniere comme on voit, s'engendre en toute sorte de terre, & dedans les montaignes dont il sort abondance d'eaues tresbonnes, & là ou il y a bon air. Souuent s'engendre en vne pierre blanche semblable au marbre, avec laquelle quand elle se fond peu de fois estant conioincte, rend le fer doux. On en trouue encores de par soy dedās certaine terre rouge separée, mais elle est fort fragile, & en soy a certaines taches noires & petits grumes iaunes. Et de semblable aussi s'en trouue en certaine terre iaune, qui a en soy vne certaine moleste comme marne. Mais ie vous conseille qu'en ceste cy ne perdiez tēps, parce qu'elle n'est pas pure. Et de ceste cy vous rendrez plus grande congnoissance, quant aupres d'elle vous verrez certains cailoux ou pierres tainctes de vert ou d'azur, & en la rompant sont en icelles quelques grains comme boutons, ou noirs comme des charbons. On faict encores vne autre experience pour congnoistre sa bonté, en ceste sorte. On met ladicte miniere en vne forte lissive, & puis l'ayant ostée on la met sur le feu fort allumé, & on s'en



s'en apperçoit par les fumées qui en sortent. Et quand aussi elle aura esté grād téps dedās ladiète lissive, soufflant en icelle avec vn petit soufflet, ou avec quelque caualet, par les bules ou boucles qu'elle fera, on s'apperceura par les couleurs qui se verront de sa malice, cōme par la diuersité qu'elle soit d'airain. La marque par laquelle se cōgnoist efficacemēt ou est le bon fer, est l'argille ou bole, & vne autre terre aussi rouge & grasse, laquelle estraincte sous la dent, ne rend nul son de terre. Et en ceste cy s'engendre, ainsi que disent les experimentez, vne mine fort parfaicte: mais elle ne procede pas par veine. Et pour vous dire de quelle sorte on trouue plus, ie vous iure que la plus abondante est celle qui a la couleur de rouille, laquelle n'est gueres bonne. Et de ceste cy, & d'une autre sorte noire, de laquelle i'ay veu au domaine de Sienne en la vallée de Boccelegian, & en autres lieux en grande abondance, & environ l'inuention d'icelle, ie ne m'y vueil plus arrester: ne aussi à vous les distinguer autremēt: par ce que ie pense en auoir dit assez: & sont choses si congneues, que pour peu de pratique qu'on aye, on n'en scaura assez avec l'experience. De la fusion aussi i'ay assez parlé, mais plustost vous l'ay monstrée que de dire de la miniere, & pense vous la monstrer aux lieux de la pratique de la fusion des autres metaux,

*De la pratique de faire l'acier. Chap. 7.*

**C**ombien qu'il semble que de telle matiere plus seroit à propos d'en parler au neuuiesme liure, là ou i'ay deliberé en particulier en traicter, il m'a semblé par ce que cestuy artifice de faire l'acier, est quasi vn rameau du precedent chapitre du fer, n'estre bon qu'ainsi m'en passasse, sauf que depuis ne semblaist que ce fust vne autre chose. Et pourautant ay voulu icy escrire de luy, disant comment l'acier n'est autre chose que le fer par art bien purifié, & par la forte decoction du feu conduit en plus parfaicte mistion & qualité qu'il n'estoit premierement: & qui par attraction de quelques conuenantes substances des choses qu'on luy adioinct, engresse sa naturelle seicheresse de quelque humidité,

& se faiet plus blanc & plus solide, tellemēt qu'il semble que quasi foste de son originale nature. Et finalement quand les pores & ouuertures par le feu bien dilatées & amolies sont avec la violence de la froideur de l'eau, en chassant la chaleur restraints: ainsi se conuertist en matiere dure, & par sa durté infragile. On peult donc de toute miniere de fer, ou bien de tout fer ia purifié, faire de l'acier. Biē est vray qu'il se fait meilleur de l'un que de l'autre, & avec l'un charbon, que avec l'autre, selon l'esprit des maistres. Toutesfois le fer duquel il se faiet meilleur, est celuy qui n'ayant corruption de sa nature, ny d'autre metal, est plus disposé à la fonte, & qui a plus grande duresse que l'autre. On met avec ce fer du marbre pillé, ou autres pierres fusibles, pour fondre, avec lesquelles se purge, & quasi ont pouuoir de luy oster sa ferruginosité, & de la contraindre, & luy reserrer les porositéz, & le rendre sans pailles ou fueilles. Et pour conclure quand les maistres vueillent faire vne telle œuvre, ils prennent du fer passé à la fonte ou au fourneau, ou en quelque autre sorte, fait d'autant de quantité, comme ils en vueillent conuertir en acier, & le rompent en petites pieces, & puis accoustrent à la fonte deuant l'egout ou auget vn petit vaisseau pour receuoir, rond du diametre & demy bras ou plus, qui sera faiet d'un tiers de croye ou argile blanche, & deux tiers de charbonize, ou terre par le feu experimentée, qui tant soit battue ensemble, qu'elle s'incorpore & melle ensemble, & baignez de tant d'eau que les pressant dedās la main, s'attachēt ensemble, & faiet ce receptacle comme vn ceneracio ou cédree, mais avec plus de fonds on faiet l'enchet dedans, ayant vn peu le bout pendant à bas comme vn nais, & afin que le vent batte dedans ledict receptacle. Et puis qu'on emplisse tout le vuide de charbons, & alentour luy font vn cercle de pierre ou de roche morte non esclatée, qui retienne le fer rompu & le charbon que on y met dauantage, & ainsi le couurent & le combrent de charbon. Puis quand ils voyent que tout est allumé & bien enflammé, & principalement le receptacle, les maistres commencent à faire mouuoir les soufflets, & à mettre dessus de ce fer rompu & pillé, meslé avec marbre saligno ou propre à pauer, ou avec loppe pillée,

pillée, ou avec autres pierres fusibles & peu terrestres. Et de telle composition peu à peu la fondant, emplissent le receptacle iusques au signe que bon leur semble. Mais auparavant ils ont fait avec le marteau trois ou quatre barreaux de mesme fer de 40. ou 30. liures l'un, lesquels tout chaux mettent en ce baing de fer fondu, lequel baing est par les ouuriers excellents nommé l'art du fer. Et ainsi au milieu de telle matiere fondue avec grand feu, le tiennent quatre ou cinq heures, & souuent avec vne verge de fer, comme les cuisiniers des viandes les remuent: & ainsi les y tiennent, tournans & retournans iusques à ce que le fer embarré tire dedas ses porosités les substances subriles, qui se trouuent estre dedans le fer fondu, par vertu desquelles se consomment & dilatent les grosses substances qui sont dedans les barreaux, & viennent à se molifier, & se faire comme vne. lesquelles estans par les ouuriers veuz ainsi, ils pensent que telle vertu subtile, que nous auons dict, soit penetrée tirant vn des barreaux. De ce que mieux se certifient avec l'experience de l'essay, & le conduisans sous le marteau estant estendu, incontinēt le plus chault qu'ils peuuent le jettent en l'eau, & incontinent qu'il est froid, le rompent: & regardent si par tout à changé nature, tellement qu'il n'ait plus de fueilles par dedas, & le trouuant estre arriué aux signes de perfection qu'on veult, avec vnes tenailles, ou par les crenes desdits barreaux les y ayans à ce laissées, les ostent & taillent en petites pieces, six ou huit par vn, & les remettent dedas le mesme baing pour rechauffer, & y mettent de nouueau d'autre marbre pillé, & fer à fondre pour renforcer le baing, & le faire plus grand, & aussi pour luy rendre ce que le feu auroit consumé. Et dauantage affin qu'en ce baignant, ce qui doit estre acier s'affine. Et ainsi finalement quand tout cecy est bien chaut, alors piece à piece le vont porter au marteau, & l'estendent & mettent en petites verges, comme l'on le voit. Et ainsi fait quand elles sont fort chaudes, & quasi à force de feu deuenues blanches, elles sont incontinent iettées en vne eau froidissime, ou la plus froide qu'on peult, de laquelle faut faire reserue en quantité, afin que tout en vn coup se estaigne & prenne la dureté, vulgairement appelée la trempe. Et

ainsi se transmue en matiere, qui quasi ne ressemble plus à celle qui auparauant estoit que se temperast: par ce qu' auparauant il ne sembloit qu'vn lopin de plomb ou de cire, & par cecy est faict tresdur & quasi toutes autres choses dures surmonte. Et dauantage se rend tresblanc plus beaucoup que son fer, ains quasi semblable à l'argent. Et celuy qui entre les autres a son grain plus menu & ferme, est le meilleur. On estime fort celuy de la Flandre, & en Italie, celuy de Valcamonica au pays de Bresse, & hors la Chrestienté, celuy de Damas, de la Cecilia, ou Caraman, & legemmino ou porisien dit Agiani, lesquels ie ne vous scauroye dire comment ils le font, combien qu'on m'aye dit qu'ils n'ont point d'autre fer que des nostres, lequel ils liment & l'empastent avec vne certaine farine, & le donnent à manger aux oyés, desquelles recueillent les excremens, & quand ils vueillent les retraignent ensemble à force de feu, & le conduisent en acier, ce que ie ne puis croire, mais ie pèse bien que tout ce qu'ils en font, si ce n'est pas la vertu du fer, c'est par la vertu de la trempe.

*De l'art de faire le letton. Chag. 8.*



YANT au chapitre precedent dit de l'acier, il me semble encores par semblable raison deuoir dire du letton, lequel est aupres de l'airain ce qu'est l'acier aupres du fer. Et cōme de l'vn aussi de l'autre quelques vns ont opiniō qu'il ait propre miniere. Et cōbien que Pline en son histoire naturelle l'appelle aurichalchum, ou cōme nous disons vulgairement orchal, & dit qu'il a miniere, neantmoins il ne dit point ou il y en aye eu, & n'ay iamais de nul autre entendu qu'en lieu du monde on en trouue. Car pour certain, si quand il escriuit cela, on en trouuoit, encores auourd'huy on en trouueroit. Et quāt à moy pour n'en auoir autre cōgnoissance que celle que i'ay avec les yeux gaignée, ie vous dy pour certain que cōme l'acier est fer avec l'art cōduit en vne autre espece de metal, aussi cecy est airain avec l'art, teint en couleur iaune. Et pour certain c'est vn bel art, & duquel on doit louer les alchumistes, cōbié que celuy



celuy qui le trouua fust trompé, pēſant auoir fait d'airain or. Mais pour retourner à propos, on fait du letton infinis ouurages, & ſe teint en diuers lieux, cōme en Flandres, à Cologne, à Paris & en diuers autres païs, cōme en Italie, en la ville de Millā, là ou i'en ay veu mettre en œuvre & teindre grande quantité, & ſe teint ainſi. Les ouuriers dont ie parle, auoyēt fait vne fournaiſe plus longue que large beaucoup, & cloſe d'vne certaine ſorte de pierre, qui longuement demeure & dure au feu ſans ſe fondre, ne fendre, ou cuire. Et par ou entroit le feu dedans la fournaiſe, elle eſtoit toute ouuerte, le corps d'icelle eſtoit quaſi tout ſoubs terre, cōme à demy ou plus, la voulte eſtoit baſſe, & de la ſummité iuſques au pied elle eſtoit pleine de ſouſpiraux, & au deſſus de la voulte elle auoit deux quarrez ouuers, par leſquels ſe mettoyent les cruſets, qui contenoient l'airain pour teindre, & puis avec pieces de terre cuiſte ou ſeiche, faiſte à propos, ſ'eſtoupoyent. Les creuſets eſtoient de terre de Valence, on les faiſoit venir de Vienne, & eſtoyent fort grans, & ceulx que ie vy, ie croy qu'ils peſoiēt deux tiers de liure pour le moins, & me fut dict qu'il contenoient chacun de cinquante à ſoixante liures de metal. Et pour faire leur operation, ils mettoient à chucun de ces vaiſſeaux vingt cinq liures d'airain d'Alemaigne tout rude & rompu en petites pieces & tout le reſte vuides iuſques aupres du bort emplifſoient à deux doigt pres d'vne pouldre d'un certain mineral de couleur iaune fort peſant, nommé callamine, comme iaune mine. Et tout ce qui reſte vuide iuſques au bort du creuſet, ils emplifſoiēt de voire pillé, & puis par leſdictes ouuertures de deſſus, accouſtroient leſdits creuſets au fons ſur le plain deux à deux, & en apres leur donnoient par vingt quatre heures feu de fuſion, & ainſi à la fin de tel terme trouuoient la matiere toute fondue, & l'airain, qui premierement eſtoit rouge, ſ'eſtoit fait iaune, doux & beau, & quaſi ſemblable à l'or de couleur de vingt quatre quaratz. Et depuis cecy, ie vy encores en la meſme boutique faire diuers ouurages pour le ſeruice de tel œuvre, entre leſquels il y en auoit vn qui battoit ledit letton pour en faire de l'orpeau, & d'autres qui le conduiſoient en lames, propre à tailler en fer d'aiguillettes, d'au-


tres le limoient propre pour faire dez à coudre , les autres en aneaux, & qui en boucles, & autres labeurs de fonte. Les autres en battoient au marteau faisant des sonnettes, des cuilliers, des bassins, quelques vns en tournoient en chandeliers, ou autres vaisseaux & vtenfiles ronds. Et bref l'un en faisoit vn œuvre, & l'autre vn autre. Tellement que qui entroit en telle boutique, voyant vn atelier de tant de personnes, ie croy qu'ainsi luy en sembleroit, cōme moy, entrer en vn enfer, ou pour dire mieux en vn Paradis, là ou estoit vn miroir, auquel resplendissoit toute la beauté de l'esprit humain & la puissance de l'art. Et ie considerant telle industrie tādīs que ie fus à Millā, ie ne fus onc iour que ie n'y allasse passer le tēps vne heure ou plus, auquel lieu iamais ne tornois l'œil, que ie ne veisse quelque ingenieuse nouveauté & beauté d'exercice. Parquoy considerant quelquesfois la grandeur & ordre des choses que ie voyoie, parce qu'elles m'estoient toutes neuues, ie demourois tout estonné quelquefois. Mais entre autres choses ie vey vne sorte d'ouuriers, qui en leur maniere de proceder me fut vne chose fort nouuelle. Et estoient huit maistrs aupres de beaucoup d'autres en vne maison, lesquels n'attendoient à autre chose qu'à ietter en moule, & à mener ensemble vn nombre infiny de formes de toutes les petites choses qui se consomment iournellement, & qui se peuuent faire de letton en moule avec vne tresbelle maniere, laquelle ie ne vueil faillir de vous reciter, par ce qu'elle est belle. Ils prenoient la quantité que ils vouloient de patrons, ou mouleures des choses qu'ils vouloiēt ietter, comme de bossettes de cheuaux, de coupes, de boucles, de toutes sortes d'anelets, de clochettes, de dez à coudre, & de celle qu'on lie les voirres, & autres semblables choses. & de telles tout vn iour n'en formoient que d'une sorte, & l'autre iour l'autre, & ainsi changeant tousiours patron ou mouleure, & ainsi ayant finy de faire les moules, ils recommençoïēt au commencement pour ietter dedans, & faire beaucoup d'ourages. Ils prenoient vn morceau de terre à potier avec de la tonture, ou de la semēce de canne, & l'ayāt fort battue, tant qu'elle fust endurcie, à la quantité qu'ils en vouloiēt. Puis sur vne table longue d'une paulme & quelque

quelque peu plus large que les champions ou patrons, ils estendoient de telle terre demy doigt ou moins, & l'ayant bien esqualie la saupoudroient avec charbon pillé, & puis y formoient leurs patrōs tous attachez au get avec leur petit euaporal & bouchette, & avec toutes les choses qui sont requises pour faire vne forme en vne fois. Ces patrons estoient l'un d'estain, l'autre d'airain ou letton, fait à propos bien limez & repolis, tellement qu'estant bien faits là, tels d'eussent venir. Et en apres ils auoyent chacun par soy, deuât soy, sur vn bâc vn fournelet quarré de lames de fer, quelqu'un de briques & de terre couuert, & au dessous vn petit gril & la bouche longue & ouuerte, autât comme estoit le fourneau, auquel avec vn peu de charbon & de feu dedâs esmeu sur le gril, ils eschaufoient le fourneau, & le maintenoient chault. Depuis sur la bouche, ou il y auoit vn peu de gril, ils mettoient la demie forme fresche, qu'ils venoyent de former pour essuyer. Et tandis que elle s'essuyoit, ils en faisoient vne autre, & la mettoient aupres de l'autre, & ainsi en faisoient iusques à six ou huit pieces, & puis reprenoient la premiere, laquelle auoit eu tant de tēps qu'elle estoit seiche, ou peu moins. Et sur icelle dressoient sa cōpagnie que nous pouuons & deuons mieux nommer le contremoule. Sur laquelle compagne à la partie dehors, ils formoient d'autres patrōs, & ainsi alloient faisant des autres. Puis recōmençoient à la premiere, & en ensuyuant à toutes les autres, tellement qu'accomplies les formes d'estage sur estage, ils les faisoient haultes vn demy bras ou plus toutes seicher ensemble, estant la masse large demy paulme ou plus, ou autât qu'estoit large la mouleure ou patron, la ou on ne doit rien laisser de vuide ou inutile. Et cestes-cy ainsi finies ou seichées en vn four, comme celuy de cuire le pain, ils les ouuroient espace à espace, & en tiroient les mouleures ou patrōs, desquels en chacune piece estoient vingt ou plus, & vn grand nombre de choses formées, par ce qu'il y auoit patron de tel qui en auoit cinquante ou soixante. Et finalement telles formes rassemblées & bien serrées, & là ou est de besoing bien accoustrées en leurs gets, semblablement & quelque autre lieu qui leur sembloit à propos, estant de cendre fine avec de l'eau encédrez, ils rassemblaient les formes, & les remettoient proprement en leur estre

premier, & finalement les lioyent de fil de fer, & avec de la mesme terre les enduifoyent. Et puis prenoient d'icelles dixhuit ou vingt pieces, & les dressoyent en terre en vne basse, luy faisant vn cercle de pierre tout alentour. Et couurant lesdites formes de charbon, les recuifoyent. Et les ayant recuittes & bien accoustrées, & à chacune face ayant dressé vn get ou embouchoir, qui porte le metal à tous les autres gets des formes, le portoient au fourneau là ou on teint l'airain. Et ainsi quand ils tirent l'airain dudit fourneau, soit vn ou plusieurs creulets teints en iaune, ayant qu'il est besoing, emplissoient les formes vne à vne, ou deux à deux, ainsi qu'il leur sembloit, en ce travaillant aurât la nuit que le iour, selon le temps que les matieres teintes en donnoient l'occasion, ou comme ils auoient des formes prestes. Parquoy pensay en moy mesme que ceste boutique là seule estoit suffisante, non seulement à fournir Millan, mais à en fournir toute l'Italie. Et pour certain cela me sembla vne belle entreprise. d'vn seul marchât. Et est de besoing qu'il eust bons reins pour soustenir la despence de si grand nombre de gens. Ce que ie pense qu'autrement ne se faict en Flandre, ou en autres lieux d'Allemagne, là ou on faict chandeliers, gardemangiers, & autres vtenfiles, qui se font & s'apportent en nostre país. De la terre qui teint l'airain en letton, ie pèse vous en dire au lieu de demis mineraux. Je vous dy icy, que ie croy qu'elle ne sert à autre chose, & que là ou on la trouue, on en peult facilement taindre l'airain en letton, tenant le moyen par mon escript. Et ne sert telle terre ditte Calamine à autre effet, qu'a teindre l'airain: parce qu'elle est matiere de mauuaise mistion & peu fixe. Avec l'airain seul par sa propriété occulte & secreete conuenance, se peult fondre & incorporer, & non seulemēt elle le teint d'autre couleur, mais le fait tant croistre qu'elle gaigne au maistre la descheute de l'airain, & la peine qu'il prend à teindre. Et avec tout autre metal ell' euapore, & à part soy dedans le feu deuiet cendre. Et si on en met avec l'airain plus que la nature ne requiert, combien qu'elle face l'œuvre plus belle en couleur iaune, elle le rend fragile. Et finalement considerant ce que ie vous ay dit du leton, il me semble estre vne telle



telle operation de l'alchumie, que lon ne la peult nier. Cōsiderāt que estant l'airain rouge de couleur par nature, avec l'art on luy oste la rougeur, & la cōuertit lō en iaune. Ce qui me semble d'au tāt plus grand que par feu cōme de tous leurs autres sophistiques en ciuq ou six fontes il retourne rouge & quasi en sa premiere nature. L'airai outre à ladicte terre, se teint en iaune avec la tutie, & quelques vns le teignēt avec vne terre rouge, laquelle est par les marchans Arabes mises entre les Zeuzi, afin qu'il pese dauātage. Je ne vueil aussi faillir à vo<sup>9</sup> dire qu'avec quelque chose dessusdite que lettō soit fait, qui ny prēd garde, il s'euapore & se pert. Mais cest chose qui sert plus aux petites choses, qu'aux grādes. Et pour ce qu'au lieu des fusiōs, toutes choses ne se peuēt pas dire, il m'a semblé de vous aduertir & vous dōner icy le moyen, lequel autāt que i'ay veu par experiēce, est cestuy cy. Et dauātage ie l'ay appris des alchumistes, toutes les fois que vous le voulez fōdre, afin que la couleur ne s'euapore, couurez dessus le creuset, ou vaisseau là ou vo<sup>9</sup> le fōdez avec voirre pillé, & faites que le vēt des soufflets batte dessus, estāt aduertis quād vous le fōdrez de vous garder de sa fumée: car cest chose dāgereuse, & en le cōtinuāt cest vn venin tresdangereux à la vie, & souuent estourdist les hōmes, & les fait paralitiques, ou stupides, ou asthmaticques, ou en autres plusieurs maladies conduist, lesquelles ie ne vous sçay dire, qui sont causes de sa fumosité subtile & penetrable: parce que sa mauuaise & non fixe mistion exhale fort comme celle du vif argent.



PROHEME DV SECOND LIVRE DES MOYENS MINERAVX.

**N**E N'AY voulu faillir, vous ayant auparavant descrit les metaux, auant que plus outre-passer, vous dire (combien qu'il semble estre hors le propos de nostre matiere) ce qu'en experimentât, i'ay compris des demis mineraux, comme au premier chapitre des minieres vous promis: lesquels demis mineraux par n'estre ne du tout pierres, ne du tout mineraux, sont par les speculateurs de la nature appelez moyens mineraux. Et de tels on en trouue de diuerses fortes: & ceux qui ont semblance de pierre, sont terrestres & fort durs à fondre, & meilleurs aux peintures qu'à autre chose. Il y en a qui sont aussi faciles à fondre au feu, comme est le soufre, l'antimoine, la margasite, la calamine, la zaffara, la manganese, & sont quasi par similitude freres des metaux. Quelqu'vns anntres sont plus aqueux, lesquels combien qu'ils ayent quelque epeffeur, se defont en l'eau, & ainsi moyennant icelle, les reduisent en leur perfection: comme sont diuerses especes de sel, le vitriol, l'alun de roche, & salpêtre ou salnitre. Et comme chose aqueuse encores conuient avec eux l'argent vif, ainsi par les vulgaires, à cause de son mouuement, appelé. Lequel combien qu'il soit non seulement liquide, mais tres-liquide, en nul effect que facent les dessusdits, ne se peut conformer, mais demeure tousiours en son propre estre, iusques à la cōsommation de sa forme, Duquel parce que la cause de ses effects, est quasi impossible à trouuer, ie ne vous en vueil parler, n'entrer maintenant en cest abisme de speculation, de vous vouloir determinement exposer que c'est argent vif. Et parce laissans les opinions & disputes, ie prendray seulement desdicts moyens mineraux, ceux que ie pense qui à necessité apportent quelque vtilité. Et premier fault veoir le moyen comment tels demis mineraux se peuuent trouuer, & & puis comment se doyuent tirer leurs meres ou matrices, à quoy n'y a moins de travail & d'industrie qu'aux metaux, parce que

que ce sont substances cachées au dedans les pierres, ou dedans la terre. Pourtāt y en a entre eulx incōtinēt que vous les auez tirez des montaignes leurfdites meres, qui demandent la fusion, les autres faut avec vne certaine corruption maturatiue disposer: l'un avec l'humide & froid, & l'autre avecques le sec & chaut, comme sont les eaues, les pluyes, les gelées, ou longues cuittes au soleil, ou au feu, ou d'un fort rechaufement en eux-mesmes, & finalement avec eau & feu, beaucoup se reduisent en fin de leur perfection, comme particulièrement en ceux, dont ie feray mention, entēdrez. Et de ceux qui par leur ponderosité, & par certaine apparence semblent metaux, ie vous diray cōment, par quelque artifice que ce soit, iamis on en tire aucun metal que ie sache. Mais comme en pratiquant pourrez entēdre, vous verrez que ce n'est autre chose que fumosité de miniere, ou minieres commencées. Quelques autres sont qui rendent quelque peu de metal, mais c'est chose si fragile & imparfaite que lon les peut nōmer inutiles, sauf qui seruent aux alchumistes sophistiquaux, pour en blanchir l'airain, ou pour endurcir l'estain. Combien que ie croy que ils ne leur seruēt gueres par estre matieres euaporables, comme est ce qui se tire de l'antimoine, de l'orpimēt ou de la calamine, & parauenture de quelque margasite, la zaffare, & la manganese, cōbiē qu'avec quelques moyēs se fondent, elles ne rendent aucune ombre de metal. Et d'auātage les sels, les aluns, les vitriols, l'ocre, le boracs mōstrēt en auoir odeur. Ceux icy tous, ou la plus grāde part, sont disposez à certaine puissance de corrosiō, qui apparōist intrinsequemēt, & ont la puissance de seicher & eschauffer. Et en tels effets en la medecine on s'en sert beaucoup, pour la cause semblable les alchumistes aussi s'en seruent, & par ce moiē alterēt ou corrōpent quasi toutes choses ou ils les meslēt. Et les semblables effets, cōbiē qu'ils voient avec vne autre sorte de puissance, se fōt de vis argent. Duql'entre les physiciens naist grāde dispute, à cause de ses verr<sup>s</sup> & operatiōs. Mais les laissant pour le present à part, ie dy pour cōclure q̄ tous ces tels moyēs minéraux, sont pour la pl<sup>r</sup> part puissāt venī à toutes les choses ou elles se meslēt, ou là ou ils passēt intrinsequemēt. Desq̄ls effets les ppres particularitez aux

maistres & ouuriers de l'un & l'autre art d'alchumie experimenter, nous en reseruons le iugement. Et pour le desir que nous auôs de mettre fin, & de nous esloigner d'un tel discours, ie vueil faire entrée au second liure, au premier chapitre duquel ie commenceray à vous parler de l'argent vif, puis suyuantment vous diray du souffre, de l'alun de roche, du sel commun de mer, & du mineral. Et consequemment prendray peine vous faire congnoistre la callamine, margasite, & autres semblables, desquelles i'auray congnoissance, & qui me sembleront estre plus duisantes d'estre declarées pour la satisfaction du propos commencé.

*De l'argent vif & de sa miniere. Chap. I.*

**L'**Argent vif est vn corps d'une matiere fluante, approchant presque celuy de l'eau en blancheur & lustre: Et si est composé naturellement de substance visqueuse & subtile; rendât assez copieuse abondance d'humidité & froideur meslée. Chose certainemēt fort propre pour estre mise & aliée avec les autres metaux, ainsi q̃ les philosophes, qui fōt professiō de l'art d'alchemie en ont opiné, & escrit. Et disent que l'argent vif (par aucuns appellé mercure) doit estre nommé droittement la force & origine de tous metaux, ayant telle proprieté, qu'il ne se peult assembler en masse: ains pour estre desaccompagné de la chaleur & seicheresse deuë, demeure en la propre forme qu'on le voit, sans faire demonstrence d'aucune forme de metal: ayant plustost apparence de chose imparfaitte, que donnant indice d'œuvre rendue en sa perfection. Parquoy à bon droit il a esté nommé par ceulx qui se sont trauaillez de le chercher subtilement, mercure, tant pour le rendre semblable à luy, que pour autant que les poëtes parlans de ses faits & vertus, l'ont assis au milieu des dieux & des hommes, au vouloir desquels ayans desir de nous rendre conformes, l'auons voulu mettre au mesme degré entre les metaux, luy faisant occuper la place en toute matiere qui doit prester obeïssance à mine. Ioint aussi qu'il s'enfuit & desrobe, penetrant toutes choses par sa subtilité



subtilité & vertu. tout ainsi comme les poetes recitēt fabuleusement du dieu Mercure, qui a pouuoir de sortir à sa volōté, du lieu ou il a fait entrée. Vous aduertissant qu'ils le desguisent en la sorte qui leur est plus agreable. Et ie l'appelleray (les voulant imiter) aucune fois Mercure, & biē soudain apres argent vif, ainsi que le suiet de mon autheur se presentera, suyuant sa matiere en laquelle ie vueil faire entrée, abandonnant la dispute entre les philosophes, pour voir si le mercure doit tenir le premier réc & marcher deuāt tous les autres metaux, pourautāt qu'elle a esté assez esclarcie au premier chapitre de ce liure. Vous assurant que ie prendray la hardiesse de m'arrester & rendre conforme à l'opinion des philosophes: Lesquels se font à croire que l'argent vif est matiere assez disposée pour se conuertir en metal, mais pour le voir tant mal proportionné & peu habille à decoction, ils ne se peuuent persuader que sa nature soit disposée à la generation de toutes les especes de metaux. Ioint aussi que s'il estoit ainsi qu'il fust desia en chemin, si on ne luy eust rompu la voye, pour engendrer le plomb, l'estain, le fer, & plustost l'argent que non pas l'or. Parquoy si nous voulons considerer, & nous arrester sur les complexions naturelles, ou asseoir fondement sur le pouuoir des planettes, nous trouuerons mercure fort esloigné des complexiōs de l'or, & par trop differant, en pouuoir, au soleil & à la lune. Vous assurant que venant à perdre le nom que ie luy ay donné, ie ne le scauroye nommer autrement que de le dire chose que la nature nous a voulu ainsi produire pour plaisir. Vous aduertissant que tous les mercurus, qui se sont presentez au deuant de mes yeulx, sont d'une mesme forme & qualité, encores que les alchumistes ayent voulu que nature vint à defaillir en luy, pour auoir ceste aduātage & acquerir ceste gloire de le pouuoir secourir par leurs ars. Et pour ceste raison ils sont continuellement enclins à se traualier l'esprit & tourmenter leurs corps, pensant pouuoir aider à l'argent vif: ayans opinion non seulement de reparer en luy ce que la nature a voulu oublier: ains se promettant de le conduire à sa perfection, pour à laquelle pouuoir attaindre & paruenir ils suscitent entre eulx vn chars d'opinions & disputes merueilleu-

sement confuses. Si que l'un croit & approuue son opinion estre singuliere, & l'autre est de iugement contraire, tellement qu'ils ne cessent se cōbatre, sans auoir pouuoir de se resoudre aucunement. Aucuns autres se trauaillent de le mettre au renc & siege des autres metaux, voulans qu'il soit de la prime entre les esprits vitaux de leur qualité. Si que les vns l'enfeuelissent au dessoubz des choses veneuses: Les autres le mistionnent avec le ius des herbes, & les autres le iettent dedans leurs caues corrosiues & fortes, qui se trauaillent de le calciner & conuertir en cendre seiche industrieusement par le feu, & qui le vueillent desguiser en autre façon à leur volonté. Plusieurs autres se trouuent differens à ceux-cy, tellemēt que les aucuns ont en haine & mespris le vif argēt pour le peu de fiance qu'ils ont en luy: & les autres ne vueillent practiquer n'y mettre la main, là ou le mercure fait entrée. Si est-ce que plusieurs hommes viennent à se trouuer de contraire opinion: comme ceux qui ne sçauoient dresser entreprise sans le mercure mettre en ieu, auquel ils sont tant fort affectionnez, qu'ils dependent, consomment, & gastent toute leur faculté pour l'espoir qu'ils ont à le suyure. Vous asseurant que l'effet d'iceluy se doit proprement appeller vn droit labyrinthe & confusio d'entendemens: pourautant que la compagnie de ceux qui sont profession de l'art d'alchemie, me represente vn nouueau spectacle de tragedie, auquel sont figurez les hommes qui s'amusent pour faire anatomie de ceste matiere d'argent vif. Et pour exercer leur deseing, & attandre au but de ce qu'ils cherchent, ils se trauaillent, non seulement avec force & deception de le reduire & rendre prisonnier: ains qui plus est se mettent en deuoir de le murer & rendre captif avec fer ou fortes chesnes pour garder qu'il ne vienne à se perdre. Certains autres se trouuent qui se delectent de faire mourir le mercure: mais voyant que leur trauail est employé en vain, ils ne faillent à se mettre en deuoir de luy briser les os, luy rompant les aelles pour luy empescher son vol. Si que aucunes fois le pauvre miserable se trouue reduit en trefort grande extremite. Mais à la fin tant pour l'aide de ses aelles, que pour la vertu de sa diuinite, il ne fait faulte pour sauuer la vie de gai-


de gaigner l'air, & rompant les liens de ceulx qui le tourmentēt, ne fault de se rēdre au ciel avec les autres dieux ses compaignōs, à la compagnie desquels il fait recit de l'estonnement, auquel il a delaissé ses aduerfaires. Lesquels sont restez autant fort affligez, pour se trouuer mocquez, qu'ils sont esbahys d'apperceuoir leurs bourses vuides. Chose certainement qui vous peult assez faire congnoistre la nature de luy, laquelle est tant subtile, que de son propre mouuement, encores qu'il soit bien fermé, vient à sortir pour la moindre faulte. Tellement qu'il vient à transpercer le vase de metal sans feu, encores qu'il soit de froide & humide nature. Si est-ce que aucuns le iugent auoir propriété & vertu de chaleur en la medecine. Dauantage il a telle vertu qu'il soustient, estant mis dedans vn vase, les metaux qui sont posez au dessoubs de luy, & le garde par quelque espace de descendre en bas. Mais il n'a pouuoir d'en vser ainsi avec l'or: pource qu'au lieu de le soustenir, il se ioint de si pres à luy, qu'il le cōduit au fond, sans se pouuoir accouster de toute autre chose, ne sans estre aidé par artifice, à cause de son humidité, qui l'empesche à ce faire. Vous aduertissant qu'il s'appelle argēt vif, tāt pour sēbler l'argent en couleur, que pourautant qu'il se maintiēt en la propre forme cōme il est, quād on le trouue dedās la mine, & est aussi mobile, cōme vous le voyez, sans le pouuoir esteindre, & faire mouuoir, qu'à biē grāde difficulté, tellemēt qu'il vient à sortir par la bouche du vaisseau ou il est, s'il n'est biē clos & fermé, sans delaisser au fond du vase aucune apparēce, ny sans perdre aucune chose de sa forme, & sans aucunemēt diminuer ne perdre son poix, s'il n'est reduit avec quantité & force de feu. Vous assurant q̄ la substāce terrestre, qui est en luy, est par subtilité aliée & meslée par l'humidité visqueuse, qui reside & faiēt seiour en luy, si, que quand le feu, comme son contraire, le vient à chasser sa nature, qui est aliée avec l'humidité visqueuse, vient à le supporter. Tellemēt que ces deux choses mises ensemble, se donnent aides & secours. Je vous ay recité cy dessus assez generalement de la blancheur du vif argent, mais ie suis encores content de vous dire que ceste couleur luy procede selon l'opinion d'Auicenne, de l'abondance de l'eau & terre subtile-

ment meslée avec les vaporations de l'air. Maints personnages le voyant ainsi clair & subtil, ont eu opinion que ce ne fust autre chose qu'eau congelée, par la vertu du soufre. Ce que n'est véritable, pour autant que l'eau pure ne se peult congeler par chaleur. Vous assurant que ie me fusse accordé à eulx, s'ils eussent mis en auant que la vehemente froideur interieure ou exterieure, l'eust de soy-mesme reduit à ceste forme, laquelle est assez cogneue, mesmement par les alchumistes, qui sçauent fort bien l'argēt vif estre mis en œuvre, par sa froideur en plusieurs medecines. Vous aduertissant qu'il a propriété & vertu de retirer les nerfs, à ceux qui se trauaillēt de le ietter hors de sa mine, & ne faut de les incōmoder, auenāt qu'ils s'oubliēt d'estre paresseux, à se tenir sur leurs gardes. Et le semblable vient à succeder aux personnes qn font estat de le manier. Si qu'avec la longueur du temps, il rend leurs membres totalement debiles & impotés. Quand il est composé avec le sel armoniac, le sublimé viēt à former, qui est vne matiere blāche & luyfante comme neige, corrosiue au possible, & poison suffisante, pour priuer de vie toute personne. Vous aduertissant qu'il a plusieurs autres proprietēz, que ie vueil delaisser à vous reciter, craignant de vous causer ennuy, lequel ie vueil abandonner pour vous faire entēdre la façō de decouurir la mine du vif argēt, lequel est volontairement enclos au dessoubs des montaignes, & mesmemēt celles sur lesquelles mercure à plus d'influēce. Vous rēdant certain que l'argent vif vient à se trouuer le plus communement au dessoubs des pierres blanches tendres, comme mortier ou chaulx. Mais si petites taches viennent à se monstrier sur la pierre, approchantes de la couleur azurée, il est certain que la lamine ne contient en soy grande fertilité. Les monts & lieux ou le mercure fait residēce, n'ont aucun defect d'eau & d'arbres, & si sont decorez d'herbes excedants en verueur celles des autres lieux, pour autant que l'argēt vif, a quant & soy vne frescheur sans estre accompagné d'une seichereffe pleine de vapeur. Tout ainsi que celle du soufre, du vitriol, du sel, & autres semblables. Vray est que les arbres qui sont plantez ioingnant l'argent vif, ne produisent aucunes fleurs. Et si par cas fortuit elles viennent à se mon-



strer, le fruit ne peut estre conduit à maturité. Vous aduertissant que les feuilles viennent à se monstrier plus tard au pres des mines de l'argēt vif, qu'elles ne font en autres lieux. Ce que deuroit estre tout au contraire, à cause de l'humidité & frescheur qui leur est contiguë. L'argent vif est communement decouvert au mois d'Auril & de May par les vapeurs & brouillars espois, qui se viennent à monstrier le matin au deffoubs du lieu, sans monter hautement en l'air, à cause de la pesanteur qui les accompagne. Si que celuy qui est experimenté en telles affaires, vient à descouvrir la mine, laquelle on dict estre parfaicte, si par cas fortuit elle est posée à l'opposite du vent septentrional. Les doctes alchumistes appellent ce mercure, l'abus du vulgaire & le deprisent grandement en tous leurs affaires, disans que ce n'est celuy que la nature produit pour engendrer les metaux. Mais ie me fais acroire qu'ils ne me scauroient nier qu'aucune partie d'iceluy, lequel ils reiettent, ne face entrée en celuy qu'ils se trauaillent mettre en lumiere. Et suis esbahi au possible, pour auoir autant de substâce en l'un qu'en l'autre, que ses reueurs prennēt la peine d'aller chercher la substance de Saturne metal terrestre, rouge & pleine de imperfection: qui me fait coniecturer, qu'ils delaissent la matiere laquelle leur est plus prochaine, & celle mesme qui produit ce qu'ils se trauaillent d'aller chercher, sans estre assurez de pouuoir rencontrer autre chose qu'ennuy. Avec lequel ie les vueil abandonner pour faire retour sur le chemin des mines ou se trouue le argent vif, lequel vient à estre battu avec pillons, ou molins (battans & moulans comme moulins à noix, ou comme les moulins d'Itales, qui moulent les oliues) le plus benignemēt qu'il est possible. & apres le font lauer, Mais si le Mercure est parmy la pierre confusēmēt meslé, aucuns de ceux qui font estat de le chercher, se mettent en deuoir de faire dresser vne petite loge voutée, & le deffus ils donnēt ordre faire tresbien fermer, afin que la matiere puisse tomber dedans vn autre moyen, qui panche d'un costé, au deffoubs duquel lon fait dresser vn, ou plusieurs fourneaux, tellement composez, que la bouche par laquelle le feu doit sortir, soit mis au deffus de la loge, dans les fourneaux, de laquelle pour-

ront estre reduits autant de pots pleins de la terre minerale, comme l'on aura la commodité d'y en mettre. Et apres dedans la vouste de la loge, on fera mettre quantité de rameaux vers, qui ne seront plustost rangez qu'on donnera ordre de bien faire fermer la fenestre & entrée, tellemēt que le vent n'y puisse faire entrée. Puis faudra mettre le feu dedans les fourneaux. La chaleur duquel fera prendre la fuite au mercure, tellement qu'il se laissera couler le long du lieu ou les rameaux seront posez, sur les fueilles desquels il se viendra poser & attacher. Parquoy celuy qui est expérimenté en tels affaires, ne faudra à esteindre son feu, & apres que le tout est refroidy, il ne faut à entrer dedans la loge, faisant tomber ce qui est resté sur les branches, puis vient à reduire en lieu propre & net son argent vif, continuant en ceste façon iusques à ce que la mine soit du tout rencontrée.




Aucuns autres viennent à le chercher avec moindre travail, portans grands pots de terre, la bouche desquels ils mettent l'une contre l'autre, remplissans le plus grand de mine, & le bouchant de sable ou cendre, afin que l'argent vif poursuivy du feu, sortant pour faire entrée en l'autre pot, qui est dessus, vienne à distiller sur les cendres ou sable, la ou il sera facilement recouré, aussi tost que le pot sera mis hors du feu & refroidy.

Autres




Autres apportent au lieu des pots certains vases de terres, la bouche desquels est aucunement large, & le fons estroit: comme sont les bassins, dans lesquels on vient à former le sucre, & met on dessus vn couuercle de terre, de l'espeffeur d'un doigt: alentour duquel ayant remply le vase de la terre minerale, on vient à mettre cendres, puis mettent feu aux fourneaux, tellement que le mercure voulant sortir, vient à hurter aux couuercles, tellement qu'il ne peut sortir, ains est contraint de tumber sur les cendres. Et comme ie vous ay dit cy dessus, est recueilly par ceux qui le cherchent.



Aucuns autres m'ont recité auoir veu mettre au lieu du couuercle & cédres, vn vase semblable à ce luy que lon appelle alembic chapelle ou clouche, pour distiller, & avec son canal on rece-

uoit ce qui se conuerrissoit en mercure, & avec son bec estoit porté à celuy qui le deuoit recevoir. Lequel ayant remply de mine le vase qui estoit au dessous, & bien couuert & accoustré, celuy qui estoit au dessus, ne differoiēt à mettre le feu au fourneau, par la force & vehemence duquel le mercure venoit à sortir & entrer au vase dessus, qui le remetoit & faisoit entrer en façon d'eau à l'autre qui le deuoit recevoir. Et en ceste façon vous pourrez vser de chercher les mines, y adioustant ce que par experience vous pourrez apperceuoir estre le plus vtile.



*Du soufre & de sa miniere.      Chap. 2.*


**L**E soufre est vn mineral tres-notoire, qui se monstre en plusieurs lieux, & lequel est produit & engendré d'une substance terrestre, vinctueuse & temperamment chaulde. Si qu'il est tenu & réputé par ceux qui font professiō de cest estat auoir semblance & approchement de l'element du feu, tellement qu'il est par iceux appellé diuin, semence masculine & premier autheur de nature aux compositiōs metaliques, & tant par sa grande chaleur & seicheresse, que par experience, il est veu auoir quelque conformité au feu: auquel il ne s'est plustost accosté, qu'il se transforme en luy, tellement qu'à la fin sa vinctuosité vient à estre consommée & perdue, encores qu'à bien grande difficulté on la puisse estain-



se estaindre & abaisser, si est-ce qu'il ne le faut iuger d'une telle substance qu'il ait pouuoir demeurer seul. Car combien qu'il soit de nature chaulde & seiche, il luy fault auoir la part & quantité d'humidité, qui est deuë à toute chose composée. Et qu'il ne soit ainsi vous le pourrez apperceuoir en sa fusion: vous aduertissant que le soufre se trouue en plusieurs lieux differant en couleur, car les aucuns sont blancs, les autres iaunes, & d'autres qui tiennent du gris & du noir. Vous assurant que ie ne vous ay encores recité toutes ses especes, & mesmement celle de la couleur rouge, qu'aucuns assurent auoir trouuée. Vous faisant certain qu'il ne fault proceder à le trouuer comme lon fait aux autres mines. Mais la nature voulant vser de liberalité, le fait resider aux montagnes toutes entieres: comme celles qu'on apperçoit aux Isles de Eolie aupres de Cicile ou bien Ethna, ou Mongibetlo, qui est posé dedans vn isle de Cicile, ou bien approchant à Pozul, qui est en terre Romaine sous le pouuoir des Senois à saint Philippe. Vous assurant que le soufre à l'odeur grande & assez agreable, & est de substance tellement ferme, que la longueur du temps ne le scauroit faire corrompre, ne rendre mol, encores qu'on le tient longuemēt en l'eau, & si ne vient aucunement à se diminuer ne augmēter en pesanteur. Vray est qu'il se rompt volontiers, se pouuant rendre impalpable, si est brisé dedans le mortier de fonte, & meslé avec de laille. Les mines du soufre ont plus d'apparence de terre que de pierres, encores qu'aucune-fois ses minieres soyent approchantes la couleur de certaine pierre blanche & tendre comme le mortier. L'odeur vehemente du soufre fait trouuer les minieres à ceux qui les cherchent, ioint aussi les baings qui viennent à naistre alentour de ce que ie vous ay dit de l'argent vis, contre l'opinion des philosophes sur la generation des metaux. Je vous tourne redire de cestuy-cy, & ne croy point qu'aucuns d'iceux interuienne proprement sinon en substance elementale, vous aduertissant que ie prens la hardiesse d'assurer cecy, pourautant qu'aupres d'iceux on ne peut trouuer aucun canal de metal, ny semblablement miniere de soufre, ny de mercure. Mais ie rentre dedans vne autre difficulté,


que ie souhaitterois de resouldre au possible, mettant en auant comme se peuuent engendrer en vn mesme instant & lieu: le chault & froid, l'humide & le sec, & estant engendrez se ioin- dre de telle sorte que presques l'vn se conuertit en l'autre. Comme lon dit estre necessaire du mercure & soufre sur la ge- neration des metaux. Car en ce lieu s'assemblent l'humidité de l'eau & froideur de la terre, qui reside au mesme lieu, auquel ses deux especes ne peuuent auoir grand pouuoir: à cause qu'ils sont grandement eslongnez de la chaleur qui procede de l'element du feu. Mais pour eiter de faire entrée dans labyrinthe de dispu- tes, ie suis content de passer outre pour vous monstrier comme ses deux especes se peuuent trouuer, & comme elles viennent à se desfrober & quitter la terre apres qu'elles ont esté descouuer- tes. Je vous ay declairé iusques à present les feux espouventables & grandes fumées, vapeurs promptes & chaudes, sortans de ces lieux, & semblablement la chaleur de l'eau qui en sort, laquelle est si grande qu'à peine les hommes ont la patience d'y tenir leurs mains. Dauantage ie vous aduertiy qu'aucunes mines de soufre viennēt à se trouuer, desquelles sort vne vapeur tant puante, sub- tile & forte, qu'elle a pouuoir non seulement de corrompre les esprits vitaux, ains d'oster le respiremēt de celuy duquel elle s'ap- proche. Tellement que les oyseaux qui passent parmy viennent à tomber en terre, comme s'ils estoient totalement priuez de vie. Et le semblable aux lieures, cerfs, cheureux, & autres bestes fauages ou domestiques, qui prennent volonté de s'en appro- cher: sans que les lezarts & venimeux serpens, ayent pouuoir d'e- uiter de tomber au mesme malheur. Et le semblable ne faudroit d'aduenir aux hommes, s'oublions d'y prendre leur chemin, sans estre sur leurs gardes de preuenir au danger, auquel ils pourroyēt tomber. Si est-ce qu'il ne faut tenir le soufre totalement entré les matieres totalement nuisantes, pourautant qu'il est mis en plusieurs medecines pour la santé de l'homme. Mais pour retour- ner sur mon propos, ie vous dy qu'il se trouue du soufre beau- coup plus pur l'vn que l'autre. Et si ie me traueille à vous descrip- re la varieté de ses couleurs, ie vous pourray causer ennuy. Si est-ce

est-ce que ie vous assure ray qu'ils sont trestous d'une mesme nature. La mine de laquelle ie ne vous veux enseigner d'auantage pour la trouuer, pource que la senteur de luy est si vehemente qu'il vous sera descouuert de loing & pres sans le iugement de la veuë. Ceulx qui cherchent le soufre tiennent l'entrée ouuerte, car il seroit impossible d'arrester au dedans si la caue estoit fermée, tant par la grande chaleur, que pour l'odeur insupportable dudit soufre. Apres que les hommes qui le cherchent, auront fait amas de ceste terre soufrerine, il est de besoing pour en tirer le soufre, de faire dresser vn fourneau ou lon puisse mettre aisement deux vases de terre de l'epaisseur d'un demy pied, pour plus seurement faire resistance à la force du feu, de la haulteur d'un bras, ayans couuercles de la mesme terre pour les fermer. Ioignant lesquels seront fichez deux broches ou canons de terre ayans leurs conduits moderement estroits. Ioignant lesquels sera posé vn autre vase de la mesme façon, accompagné de son couuercle sans auoir aucun canon.



Vray est qu'il aura deux trous sur les deux extremitez du coupeau, & vn autre au pied du vase pour donner issue au soufre qui doit entrer dedans. Er est de necessité en tel affaire d'auoir de tels vases, trois pour le moins en chascun four, ou six: faisant le feu aux deux extremitez. Les deux vases garnis de canons seront posez tellemēt que la flamme n'aura aucun pouuoir de respirer, excepté par deux ou trois trous, qui seront faits sur la som-

mité des couuercles du fourneau. Le troisieme vase sera posé hors du fourneau, en lieu qu'il n'ait pouuoir de s'êtir la chaleur du feu, & que les canals des autres deux puiffêt faire fluer, ce qui est dedans eu luy par les deux trous, alentour desquels on doit auoir sollicitude de mettre à force cendres pour bien estouper & euitter que la matiere ne vienne à se perdre. Car la mine du soufre sera mise dedans les deux premiers vases, qui ne seront riens moins fermez que le troisieme qui sera dehors, & au dessoubs duquel sera embrasé d'un gros feu qui sera continué, iusques à ce que la miniere des deux autres soit passée en celuy qui la doit recevoir, & laquelle passe en fumée, se conuertissant dans les canons en espeffeur suffurine, tellement qu'il vient à tomber comme s'il estoit conuertty en cire iusques au fond du vase. Si que le maistre ne faut à l'enfortir, iettant bois mouillé, ou terre cuite pour faire arrester la chaleur, laquelle n'est plustost passée, & le fourneau nettoyé, qu'on vient à descouurir les deux vases, & les auoir tournez sans dessus dessous, la miniere qui sera demeurée dedans, sera trouuée semblable aux cendres esteinctes. Lesquelles ne seront plustost viues, qu'on tournera remplir de terre les mesmes vases, tout ainsi qu'au commencement.



Le soufre se trouue encores dedans la miniere de couleur noire & iaune, lequel est plus naturel que les autres, beau & reluy-sant au dedans, tellement qu'on l'appelle soufre vif. Duquel ne  
se



se trouue grande quantité, & si le fault aller chercher sur le cou-  
 peau des montaignes, comme vne exhalation composée. Tre-  
 stous les soufres qu'on peult trouuer, sont de nature chaude &  
 seiche, & se peut fondre tout ainsi comme la cire ou metal, ser-  
 uant en medecine, & ayant la vertu de blanchir laines, & autres  
 choses diuerfes. Sieft-ce que la plus grande quantité est em-  
 ployée aujourd'huy en la pouldre à canon. Laquelle ne pourroit  
 tant soudainement estre enflambée sans son aide. Les alchumi-  
 stes, (comme maternel acteur de leurs operations par sa chaleur  
 & siccité, accompagnée de sa couleur iaune) l'ont en grande re-  
 putation & estime. Et le semblable ont les vendeurs de cire, les-  
 quels blanchissent leurs cierges avec la fumée du soufre reduite  
 dedans vne de leurs casses. Et le semblable ils font de leurs dra-  
 peaux sans y appliquer teincture quelconque. Et pour plus l'ex-  
 perimenter ses faiseurs de cierges en blanchissent les cheueux  
 de leurs dames, & couurechefs qui portent sur leurs testes, Da-  
 uantage on vient à en tirer huile de fort grande vertu, chaut &  
 desiccatif au possible. Qui est tout ce que ie vous puis dire du sou-  
 fre & de sa miniere. Parquoy ceulx qui en voudrôt plus sçauoir,  
 ie les priray d'aller visiter Pline, Albert le grand, Dioscoride, Au-  
 cenne, lesquels ont tous trois escripts de sa vertu & propriété.

*De l'antimoyne & de sa miniere. Chap. 3.*

**L'**Antimoyne est à mon iugement vne composition de cho-  
 ses produittes par nature pour la creation des metaux, qui  
 sont subiets à miniere, & approche bien fort à la complexion,  
 proportion & matiere de l'argent vif, lequel on estime vn mon-  
 stre entre les metaux. Vous assurant que l'antimoyne est de cou-  
 leur claire, d'odeur de soufre, difficile à fondre, & beaucoup plus  
 facile à rompre que n'est le voirre, encores qu'elle soit blanche,  
 & de beaucoup plus reluyfante que n'est l'argent. Les philoso-  
 phes alchumistes en font huile qui sert à donner couleur à l'or  
 posé sur l'argent. pour raison dequoy plusieurs d'eux en font cas  
 & l'ont en fort grande veneration. Et mesmement que l'anti-

moine approche plus l'espece des metaux que ne fait le soufre, & de cela ie me tiens assure, car i'en ay veu tirer vne liqueur sanguine en forme d'huile, laquelle on m'a assure auoir la vertu & proprieté de donner couleur d'or à l'argent. Ce qui peut estre vray: mais ie n'ay oncques veu l'experience. La miniere de l'antimoine se trouue aux montaignes, tout ainsi que celle des autres metaux, & se tire par diuerses operations, & s'en trouue en diuers lieux d'Italie. Si que d'Alemaigne on l'apporte parmy drapeaux à Venise, pour le seruice de ceux qui font les cloches, à cause que meslée avec le metal, elle rend le son plus haultain. Ceux qui font les vases d'estain la mettent en oeuvre, & le semblable font ceux qui s'amusent à faire les mirouers tant d'acier que de voirre. I'ay entendu qu'elle a proprieté de guerir les apostumes, vlceres incurables, faire tumber la chair morte, remettre & augmenter la viue, seruant non seulement à donner couleur jaune aux vases de terre, ains a pouuoir de teindre l'esmail, voirre, & autre labeur industrieux. Les mines d'antimoine sont abondantes en la conté de Sienne, & en y a vne fort prochaine de la cité de Masse, & vne autre grande contiguë & ioignante d'une autre cité, appellée Souana. Laquelle les experimentez chercheurs de miniere, iugent estre la meilleure, & emporter le pris sur toutes les autres. Il s'en trouue encores au conté de Seuffleur, aupres d'une terre appellée Seluena, & en plusieurs autres lieux, ausquels on n'en fait grand' estime, pourautant que ce ne sont mines d'or, ou d'autres metaux d'importance, vous assurant qu'il m'est impossible passer plus outre quant à l'effait de l'antimoine.

*De la margasite ou se trouue les metaux. Chap. 4.*

**O**N trouue les Margasites de plusieurs raisons, annexées & iointes avec toute miniere de metal, & croy que toute terre de mine produit la sienne. Me faisant à croire que les margasites sont les exhalations qui viennent à sortir des matieres secondes, ou bien le sperme menstruel que les metaux viennent à con-

à concevoir, lesquelles demeurent imparfaites par le deffault du temps. Aucuns disent en auoir fondu. Que s'il est ainsi ie prendray la hardiesse d'assurer la margasite estre commencement de mine, & non fumosité sublimée, pourautant que celle qui endure la fonte est desia paruenüe au terme de la disposition metalique: ou bien que quelque chose de la mine parfaite estoit meslée en elle, & par son alliance elle s'estoit fondue. Si est-ce qu'elle n'a pouuoir de rendre aucun metal, ains vient à produire vne matiere noire, ou de couleur plombine, laquelle ne sert à autre chose fors à donner couleur aux pots de terre, à teindre les voirres, ou bien de faire resuer les volontaires & trop credules alchumistes. Entre lesquels aucuns sont d'opinion que la margasite soit la semence de l'or. Et se font à croire l'ayant trouuée, que la couleur luy soit procedée par l'industrie de leur art, mais c'est tout au contraire. Car cela luy aduient quand la mine a sçeu garder l'argent, qui par le soufre, l'arsenic, ou feu, y a esté conduit. Et encores qu'elle soit plustost composition de mine que fumosité, ie me confirmeray à l'apparence de leur composition: comme celuy qui l'a encores veüe sur les confins de Frioli & de l'Alemaigne, autre sur le coupeau d'une montaigne, là ou ie descouris vne filoné excédant en longueur cent cinquante brasses, & en largeur demie brasse. Qui me fait auoir opinion que ce n'estoit fumosité. Car à la grandeur qu'elle demonstroit, il fust esté de necessité, que la miniere dont elle procedoit, fust esgale à toute la montaigne. Plusieurs autres sont qui disent que la pluye & force du soleil, introduit quelque vertu, avec le temps, en icelle qui est descouuerte, mais ie n'y puis adiouster foy, car nature tasche tousiours à la multiplication. Ceste composition de margasites est trouuée en diuersité de couleurs, & celle qui est luisante & iaune sembleroit estre fin or, si elle estoit accompagnée de plus de pesenteur qu'elle n'est, encores en trouue on, mais bien peu, de telle qui approche en couleur l'argent, si qu'on diroit que se sont petites pieces bien couplées & brunies, & tiennent ceux-la du blanc & du iaune. Les plus difficiles à trouuer me semblent celles sur lesquelles sont posez

certain grains, les vns gros, & les autres petits, si conformes à quadrature aux dez qu'il est impossible de les pouoir mieux paindre ne tirer plus iustement, vous assurant qu'elles ont toutes l'odeur du soufre, & si ne sont grandement dures. Mais quand on vient à les battre sur l'acier, elles viennent à rendre abondance de feu à grande quantité de flammeiches. Et mesmement ne faillent de faire ainsi les margasites qui se trouuent au dessus la miniere du vitriol, qui semble fer collé. Vous assurant que ie n'ay en plus grande recommandation la blanche que la iaune, & si ie ne fais non plus de cas de la grosse que de la petite, ains remets le iugement au medecin ou à l'alchumiste, qui la voudront experimenter. Car quant à moy ie l'estime du tout inutile pour estre iointe avec les metaux. Mais voulant parler par certain indice accompagné de l'autorité de quelque sçauant alchumiste, ie dy que la blanche est beaucoup meilleure, elle ne tient de la nature du fer, pour n'auoir en soy l'aduste malignité qui reside & fait compaignie à la iaune.

*Du vitriol & de sa miniere. Chap. 5.*

**L**E vitriol est vne substance minerale produite par exhalation, & de laquelle aucuns ont opinion, les matieres elementales, qui produisent les metaux, estre engendrées, & mesmement l'or. Vous assurant que ce n'est fumosité de metal, ne encores moins chose qui le produit, combien que par ses effaits, il ait apparence du contraire, pour l'excessiue odeur qui rend. Le vitriol approche bien fort la semblance de l'alun, ayant substance corrosiue, aspre au gouster, & rendant quelque pique d'aigreur à la langue. Et si ne faut à se resouldre en bien peu de temps, estant reduit en lieu humide ou mis en l'eau. On reputé le vitriol auoir en soy cinq qualitez, avec toutes lesquelles il a participation. La premiere desquelles est, qu'il a proprieté de soufre, la seconde, operation d'alun, la tierce, la corrosiuité du nitre ou sel. La vertu du metal en rend au quatriesme, & la proprieté du fer en la cinquiesme. Vous aduertissant que la mine de luy se trouue commune-  
ment



ment és lieux sauuages & peu frequentez, & si le faut estraire & tirer par l'aide des valées qui sont au pied des montaignes, ou elle reside & est enclose. Vous assurant qu'on trouuera la mine du vitriol plus communement en terre noire, ou ioignant vne pierre tendre, qu'on ne fera aupres de celle qui est dure. Et si est la pierre coustumierement semée par dedans de tache iaunes & vertes, qui ne sont grandement eslongnées de quelque mine de soufre, petite ou grande, de la senteur de laquelle il approche fort grandement. Les eaues qui viennent à sortir du lieu, ou est le vitriol, sont toutes corrompues & espesses merueilleusement, tenans plus de l'element terrestre que de l'eau, laquelle s'apparoit bouillante en aucuns endroits, & aux autres non. Si est-ce qu'elle est tellement couuerte de grande quantité de fumée, qu'on iugeroit aucunesfois le lieu, ou elle s'apparoit, estre quelque spelôque, ou caue infernale. Ceste terre ou miniere vient à produire le vitriol, mais il en faut premierement tirer la quantité qu'on a desir d'auoir, puis la porter en quelque place pour la faire seicher l'espace de six mois. Sur la fin desquels on vient à remettre au dessus celle qui estoit au dessous, & en la remuant avec vne pelle, on se trauaille de la briser & estendre, pour plus facilement la faire recuire & rendre ferme. Et apres on donne ordre de la remettre en lieu couuert, là ou est delaissée encores six ou huit mois, auant que de la mettre en œuvre. Ceux qui se mettent en deuoir de chercher la mine du vitriol, sont dresser premierement en lieu couuert, vne mare ou viuier de la longueur de vingt ou vingt cinq brasses, & de la largeur de dix ou douze, de haulteur quatre, ayant au milieu vne vuidage qu'on posera à l'un des coings de l'eau, par l'aide duquel la terre purgée sera retenuë. Et à demy brasce pres du centre seront posez trois ou quatre trous, qu'on pourra tenir fermez & ouuerts, quand l'occasion s'offrira, ioignant ce bain sera dressée vne loge tresbië murée & couuerte, si que la longueur d'iceluy vienne à couurir la longueur de l'edifice & bain. Et faut que ceste ouuerture soit de la largeur de trois ou quatre brasses: afin que le trou qui sont posez aux lieux d'iceux nommez, viennent à respondre & se raporter à ceste couuerture. Vous aduer-

m iij

tissant qu'il fault remplir le baing à moitié d'eau, alors qu'on veut tirer de ceste terre la substance du vitriol, sans mettre en oubly de fort bien estouper & fermer tous les lieux, par lesquels le vitriol se peult derober. Et apres auoir pris de la terre, il la fault destréper en l'eau iusques à ce que l'epaisseur de la terre viennent à descédre en bas, & q l'eau reste claire & luyfante accôpagnée de substâce forte & disposée à faire le vitriol. L'eau q demeure claire prend son conduit en l'autre receptacle, par les canals qui sont mis au deuant des trous que ie vous ay nommez. Et encores que ceste eau ne soit iugée assez vertueuse pour faire le vitriol, si ne delaisse elle à demeurer claire, si qu'on la conuertira en vitriol, la metant boullir. Et pource faire il fault dresser dix ou douze chaudières de plomb, esgales en grandeur & semblables à celles, avec lesquelles on forme le sel. Et à la chascune sera accosté vn fourneau muré, ioignant le lieu ou l'eau est reduite. Sur les chaudières seront posez canons & tuyaux, lesquels seront ioincts aux pieds les chaudières ou ceste terre minerale sera mise. Laquelle veult longuement bouillir, afin que ces vapeurs soient conduites iusques à vn certain terme & periode. Et apres que ceste eau semble estre reduite en grâde chaleur on vient à mettre & ietter dedans pour la faire resouldre & congeler, du fer vieil ou nouveau. Et en ceste façon il fault continuer le faire iusques à ce que elle dône apparéce de se pouuoir congeler. Parquoy les ouuriers l'apperceuans en ceste sorte, ne tarderont à la mettre hors de la chaudière, pour la ietter dedans vne casse, ou quelque autre vase de bois de grandeur excessiue. Là ou ils la laissent seiourner deux ou trois iours, afin que toute partie disposée à congelation, ait la commodité de se congeler. Et apres ils tournent remettre l'eau qui est demourée aux vases dedans les chaudières, ou ils la reduisent à part pour luy donner l'oportunité de se rendre conforme à celle qui s'est congelée. Et apres que les ouuriers ont ietté & mis hors des casses, vases, ou cuues le vitriol congelé, ils retournent le mettre aux chaudières ou dedans certaines coupes, ou ils se conuertissent en pains. Puis le tournent trestous refondre ou bié vne partie, si que, ce qu'auoit esté reduit dedans les coupes, se re-

tourne

tourne encores à congeler vne fois. Puis on vient à vuidier l'eau, & tournent l'emplir de vitriol congelé & alié avec l'autre qui n'y a encores esté. Si que le tout vient à s'augmenter, tellement que les pains de vitriol viennent à se former tous entiers. Mais ils se font beaucoup plus beaux en les iettant dedans les coupes, & en sortent beaucoup plus nets quand on les fait trois ou quatre fois. La mine de vitriol est trouuée en Italie, & dehors en plusieurs lieux. Aucuns disent que là ou elle reside qu'elle donne indice de mine d'or. Ce que ie ne puis approuuer, vous assurant, qu'on est contraint de laisser la caue ouuerte à ceux qui cherchent la mine du vitriol. L'odeur duquel est insupportable & pire que celui du soufre. La mine du vitriol est descouuerte par diuersité de signes, & mesmement par l'excessiue odeur qu'il produit, laquelle rend de luy clair tesmoignage. Plusieurs alchumistes ont en recommandation & estime par dessus tous autres le Cyprien & le Babylonique. Mais moy qui ne veux eslongner tant fort, vous veux parler de celui d'Italie, & mesmement de celui duquel j'ay plus de congnoissance, lequel s'appelle vitriol Romain, qui se tire au conté de Baignorée. Et combien qu'il n'ait le lustre si haultain que l'autre, ne la couleur du vert azuré comme le Cyprien, si ne laisse-il à estre de garde, vous assurant que i'estime beau & meilleur sur tous les autres le noir. I'en ay apperceu venir quantité grande à Venise de celui d'Alemaigne, mais à mon iugement il tient plus de la terre que ne fait le Romain, la plus grande partie duquel approche la verdeur des herbes, mais l'autre approche la couleur iaune, encores est-il quelque peu moucheté de vert, vous aduertissant celui de Tuscan n'estre rien moindre en force & beauté que le Cyprien. Encores peult on tirer du vitriol à Trail, à Mont rond, à saint Philippe, à Souane, & en plusieurs autres lieux de la terre de Sienne, & si s'en trouue encores au conté de Volterre en la montaigne d'Amiata, à la conté de sainte Fleur, là ou ie suis d'opinion se pouuoir trouuer du vitriol blanc. Les alchumistes vsent volontiers du Cyprien Romain, quand ils vueillent faire leurs huilles & eaux fortes & corrosiues, mais ie m'assure qu'ils prendroient volontiers de celui de masse qui est

Italique, s'ils auoient cest heur d'en pouuoir recouurer, à cause qu'il est biē fort louable au Cypriē, & tant peu terrestre qu'on le peult mettre en œuvre sortāt de la caue. vous assurāt qu'il se trouue de toute espece du vitriol en la mesme façō que ie vous ay decclairée du soufre. Et se trouue du vitriol qui se reduit naturellement sans aucun art à son extreme curité, lequel se met hors de sa chaleur avec vne poille, & laissé seiché se conuertty en vitriol trespuissant, tellement qu'il en vient à perdre le nom, & est appellé couperose de laquelle les alchumistes, comme de matiere forte & desiccative, se seruent le plus communement, & le semblable font les paintres, quand ils vueillent faire promptement seicher leurs meslées couleurs.

*De l'alun de roche & de sa miniere. Chap. 6.*

**L'**alun par le vulgaire appellé alun de roche (laissant à vous dire la deduction du vocable) est vne substance terrestre congelée & luyfante de nature chaude & seiche, de saueur aspre, accompagnée de goust salé, ayant la propriété de reteindre & ronger. & se peult tirer par artifice des pierres minerales. Vous assurant que tous ceux que i'ay veu sont d'une mesme nature, mais ils ne sont de semblable couleur. Car l'un est blanc & l'autre rouge. Plinie recite qu'il s'en trouue de noir, ce que à esté congneu par les anciens: mais on ne trouue par escript qui à iuuenté le moyen pour le trouuer & tirer tel que les modernes vsent pour auourd'huy. L'alun outre son interieure nature salée, a vne grande visquosité, laquelle est plustost descouuerte que ne sont les autres effets. Car si on vient à le mettre au feu pour le calciner, il vient à se resoudre facilement avec eau & feu. Les alchumistes & ceux qui departent l'or s'en seruent merueilleusement, & sans l'aide d'iceluy, il leur seroit impossible de faire leurs eaues fortes. Et si n'est rien moins necessaire à ceux qui font profession de teindre draps & laine qu'est le pain à l'homme. Dauantage il est mis en œuvre par ceux qui accoustrent le corail, & est appliqué en medecine pour obuier à plusieurs maladies & infirmittez. Sa mine se  
trouue



trouue aux montaignes, tout ainſi que celles des autres: mais elle ſe rencontre en bien peu de regions, encores que les anciens ayent recité & aſſuré qu'il ſ'en trouue en Cypre, Armenie, Macedone, Ponte, Afrique, Cecile, Sardeine, & Eſpaigne, aſſeurans d'eſtre en ceſte contrée auſſi liquide qu'eſt le miel. Mais pour le iourd'huy ie ne ſçay lieu ou l'alun ait pouuoir de ſe trouuer, fors en Hellespôt. aupres de Metelin en Eſpaigne, & ſemblablement ioignant Carthage en vn lieu appellé Mazaron, mais en Italie il ſe trouue en pluſieurs lieux, excèdent en beauté, quantité & bonté celuy des autres contrées. Et pour contenter voz deſirs, ie vous dy qu'il ſ'en trouue en la terre des Neapolitains à Iſchia, à Pozul, & ſemblablement en la terre Romaine à douze mil de la Mer entre Ciuita Vechia & Corneto, en vn lieu appellé Letolſe, là ou pluſieurs montaignes ſont aſſemblées. La plus grande partie, deſquelles, ſont de celles qui produiſent l'alun, & ne furent deſcouuertes iuſques au temps de *Pius ſecundus*, apres lequel les miniſtres de la chambre apoſtolique, ont faiët diligence de les cauer, & en ont tiré vn threſor qu'on ne peult eſtimer. Et ay opinion qu'ils ne delaiſſeront à ſuiure leur volonté iuſques au dernier iour du ſiecle, car ils ont opinion (apperceuant le lieu tant bien formé de pierres, bois & autres choſes neceſſaires) de ne pouuoir iamais eſtre eſteinct ne vuidé par humaine operation. Il ſ'en trouue encores en la terre du domaine de Sienne, à Maſſa & à Mont rond, & ſemblablement aux contez de Piombin, Volterre & à Campiglia, ſans que ie ſache en toute l'Italie ne au dehors autre mine d'Alun. Vous aſſurant celuy que i'ay veu eſtre de trois ſortes differentes, l'un blanc & ſemblable aux pieces grandes de criſtal, ayant ſemblable luſtre, & ſe congele en forme fort epeſſe & quarrée, tellement qu'on iugeroit diamans de exceſſiue grandeur eſtre poſez ſur les quatre extremitez & coings, tant beaux ils ſe demonſtrent. Vne autre vient à ſe rencontrer approchant de la couleur rouge: qui ſe congele plus ſoudainement que le blanc, à la netteté duquel il n'approche, mais il a en ſoy plus de force encores, qu'il ne ſoit à la veüe ſi agreable. Toute l'autre eſt rouge, & n'excede en grandeur vne ſebue. Mais il eſt de nature

beaucoup plus corrosif, comme son operation le fait apparoir. Ioint aussi que le regardant, vous le iugeriez de couleur de feu, ayant apparence de plus de chaleur que n'a l'autre, & si fait l'eau des departeurs beaucoup plus forte, & avec moins de flamme. Vous assurant que c'est de celui qui vient de Metellin, Mazaron, & Carthage, qui sont assez semblables en couleur & grandeur, & vn chascun d'eulx a sa pierre particuliere. Le blanc vient à estre trouué dans vne pierre blanche, ferme & pesant, & de couleur fauve. Et combien que de plusieurs pierres diuerses en couleur, l'alun vienne à fortir, il s'en trouue de couleur bazanée, entre les autres le plus tendre. Vous assurant qu'on ne sçauoit iuger à l'œil, n'auoir signe par le gout que l'alun, fust reduit en aucune pierre sans le faire cuire, premierement par vn certain iugement general & confus, que les praticiens viennent à concevoir par experience. Toutes les bonnes mines de l'alun, au moins celles qu'on veut mettre dedans le feu, doiuent estre aucunement dures, & seront les meilleures celles qui peseront le plus, & qui n'auront aucuns petits trous par dedans: sur la sommité d'icelles lon trouuera tousiours leur margasite vne pierre appelée pirrites, presque aussi dure au fer & feu que la pierre qui est propre pour faire l'alun, laquelle approche le fer en couleur, ayant aucunes taches de blanc & de iaune, qui la font estimer pierre inutile pour faire l'alun, pourautant qu'elle ne peut cuire en fournaise, qui est cause qu'elle ne peut estre renduë molle, comme la bonne pierre. Et si vous entreprenez de la faire cuire par continuation de feu pour la rendre tendre, ie vous aduerty que vous viendrez plustost à faire consommer la bonne pierre, & passer les termes du feu, brullant la substance de l'alun, si que ne luy resteroit plus grande chose que calcinosité, & plus de crasse en la dissolution, lors qu'on la voudroit congeler en la chaudiere. Pour à quoy obuier les sages maistres procurent avec diligence, que la pierre soit sicee auant que de la cuire. Et la font encores resier pour la faire dissoudre, apres qu'on la fait molifier, auant que de la noyer, & mettre dedans la chaudiere. Les caues, ausquelles les ouuriers s'acheminent pour trouuer ceste pierre,

se laissent ouuertes, & continue-lon d'agrandir la bresche, iusques à ce que ceux qui cherchent ceste pierre soient arriuez au milieu de la montaigne, là ou ils esperent trouuer plus grande quantité de ce qu'ils cherchent. Parquoy ayans quelque peu descouvert la terre, ils ne tardent à faire vne longue trenchée. Puis apres ils commencent à tailler la pierre le plus profondemēt qu'il leur est possible, sans oublier d'appuier & dresser pieces de bois, pour garder de tōber ce qui est dessus, qu'ils ne tardēt à laisser ruiner quād ils voyent leur point. Puis avec masses de fer & autres instrumēs, font diligence de la rompre, separant la bonne d'avec l'inutile & mauuaise, en enuoyant la bonne sur charrettes à la fournaise, & la mauuaise en la riuere, tant pour nettoier la caue, que pour ne ser uir d'empeschement aux ouuriers, qui se trauaillent tousiours de passer outre, s'adressans la part ou ils descouurent plus d'apparēce de mine. Vous assurāt qu'il ne seroit de necessitē aux gens de cest estat, qu'ils vinssent à percer le mont iusques au centre, pour voir ce qui est dedans, sans craindre à se aider de l'art de nigromance, ou de la force des geants, pour le renuerser sans dessus dessous. Vous assurant qu'on ne peut trouuer aisement les montaignes qui produisent telles mines, & si par cas fortuit, ou par art, on ren contre les mines, apres auoir cauē, & siē comme ie vous ay dit, le tout sera conduit aux fournaises, qui ne sont faictes autrement que les communes ou lon forme la chaulx, voutēes de la mesme pierre, & le semblable sera le dessous pour receuoir le feu pour cuire la pierre, de laquelle ceste voute sera remplie, & y sera le feu continuē l'espace de dix ou douze heures ou plus, à la discre tion de ceux qui conduisent l'entreprinse, à l'experience desquels gist le tout. Car si on s'oubloit d'y prendre garde, la vertu & substance de l'alun viendroit à estre consommée par feu: tellement qu'on ne pourroit congnoistre la vertu de la pierre, & seroit dangereux que le patron & conducteur de l'œuure vint à estre interessē bien grandement sur la despense qu'il auroit faite. Parquoy il est necessitē de congnoistre les pierres & leurs propres couleurs avec indice d'experience, & semblablement les feux & fumées sulfurées selon qu'elles donnent

apparence de foy : Car on ne peut auoir notice par parolles que malaisement. Parquoy on doit estre songneux à sy exercer plusieurs fois, pour puis apres s'arrester à ce qui suffira estre le plus vtile & commode. Quand ceste pierre sera bien esté fumée & cuite, & que la chaleur s'en sera absentée, les ouuriers la mettront hors de la fournaise pour la poser en quelque place plaine, en laquelle ils poseront ces pierres, les vnes sur les autres, tout ainsi comme si on vouloit dresser vn rempart de muraille, qui continueront de parfaire iusques à ce qu'il soit de la longueur de vingt ou vingt cinq brasses, tenant en largeur quatre, & en hauteur vne & demie approchans de deux. Apres ils dresseront vn canal d'eau pour l'arrouser soir & matin, & en esté trois fois le iour, continuant ceste façon de faire quarante iours, sur la fin desquels la pierre se trouuera subtile, & assez propre pour faire l'alun. Mais premierement que de pouuoir cōduire à cest effet, il est besoing de recouurer vne loge assez spacieuse. Et pour espargner la despence la pourra faire bastir en façon de cloches, mais il fault que elle soit large, tellement qu'on y puisse mettre vne ou deux chaudières, avec la quantité des casses ou l'eau pour congeler sera mise, qui seront de la grandeur que pourront porter les chaudières. Le fond desquelles sera de pierre ou de bronze, qui esgalera vn diametre en grâdeur de quatre brasses, ayant alentour vn bord tout ainsi comme les plats d'estain. Et seront mises es chaudières ioignant les fourneaux contre le mur, & le tout enchassé dans le boys vne brasse & demie du bord des chaudières, iusques au fōd, on y procedera en forme pyramidale, ou en façon de cisterne, tellement qu'elle vienne tousiours en eslargissant. Et si le centre vuide est de trois brasses & demie, la bouche & entrée sera de cinq. Et apres que le tout sera accoustre à la façon que ie vous dy, on remplira la chaudiere tout à l'entour de chaux, d'escaille de fer, de glaire d'œuf & d'huyle. Et le tout sera bien composé & incorporé ensemble, pour obuier que l'eau, qui viendra à bouillir dedās, ne s'en puisse sortir, ne verser. A l'entour du bord on dressera vn cercle de boys espois de demie brasse, & hault quatre fois autant, pour aider aux ouuriers quand ils voudrōt leuer la pierre & en-



& entrer l'eau qui sera au fond de la chaudiere, pour la purger de la crasse terrestre & matiere dure & nō dissoluë. On ne peut vser en autre façon en la mesme loge, ou en vn autre, accompagnant vne chacune chaudiere de trête cassés ou cuues de boys de cheffne, dans lesquelles sera mise l'eau pour estre congelée, & seront de la haulteur de deux brasse & demie, de largeur de deux, & de trois en longueur bien faittes au possible. Et en chacune seront mis des ouuriers avec leurs instrumens, pour garder que chose quelconque ne vienne à verser, & se mettent tous en ordre ioignant la muraille, & pres les vns des autres tout ainsi qu'il leur sera plus agreable. Or vous ay-ie rendu les pierres de l'alun acoustrez à leur deu, & les chaudiere sur les fourneaux, & semblablement les cassés dressées & mises en ordre pour faire l'alun: parquoy desirant passer plus outre, il vous fault premierement emplir d'eau (qui prendra son cours par vn canal) la chaudiere, laquelle sera si grande qu'elle tiendra cent charges d'eau: pour laquelle faire bouillir on mettra le feu au dessous par la bouche du fourneau. Or aussi tost que les ouuriers l'apperceueront bouillir, ils mettront dedans la pierre, laquelle deuiendra tant fort subtile pour estre mouillée, que sera presque conuertie en terre. Vous aduertissant qu'on en pourra mettre dedans à chacune fois six ou huit charretées. Et à l'heure sera de besoing que quatre des ouuriers se tiennent sur le bord, estans fournis de pelles de boys grandes & longues, tellemēt qu'ils ayēt pouuoir d'atteindre iusques au fond pour remuer & tourner parmy l'eau ceste pierre, afin d'en tirer & mettre hors celle qui est par trop dure & mal disposée à se fondre. Et en ceste façon trois ou quatre fois, ils ne faillent de ietter en la chaudiere toute la pierre qu'ils vueillent mettre en œuvre, faisans intermission de l'vn à l'autre l'espace de trois heures, donnans commodité à l'eau de perdre sa chaleur. Et apres qu'elle est aucunement refroidie, & remettans de la terre au dedans, ils retournent à la faire bouillir. Et quand ils apperçoient sur la fin que la chaleur est bien vuidée des pierres non cuittes, & l'eau descompagnée de crasse terrestre & espesse, apperceuans l'eau disposée à se congeler, & bien chargée de sub-

stance d'alun, avec certains vases de bois, fermez en la façon des manequins, ils ne faillent à l'espuiser, & par certains canals, propres à cest affaire, la font aller rendre dedans les casses & cuues, les remplissans tous l'un apres l'autre, là ou ils la laissent reposer pour se congeler, quatre iours en hyuer, & six en esté. Sur la fin desquels les ouuriers font deux trous au dessoubs des casses pour donner cours à toute l'eau qui n'est congelée. Mais premiere-ment ils reçoivent toute la plus claire, & la remettent dedans la chaudiere: ou dedans l'une des casses, pour la remettre encore vne fois, car elle a desia tiré quant à soy la substance de l'alun. Vous as- surant que vous ne faudrez en usant ainsi de la trouuer dedans les casses, que vous aurez remplies, attaché au bois en la mesme quan- tité & vertu qu'auoit la pierre qu'on auoit mise dedans, soit que elle fust blanche, ou rouge, selon la qualité de la mine, ou elle au- roit esté tirée. Vous aduertissant qu'on doit ietter au vent ce qui se trouue au fond de la casse, s'il n'y a apparence d'alun de l'épaisseur de trois ou quatre doigts, pour autant que cest chose inutile. Mais l'autre matiere qui apparoit sur l'eau doit estre remise en la chau- diere en la compagnie des pierres qu'on veut faire rebouillir. L'al- lun qui se trouuera attaché dedans les casses, sera besoin arracher avec vn enchampre, ou quelque autre fer, & l'auoir tiré & laué dedans vne petite cuue, sera réduit à couuert dedans vn magasin, pour autant qu'il est conduit à la fin de sa perfection. Je ne veuls oublier de vous aduertir qu'avec l'auantage des ferremens, four- naises, chaudières & grandes casses, on vient à faire amas de l'alun en plus grande quantité, tellement qu'on vient satisfaire à la de- pense, estant aydé du profit qui en vient à sortir. Plusieurs autres especes semblables en substance à ceste, se trouuent, cōme l'alun de Catina chiama, fecce & de Plume, qui est tout ce que ie vous pourroye ou sçauroye dire de l'alun tant artificiel cōme naturel.

*De l'arsenic, orpiment & reagal. Chap. 7.*

**L'**Arsenic & orpiment sont deux substances minerales en na- ture conformes, pures & sans estre meslées d'autre espece, & pour

& pour leur apparente qualité, nous dirons leur composition estre vne terre aduste, vous aduertissant qu'ils sont tant subtils & penetrans qu'estans aliez avec autres metaux, ils ouurent & font telle operation qu'ils les corrompent, & les transforment presque en autre nature. Les alchumistes sophistes blanchissent pour leur ayde le cuiure, letton, & plôb iusques à leur donner vne mesme blancheur qu'a l'argent. Vous assurant qu'ils sont de nature chaude & seiche, iusques au quatriesme degré, si on veult adiouster foy à l'opinion de Physiciens, qui les disent grandement corrosifs, comme ceux qui sont grâdement contagieux à toute chose ayât vie. Il se trouue d'arsenic qui est blanc, & d'autre qui est de la mesme couleur du citrin. L'orpimét & luy sont dispersez encores qu'ils prênēt naissance en vn mesme lieu, & si sont tous deux couuers de lames & escailles, lesquelles sont beaucoup plus subtiles & deliées que n'est papier. Si est-ce qu'on vient à les separer facilémēt, & les auoir rôpues, on en fait de la poudre. Leur mine se trouue en Hellepont, & en Capadoce, là ou il est caué fort profondement, pourautant que la nature est auare à nous monstrier ou elle reside, nous enseignant qu'on ne se doit trauailler à chercher chose si pernicieuse. Si est-ce que les superbes chercheurs de mines, ne s'en refroidissent aucunement. Mais apres qu'ils ont caué profondement pour la trouuer, ils marchent tout le long de la caue bouchee, estans garnis d'esponges trépées dans vinaigre, pour euitier q̄ leur exhalatiō venimeuse ne vint à les priuer de vie. Et ne s'oublent apres auoir trouué ce qu'ils cherchēt, de prendre la hardiesse d'oster la terre qui est alentour. Ces mines n'approchent aucunement à la semblance des autres, ains sont formez en façon de ciottoli d'un fleuve, & si sont merueilleusement pesantes, si qu'on les iugeroit auoir quelque conuenance avec les metaux, & que la nature leur permit de faire le mesme effet de l'or ou l'argent, ayant respect à leur couleur & pesanteur. Mais les vns ont leurs effets vtiles & pleins de gracieuseté, & ceux cy sont pleins de cruauté. Vous declarant derechef encores que i'apperçoyue en leur nature diuersité grande, que les aucuns disent qu'on peut tirer or de l'orpimét. L'arsenic blanc

se trouue par le souhait des praticiens quasi en toutes les compaignies des mines de metal, pourautant que c'est luy qui consume & emporte l'argent aux fontes, qui est contenu dans iceux, vous aduertissant que ie ne me sçauroye persuader le second auoir telle propriété qu'a le premier. Je vous dy encores que l'orpiment & l'arsenic cristalin, sont d'une mesme nature, & si me semble à veüe, d'estre de composition diuerse. Car l'un se monstre blanc, ou de couleur citraneuse, qui signifie contenir du terrestre & aquatique. Et l'autre est veu de couleur d'or reluisant, beau, & de substance sulfurée. Tous se brisent & se calcinent comme fait l'antimoine, & meslez ensemble se forment le reagal par sublimation, qui est de leur mesme nature, delaisans tous trois une certaine feuille blanche comme argent, & aussi facile à rompre comme est le voirre, l'arsenic, orpiment & reagal fondus ou bruslez ensemble s'en vont en fumées, & accompagnez avec autres metaux restent en eux incorporez: tellement que les metaux deuiennent si fort subiets à rompre, qui sont en danger de demeurer inutiles, sans estre aidez par art. Vous aduertissant que les medecins font seruir ces trois poisons en plusieurs choses, encores que leur qualité soit pernicieuse & dommageable. Aucuns assurent que cest un souverain remede contre la peste, les portans sur le cœur dans un petit sachet. Et encores disent que c'est un souverain remede pour celuy qui a longuemēt gardé la toux, & qui crache le sang. L'orpimēt meslé avec lessiue & chaulx, fait tōber le poil en quelque part qui soit, sans faire souffrir aucun mal. Et est presque propre pour cauterizer. Mais cōsiderans la nature mauuaise de ces trois, ie vous conseille de ne pratiquer avec eulx, si la necessité ne vous y cōtraint.

*Du sel commun, qui se tire es caues, en eaues, & autres en general.*

*Chapitre 8.*



A quantité du sel que nature produit en plusieurs & diuerses regions est merueilleusement grande, comme Plin en rend tesmoignage en sa naturelle histoire. Ioinct aussi que les diuersitez des choses salées, sont en grāde abondance, & mesmemēt de celle



de celles desquelles on peut tirer sel, comme sont toutes les liquides passant parmy les cendres, & le vrines de tous les animaux. Mais pourautant que ce ne sont raisons ayant pouuoir de bailler aux hommes ce qui leur est necessaire & commode à la vie, ie m'abstiendray de passer plus outre, pour vous declarer comme lon procede tant seulement par deux moyens à recouurer abondance de sel, pour la necessité des humains, Le premier desquels est de le tirer & aller prendre en caue avec certain art, & mesmement selon la commodité des lieux & eaues salées prochaines de la mer, ou de ses fontaines par congelation ou seichecheresse. L'autre moyé est de tirer de la terre le sel, lequel est luyfant & beau au possible. Et se prend aux montaignes formé en pierre naturellement, sans aide d'art quelconque. Vous assurant que tous, tant gros que petits sont de mistiô terrestre, de chaude & seiche nature, ayant certaine puissance de ronger les metaux & toutes autres choses, ou lon ne s'oublie d'en mettre. Et si ont vertu de conseruer & garder toute chose disposée à corruption par humidité, & si deseichent les corps ausquels on prend la peine d'en mettre, sans auoir proximité avec le feu, encorés qu'ils soient chaulx & secs, comme à le salnitre, ains comme ennemy se met à saulter & fuir aussi tost qu'il le sent, comme l'armoniach, le sel gemmé & autres semblables. En autre cōtrée les dessusdits ne seruent nullement fors qu'aux alchumistes, ou en quelques operations medicinales. Parquoy ie delaissieray ses operations particulieres, qui seroient longues à declarer, & vous reciteray la pratique de celuy qui se fait par attraction des parties subtiles, dans les eaues marines, salées par la puissance des rayons du soleil caniculier. Et semblablement de celuy qui se fait par emouuement de l'eau qui vient afluier, ou qui se tire hors des puits. Et entre rous ie iugeray celuy estre meilleur, qui sera luyfant & tenant moins de la terre. Pour former celuy qui est dedans la marine, il le faut faire sur le grauier en lieux plains & fort spacieux, dans lesquels les vagues & vndes marines, ne puissent faire entrée. Pour à quoy obuier, il faut faire quatre ou six fosses larges de trois brasses & autant profondes, ayant de longueur trois cens brasses.

o

Et seront posées le long de la plaine, eslongnée les vnes des autres enuiron cent brasses. Et à trauers ceux cy, en seront posées en forme de croix deux ou trois autres, lesquelles sont appellées maistresses fosses, pourautant qu'elles prennent l'eau dedans vn estang qui est prochain de ceste place, & la portét par tout le circuit & de fosse en fosse, à l'entour desquelles on dresse motes de terre, pour euitier quel'eaune s'alle accoster de la fosse principale, en laquelle on fait vne petite bouche pour entrée, & semblablement vne autre au pied pour la sortie de l'eau de la marine. Pour laquelle faire entrer, ils ouurent la bouche à l'entrée, afin qu'elle se puisse mesler avec l'eau de l'estang, qui est d'eau douce, avec laquelle il est de necessité de la ioindre, ou par ayde de fleuve, ou par secours de pluye encores qu'on assure que le sel se forme en Candie sans eau douce, & qu'on y remply toutes les fosses maistresses, ainsi qu'elles sont estendues sans fermer les autres, ains les laissent remplir, tellement que l'eau vient à se congeler & crouster par abbreuatiō de sel: puis apres auoir tout vuidé & purgé ainsi qu'il appartient, tournēt remplir voulans cōmencer leur labour de la susdite eau de la mer, laquelle ils laissent tant reposer qu'elle vient à se mōstrer en certaine disposition de grosseur. Ce qu'apperceuans les maistres, ils ne tardent de la faire passer en la seconde fosse, en laquelle ils la font reposer quelque espace de temps, puis ils la font conduire en la tierce, là ou ils la laissent totalement congeler. Et les fosses vuides ils font remplir de la premiere ou seconde eau, tellement qu'ayans grand nombre de fosses, ils font du sel tant grande quārité qu'ils vueillent. Mais ie suis esbahy d'ou procede que l'eau de la mer est ainsi salée. Et suis biē cōtent de vous en dire mon opinion, encores que ie soye certain qu'elle sera approuuée de gens doctes & lettrez pour le peu de doctrine qui me fait compagnie. Ioint aussi que cela à esté decidé par le diuin Aristote, & approuué par plusieurs autres hommes de grande erudition. L'opinion desquels est, comme ie croy, que ne ignorez que les rayons du soleil deseichent & brulent certaine partie de la terre, laquelle estre esleuée en hault vient à tomber en la mer, là ou elle prend le goust du sel, vous  
assurant

assurant que ie ne vueil cōtreuenir à ceste raison pour auoir esté prononcée par personnes de grande autorité. Vray est que ie ne les puis aisément comprendre, à cause que ie sçay plusieurs lacs & eaux sur la terre qui ne deuiennent point ainsi salées comme la mer, encores qu'elles soyent en moindre quantité, si ne sont elles rien moins exemptes de l'ardeur du soleil, ne de ses rayōs. Ioint aussi que celles de l'Océā, de la mer Caspie, & de plusieurs autres mers, deburoyēt estre semblablement salées. Et suis esbahy pourquoy on trouue en la mer aucūs lieux plus salez que les autres, & ne me puis garder de penser que telle chose procede d'une certaine propre nature de terre ainsi salée, & mesmement pour estre comme il en y a en plusieurs lieux au deffoux des eaux de la mer, & cela me fait aduancer d'en dire plusieurs raisons. Et principalement quand i'apperçoy au deuant des yeux de mon entendement, si grande quantité de montaignes & autres terres diuerses qui sont des eaux de la mer vestues & couuertes, ie viens à perdre le doute que i'ay eu, croyant que le sel se peut aussi bien former en la mer, comme elle fait dedans la terre avec l'aide de ses mines. Et n'ay mis en oubly d'auoir entendu autrefois qu'en Cypres on pesche le sel, & le va on chercher en cauant iusques au fond de la mer, laquelle estât esmeuë iette semblablement le sel sur la riuē comme sable par l'impetuosité des vagues, & mesmemēt en Hamen, tout ainsi comme recite Plīne au pays de Barriens. Vous assurant qu'il y a plusieurs prouinces qui ne se seruent d'autre sel que de celuy qu'ils tirent des montaignes sans aucun artifice. Et pour plus grande confirmation de ce que ie recite, ie vous dy qu'outre les autres lieux i'ay veu à Halla au duché d'Austrie vn petit ruisseau d'eau douce, lequel passant parmy vne montaigne fort prochaine, deuieēt salée, en telle sorte qu'on la met dedans certaines chaudières grandes de quatre brasses, posées sur fourneaux pour la faire bouillir. Tellement que ceux du pays en viennent à tirer grande quantité de sel blanc au possible & fort net, & ainsi humide on le met sur des aix ou tables là ou il s'endurcit comme marbre, & en fait-on plus de demie charge. Vous aduertissant qu'il ne sert tant seulement de

commodité à la terre de Halla, ou il se fait, ains toute la prouince de la haulte Allemagne en est seruie fort abondamment. Et le semblable que dessus aduient en Toscane au lieu de Volterre d'une eau salée tirée des puits, laquelle on met en chaudières de plomb, semblables à celle du vitriol. Et par industrie & aide du feu ils la font deseicher, tellement qu'ils en viennent à tirer un sel, blanc comme neige, & en si grande quantité que non seulement ceux de la cité de Volterre en sont satisfaits & seruis, ains ceux de Florence & du conté d'icelle en sont pourueus sans en user d'autre. Plusieurs autres lieux ie vous pourray nommer auxquels le sel d'eau minerale se trouue, & mesmement à saint Quiriche qui est au conté de Sienne. Mais pourautant qu'ils en ont abondance de celui de la mer, ils en font peu de cas. Parquoy ie suis content de m'en taire abandonnant les effets du sel commun & duquel on use, pour vous faire memoire du sel nitre, pourautant qu'il est mis entre & au nombre des sels, vous assurant qu'il n'est tant seulement corrosif, ains est chaud & sec: & en trouue on du naturel & de l'artificiel, ainsi que Plinie recite. Le naturel se caue comme les minieres de sel, & comme les pierres en Arménie, Afrique & Egypte, & si est blanc comme l'armoniach, & accompagné de taches semblables à celle de l'antimoine: & dit Plinie qu'on en trouue en plusieurs lieux & eau nitreuse fluante: Laquelle estant deseichée sur le feu deuiet dure tout ainsi que le sel, & sa couleur approche de la rougeur du fer, ayant la saveur grandement salée avec quelque peu d'amertume. Et pour abregier ie dy que tout nitre naturel est de substance aduste & salée: mais pour le iourd'huy il ne s'emporte point en nostre contrée. Qui est cause que les Physiciens n'en congnoissent tant seulement que le nom. L'artificiel est de la mesme qualité, mais il est beaucoup plus aduste que n'est le naturel: vous aduertissant que les modernes de bon entendement l'ont congneu, auoir en soy une certaine espece terrestre: & avec leur industrie on trouue moyen de le tirer, le nommant sel nitre. Et pour conclusion ie vous dy que le plus communement il s'engendre aux cauernes humides: & principalement au dessous des grosses murailles  
chalci-



chalcineuses, là où se trouue attaché en forme de glaçons. Outre les dessusdits, i'en ay encores veu ietter hors des caues en Thosca ne, au Conté du col de Valdesé, auprès d'un lieu qu'on nomme la Rocchestes, vn gros monceau qui est de couleur blanche, duquel vn gentilhomme, curieux de trouuer choses belles & proufitables, prenoit pour en faire sel-nitre. Mais la quantité qu'il en faisoit mettre hors, n'estoit suffisante pour satisfaire à la despée qu'il faisoit: ioinct aussi qu'estant mis en pouldre, il estoit d'opérations debile sans approcher la force du sel-nitre, tiré des cimitières, cauernes, ou murailles anciennes, comme ie vous ay dit cy dessus. Sa nature est comme celle du sel chaud & sec, ou comme de celle du nitre, mais il a quand à foy veteuse & subtile, qui le rend aduste & prompt à bruster, cōme ie vous diray particulièrement au lieu ou ie reserue vous faire entendre la composition de la pouldre à canon. Ie vous ay bien voulu declarer sa generalité, pourautant qu'il est mis au nôbre des sels. Et cōbien que le nitre soit tresfort, s'y n'a-il pouuoir de s'esgaller à l'armoniac qu'on dit venir de Cirenne, ou Armenie. Autres ont opiniō qui soit de caue minerale, s'engendrant comme zaffare, qui est vne espee de sable merueilleusement sec. Si que les aucuns disent qu'il est artificiellement fait de cendres de certaines plantes, & d'autres disent qu'il est composé de la corruption des vrines, ou de la sueur des hommes. Encores trouue lon d'un autre sel appelé gemmé, ou pierreux, qui prouient de mine, & est luisant cōme est la pierre appelée gemma, qui se trouue en Hongrie en grand abondance. Encore forme on par artifice vn autre sel, nommé sel de voirre, qui se fait par le moyen d'une lissie faite de cendre, d'une herbe appelée Gala, ou Soda: mais la plus grande partie appelle ceste cendre alun Catina, & se fait par l'aide d'icelle le saun, & par seicheresse s'en tire le sel dessusdit, pour faire le voirre: pour raison dequoy il est apellé du vulgaire sel de voirre. Il s'en trouue encores d'autre espee, comme est le sel qu'on nomme l'inde, lequel est noir, & celuy de Lalebre, qui est vne composicion de plusieurs lissies & vrines inuentez par les alchumistes, lesquels tant par nom que par diuersité de nature, trouuent moyen d'en faire plusieurs,

pour le seruice de leurs œuures. Vous aduertissant pour conclusion, que ie tiens pour certain le sel pouuoir estre tiré de toute chose qui a en soy aspreté corrosiue, & de laquelle on puisse faire cendres avec feu.

*De la callamine, du safre, & manganese dite Salicor.*

*Chapitre. 9.*

**L**A callamine est vn des moyens minéraux, comme celle qui sort de miniere & est assez pesante, de couleur iaune, ayant quelque proximité & affinité avec les metaux, & se trouue en Allemagne aupres des caues, desquelles on tire le plôb, & en Italie en vne montagne, qui est entre Millan & Come. Et semblablement i'ay entendu qu'on en trouue au terroir de Sienn, en vn lieu appellé Fosini, & tiens quasi pour assuré qu'on en trouue par accident aupres des autres sortes de minieres: mais il est bien difficile d'en tirer pour auourd'huy. Aucuns disent qui se sont trauallez de la fondre avec le cuiure, mais elle ne se trouue gueres bonne. Et cela pourroit proceder pour estre prinse aucunes fois sur le plus haut de la terre, & que elle pourroit deuenir meilleure en cauant plus profondement, ou en luy baillant le feu ainsi qu'il est requis. Mais voulant delaisser à parler de telle chose, ie vous fais entédre que c'est ceste terre qui teinct le cuiure en couleur iaune semblable à l'or. Et crôy qu'elle est naturellement de qualité chaude & seiche, semblable à la margasite, aïsi que l'experience le demôstre. Veu qu'estât seule elle vient plustost à se brulér qu'à fondre: mais en compagnie dudit cuiure elle se fond, & se augmente de huit pour cent en pesanteur, ie vous ay declairé son operation, lors que ie vous ay monstré à faire le letton, & ne sçay que en autre chose elle soit bonne. Le Safre est vn autre terme de mine pesant comme metal, qui ne se peut fondre estant seul, mais accompagné des choses approchantes la nature du voirre, il se conuertit en eau de couleur azurée, tellement que ceux qui veulét teindre voirres, ou peindre vases de terre vernicée, le mettent en vſage. Et non seulement il sert pour faire ladite couleur azurée au voirre, & sur la terre, mais si on y met plus dudit Safre qu'il

qu'il n'est de besoing pour faire ladite couleur azurée, il fera noir, & autre couleur, selon la quantité qu'on y mettra. De semblable nature se trouue encores vn autre terme mineral lequel s'appelle manganese, duquel se trouue (outre celuy qui viét d'Alemaigne) en Toscane, en la montaigne de Viterbe: & est la manganese, obscure comme fer. Vray est que pour la fondre on n'en scauroit tirer metal, mais accompagnée elle donne fort belle couleur aux voirres, tellement que ceux qui font profession de former vases de terre, vsent d'icelle en leur painctures, & mesmement leur voulant donner la couleur azurée, vous aduertissant qu'il a encore ceste propriété que estant mis dedans vn verre fondu, il le purge, & fait deuenir blanc, encores qu'il soit verd ou jaune: & par trop grande vehemence de feu, il s'en va en vapeur, tout ainsi que fait le plomb à la cendre, comme ie vous reciteray plus à plain, vous montrant la pratique de faire les voirres, & la façon de former les vases & pots.

*De la calamita pierre d'aymant & de ses diuers effets & vertus.*

*Chapitre 10.*

**T**Out ainsi que ie sçay que vous entendez toutes choses créées par le souuerain Dieu auoir quelque propriété particuliere pour petites qu'elles soyent, de mesme façon, ie suis d'aduis que nous deuons mettre peine de chercher celles qui ont quelque vertu interieure, comme ont les herbes, fruits, racines, metaux, & bestes & pierres. Pour à la cōgnoissance atteindre & paruenir, il est de necessité d'estre experimenté. Car autrement il est impossible d'auoir cōgnoissance de leur vertu. Car cōme vous voyez que la couleur est congneue par le benefice de l'œil, le sentir par l'odoremment, la saueur par le goust, & l'armonie par l'oreille. Semblablement l'aspreté & toutes choses extremes, sont rapportées du sens commun à l'estimatiue: par la subtilité de laquelle toutes leurs especes sont discernées: & iugées, autant bien la puissance de nuire, cōme d'aider & secourir. Tellement que celuy qui les veult soigneusement cōsiderer, ne fault accompagné d'expe-

rience de les trouuer. Mais pour abreger propos, ie vous vueil  
 parler de la Calamite & de sa propriété: vous aduertissant que  
 c'est vne des choses qui fait apparoir ses effets à nostre veüe  
 par vertu particuliere tant cachée & occulte, que les sages let-  
 trez curieux de parler de toute autre chose, n'ont eu congnoissan-  
 ce d'elle iusques à present, vous assurant que ceste pierre semble  
 auoir par nature vn esprit de viuacité. Et qu'il ne soit ainsi, elle a  
 puissance de tirer & faire ioindre à soy le fer, effet certainement  
 assez suffisant pour tesmoigner la vertu des autres choses créées,  
 & desquelles le pouuoir n'est manifesté maintenant aux sens  
 extérieurs, vous aduertissant que ceste pierre est trouuée en plu-  
 sieurs lieux & en diuerses sortes de couleurs & proprietéz: mais  
 celle de qui on a le plus de congnoissance, est celle qui a la vertu  
 d'attirer. Albert le grand escript en son liure des mines au chapi-  
 tre de suspensions & ligatures des pierres, que non seulement  
 il se trouue de celle qui a pouuoir d'attirer le fer, ains & de re-  
 ietter & chasser loing de soy son contraire. Et encores dit on  
 qu'il s'en trouue ayant la vertu d'attirer l'or & non point le fer.  
 D'autre qui tire le cuiure, plomb, & estain & semblablement la  
 chair humaine, les os & la peau: & vne autre qui a pouuoir d'at-  
 traire & faire sortir. Lon recite encores qu'il s'en trouue encores  
 d'une autre sorte qui s'appelle huyleuse, pourautant qu'on en tire  
 l'huyle. Vne autre appelée pierre vinaigriere, rendant le vin ai-  
 gre, & semblablement vne de laquelle on tire le vin, tellement  
 qu'il ne reste fors d'en trouuer vne produisant (pour satisfaire au  
 vouloir des hommes) l'herbe & le sel pour faire vne salade, laquel-  
 le ayant reduitte, il leur seroit loisible de porter pour faire cola-  
 tion. Ou il leur seroit agreable de s'acheminer sans mettre en ou-  
 bly quelque peu de pain. Mais voulant abandonner ces choses  
 fabuleuses, ie vous dy que celle qui est en nostre contrée, & de  
 laquelle nous auons entiere congnoissance, est de couleur noire,  
 ayans telle vertu que les mariniers voulans aller à Orce en vsent.  
 Vous aduisât que c'est matiere minerale pesant au possible: mais  
 on ne la peult assurer de contenir en soy metal, pourautant que  
 elle ne se peult fondre. Parquoy considerât son principe & com-  
 mence-



cementie la diray estre engendrée de composition commune des pierres, avec abondance de mistion metalique, & en sa couleur & pesanteur, elle monstre facilement, estre née entre les mines du fer: la compagnie duquel elle desire tât fort que ie l'ay vëu ne le pouuant tirer à soy, à cause de la quantité, deuenir comme viue & embrasée, & se mouuoir pour l'aller trouuer. Lon recite qu'il s'en trouue encores de celle qui a la couleur blanche, & est celle, (ainsi comme lon dit) qui a proprieté d'attirer à soy la chair, tellement qu'on la met sur la cuisse dextre de la femme pour la faire deliurer. Ioint aussi qu'on l'assure auoir telle vertu qu'elle fait conceuoir amitié entre deux personnes. Et mesmement si la cōionction de Venus & de Mars est taillée au dessus avec leurs caracteres & images. Encores assure on qu'on en fait tailler diuerses images selon la conionction des astres. Les aucuns pour acquerir richesses & sciences, les autres amitié, & d'autres authorité & honneur. Choses certainement qui nous seroient bien fort vtils & profitables pour satisfaire à nostre appetit avec peu de peine & travail. De ceste calamite les anciens ont escrit, ainsi que dit Pline, & l'ont meslée avec le nitre aux premieres intentions du voirre. Encores assure-on que la plus grande quantité de ceste pierre est trouuée en certaine partie de la Mer Indique, mais on ne si peult faire conduire, pour ne s'oser assurer sur les nauires à cause des cloux, pourautant qu'avec sa vertu elle vient à tirer les cloux, faisant ouuir le font du vaisseau, tellement que ceux qui sont dedans restent surmergez. Aucuns ont opinion assurée que la sepulture de Baccus, qui estoit de fer, fut mise en vn certain lieu d'un temple, & fut close & enuironnée de calamite par la vertu de laquelle estoit soustenuë en l'air: Et le sēblable dit on de Mahōmet. Vous assurāt que toutes ces pierres de calamite ont proprieté de tirer, mais elles viennēt à perdre leur vertu toutes les fois, qu'on viēt à metre aupres vn diamāt de grece, ou si on l'arrouse de lait de cheureau, du ius des os, ou si on la viēt à oindre d'huile. Il s'ē trouue assez en nostre cōtrée en l'isle de l'Elbe, mais pourautāt q̄ elle est dedie au seruice de la mer, ēcores q̄ ses effets soient à noter, ie ne suis deliberé de vous en declarer dauantage.

*De l'Occre, du Brolamini, de l'Emeril, & du Borrás.*

*Chapitre. II.*

**L'**OCCRE est vn moyen mineral, composé de nature terrestre, ayât la couleur ianne, à cause de la fumosité de la miniere du plomb, & si est matiere toute senle sans aucun metal, encores qu'elle aide à fondre les minieres de metal sauage & aigre, & soit qu'elle serue en autre chose, fors à ceux qui font estat de paindre. Le brolamini est vne terre rouge & visqueuse, estant naturellement seiche, sans auoir que bien peu d'odeur & faueur, au moins qu'elle soit manifestée grandement. Et croy que la fumosité de la miniere de fer soit cause de ce qu'elle est ainsi rouge, pourautant qu'elle est accompagnée de luy, & se trouue au lieu là ou il est caué. Vous assurant que cest vne souueraine medecine contre tout venin, faisant telle operation comme la terre sigellée, ou paraenture meilleure. Anciennement on le trouuoit en la province d'Armenie; mais en ce tēps il s'en trouue en Portugal, en Alemaigne, & en l'isle del'Elbe fort abondamment. Les physiciens & chyrurgiens en vsent aux medecines correptiues & dissecatiues, & les paintres s'en seruent pour attacher l'or aux ornemens de leurs peintures, & les feseurs de pots semblablement en la couleur rouge, en faisant composition avec le gete. L'Emeril est semblablemēt mine cōposée en forme de pierre dure, ayant la couleur noire. Vous assurant qu'il est subtil & corrosif, cōme celuy avec lequel toutes les ioyes & pierres dures, que les orfeures mettēt en œuure sont vnies & taillées. Et si a la vertu de nettoyer le fer de toute tache & rouillure. Le borrás est de deux sortes: car l'vn est naturel, & l'autre artificiel. Le naturel est vne pierre luyfante & de forme semblable au sucre cādý, ou sel gemme, encores que Pline dise qu'elle soit verte. Et que nō seulemēt elle sert à souder l'or, ains a païdre. L'Alemaigne en produit pour le iourd'huy grande quantité & la met on en poudre facilement. L'artificiel se fait d'alun de roche & de sec almoniac. l'vne & l'autre espeece a pouuoir d'habiter la fonte des metaux, si que ils se viennent

viennēt à vñir & souder là où ils sont mis. Au moyen dequoy les orfebures s'en seruent tant pour fusions de l'or, que pour faire ioindre plusieurs pieces rompues ensemble.

*De l'azur, & vert azur. Chap. 12.*

**D**Vis que j'ay commencé à vous parler des mines qui seruent aux couleurs, ie vous vueil dire & declarer la propriété de l'azur, & vert azur, afin que vous en ayez congnoissance. Vous aduertissant qu'il en y a de deux sortes, l'un appelé par les peintres azur ultra marin, & l'autre Azur d'Alemaigne. L'ultra mari est celuy qui se fait de la pierre appelée lapis lazuli, qui est la propre mere de la mine d'or: & se attendoit, laué & disposé, à certaine subtilité, que mal aisement on le peut manier: mais avec l'aide d'un certain pastel fait de gomme, on le fait retourner à sa viue & belle couleur. Et demeure cest azur afiné, & tellement seiché qu'en luy ne reste humidité quelconque, tellement qu'il est le plus estimé de tous. Et pour la beauté de sa couleur & subtilité, les peintres se travaillent de l'achepter à outre pris, pourautant qu'il ne monstre seulement sa beauté en œuvre, ains resiste au feu & à l'eau, ausquels les autres couleurs ne se peuvent defendre. L'azur d'Alemaigne est vne teincture procedant de fumosité de miniere d'argent, cueillie nettement & ratissée au dessus des pierres, où il s'apperçoit estre composé: & est de nécessité de l'esleuer, & le plus subtilement qu'il est possible le faut briser. Le vert azur est vne exhalation de mine de cuiure, meslée avec l'argent, tellement que selon la quantité du plus & du moins, il en demeure plus vert & azuré. Et selon la puissante exhalation de la miniere, on vient à en trouuer plus grande ou moindre quantité. Vous aduertissant qu'il le faut cueillir sur les pierres teintes, & le brisant & mettant dedans l'eau il vient à se purger. Les peintres estiment entre tous les autres celuy qui est le plus subtil & de couleur plaisante & agreable. Je me suis voulu travailler de vous donner ceste congnoissance: tant parce qu'elles procedent de mines, que pour les con-

gnoistre si par cas fortuit vous auiez la commodité d'en veoir en quelque lieu.

*Du cristal, & des autres pierres plus rares & recommandées en general par les lapidaires & orfeures. Chap. 13.*

**V**ous ayant parlé cy dessus de la calamite, safre, emeril, & man-  
ganeſe, qui ont plus de participation avec les pierres qu'a-  
vec les metaux, j'ay prins volenté de vous faire encores discre-  
tion du cristal, & ſemblablement d'une partie des ioyes & pier-  
res plus congneues, encores que ie ſache fort bien qu'elles ne  
doient ſuyure l'ordre des metaux, ne ſemblablement des cho-  
ſes minerales. Vous aſſurant en verité que ce ſont pierres, & ayât  
la meſme nature d'icelles. Toutesfois quand elles ſeront miſes au  
renc de la partie qu'on voudra, ie ne me garderay de paſſer ou-  
tre, & diray que c'eſt choſe grandement louable à vn gentil-  
homme auoir congnoiſſance de telles choſes, pour auſquelles  
paruenir ie vous diſ, que le cristal eſt vne pierre claire & luiſante,  
naturellement aqueuſe en ſa compoſition. Si que pluſieurs l'ont  
creu (outre l'orde des choſes naturelles) auoir eſté engendré par  
nature d'eau pure par la force d'une puiſſante & perpetuelle froi-  
deur, qui reſide, ſans ſ'absenter aucunement, aux montaignes &  
lieux ou il ſe trouue, & auſquels il eſt impoſſible iamais de pou-  
voir faire deſgeler les eaux & neiges, à cauſe de l'exceſſiue froi-  
deur. Et pour mieux rendre approuué ce qu'ils ont opiné, ne fail-  
lent de mettre en auant que le cristal tient de la nature de l'eau  
qui eſt gelée, & a encore ceſte propriété que ſi on le met en l'eau  
qu'il demeurera au deſſus, comme fait le glacs ſans aller au fond.  
Encores dit on qu'on le met ſous la langue de ceux qui ont ſoiſ à  
cauſe qu'il a pouuoir d'eſtancher la ſoiſ pour la froideur & humi-  
dité qu'il rend. Mais combié qu'il fuſt ainſi, ſi ne prendrons-nous  
la hardieſſe de conclurre & aſſurer le cristal eſtre eau: car il fau-  
droit le ſemblable dire du diamant & emeril. Parquoy ie ne me  
ſçauroye faire acroire que ce ſoit pure eau gelée comme lon re-  
cite, pource que ceſt pierre que nature a pris plaifir de produire  
en ceſte



en ceste façon. Ioint aussi que si elle estoit en lieu ou la pluye vint à tumber sans intermission, le tout viendroït pour la vehemence du froid à se geler, & se cōuertir en cristal, tellement que les montagnes d'iceluy viendroyent à excéder la multitude de celles qui produisent les pierres. Ioint aussi que i'enten fort bien qu'il fault que tout corps des choses inferieures soit composé par la force des quatre elemens. Et si le cristal estoit eau pure, il n'auroit aucun pouuoir de se pouuoir tenir & former seul: encores qu'on voulsist assurer eau pure ne se trouuer sur la terre. Parquoy ie conclud & dy qu'il est de besoing que la nature deseiche de l'humidité & composé estant eau, ou qu'elle y adioust de la terre pour luy faire prendre forme de pierre, y faisant participer les deux autres elemens superieurs, encores qu'il fust besoing d'en y adiouter petite quantité d'eau. Et tiens pour fermeté que toute blancheur reluisante tient de l'eau ou de l'air. Je dy le cristal estre de substance d'eau meslée avec terre subtile accompagnée d'abondance d'air & de peu de feu, pour raison dequoy il est froid: & s'il est vray qu'il se trouue sur l'eau, on peut le semblable assurer des autres pierres, autant qu'elles sont aqueuses de leur naturel, mais elles viennent à changer leur nature, selon le plus ou moins de leur substance elementaire, encores que leur propre matiere soit aussi aqueuse, comme est celle des metaux, hors mis qu'elles ne fondent point dedans l'eau comme les autres metaux, ne le cristal vient à fondre par le feu, tout ainsi que la glace vient à se refondre dedans l'eau. Ce qu'il feroit si la mistion des autres elemens ne luy donnoient empeschement. Parquoy il vous suffira prendre de ceste matiere l'vniuersel que ie vous dy, & d'iceluy en tirer encores vn autre plus estroit, contenant vne composition de matieres, ayant en soy beaucoup plus de perfection. Vous advertissant que ceux-cy sont les deux especes de pierres tant reluisantes & claires comme obscures, entre lesquelles a certaine difference d'espece & perfection. Combien que toutes soient en l'ordre des pierres, comme sont porphires, serpentines, parragons, grenas, marbres, & autres semblables, ayât leur perfection en toute espece, cōme ont entre les metaux l'or, l'argēt, cuiure,

plomb & autres. Et ce entre les ioyaux resplendissans les pierres de diamans, rubis, emeraude & zaffir. Et le semblable entre les obscures, comme la Sidonie, la gate & autres selon leur difference, de toutes lesquelles me mettant en deuoir de vous parler particulièrement, ie viendroye à augmenter mon volume par trop. Si est-ce que ie suis contraint aucunes fois de m'y arrester, pour autât que leurs interieures particularitez me semblét beaucoup plus difficiles à comprendre que ne sont celles des metaux, tellement qu'elles me sont veuës incomprehensibles, à cause des certaines mistions qui les accompagnent. Comme est la clarté reluisante au diamât, l'entiere rougeur au rubis, la verdeur à l'emeraude, & semblables autres couleurs, desquels ceux qui sont profession d'escrire s'en passent legierement, disans generalement que toutes les pierres sont produites par nature, ayans substance d'eau & de terre avec leur necessaire adionction des elemens. Vous aduertissant que la nature produit, ainsi qu'il me semble, de trois especes de pierre, & la chacune est diuisée en plusieurs especes selon leur mistions. La premiere espece nous dirons que c'est celle des pierres tenans plus de la terre, comme sont celles des montaignes qui sont communes en tous lieux. La seconde est vne espece qui est entre les dessusdictes pierres communes, & les pierres precieuses luyfantes, qui sont les obscures. La tierce est celle des plus reluyfantes & de plus de lustre, lesquelles excèdent toutes les autres. De la premiere ie ne vous feray aucune mention, Mais en la seconde ie vous prieray de vouloir considerer la durté qui les accompagne, & la perfection de leur vertus & couleurs. Entre lesquelles il s'en trouue de blanches, des noires, des rouges, vertes, & aucunes autres si fort meslées, que l'une des couleurs vient à arterer & deteriorer l'autre: le semblable succede à la troisieme espece de celles qui sont resplendissantes. La premiere desquelles est le diamât: pierre au respect des autres petite, luyfante, accompagnée d'une durté incomparable & d'un lustre fort excessif. Mais auât que passer plus outre, ie vous dy que toute blancheur qui se montre aux pierres, procede de chose blanche & pure, & la viuacité vient de la conionction de l'eau & de la terre

la terre, & la grande lueur vient de la grande durté de la matiere terrestre. Toute blancheur est substance d'air ou d'eau congelée au suget, avec certaine inclination des matieres purgées, desquelles ie viennent à former, le diamant, emeril, & toute autre pierre sans couleur. Mais cest avec plus ou moins de perfectiō. Et tout ainsi que les matieres viennent à superabōder ou à defaillir, lors qu'elles sont mises en composition, & apres viennent à tomber en diuerses couleurs, selon les lieux & approchèmes des mines. Mais celles qui en sont esloignées cōme l'emeril, cristal, calcidoine, & alebatre, qui sont pierres participans plus de l'eau que de l'air, il leur concede tout au contraire, comme celles qui demeurent au mesme estat, auquel elles sont formées. Mais pour autant que les raisons de ces choses viendroient à tomber en opinions, qui pourroiet estre par trop longues à disputer, ie suis content de les abandonner pour vous dire & assurer estre certain comme ie croy, que la nature a crée ces choses comme enuyeuse du ciel, pour le rendre stimulé, conuoiteux, & desirant ces choses, comme vous pourrez appercevoir qu'elle ameuble l'eau de toutes sortes d'animaux pour la secrete enuye de la terre. Et pour ceste mesme raison elle a voulu produire ces pierres, pour prefigurer les estoilles. Ce qu'est à presumer, voyant la diuersité des couleurs qui les suit, & leurs vertueux effaits. Et pour vous persuader ce que ie dy estre vray, ie vous prie de vous arrester quelque espace sur la durté, lustre & beauté du diamant, rubis, emeraude, ou de leurs semblables, & sur le vert qu'on dit leur faire cōpagnie. Vous aduertissant que vous ne fauldrez à iuger que elles excèdent routes autres especes minerales. Si qu'un chacun fouhaitte d'en recouurer, comme chose precieuse & diuine. Laquelle ie vueil abandonner. Et tout ainsi que ie vous ay descrit du cristal, ie suis en vouloir de faire du diamant, qui est vne pierre fort reluisante & dure. Et dit-on par renommée que le plus grand qui se soit trouué encores au monde, n'excede la moitié d'une noix. Et s'il est bruit qu'il est entre les mains de Soliman, Empereur des Turcs. Et l'autre qui l'aproche en grandeur, est à Rome sur le manteau du Pape. La qualité de ceste pierre est d'estre

merueilleusement dure, & si est resplendissante par dessus tout autre, comme celle qui rend lustre singulier, lors qu'on vient à mettre vne feuille de couleur noire au dessous, la mettant en œuvre. Vous aduertissant que le feu n'a aucun pouuoir de l'amoillir ne rendre tendre, ne feu quelconque a puissance de la tailler, si qu'elle ne peut estre surmontée ne vaincue, fors par le sang d'un bouc bien chaut, qui a vertu de la rompre. Et principalement si ceste beste a beu du vin plusieurs iours, mangé du persil, & qu'il soit de montaigne. Pour le rendre plain, vny, & clair, il le faut frotter avec un autre diamant, & avec sa mesme pouldre, l'accoustrer sur vne rouë d'acier bië temperé. Puis apres sur celle de cuire & plomb, selon les termes & moyens par lesquels il doit estre conduit. Vous aduertissant qu'il naist en Indïe, Arabie, & Ethiope, aux lieux mesmes desquels on tire l'or. Et si s'en trouue encor en Macedone, & en l'isle de Cypre: vray est qu'ils sont de couleur plus obscure, & moins durs que les autres. Et pour le faire brief, ie vous dy qu'il s'en trouue de six sortes. Les premiers sont clairs, les autres ont la couleur plus obscure, & si excèdent les premiers en durté. Les troisiemes tiennent du iaune, les quatriemes du violet, les cinquiesmes approchent du vert. Et les sixiesmes ont la couleur rouge, formées presques en façon de deux petites piramides, ayant six faces coniointes si iustement, que l'une fait sembler abaïsser l'autre. Maintes grandes vertus luy sont attribuées, & si d'autant plus puissantes, que la piece est en quantité grande & sans aucune tache ne macule. Et mesmement si elle est attachée avec or pour estre portée au doigt, ou pandue au col. La premiere vertu qu'on vient à luy donner est qu'elle rend iceluy qui la porte, non seulement riche, ains le fait aimer d'un chacun le rendant assuré: tellement que les entreprinſes & menées qu'on dresse contre luy, n'ont aucune puissance de le molester, ains le preserue de tout venin. Dauantage si ceste pierre diamantine est attachée sur le bras droit de la femme enccinte, elle ne faudra à porter son fruit le terme qu'elle doit. Et si a puissance, estant en presence, d'empescher que la calamite ne tire le fer. Et si par cas fortuit elle festoit iointe à luy, ne fauldra a l'aban-



l'abandonner tout incontinent. Vous aduertissans que par son aide, on taille toutes autres ioyes & semblables pierres, & les reduit on en la forme qu'il plaist à l'ouurier de les conduire. Les physiciens disent qu'elle est de nature froide & seiche. Maintes personnes ont esté d'opinion & croyent encores que c'est la poison la plus dangereuse, estant prinse au mâger, mais elles sont en erreur. Il est bien vray qu'elle a pouuoir de priuer la vie, estant prinse en pouldre, pourautât que l'estomac ne la pourroit endurer, & presque autant en feroit le voirre puluerisé. Je vous ay bien voulu faire ce discours, pour oster de vous ceste fantasie, que le diamant fust chose mauuaise. Apres luy vient à gaigner le deuant & marcher en renc le rubis, qui estant grand est d'aucuns appellé l'escarboucle, & est de la mesme espece des pierres claires & reluisantes. Sa couleur tire sur le rouge sans estre aucunement gras, ains sec au possible, si par la beauré de son lustre tant fort reluisant, il est agreable, comme celuy qui fatisfaiçt merueilleusement à la veuë. Vous assurant qu'il est accompagné de durté fort grande, mais non pas telle qu'elle se puisse egaler à celle du diamant. Les speculateurs medecins le iugent estre de nature chaude à cause de sa couleur. Les pierres de rubis se trouuent en Lybie & Indie, puis les auoir cueillies on se travaille de les reduire en tables carrées, en continuant de les frotter avec Emeril sur rouës de plomb. Ses vertus sont en grande quantité: mais les principales sont les deux que ie vous vueil dire. La premiere est qu'elle chasse toute tristesse du cœur. La seconde qu'il aide contre tout venin, & mesmement preserue & garde quel'air infecté en temps de peste ne vous peut nuire. Lon dit la mere de laquelle il prend origine estre le balay, qui est semblablement rouge: mais il n'approche en rien la viue couleur du rubis, ains celle du granat, tellement qu'on les appelle freres, à cause de l'afinité de leurs couleurs. Mais le granat n'est pas si sec ne dur comme est le balay, né de telle perfection, encores qu'aucuns soient d'opinion contraire, disans qu'il excède par trop, mais ie croy donc que ce soit en quelque vertu particuliere. Tout ainsi qu'on dit que les especes des Iacintes vien-

nent non seulement à surpasser le rubis, ains toutes autres pierres. Si est ce que s'acostant de luy elles viédroient à perdre le prix en beauté. Laquelle consiste en n'estre vmbragée de noir & de blanc, se departissant parmy en façon d'une nue. L'éméraude doit tenir le troisieme lieu entre les pierres congneues par ceux qui védét les ioyaux, ioit aussi que c'est vne pierre precieuse bié fort estimée. Vous aduertissant qu'elle n'est tant seulement dure & fort reluisante, ains est chargée d'un vert auquel les autres n'ont aucun pouuoir de ce parangonner. Et telle clarté de verueur si agreable à la veüe qu'elle en vient à estre confirmée quand elle se trouue interressée. Ceux qui ont congnoissance de l'éméraude la disent auoir en soy plusieurs vertus. La premiere desquelles est qu'elle vient à obuier, que celuy qui est empoisonné, ne pert ongle ne peau. comme font plusieurs autres, qui tumbét en tel malheur. Mais il est de necessité que le patient en prenne douze grains. D'autantage ceste pierre empesche à la maladie caduque, appelée d'aucuns le hault mal, de faire son operatiō enuers celuy qui la porte au col. L'éméraude rend bonne memoire à celuy qui la porte au doigt enchassée en or, & si le maintient en santé & lieffe. Encores assure on qu'elle est fort contraire au peché de la chair, tellemēt qu'elle se met en pieces si lon s'oublie de la porter, lors qu'on se veut deduire ou entrer au plaisant cōbat amoureux. Ceux qui ont escript des emeraudes disent que les meilleurs se trouuent dedans les nids des Griffons. Les autres assurent que elles sont apportées de Cithie & de Batrie: & autres sont d'opinion qu'elles sont amenées d'Egypte ou d'Arabie. En Cypres s'en trouue de petites, mais elles sont moins vertes que les autres, & s'accoustrent toutes, les reduisant en petites tables carrées. leur dōnant lustre & clarté avec l'aide de l'emeril & tripoli, tout ainsi qu'on acoustume les autres pierres de leur espece. Plusieurs iugent l'enterande estre de nature froide & seiche. Le safir est vne pierre claire, luisante & dure, tainte d'azur, approchant la couleur du ciel, lors qu'il est en sa plus grande serenité, & s'en trouue de plusieurs especes, mais les meilleurs viennent d'orient, & se peuuent contrefaire en diamans par le gens les tenans dedans

dās l'or fondu sur le feu l'espace de vingt quatre heures. Je demeure à vous declarer plusieurs autres qui succedent, apres ceux icy, mais pour estre la matiere trop longue, & que ie delibere vous declarer leurs particularitez cy apres, ie suis content de passer oultre, ayant espoir quelque iour de vous en mettre en lumiere vn petit traitté pour donner plaisir aux gentilshommes, vertueulx, ausquels il est fort honnesté d'en auoir congnoissance & en sçauoir parler.

*Du voirre & des autres termes de mine en general.*

*Chapitre.*

14.

**S** Ous la mesme couleur que ie vous ay dict au chapitre precedent parlant du cristal & des autres pierres, ie suis en mesme volonte de vous parler du voirre pour estre vn des effets & propres fruits de l'art du feu. Ioit aussi q toute chose produite qui se trouue dans la terre, fait qu'il soit pierre, metal, ou coloquée au nombre des moyēs mineraux. Et mesmement y doit estre retenu le voirre pour la semblance qu'il a avec tous : encores que toute sa despence prenne son origine de l'art. Pour raison de quoy il m'a semblé tresraisonnable auāt qu'arriuer au lieu propre de l'art, de vous faire mention de ce beau composé meslé avec l'art. Et semblablement de le mettre & loger au renc des moyens mineraux. Et par ce moyen ie vous parleray de luy en ce chapitre, non comme propre terme de mine, ne encores moins de metal, ains comme matiere fusible & quasi transformée en mine, tant par art, que par la puissance & vertu du feu, née par l'industriouse speculation des bons esprits, faisans profession de s'experimenter en l'art d'alchumie, imitant lequel il est requis en vne partie de suiure les metaux, & en l'autre la clarté resplendissante des gemmes. Chose certainement, diuinement belle, & qui ne merite aucunement d'estre enseuelie ne mise sous silence, tant à cause de la consideration que l'art à sceu trouuer industriousement : que pour la beauté qui luy fait compagnie, rendant contentement fort grand aux cœurs des hōmes lors qu'ils

viennent à boire dedans les vases qui en sont formez, ne me voulant eslongner desquels, ie commenceray de vous reciter à la faueur des alchumistes, comme ils prendrent volonté de faire les gemmes. Et ne pouuans attaindre ne satisfaire à leur desir (comme ils leur aduient comunement aux metaux) ils sont tumbez en cest belle & agreable compositiō du voirre. Encores que Plin le recite auoir esté trouué par cas fortuit, en Sorie dedans les fosses du fleuve Belle, par certains marchans qui par fortune de mer y furent poussez, & contrains de prendre terre. Mais ainsi qu'ils cuisoient leurs viandes, ils apperceurent les pierres de ce lieu estre conuerties en matiere fort reluisante, la beauté de laquelle les prouoca au departir de ce lieu d'emporter de l'herbe & des pierres. Et en ceste façon fut donné commencement au sel & au voirre. Mais laissant à part ces raisons ie vous dy que l'art à esté celle qui luy a donné estre, avec esperance fort grande, & pour la ioindre & leuer comme elle est disposée. Car comme on apperçoit les anciens adioutoient & mettoient ensemble la calamite, sel-nitre, cristal, & autres pierres claires & luisantes. Mais les modernes en les imitant me semblent auoir fait tel deuoir qu'à peine pourroiet plus aller sans l'aide de cest art, pourautant qu'on en fait encores, comme vous voyez, diuinement belle. Et si est matiere qui se teint avec odeur & substance de metaux en toute sorte de couleurs qu'on veult, satisfaisant & estant tant fort agreables à l'œil, que le iugement des praticiens bien experimentez se trouue aucunesfois deceu, tant fort son lustre est agreable. Et si par fortune avec l'aide de l'esprit on pouuoit trouuer le moyen qu'il ne fust fragile & suget à rompre, il excederoit en beauté tout autre metal. Car en sa qualité il est pur incorruptible & sans rouillure. Ioint aussi qu'il ne rend odeur ou faueur mauuaise, si qu'en cest art la nature est surmontée. Et encores qu'elle ait produit le cristal, & les autres pierres excedens en beauté le voirre, si est-ce qu'elle n'a peu encores trouuer le moyen d'en faire ce qu'on fait du voirre. La pratique duquel pour le vouloir composer, & puis rendre en œuvre, est ceste. Premièrement il faut prèdre des cendres faites de l'herbe appelée Chali, qui vient de Sorie,



Sorie, & croy qu'il s'en trouue en France sur le Rosne en l'Euesché de Maguelonne, ainsi qu'il m'a esté recité par l'Euesque dudit lieu. De telles cendres on en prend quantité, telle que les maistres iugent estre necessaire, & avec eau bouillante mise au dessus dressent vn monceau en forme de pinacle. Lequel peu à peu viét à se fondre & faire clair, & par mouuement est deseiché iusques à ce qu'il vient à se former en sel, qui est celuy qu'on appelle sel de voirre. Duquel on prend certaine quantité: puis apres on se vient à fournir de ces pierres blanches de riuiera, qui s'appellent coquilles. Et s'il est malaisé d'en recourir, on prend d'une certaine arene blanche de caue. Et en ceste façon avec quantité de manganese viennent le tout à mesler, puis mettent le tout en vn four composé par tel effet qu'il est long de trois brasses, larges de deux, & haut d'une. Puis on vient à luy donner le feu & flamme avec du bois, iusques à ce que ceste composition soit bien fondue & conuertie en masse. Et aussi tost que le tout sera refroidi & mis dehors, ceste masse sera mise en piece, & appelée des maistres, cuite & matiere desia conuertie en forme de voirre, sans toutesfois estre purgée, ainsi comme il appert. Et pour venir en cest effet, est de besoing de faire vn fourneau tout couuert & muré de brique, afin que la pierre n'ait pouuoir de se calciner ou fondre par leu feu: la voute sera de l'estendue de quatre brasses ou enuiron, & au dessus appropriée en ceste façon. Premièrement y sera adioustée vne voye, par laquelle les flammes du feu seront conduittes au milieu de la fornaisse. Et a l'entour du circuit sera dressée vne muraille, ayant trois quars de brasse d'espeueur, au dessus de laquelle serôt posez les instrumens, dans laquelle le voirre doit estre mis, & doit estre ceste enceinte sur terre de la hauteur d'une brasse ou enuiron. A l'entour faudra faire dresser cinq ou six arcs bien faits au possible, pour le soustenement de la voute, au dessous desquels seront faites les bouches, tant pour voir au dedans que pour prédre le voirre, lors qu'on le veut ouurer. Puis apres on vient à bien fermer la voute & à couvrir le voirre, laissant toutesfois vne bouche ouuerte au milieu d'un pied. Au dessus de cette voute s'en fait encores vne autre, qui ferme & couure

le tout, outre les deux brasses par dessus. L'autre, afin qu'elle vien ne reuerberer dedans la fournaise, en laquelle sera vn certain lieu pour refroidir l'œuure qui sera faite. Car si en ce lieu on ne pouuoit receuoir vn certain temperament d'air, tous les vases sentant le froid viendroient à se rompre aussi tost qu'ils seroient acheuez. Ce refroidissement se fait par vne certaine ouuerture qu'on fait sur la partie senestre, & est formé ce canal en façon de trôpe, de laquelle avec vn fer long, tous les vases froits l'vn apres l'autre, sont tirez dextremēt à trois ou à quatre fois à la bouche, & mis au dehors. A l'entour de ce fourneau sont posez au dessus du mur de la plus basse voute & plus approchante du fer, six ou huit pots faits de terre valentiēne, ou d'autre pays, ayāt cela propre de nature, qu'elle resiste par vn long temps au feu, pourueu qu'elle soit bien maniée, batue & nettoyée de toute pierre. Vous assurant que tels vases sont ceux qui tiennent dans les flammes le voirre pour estre purifié & maintenu net. Et de la mesme terre se font les briques, avec lesquels la fournaise est murée, & principalement les lieux ou le feu doit plus resider. Au dehors du fourneau sont posez cinq ou six murailles iointes avec arcs, cotoyans la fournaise pour le soustenement de toute la machine, & sera la chacune muraille de la grosseur de trois quars de brasse. Les pots dessusdits ou vases, seront faits par les maistres, de la grandeur & haulteur d'autres trois quars de brasse, & au fons aurōt la largeur de demie brasse & deux doigts, ou peu moins d'espeſſeur, & les faudra laisser seicher à l'ombre à leur aise, sans les haſter aucunement. Et apres qu'ils ont demeuré cinq ou six moys faits, on viēt à les mettre en la fournaise en vn coing qu'on a laissé ouuert au dessous des arcs: puis apres on vient à mettre le feu qui est continué iusques à ce que la fournaise soit du tout embrasée. Et en ce mesme temps on met en la fournaise qui reuerbere, & en laquelle se fait la cuitte du voirre; tous les pots qu'on y veut mettre, & à petit feu les rechauffe on pour en leuer l'humidité. Puis on viēt à leur augmenter le feu iusques à ce qu'ils soyent esté couuerts de couleur rouge, & alors les maistres se prennent à les tirer avec tenailles le plus hastiement qu'il leur est possible, & les ti-  
rent

rent hors de la fournaise, ou ils ont prins la chaleur pour les remettre en celle qui est faite pour former le voirre, & estre diligemment rengez en leurs lieux: & de nouveau rechauffez, on les remplit de pieces de voirre, & ayant muré la bouche de la fournaise les laissent reposer. Et afin que l'ouurier ayt pouuoir de tirer hors du canon ou trompe le voirre qui est dedans le vase pour le mettre en œuvre, il vient à mettre en deux entrées petites, la grande: afin que par vne il puisse tirer ce qu'il veut, & par l'autre maintenir la chaleur au canal de fer, avec l'aide d'une terrasse de marbre mise au dessus d'un des arcs au deuant de la bouche, qui est contenue par un fer qui sert à la caue: tellement que la veue des ouuriers n'est aucunement interessée. Et en ceste façon est procedé en tous les lieux ou les ouuriers prennent plaisir de trauailler. Et apres que le tout à esté ainsi ordonné, on se dispose à donner feu à la fournaise, par la vertu duquel aucune-fois la matiere qu'on a mise dans les voirres se trouue purifiée & liquide en deux iours. Et alors si on trouue disposition deue on se peut mettre en œuvre. Le feu qui est deu en cest exercice doit estre de boys doux & sec, afin que la flamme en vienne sortir claire, & que le voirre ayt mieux la commodité de se purifier, rendre uni & luisant. Il me reste encores à vous dire comme ceste composition rendue ainsi claire & purifiée, se doit mettre en œuvre, ce que ie feray, encores que vous l'ayez veu en plusieurs lieux: Vous aduertissant qu'on vient à former le voirre en soufflant avec certains canons de fer. De deux desquels vn chacun ouurier est faisy, qui sont faits de la longueur d'une brasse & demie, & avec l'un il tire & met hors le voirre, hors du vase qui se tient à la pointe: & peu à peu comme chose visqueuse le fait monter pour en prendre la quantité qu'il veut. Laquelle auoir reduitte en pelotte, il se trauaille de la detramper sur le marbre, sans cesser de la retourner iusques à ce que tout soit vny. Puis apres soufflant dedans le canon, ne cessent à donner vent, iusques à ce qu'ils ont conuertie leur matiere en forme d'une vessie: & l'auoir empoignée & mise dedans vn seau de bronze, se trauaillent d'en former vn vase, puis l'ayant remis au feu le reprennent avec

la pointe du secōd canon. Et avec des cizeaux luy taillent la bouche, luy attachant anses de voirre diuersifié en diuerses couleurs, ou vrayement s'estudierōt à le dorer & paindre, l'ornant d'esmail plaissant & delectable. Et à la fin le mettrōt refroidir tēperement au dessus de la voute. Puis par la bouche faite en façō de trōpe, le mettront dehors avec le fer, quand ils apperceurōt qu'il sera tēps de le pouuoir manier sans danger: certainemēt c'est vne belle & vtile inuētiō entre toutes les autres, encores que la despēce y soit excessiue. Vous assurāt d'ē auoir veu d'ouurages si biē faits, & les termes requis tāt biē obseruez, qu'un artisan eust eu plus grāde peine à le former de cire, & si n'ē fust sorti en si peu de tēps. Vous assurant d'auoir veu vne Meduse imprimée sur vn vase de voirre, ayāt les cheueux tant propremēt entortillez a l'étour de sa teste, avec les serpens, qu'on l'eust iugée estre totalemēt couuerte d'iceux. Tellemēt qu'à la voir aīsi on n'eust sceu croire qu'elle y fust esté formée, ains retouchée sans qu'ō eust atteīt à la totalitē de sa perfectiō. Mais laissant à parler des āciēs, lesquels furēt les dieux des exercices, ie suis cōtēt pour à ceste heure de tōber sur les modernes qui fabriquēt le voirre, & luy dōnēt couleur outrel'ornemēt des peintures & embelissement d'esmail, tellement le rēdant clair & luisant, qu'on le peult esgaler au propre & naturel cristal. Si que i'estime tous les metaux deuoir quitter la place de beauté à luy. Et qu'il ne soit aīsi qu'on regarde les salieres & vases, auxquels sont represētez les faces ou visāges, & on apperceura qu'il demonstre auoir en soy vn certain relieuemēt, & si sont vnis semblablement. Je leur ay veu ietter en couleur de perle & taindre en vert & azur si propremēt, & donnant autant de contentemēt à l'œil, qu'eusse peu faire les ouurages posez sur l'or, argēt, ou cuire. Et dauātage les maīstres ouuriers accoustret si bien le voirre qu'ils en contrefont l'emeraude, diamant, rubis, & toutes autres pierres fines, leur faisant prendre la couleur qui leur est plus agreable. Et en ay veu de tant bien contrefaittes, que les experimentez lapidaires n'ont sceu auoir la congnoissance qu'elles fussent faulses, encores qu'il les eussent au deuant de leurs yeux. Tellement qu'à bien considerer les effets d'iceluy, on le doit auoir  
en ad-



en admiration. Mais cōsiderât la brieueté & peu de vie, tât facile à rōpre on n'y doit fonder aucunemēt son amitiē, & pour exēple le doit on tenir au deuant des yeux pour se ramenteuoir de la vie de l'homme & des choses mōdaines & caduques, encores que la beauté leur face cōpagnie. Mais voulant abandoner ces discours, ie vueil faire retour au voirre, duquel se fait composition en autre façon pour euitier despence & trauail. Mais il n'approche en rien la beauté de l'autre. Et pour vous declarer la façon il fault prendre les pierres du fleue appellées coquilles, ou bien l'arene blāche, sans y adiouter sel d'alun catiné, mais autāt des propres cēdres & autant de manganese, & auoir assemblée ceste cōposition la fault mettre dedās les vases vuides, qui sont en la fournaise, là ou avec le temps se purgera avec le feu. On peult encores appeller voirre ceste couleur blāche que les maistres potiers de terre donnēt sur leurs pots, qui est subtile tout ainsi cōme vne peau. Vous assurant que avec plomb & estain calciné, lon vient à donner esmail à leur cōposition, & sur iceluy on viēt à peindre & à figurer tout ce qui plait le plus au maistre cōme ie vous feray entēdre en la pratique des vases & pots de terre. Vous certifiant que ie ne suis en volōté pour ceste heure de passer plus outre, si ie ne suis prouoqué par vous. Car il me semble auoir assez suffisamment parlé des moyēs minéraux, si que ie n'auray aucun regret de mettre fin à ce present liure.



LIVRE TROISIEME  
PROHEME DV TROISIEME  
LIVRE DE LA PIROTECHNIE  
POVR ESSAIER ET DISPO-  
ser la miniere des metaux pour  
estre fondus.

**E**OVr ainsi que ie vous ay dit estre chose necessaire d'essayer les metaux, apres les auoir trouuez, pour sçauoir ce qui reside en eulx, à cause que le iugement de l'œil n'est suffisant de congnoistre quelle quantité ou substance est contenue en eulx. Pour à laquelle atteindre, il est de besoing venir à l'essay. Et avec la congnoissance de l'experience proietter les vertus d'icelles, pour les imiter & suiure: ou bien se retirer du penible travail & de la despence. Et encores pour sçauoir obuier à leurs defaux & imperfections, si par aucune malignité ils viennent estre offensez. Car estant priué d'aide & secours, lors qu'on en seroit indigent & necessiteux, seroit faire perte totale de ce qu'on voudroit employer. Et au contraire trouuant copieusement quantité & substance aisée & facile à fondre, on prend volonté de passer oultre sans auoir respect à crainte quelconque. Pour raison dequoy ie vous diray premierement au liure suiuant, comme l'essay de tous metaux doit estre fait en general, & pour estre chose d'importance grande ie m'arrestteray plus sur la particularité de l'argent que sur aucuns des autres. Et apres ie vous diray comment les mines se doiuent preparer pour estre fondues. Et semblablement comme lon doit former creseulx & fourneaux pour ce mesme effet. Finablement ie vous donneray congnoissance & apprendray separer toute mistion de metal par industrie & puissance de l'art, & comment leurs especes se reduisent à la derniere perfection & finesse.

*La maniere de faire essay de toutes les minieres de metal, & mesme-  
ment de celles qui tiennent en soy argent & or.*

*Chapitre. I.*


De

**D**E toutes les minieres de metal est fait essay par l'aide & moyen de la fonte, & avec cest ordre le tout est conduit à sa finesse. Mais enores que ie vous aye dit, parlant du plomb & de l'estain, du cuiure & du fer, que vous en prinriez quantité pour fondre, & que par le pois vous viendriez à congnoistre la despence qu'il fauldra employer: d'iceux & de cestuy, ie ne fais cas comme l'essay vienne à ce faire, mais à celuy de l'argent vif & de l'or pour estre chose de valeur & pris, il ne fault estre paresseux d'y auoir l'œil avec extreme diligence: Car il est de besoing d'en auoir cōgnoissance plus terminée. Parquoy ayāt trouué la montaigne, & en icelle le fil de la mine, & encores decouuert au iour pour l'auoir faiēt tirer hors de la caue. Il est donc de besoing d'en faire essay, afin que les praticiens puissent auoir congnoissance de ce qui est contenu au dedans. Et pour ce faire il est necessité en quelque façon que ce soit, d'en faire tirer vne quantité la plus nette & meilleure qu'on pourra arracher de la pierre, & à icelle donner feu sans l'accompagner de chose quelconque, pour auoir congnoissance pour veoir si elle sera facile à fondre. Et si par cas fortuit elle ne fond estant seule, vous traueillerez de sçauoir & entendre d'ou cela procede. Vous aduertissant que plusieurs fois ceste imperfection est causée de la pierre qui l'accompagne, à cause qu'elle contient en soy seicheresse & terre abondamment. Au moyen dequoy il est besoing se mettre en deuoir, & chercher les moyens de molifier ceste mine, avec l'aide & compaignie, des choses fusibles: comme sont marbre, voirre brisé, plomb, escalles de fer, loupes d'autres mines. Et aux choses petites on peut vser de borras, sel-nitre, occre, & leurs semblables, comme ie vous diray particulièrement lors que ie vous parleray comment les fusions des minieres doiuent estre preparées, & finalement avec l'aide du feu, ou par autres moyens on essayera de pouuoir vaincre ceste mine pour la pouuoir conduire en sel fusible. Et si par cas fortuit elle y est reduite, l'ouurier a presques la congnoissance de ce qu'il va cherchant. Mais quand par fortune les chercheurs rencontrent les mines aigres & sauages, ou pour les fondre, ou pour les essayer, ils les remettent

deux ou trois fois au feu, & apres les arrousent d'eau fort abondamment: Les brisent & lauent pour les purger de la terre, avec laquelle on les a tirées. Et apres que le tout a esté cōduit en ceste façon, on fera le premier essay avec le mercure, & ne voulant venir au point, les fauldra mettre avec plomb en la coupelle, ou en la compaignie que l'experience vous demonstrera de les pouoir mieux faire fondre. Mais pour autant que ie sçay que vous ignorez comment le mercure doit estre mis en œuvre, & semblablement ne sçavez qu'elle chose c'est coupelle, ou comment elle doit estre mise en œuvre pour ne vous en auoir fait aucune mention, ie suis content reseruant à vous parler du mercure en son lieu, premierement de vous enseigner de faire les coupelles & la façon de former le fourneau pour faire les essais. Puis apres reprenant la mine ie vous monstreray l'ordre qu'il faut tenir à faire tels essais. Les coupelles sont petis vases disposez à receuoir certaine quantité de plomb, ou d'autre metal pour estre affiné, & sont faites de cendre sans estre grandement profondes, & sont formées de plusieurs sortes de cendres: comme des os des iambes des cheuaux, asnes, ou mulets, & semblablement de tous os qui sont esté bien calcinez en fournaise, & depuis mis en l'eau. Et apres les auoir lauez & recuits de nouveau, les briser & mettre en pouldre. Encores en fait-on des cendres de serments, faulles & petis noyers, mais qu'elles soyēt bien cuittes, lauées, seichées, & subtilement passées. Puis sont mises dedans vn vase de bois ou d'autre matiere, là ou il les faut arrouser avec quelque quantité d'eau, sans cesser de les manier iusques à ce qu'avec le point, le tout vienne à se leuer ensemble. Et alors on viendra à les mettre dedans vne forme de boys ou de bronze faite de la grandeur & hauteur qu'on veut rendre les coupelles: & à la fin emplissant ceste forme vuide de cendres humides, les coupelles viennent à se former. Et avec vn petit piston de boys on vient à cauer dedans la cendre, tenant tousiours vn fillet à l'entour pour n'exceder la grandeur de laquelle on les veut estre composées. Et en ceste façon on vient à les former, sans oublier pour les rēdre plus nettes, à cause de l'essay, de mettre au fōd quelque peu de cēdres faites




faites de la pointe des cornes de cerf ou des machoires de loup, ou vn peu d'emeril puluerisé, ayât esté premieremēt mis trois ou quatre fois au feu, & depuis trempée en vinaigre. Encores si peut mettre vn peu de borraz, puis faut mettre les coupelles dans la forme du bois pour estre rabattues, afin qu'vne des cendres se puissent bien vnir, ioinde & alier avec les autres. Et apres on viēt à mettre hors les coupelles pour les faire seicher, qui seront puis apres mises en œuvre, comme vous entendrez. Mais premiere- mēt que passer plus outre, ie vous dy auoir veu mettre en œuvre plusieurs fois en lieu de coupelle par necessité, vn coupon caué avecques vn enchampre. Mais pour autant qu'ils sont faciles à se rompre par la vehemēce du feu, on ne les doit mettre en œuvre, ayant la commodité d'y proceder autrement. Si est-ce que ie le vous ay bien voulu dire afin de vous en pouuoir seruir en temps & lieu, ou vous n'aurez le moyen de faire coupelles.



Après les coupelles il est de necessité auoir vn petit fourneau muré & fait en façon d'vne petite tour quarrée & fault que la voulte soit large quelque peu plus d'vn pied, haulte sur la terre demie brasse. Et au pied de ce fourneau sera delaissée vne ouuerture quarrée en façō de porte, par laquelle le vent ait pouuoir d'y faire entrée: & au coupeau ou le charbon doit estre mis & embrasé, aurez vne place vuide d'vn quart de brasse, & vn pied au dessoubs sera faite vne petite separatiō, en laquelle aura entrée,

comme si c'estoit vne fenestre quarrée, large de quatre doigts, & vn doigt au deffoubs sera posée vne grille de petites verges de fer contigues & ioignantes l'une à l'autre d'un demy doigt. Et au deuant du trou qui est sur la grille, sera mis vne tuille pour eslargir l'entrée de la bouche du fourneau. Au pres cestuy-cy on forme vn arc de terre de creseulx, pors, ou d'autre chose qui resiste au feu. Et sera la voute de cest arc autant large comme est la bouche du fourneau & quelque peu dauantage, & à cause du feu sera cest arc couuert pour ne laisser interesser les coupelles qui sont au deffoubs. Et le tout sera bien fermé, apres que les susdittes choses seront esté ainsi ordonnées, il ne vous restera tant seulement fors entendre la pratique pour faire l'essay. Pour à quoy paruenir il vous fault premierement mettre vostre arc au lieu vuide du fourneau qui est au dessus de la grille. Et le faudra droittement poser contre la bouche, laquelle sera bien fermée de charbon apres y auoir mis le feu au dedans. Lequel estant bien embrasé, & l'arc & four bien echauffé, on ne faudra à mettre dedans les coupelles par la bouche deuant, dans lesquelles il ne faudra mettre chose quelconque iusques à ce que l'ardeur du feu les ayt rendues totalement blanches. Et à l'heure les faudra remplir d'une telle quantité de plomb qui ne tienne aucun argent, qu'elles en soient remplies à demy. Puis fermant la bouche avec vn gros charbon, les faudra laisser reposer iusques à ce que la couleur noire du plomb soit conuertie en blancheur subtile & bien claire. Et alors vous prendrez de la mine de laquelle vous voudrez faire l'essay, & avec le petit tresbuchet vous ne faldrez à fonder la pesanteur, pour sçauoir combien ceste mine tient d'argent pour cent. Et afin que vous en ayez plus facile intelligence, ie mets le cas que vous en preniez vne once, demie, ou vn quart, ayant en pensée que la chacune d'elles soit de la pesanteur de cent liures. Et peu à peu les viendrez à les mettre au dessus du plomb, à deux ou trois fois, dans les coupelles. La ou le tout sera delaisé, non seulement iusques à ce que le tout soit fondu, ains iusques à tant que le plomb s'en soit du tout en allé en vapeur. Mais si ceste miniere se trouue dure à fondre, vous l'accompagnerez

gnerez de ce que congnoistrez luy estre plus duiſant. Et l'auoir peſée, viendrez à la faire fondre dans vn creſeul bien couuert & fermé, dans lequel vous mettrez du plomb au double, ne mettât en oubly lors que vous le viendrez à oſter & mettre hors du feu avec les moles de fraper le fond, ou en donner contre quelque choſe, afin que tout le metal qui a eſté mis au dedans vienne à ſe aſſembler. Et apres que vous apperceurez la matiere estre du tout fondue deſcouurant le creſeul viendrez à la getter en verges, tellement que le metal qui ſera meſlé avec le plomb viendra à ſortir, & les loupes reſteront attachées au creſeul. Lequel auoir mis en pieces, faudra le remettre en la coupelle peu à peu. Et ſi par cas fortuit la mine tenoit du cuiure fort abondamment, vous ne faudrez y adiouter du plomb dauantage, vn peu plus qu'au commencement, afin qu'elle en puiſſe estre mieux purgée en deux ou trois fois. Et en ceſte façon par l'argent qui reſtera en la coupelle, congnoistrez combien la miniere que vous auez trouuée tient pour cent. Il en y a aucuns qui font leurs eſſays ſans fourneaux ainſi ordonnez, n'ayant autre choſe qu'un vaſe bien fermé, ou vn petit fourneau compoſé de quatre briques accompagné de gros charbons, & iointes avec quatre fers comme ceux qui vueillent fonder, mais bien ſouuent cendres, charbons, ou quelque autre choſe viennent à les empeſcher, qui me fait conclurre que la voye du fourneau eſt la plus facile & la plus parfaite.



**T**OUTES les mines, encores qu'elles soient parfaites en leur qualité, doiuent estre cogneues des praticiens estant experimentez, & ayans congnoissance des metaux: afin qu'en la preparation ils ayent pouuoir de separer les bonnes mines des mauuaises. Et à cela il leur sera facile de pouuoir atteindre, rompant ou taillant la pierre, & la despouillant de la terre, afin que la mine qu'on cherche ne soit abreuee de l'odeur des autres qui pourroient estre cōtraires à sa nature. Et finalement est de besoing pour luy aider de la ietter dans la flamme du feu. Et puis l'auoir esteinte, lauée & nettoyée, le plus qu'il sera possible, la faudra accompagner des choses que vous congnoistrez luy estre plus duisantes pour la faire, auquel vous la voulez employer: pource que les mines sans les mettre en fonte, n'auroient non plus d'effet & vertu que pierres inutiles. Parquoy estant certain que les minieres sont de mistions diuerses, & que à la chacune d'icelle est besoin de donner secours à cause de la participation mauuaise, en laquelle elle defaut, il est necessaire d'auoir le conseil d'un ouurier experimenté, qui ait fait preuue des metaux avec le feu. Et faire tel deuoir qu'il puisse trouuer quelque moyen par lequel l'aigreur de la mine soit moderée. Ce que lon peut faire avec choses fusibles & coulantes comme sont arenes, marbres, & autres semblables simples mineraux de nature aqueuse, qui ont merueilleusement grand pouuoir en cest affaire. Et pour vous declarer le tout, il les fault esprouuer avec diuersité de fourneaux, maintenant avec feu de boys, à ceste heure avec feu de charbons. Et finalement tant par vn chemin que par autre, faire tant qu'elles se viennent à brusler ou à fondre. Et pour venir à la particularité des pratiques, les mines seiches & mal-disposées, auant toutes choses doiuent estre routies dedans vn four ouuert pour estre euetées, avec boys de charbon causant la vapeur, tout ainsi que ie vous ay dit de celle de l'or. Il en y a aucunes qui veulent estre esteintes en l'eau vne fois ou deux, & si est de besoing,

voulant



voulant bien faire son deuoir, qu'elles soient subtilement brisées & mises dedans vn lauatoire d'eau courante pour estre lauées dans larges coupes de bois fort diligemment, si que toute la bonté de la mine vienne à se rendre au four. Et si tu y veulx proceder autrement, il te faudra dresser vn baing semblable à vn cuuier ou lon met les cendres, & peu à peu tu le feras fondre dedans. Puis apres ne faudras à la purger & reduire à son periode & fin avec l'aide du cuuier. Et si par cas fortuit la mine estoit d'or, n'ayant la couleur autant belle comme vous auriez la volonté, vous ne faldrez à luy donner vn ciment commun, comme ie vous enseigneray en son lieu. Si que le faisant vne fois ou deux, vous ne faldrez à la reduire à la finesse & couleur qui vous sera plus agreable. Encores se tire la substance de l'argent d'aucunes mines qui sont pures en les brisant comme ie vous ay dit, & apres les auoir lauées, les faut tremper en vinaigre, dedans lequel ait esté mis rosette, ou bien l'arrouser avec eau, en laquelle aye sejourné sublime, vitriol, & cuiure vert. Puis reduisant le tout dedans vne coupe large de bois ou de pierre, y auoir mis vne bonne quantité de Mercure, faudra battre le tout avec vne petite masse, tellement que le Mercure vienne à tirer à soy toute la substance des metaux. Puis apres l'ayant fait passer par vne bourse de cuir de cerf, ou euaporer par alambic, l'argent ou or viendra à demeurer & rester totalement attaché à la bourse ou au fond de la chapelle. Vous assurant que ceste façon est la plus briefue & vtile. Mais pourautant que peu souuent on trouue peu de mines qui soient sans compagnie de quelque autre metal, avec lequel mercure ne s'acoste, s'il prend il en eschange la voye & chemin du feu. Et ceulx icy sont les moyens avec lesquels on procede communement. Mais qui voudroit particulierement vous enseigner le tout, il seroit necessaire d'estre plustost accompagné d'un esprit diuin que humain: pourautant que les moyens & façons sont en aussi grande abondance, comme sont les iugemens des maistres: Et comme les especes & nature des mines, encores qu'elles ne soient eslongnées grandement les vnes des autres. Il y a aucunes mines encores qu'elles soient fondues,

f

elles demeurēt accompagnées d'une certaine chose vicieuse, qui leur emporte toute leur vertu interieure : & est l'opinion des maistres que ce soit l'arsenic. Vous aduertissant que l'essay leur en donne cōgnoissance, pource qu'à l'œuvre grande, le premier essay est different aux autres qui ne rendent la mesme façon. Et semblablement le tout vient en lumiere avec les sublimations & brüslemens, sur la fin desquelles on met deux ou trois fois en l'eau la mine, puis apres l'accompagne on de choses contraires à la malice qui la tient embrassée, comme sont veines de plomb, ou loupes & autres pierres fusibles, ainsi que vous verrez estre de besoing. Vous assurant que la veine du plomb, l'arene blanche, loupes de fer, occre, brolamini, selnitre, borrac, voirre puluerisé & autres semblables sont appelez matieres minerales, pourautant qu'ils ont quelque proximité naturelle avec la chose qu'on doit fondre : ioint aussi qu'ils ont force de penetrer, à cause de leur abondante aquosité, ayant leur facilité de fondre acostée avec la seiche durté des mines, ausquelles les matieres minerales susdites font changer la nature, les disposans tellement qu'ils leur font perdre ceste seicheresse & durté, & les font deuenir molles & tendres. Je vous veuil encores dire ce que ie vous ay dit que souuētefois la benigne nature est coustumiere produire les matieres susdites en la compagnie de telles minieres aigres, ou d'autres pierres & terres à tel effect disposées, cōme si elle prenoit plaisir de satisfaire à la necessité de nos apetis. Parquoy il est necessaire de faire tel deuoir en preuue, que l'aide que on desire se puisse trouuer, non seulement avec choses communes, ains meslant plusieurs choses diuerfes en quantité, afin que la vertu qui fait compagnie à la mine ait plus de pouuoir de ce defendre du feu, & de la malice & vice qui se peult trouuer aucune fois iointe avec la mine, cōme ie vous ay dit. Vous assurant la maniere du plomb estre chose fort singuliere en cest effect. Et vous veuil encores aduertir, cōme lon doit proceder de faire les feux, & semblablement les fourneaux qui doiuent estre formez selon qu'il est necessaire à la qualité des mines. Si est-ce que communement les fourneaux doiuent estre larges par le hault, & estrois

par le bas, afin qu'avec charbons & soufflets le feu vienne à se renforcer tant pour estre en lieu sec que pour auoir rempars & obstacles à l'encôtre de la froideur de l'air. Vous aduertissant que le feu vient à s'augmenter lors que les maistres se trauaillent d'augmenter le vent, faisant mettre à l'entour deux ou trois paires de soufflets. Mais chose tant gentile ne doit estre exercée par ceux qui n'en ont aucun iugement: pource que aucunes fois au lieu de ayder ils viennent à nuire, si que la vertu de la mine vient à se consommer & se conuertir en fumée: pour raison dequoy il vient à succeder plusieurs fois que les fours bien fermez pleins de bois & charbons sont beaucoup plus duisans que les fourneaux, pourueu qu'ils soient composez tellement que la chaleur vienne à reuerberer. Mais quand on les a construits, la miniere est premierement bien fumée: puis estre brisée & lauée les compagnies luy sont acostées, par la force desquelles la durté vient à estre vaincue. Vous assurant d'auoir apperceu le mesme effect en Alemaigne, en laquelle cest art est plus exercé qu'en toute autre prouince de la Chrestienté, non seulement en ordre des fourneaux & fours, mais en la prepatation de la fonte. Car i'ay veu prendre la mine de cuiure tenant argent, & l'ayant mis en pieces l'accompagnet d'une quatriesme partie de loupes de fer, l'autre quatriesme partie de mine puluerisée de plōb, & plus d'une troisieme partie de marbre brisé subtilement, puis le tout estre bien meslé, on le venoit à mettre dans la casse pour estre fondue, laquelle estoit enuironée de charbōs pour rechauffer la cōpositiō, de laquelle la casse estoit pleine, & ainsi que le charbon venoit à estre consommé la mine se fondoit, on venoit à y en mettre sans intermission. Qui me fait considerer & tenir pour certain que toute autre miniere n'estant beaucoup esloignée de la nature dessusditte, pourroit estre reduitte par le mesme moyen à la purification de la fonte. Vous assurant pour certain qu'on peult seurement cheminer aux autres voyes & arriuer aux termes qu'on desire, voyant les moyens avec lesquels les autres procedent pour le seruice de leur entreprinse.



OMME chose necessaire, nous iugerons (pour la fin qu'on cherche aux mines) estre la fusion, sans laquelle toute mine & pierre seroit inutile. Et singulierement la fusion est cherchée par ceux, qui prouoquez d'esperance, ont tiré abondance de mine avec grand amas & despence. Et pour ceste raison tel suger merite d'employer l'esprit à chercher nouveaux moyens, si les ordinaires n'y sont suffisans, pour fondre les mines, & les purger de la terre qui les accompagne, afin d'en tirer les metaux. Et pour ceste raison ie vous parleray maintenant des casses & fourneaux: Et vous diray dauantage pour vous aduertir, qu'il vous fault premierement regarder pour faire bien vostre affaire, la qualité & nature de la mine, de laquelle vous avez eu congnoissance par l'experience du sage & essays qu'en avez fait. Suyuant laquelle vous viendrez à pourvoir aux autres necessitez, selon que la necessité s'y offrira: pourautât que le fer demande vne chose, & le plomb souhaïtte au contraire. Mais ie ne suis en deliberation de la repliquer: à cause que i'ay desia satisfait aux lieux ou i'ay parlé de leurs mines. Mais ie vous vueil tant seulement parler icy de la mine du cuiure, comme compaignie de l'argent, & de l'or: & là ou l'art est plus cherché, & ou les difficultez sont plus apparentes. Parquoy premierement il faut faire vn edifice pour tenir l'eau, afin que plus facilement l'œuure soit continué, & que les rouës soyent grandes & faciles à se mouvoir: ioint aussi qu'il fault qu'elles soyent conduïttes & si bien ordonnées, que la force de l'eau hausse les soufflets, tellement que le vent puisse entrer par la bouche des casses ou les mines doiuent estre fondus. Et pour cest effet, il fault auoir l'œil à la situation de l'edifice, à la qualité de l'eau & à sa descente, puis au boys, duquel l'edifice doit estre construit, & le charbon doit estre fait. Consequemment aux pierres qu'on doit employer pour la composition des casses. Et puis apres donner ordre de recouurer de bons soufflets qui soyent larges & longs, pourautant que tant plus ils sont bons, tant




tant plus ils vigourent la puissance du feu dedans la casse, & vient à se fondre plus grande quantité de mine. Pour faire les casses on doit chercher de-recouurer pierre qui aye pouuoir de resister au feu, comme est la silice noire, tachée de blanc ou de pourpre. Et si par cas fortuit vous n'auiez la commodité d'en recouurer, vous prendrez celles qui ont pouuoir de faire plus de resistance à cest element. Pour ce qu'autrement la violence & longueur du feu viendroiét à les manger, faisant fort grand dommage au maistre, & donnant si grand trauail aux ouuriers, qu'il leur seroit bien difficile de conduire leur entreprinse à perfectiō. Parquoy il sera de besoing prendre de la meilleure pierre que la commodité vous presentera, ou que l'experience vous enseignera. Mais outre ce que vous aurez dressé le tout ainsi que ie vous ay dit cy dessus, si est-il necessaire que ie vous monstre à cest heure la façon comme de faire les casses pour fondre, & la forme d'aucuns autres fourneaux, afin de pouuoir arriuer à la fin desirée pour fondre & purger les mines. Vous aduertissant qu'on est en coustume d'en faire de diuerses façons, selon que la necessité des matieres s'y offrira: ou bien iouxte l'aduis des ouuriers, qui aucunesfois les font faire simples, & autrefois doubles, tout ainsi qu'on veult plus ou moins donner feu à la chose, sachant fort bien estre necessaire adiouter chose de grande puissance pour vaincre vne obstinée & grande durté. Or pour rendre les mines molles & liquides, il est de besoing d'y adiouter le feu selon la matiere. Car si elle est douce, il luy fault donner le feu peu violent: Et si elle est dure, ne fault differer à luy bailler aspre & puissant. Et pour cōclusion toutes casses à fondre mines, sont ioignantes en vne muraille fort commode par l'aide de l'eau qui fait tourner les rouës, par la force desquelles les soufflets viennent à iouer & rendre vent. Vous aduertissant que les plus profitables sont celles qui sont semblables aux rouës des moulins. Car outre qu'elles relieuent les ouuriers d'un penible trauail, vous les faictes aller à vostre volonté, comme ie vous diray au lieu propre des edifices. Et pour retourner sur les casses, ie vous ay dit premierement qu'elles sont iointes au mur, mais aucuns ouuriers les font enchasser dedans. Mais

pour euitier despence & trauail, toute casse doit estre posée entre deux piliers esloignez l'un de l'autre deux brasses, & doiuent estre de la haulteur de quatre. Or pour le fondement d'icelle, on fait vne place aucunement pendente en auant, qui est de la haulteur d'une demie brassé, au dessus de laquelle on commence à murer & faire vn edifice quarré & vuide de la largeur d'un pied & demy.

Sur les quatre coins sont posez & tirez deux fils, qui viennent à respondre à la bouche, laquelle est prochaine d'un quart de brassé de cest edifice, qui est de haulteur de deux brasses, ou peu moins selon l'opinion des maistres, qui veulent que le tout soit clos & enceint de muraille, mais non si haultement que le mur qui est posé sur le deuant ait pouuoir d'empescher au fondeur de mettre le charbon & mine facilement. Vous aduertissant que d'autant plus que les mines leur sont longues, tant plus elles demeurent à se fondre au feu. A l'endroit de la casse sera posée & attachée au mur (contre lequel sont posez les soufflets) vne platine de cuiure, afin que le vent entrant par le trou de ceste platine, vienne à respondre dedans la casse de l'autre costé. Et tout au deuant de la casse sera posée vne petite porte de pierre, tellement adaptée, qu'on la puisse facilement poser & leuer pour accoustrer ou regarder dedans la casse sur le droit du fond, de laquelle on fait vne petite bouche, par laquelle la matiere fondue a la commodité de sortir. Et ioignant la casse sur l'endroit mesme de la bouche, on fait vn moule avec platine de fer, & l'auoir murée & enchassée en terre, tout aupres se fait vne fosse en terre large d'une brassé & demie en profondeur. Et quand vous voulez mettre la casse en œuvre, il vous faut prendre pouldre de charbon, terre d'arille, quelque peu de cendres, & le tout auoir mis dedans vn mortier de boys ou de pierre, avec vne masse de boys fault le tout battre ensemble, puis auoir destrempé ceste matiere, la vous faut prendre & en faire le fond de vostre casse, sans oublier d'y former vn canal en pendant, qui respondra à la bouche, afin que la mine fondue puisse facilement sortir, puis apres avec la pierre enchassée & terre fermerez ce fond tout à l'entour, hors mis la petite bouche, qui sera reseruée pour tirer à vostre plaisir hors du moule la  
mine

mine & loupe fondue. Et auoir le tout paracheué de ceste mesme composition de terre & poudre de charbon, vous emplirez le moule, lequel vous n'aurez plustost remply à son deu, que vous cauerez iusques à ce que vous aurez rendu vne place vuide au fond, faisant la bouche de la largeur de demie brasse, & au fond d'un pied. A vn des coings sera delaisé vn trou, par lequel viédra à sortir ce qu'on voudra faire passer à la fosse que ie vous ay dite. Apres il ne faut mettre en oubly de faire, entre l'issüe de la casse & le moule, vn canal, par lequel vous verrez le fond de la casse estre plein. Vous ferez passer toute la matiere fondue au moule. Et l'auoir quelque peu laissée reposer, vous apperceurez que toute substance de metal, cōme chose plus grand & moins visqueuse, ne faudra de s'aller rendre au fond de la terre fondue & conuertie en loupe, & restera au dessus cōme séparée. Vous assurant que ie ne fauldray à vous faire entendre ce secret, lors que ie vous feray mention cōme les mines fondues viennent à se purger & nettoyer. En la façon, que ie vous ay dite, sont appropriées & faites les casses communes. I'ay congneu aucuns ouuriers qui les faisoient faire doubles, y adioustant deux paires de soufflets. Et ordonnoient tellement les casses, que la matiere fondue venoit à passer de la premiere en la seconde. Ce qui me semble chose de grand trauail. Et outre la superflue despence, ie me fais a croire que ce soit vne procedure beaucoup plus superstitieuse que profitable & vtile.




Aucuns autres sont qui forment vne manche large deuers le pied & tortue à la sortie, & le demeurant droit, tout ainsi que vous pouuez aperceuoir en ceste figure posée aupres de l'autre. Vous assurant que la matiere sortant d'icelle, vient à tomber en vne fosse qu'on fait au dessous. Et prend ceste manche son vend presque à la vuidage de ceste tortue entrée, ou quatre doigts au dessous. Mais telle façon ne m'est beaucoup agreable, au moins sans fermer les trois carres de la bouche deuant. Car il me semble que le charbon & les flâmes chassées de la puissance du vent, doiuent sortir par la bouche deuant, & en plus grande quantité que celles qui restent dedans. Aucuns autres prennent fantasie au lieu des manches de faire dresser fourneaux à vent, pour fondre mines doulces: & aucuns autres le font en sorte qu'ils ayent pouuoir de reuerberer y mettant du boys au dedàs: pource qu'ils ne vueillent donner les feuz si ardens comme ceulx des manches: ioint aussi que n'est chose conuenable de les donner ainsi apres auoir vent & charbon au plomb, estain, & à certaines autres mines assez corrompues. Et dit-on qu'elles sont presque roties auant qu'elles viennent à se fondre. Vous aduertissant que tels fours se font en terre sur vn creux muré en façon d'un cerne, de la largeur de deux brasses, & de la hauteur de demie sur terre. Et au centre sera faite vne bouche, comme est celle d'un moulin à moudre, large de trois quars de brasse: & au dessous d'icelle sera posé vn lieu vuide, qui percera presque d'une bande à l'autre, par lequel on aura la commodité de donner le feu ainsi qu'on voudra en ce fourneau, qui sera enceint & enuironné tout à l'en tour d'une rouë toute plaine. Au dessus de laquelle sera posé vn boucal estroit en façon d'une trompe, de la hauteur d'une brasse & demie, à cause que le feu viendra à en sortir. Et quand on sera arriué à ce terme, on formera vne plate forme sur les quatre extremitéz, de laquelle seront posez quatre auges larges d'un tiers de brasse, par lesquelles les flammes viendront à sortir, estans dedans ce fourneau, lequel sera circondé d'un mur d'un quatriesme de brasse. Sur lequel sera construite vne voute de la haulteur d'une brasse, qui seruira de couuercle. Et au dessous de toutes les extre-

tremité-



tremitez sera fait vn canal pour receuoir la mine fondue qui descendra. Et au dessous d'iceluy aura vne fosse pour receuoir les matieres, ainsi qu'elles viédrôt à sortir. Et trois ou quatre doigts au dessus du couuercle du four, serôt faites deux petites breches, afin qu'on puisse voir & manier la mine. Et vn peu au dessous de la voute, seront faits quatre trous, afin que les fumées & flammes superflues ayent la commodité de sortir. Vous aduertissant de vous auoir declaré la forme du fourneau, duquel ie vous auoye parlé cy dessus, qui à mon iugement ne me semble chose fort exquise.



I'ay entendu qu'aucuns autres voulans fondre les mines font dresser fours communs, ayans pouuoir de reuerberer: mais ils les font longs & percez au dessus, afin d'y pouuoir adiouter mines, & facilement en tirer les loupes. Aucuns autres fondent les mines facilement avec l'aide des simples flammes de boys, leur donnant le chemin & entrée dans les fours, desquelles ie vous ay voulu donner congnoissance, afin d'en pouuoir parler quand l'occasion s'offrirait. Mais par mon cōseil ie suis d'aduiz que vous vsiez des manches, pource qu'elles sont gentilles & propres, & mesmement à certaines especes de metaux, ausquelles il faut par necessité faire sentir la puissance du feu pour les faire fondre. Ie vous ay parlé de la mine du fer en son lieu assez suffisamment, si est-ce que ie ne vueil donner fin à ce chapitre, sans vous en parler & dire commé les moyens, par lesquels on le vient à fondre &

purger, sont les manches, encores qu'on les appelle fours. Il est bien vray qu'elles sont plus grandes & autrement formées que les communes, pource qu'il luy faut plus grande quantité de feu. Pour raison dequoy sont faits les grands soufflets, & la grande concauité pour mettre le charbon. Vous assurant d'auoir veu manche propre à cest affaire, tenant cinquante ou soixante sacs de charbon, & six charges ou huit de mines. Parquoy il ne se fault emeruciller si on vient à recourir soufflets de grandeur excessiue, car il n'est besoing que le vent vienne à manquer, si on veult tenir en vie vn tel feu.

*Comme lon doit proceder aux fusions des mines des metaux.*  
*Chapitre. 4.*

**V**ous ayant monstéré cy dessus comment les mines sont trouuées, tirées, préparées & disposées aux fusions, & semblablement comment sont composez manches, fours & fourneaux, pour l'ayde desquels on vient à les purger de la terre qui les accompagne: Je me seroye trauaillé en vain, si ie ne vous monstroye la pratique de les fondre. Premièrement ie vous dy qu'il vous fault prendre à poix ou mesure la quantité de mine que vous prendrez en volonté de fondre: Et mesmement si elle est de telle espeece qu'elle contienne argent: puis la romprez en petite piece, vn peu moins ou plus grosses que febues. Lesquelles vous poserez au dessus des pierres pleines & viues. Et auoir préparé le four ou manche, vous ne fauldrz à la ietter dedans, l'accompagnant d'vne quatriesme partie de veine du plomb. Puis apres vous y adiouterez encore autant de loupes de fer, ou d'autres mines puluerisées. Et apres auoir remply le four, vous ne ferez faulte de la rendre bien embrasée avec charbon, donnant l'eau abondamment parmy l'edifice, ou les soufflets sont posez, avec le vent, desquels vous continuerez iusques à ce que le tout sera bien embrasé. Et quand les flammes commencent à sortir, on remplit vne petite mesure de nouueau charbon, puis on met dedans le fourneau vne autre mesure de la composition  
 de la

de la mine, en vsant en ceste façon iusques à ce qu'on apperceura le fond de la manique estre plein de matiere fondue, & alors avec vn fer, la bouche que vous auez laissée au pied du fourneau, viendra à estre ouuerte, donnant liberté au metal & aux loupes de sortir, tellement que par le canal toutes ces deux choses viennent à faire entrée en façon d'huile au moule: pourautant que tout ce qui est dedans le fourneau vient à se vuider & à l'heure que les maistres aperçoient le moule estre plein, ils rebouchent le pertuis qui est au deffous du fourneau, lequel ils tournent remplir de nouvelle matiere, pour poursuyre la seconde fonte. Et tandis la matiere fondue qui est dedans le moule, vient à se departir, tellement que les parties terrestres si grosses restent au dessus, & les subtiles descendent au fond. Vous assurant que les terrestres seiournent bien peu à venë de l'œil sans deuenir dures: & alors avec vnes fourches de fer ammanchées de bois on vient à frapper dessus, tellement qu'elles viennent à estre rendues à quelque coin, là ou elles sont prises & ostées pour laisser vuider & espuiser tout ce qui est contenu de metal dedans icelle piece. Et apres qu'elle est froide, ils la mettent à part, & de main en main font ainsi des autres. Puis se trauaillent de les lauer iusques à ce qu'elles se conuertissent en meral, deuenantes si fort claires, qu'au dessus d'elles n'à aucune apparence de loupes. Vous aduertissant le metal qui est dedans le moule, estre de trois natures, & les deux plus subtiles & pesantes, qui sont celles du plomb & de l'argent viennent à se separer de la nature du cuiure, & vont au fond. Si que le cuiure reste au dessus, qui n'est plustost refroidy qu'on le traite tout ainsi comme les loupes, sans cesser. iusques à ce qu'il arriue à celle partie plombense, qui ne refroidit si facilement, comme fait le cuiure. Et à l'heure ils deferment le trou du moule, laissant prendre le cours à ceste liqueur le long du canal, par lequel elle se vient rendre en la fosse, ou elle se refroidy, & appelle on ceste matiere en Alemaigne couolo, à cause qu'elle contient d'argent selon la quantité de sa mine: & celle du cuiure qui est prise au dessus de l'eau, on la nomme confrustagno. Et en ceste façon ils poursuyuent iusques à ce qu'ils ayent employé la

mine qu'ils auoient apprestée pour la journée, ou bien pour toute la semaine. Vous promettant que ie ne fauldray à vous donner congnoissance comment il fault conduire à leur derniere perfection ces deux metaux, qui se viennent à former dedans le moule, l'un tenant de la nature du plomb, & l'autre du cuiure. Je croy encores que ce mesme moyen de faire couler les matieres dans le moule, se pourroit vsfer aux fusions des fours qui reuerberent pour separer les loupes du metal. Mais si ie me vouloye trauailler en tels affaires, & que ie voulusse suyure & tenir les chemins des fours, ie penseroye trouuer moyen par lequel les loupes viendroient à estre separées du metal, lors qu'elles seroient dans les mesmes fours. Lesquelles ie viendroye puis apres à tirer par les bouches toutes purgées, ou bien ordonner qu'elles viendroient à sortir, ainsi qu'elles viendroient à se fondre. Je vous ay desia dit que la masse que vous auez faite de cōfrustagno & couolo, est de cuiure, plomb, argent, & force quantité d'or meslé parmy. Et si par cas fortuit vne telle mine contenoit ce que dessus, & qu'elle demeurast en tel estat seroit chose inutile, & seroit necessité de venir à la definition de la separation desdites matieres, de laquelle le n'ont tant seulement les mines, ains les nettoyeurs des vieilles loupes, d'oriers & bateurs d'or vsent. Les moyens de ce faire encores qu'ils soient diuers, cestuy que ie vous vueil dire au chapitre suyuant est tresbon & fort facile, & si rend plus d'utilité que autre qui se soit trouué iusques à present. Il y en a aucuns qui se seruent de l'argent vif en la purgation des loupes, là ou il sert beaucoup, mais il est de fort grande despence, & en fauldroit recouurer grande quantité pour satisfaire à l'abondance des matieres. Vous assurant que ie ne vouldroye les mettre en œuures, sinon là ou l'or seroit pour supporter la despence superflue qu'on y veult employer.

*Moyen de preparer le plomb du cuiure, & en tirer toute substance d'argent ou d'or, qui est contenue en iceluy.*


*Chapitre. 5.*



**E** vous ay dit cy dessus qu'on meist à part le metal que on auoit tiré de la fusion de la mine, lequel est de la substance de cuiure, plomb, argent, & parauenture de l'or. Mais ce sont toutes substances meslées en vn corps sans aucune distinction. Et pour les reduire & separer à leur cure & qualité, est de besoing y proceder en vn chacun d'eux, selon leurs propres moyens: & à ceste heure pour separer le plomb, pour tirer du cuiure l'or & l'argēt, est de besoing faire retour à la fusion, & suyure l'un des deux moyens dessusdits. Le premier desquels est, que refondant avec adioutement de plomb, ou de sa mine, vous faciez passer le tout par le canal, dedans le grand moule, qui est posé au deuant du fourneau. Et ainsi qu'il se refroidit, on le doit leuer comme pur avec la forcelle, & continuer iusques à ce qu'on paruiet à descouurir comme auez fait la premiere fois: lequel faut tirer & en faire essay pour voir si tient d'argent, & en estant accompaigné de tant pour cent, & qu'il ait pouuoir de porter despence, vous le retournerez derechef à la fusion, laquelle vous luy continuerez iusques à ce que vous l'ayez totalement nettoiyé de toute crasse, tellement qu'il viēne tousiours à demeurer couolo. Et si par cas fortuit il se trouuoit au contraire, ou qu'il en fust de peu accōpaigné, vous ne deuez estre paresseux à vous recompenser de vostre œuvre, ou de la retourner fondre de nouveau, en y adioutant tousiours plomb, ou veine de plomb, & faire tel deuoir qu'il demeure exempt de toute odeur d'argent & de toute autre compaignie, excedant en valeur celle du cuiure, vous priant de mettre à part les pieces subtiles de ce metal. Car ie vous diray puis apres en quoy elles vous peuuent seruir. L'autre moyen est de fondre le dessus dit metal couolo, & ensemble y adiouter tant de plomb, ou de sa veine qu'il vienne à exceder la moitié, ou les deux tiers, toute la quantité du cuiure, qui est au corps du confrustagno. Puis faut le tout passer dans le moule de la fusion pour le purger & nettoyer de ses loupes s'il en tenoit aucunes: & apres l'enuoyer par son conduit en la fosse, dans laquelle se mettra vn aneau de fer au milieu pour le pouuoir peser auāt qu'il vienne totalement à se refroidir. Vous assurant qu'il s'en

vient à former totallemēt des pains pesans deux cens & cinquante liures, & d'iceux s'en faiēt autant grande quantité que la matiere peut porter. Et apres ces pains seront portez en vn lieu construit de pierre bien longue, semblablement à vn hostel, vn peu moins avec le dessus duquel sera couuert de platines de fer acostées l'une à l'autre, mais non point tant prochaines, qu'un canal d'un demy doigt ny soit delaisé entre deux. Et en ce lieu seront posez & regez autant de pains que la commodité du lieu en pourra recevoir, eslongnez toutesfois l'un de l'autre de quatre doigts ou plus. Et avoir esté ainsi acostées les faudra environner avec vne grille faite en croix de verges de fer, posées & serrées tellement que le charbon qui sera mis au dessus ne puisse tomber. Et aussi tost que les pains seront eschaufez, vous verrez distiller le plomb clair & beau dans vn grand moule que vous ferez mettre au dessous pour le recevoir. Duquel vous le viendrez à tirer avec vne cueiller de fer, pour le mettre dans certains petits autres moules ou cuues, qui pourront tenir la valeur de vingtcing liures ou environ. Et ne cesserez de continuer ceste façon iusques à ce que le plomb vienne à se desister d'en rendre aucune goutte. Vous assurant qu'en iceluy est tout l'argent & l'or qui estoient contenuz aux masses du cuiure & du plomb. Et la matiere qui est demeurée entre les charbons & cendres est seiche, semblable à vne esponge pourreuse & maigre, mais en substance c'est cuiure, & la retourné encores de nouveau dans le fourneau pour estre refondue, & derechef essayée. Et se trouuant qu'elle tienne de l'argent, on luy donne encores vne charge de plomb par semblable voye. Et si elle ny est suffisante, on luy baille la troisieme & quatrieme, continuant iusques à ce que toute substance d'argent en soit totalement esteincte & tirée. Puis avoir fait fondre ceste matiere, on la fait conduire dans le moule qui est posé au deuant du fourneau, & puis on la retire pour la mettre en vn fourneau pour estre euantée, afin de perdre sa vapeur & ne cesse on de luy continuer le charbon & bois, iusques à ce qu'on apperçoit qu'il ne contient plus en soy odeur de plomb, & qu'on voit que telle matiere est disposée pour estre reduite

reduite à cuire fin, lequel ie vueil estre mis à part, & semblablement les pains qui sont esté formez du plomb. Car pour conclusion tout l'argent & l'or que tenoit la mine que vous auez fondue, qui estoit plomb & cuire, estoit de la propre matiere du cuire. Vous aduertissant que la chacune particularité de ces choses, est en disposition de se pouoir facilement reduire à la derniere qualité de sa finesse. Et parlant de l'argent pour le reduire afin, ie vous diray premierement le petit moyen, & puis apres la grande pratique, certainement ingenieuse & belle, & mesmement celle ou le cuire est accompagné pour en tirer l'argent & l'or avec l'aide du plomb, extraits d'une raison que iamais il ne se vnit à ceux qui ne le ressemblent, encores qu'on le mette en compagnie, & avec peu de feu il vient à sortir, laissant le lieu vuyde ou il auoit esté mis, faisant encores le semblable à l'argent & à l'or. Mais pour l'en separer il faut employer art & subtilité plus grande & feu plus excessif & abondant, comment ie vous feray congnoistre clairement quand ie vous monstrey le moyen d'affiner.



*Le moyen d'affiner l'argent avec la coupelle, & de faire les essays  
de l'argent & de l'or qui sont reduits  
en masse de metaux.*

*Chap. 6.*

**E**N CORES que ie vous aye escrit cy dessus l'ordre de faire les essays des mines, chose qui n'est de beaucoup differente à celle qu'en ce present chapitre ie vous vueil declarer, si ne lairray-ie de le vous repliquer en substance, en y adioutât le moyen de faire l'essay de l'or: ioint aussi que ie vous vueil declarer vne certaine regle de poix, chose assez necessaire pour estre sçeuë, & mesmemét pour mieux retenir le moyen d'affiner par coupelle le peu de quantité de l'argent. Vous aduertissant que sont deux seuls moyens, ausquels lon s'accoustume pour conduire l'argent afin, l'un desquels est celui de la coupelle, & l'autre la cendrée, l'un pour la quantité petite, l'autre pour la grande. Mais encores qu'on les mette deux en nombre (comme le fin, & l'ordre) si est-ce que ce n'est qu'une substance. Et ne congnois entre eux autre difference, fors la façon de proceder, & celle de quantité grande à la petite. Vous assurant que telle chose est grandement necessaire & vrile pour la congnoissance de celui qui manie l'or ou argent: Car non tant seulement il luy met en lumiere l'œuvre qui doit faire, ains luy demontre la verité & la mesure certaine des choses grandes: tellement qu'il vous rend plus facile la voix pour conduire vostre œuvre à la perfection determinée, beaucoup mieux qu'on n'y sçauroit paruenir, par celle mesme voye qui conduit la grande quantité. Et pour ceste raison on se traueille à faire essays pour sçauoir quelle quantité & substance d'or & d'argent est contenue au cuivre, au plomb, & autres mines, afin que vos ouuriers ne vous puissent tromper & interesser: ioint aussi qu'ils feroient aucunes fois mal leur deuoir s'ils ne craignoient estre decouverts. Vous assurant que les essays ont pouuoir de vous rendre beaucoup plus assurez que la touche. Je vous ay dit cy deuant le moyen comment l'on doit faire le fourneau, & la façon en laquelle les coupelles doibuent estre disposées: & maintenant ie vous vueil monstrier à bien partir la petite liure avec la commune de douze onces, & diuiser vne once de douze en vingtquatre parties: & vne partie de vingtquatre en autre vingtquatre q. est vn denier, & ce denier en vingtquatre grains, & vn grain en moitié, & toute moitié en vne autre



autre qu'on appellera quart de grain. Et ce quart de grain en vn seziesme de grain, qui se diuifera si vous voulez en vn trétedesiesme. Vous aduertissant qu'il fault prdère vne quâtité & pesanteur de poix à vostre fantasie pour vne chacune petite liure. Mais il fault prendre garde que les petites balances de l'essay attachées au trebuchet, se puissent facilement monter & descendre, mettant le cas que vous auez prins la pesanteur de trois deniers, que vous presupposerez estre la liure de douze onces, puis apres vous prendrez l'essay du cuiure ou argent que vous voudrez essayer, & en couperez avec vn enchampre en trois lieux aux deux extrémités & au milieu. Puis apres avec le poix & voz trois deniers le contrepeserez iustement: & l'auoir battu sur vne enclume & rendu subtil, ne faudrez (apperceuant voz coupelles bien rouges) à le mettre dedans, ou il sera reduit à finesse, aussi tost que le plomb s'en sera allé en fumée. Pour raison de quoy vous viendrez à mettre vostre essay avec les molettes hors de la coupelle, & l'auoir bien nettoyé vous le mettrez sur les petites balances d'essay, puis tirant tout bellement le trebuchet viendrez à le contrepeser, & avec la liure que ie vous ay enseignée, vous viendrez à faire vostre preuue d'arithmetique, par l'aide de laquelle vous trouuerez le tout estre veritable. Et apres l'essay de cest argent, vous prendrez du lingot la quantité & pesanteur qu'il vous faudra, puis l'auoir fait battre vous le rendrez subtil avec eau forte (comme ie vous diray cy apres) en le mettant dedans vn petit tonneau, là ou l'or que ceste eau enuoye au fond se trouue, qu'on vient à lauer, seicher & peser: vous aduertissant que pour l'instruction que ie vous ay baillée, vous pourrez tousiours auoir congnissance de vostre argent, ou or, & de ce qu'il contiendra, en y adioustant toutefois vostre diligence.

*La façon de faire cendrée pour affiner argent en quantité.*

*Chapitre. 7.*

**E** O V T ainsi que ie vous ay enseigné d'affiner l'argent & en faire l'essay, ie suis à ceste heure en la mesme volonté (au lieu des coupelles) de vous monstrier à faire les

cendrées pour afiner l'argent, lors que vous en ferez pourueuz en grande quantité. Et en cest affaire ay ven proceder par quatre moyens, mais à la fin ils sont tous reduits en vn, & bien peu differents les vns des autres. Aucuns ouuriers prennent plaisir à se feruir d'un four ayant la voute couuerte de pierres posées au dessus de la cendrée. Autres se trauaillent de faire vn chapeau de fer en façon de couuercle fort grand. Qui prend vouloir de mettre en œuvre pieces de chesnes secs ou autres de gros bois: & qui se delecte de recouurer certaines lances, bardes, ou platines de terre cuitte, estant tellement longues que trois ou quatre couurent toutes les cendres. Si que les deux qui sont contigues & ioignantes l'une à l'autre, auront au milieu vn trou qui battra droittement sur ces cendres, & par ce conduit la matiere sera mise au plomb, comme ie vous feray congnoistre la pratique cy apres. Car ie vueil retourner à vous dire comment le plus communement sont faites les cendrées, lesquels tout bon maistre voudront faire perpetuel pour en auoir commodité plus grande: Les differences de tel chemin pour faire cendres sont les moyens de les tenir chaudes, afin qu'elles puissent mieux operer. Car le cendrier est celuy proprement auquel la matiere est contenue, & celuy mesme qui est cause que l'argent vient à s'afiner facilement, le purgeant de toute compaignie qu'il scauroit auoir, excepté celle de l'or. Et pour attaindre à ce que ie vous dy, il fault eslire vn lieu commode, auquel sera construit vn edifice d'eau ou autrement, pour auoir la commodité de faire iouer les soufflets: Et au deuant de la bouche des canons sera faite vne muraille en façon d'une rouë, en lieu tant spacieux, qu'on aura la commodité de pouuoir aller tout à l'entour, ayant sur la terre de haulteur deux tiers de brasse, avec vn canal au deuant: comme vous verrez estre necessaire, & grand à vostre volonté. Puis quand vous voulez ouurer, vous prenez cendres & les detrempez dans l'eau, tellement que vous venez à en former des pains que vous faites par deux fois seicher & reduire pour encores les relauer, afin que tout ce qu'il tient du sel en puisse mieux estre vuide. Et auoir le tout ainsi accoustre, vous en prendrez la quantité, qui vous sera besoing, & avec


& avec icelle meslerez la quatriesme partie d'arene de fleuve bien lauée, en y adioustant autant de tuille puluerisé. Et meslant toutes ces choses avec les cendres en ferez composition. Puis les ayant estendues au dessus des autres recuites, & en humidité reduites dans vn cercle, vous ne fauldrez à le remplir de telle composition y en mettant de l'epaisseur de quatre doigts, vous trauillerez de la rendre esgalle & vnue avec la main, puis commencerez avec vn marteau à la battre tout à l'entour & au milieu, tellement qu'elle vienne à s'endurcir, & reduire de quatre doigts à deux. Puis avec vn fer viendrez à la pollir & rendre vnue & pleine sans aucune macule. Et apres on viendra à fortifier le tout avec eau salée, & se trauillera-on d'y aller appliquer cendres & glaire d'œuf, & prendra-on peine d'y mettre tuille brisée & chaux, tellement que la iointure du cercle viendra à s'elargir & oster. Au moyen dequoy on viendra mettre tout à l'entour pour fortifier d'autres cendres: afin que les pieces de boys qu'il faut mettre aux cendres, n'y puissent aucunement incommoder: mais il seroit beaucoup meilleur de clorre l'enceinte de muraille. Apres que le tout sera ainsi accoustré, le charbon sera mis au dessus, & le feu au milieu d'iceluy, qui viendra à sallumer peu à peu, si que la cendre viendra merueilleusement bien à se recuire. Et si en aduenoit autrement, ie vous aduerty qu'il vous pourroit porter domage, pource que quelque chantillon de l'argent pourroit valler au dehors, ioint aussi qu'il seroit perilleux que le lieu ne vint à se rompre, & la cendre à se descouurir perdant sa crouste, tellement qu'il faudroit abandonner l'œuvre sans l'acheuer pour euitier de perdre l'argent. Vous aduertissant que pour surté on y doit adiouter charbon apres la premiere recuite, & donner feu pour la seconde fois, & mesmement au propre lieu de l'argent qui ne voudroit moins de huit ou dix heures la continuation d'un bon feu. Encores vous veux-ic aduertir que vous deuez faire la forme & composition des cendres selon les matieres que vous voulez afiner, tant de plomb que de cuiure. Or vous ayant équipé vostre cendrier, ainsi qu'il appartient, ayant fait mettre la voulte murée au dessus,

& vn chapeau de fer ou cepz, & fait couvrir les cendres de gros charbon, ayant mis le feu, on fait iouer les soufflets avec l'aide de l'eau, ou celle de l'homme. Puis vous prendrez trois fois plus que il n'y a de matiere que voulez afiner, du plomb que vous auez tiré ou d'autre, & le mettrez à part sur les cepz qu'auuez mis dedans les cendres, & le laisserez peu à peu espuiser. Et quand vous aperceurez qu'il est chaud, vous commencerez tout bellement à faire mouuoir les soufflets entre le chapeau & charbon. Et auoir transuersé sur le feu, certaines longues buches de chesne, vous mettrez en deuoir de faire continuer le vent le plus doucement & longuement qu'il sera possible, sans mettre en oubly de tenir tousiours chaut & bien couuert le cendrier, si que vous n'arresterez longuemēt de voir parmy les flammes du boys, que le plomb semblera estre de couleur azurée, puis apres noire, & en vn instāt deuiedra clair & luisant cōme vne estoille. Et à l'heure vous prendrez celle quantité de couolo, ou d'autre matiere q̄ vous voudrez afiner, ainsi q̄ requerra le plōb, que vous auez tiré des grans pains de cuiure que ie vous ay fait chercher cy dessus. Puis l'auoir posée sur les charbons, la ferez fort bien seicher, tellemēt que ce plomb viendra par la force du feu à se conuertir en liqueur, approchant fort pres de celle de l'huile, vous aduertissāt que vostre baing soit tousiours bien chaud. Et tout ainsi que la mer fait aux vndes, le vent des soufflets vient à la ietter aux extremitez, si que ce metal est conuert y en cuiure & plomb, par la vertu du feu. Tellement que quand les ouuriers le voyent ainsi reduit en ce point, ils fauancent pour le couper avec vn fer: & l'auoir fait aucunement epuifer & rendre son humidité, ne faillent à le mettre au dehors des cendres, appellant telle chose ghelta. Laquelle auant que d'estre refroidie semble vne liqueur subtile, qui de main en main se va engendrant par la frequentation du cuiure & plomb sans prendre fin, tant que la substance est en ce lieu. Et quant l'argent pur s'est conduit au fond des cendres, encores que ceste liqueur se trouuaft fort prochaine, on cessera d'en plus tirer, afin d'euitier qu'on ne vint à tirer quelque partie d'argent avec ceste liqueur. Mais avec boys sec on vient à luy mettre vn puissant feu à  
dos, &




dos, & avec le vent le plomb vient à s'en aller en fumée, au moyē de quoy on iette la veuē sur l'argent. Et le voyant reluire, & couuert de diuerses couleurs approchantes du noir, vous empescher presques la veuē d'iceluy. Il ne vo<sup>u</sup> fault differer d'y adiouter nouveau plomb, pource que la couleur dessusdite vous donne indice qu'il n'est pas encores bien purgé. Parquoy tenant tousiours vostre œuure bien chaude, vous irez ainsi continuant, comme ie vous ay dit, iusques à ce que vous aurez congnoissance, que l'argent soit totalement purgé du cuiure, ou de quelque autre odeur qu'il pourroit auoir. Et à l'heure vous l'apperceurez arrester blāc au possible, tellement que vous aurez conduit vostre argent bien fort pres de sa derniere finesse, tant plus ou moins que luy serez esté liberal du plomb, vous assurant ceste-cy estre la voye d'affiner l'argent quand il se peut faire avec l'œuure & art des cēdres. Mais pourautant que rarement on le vient mettre hors nettement, on le vient à tirer ainsi chault. Puis l'auoir taillé & mis en pieces, le mettent aux coupelles avec plomb, pour le reduire à plus grande finesse, ou bien sans le mettre en coupelle, le fondāt en vn creseul de fer ou de terre dans vn fourneau, luy donnāt bon feu avec vn peu de voirre brisé ou de sel-nitre. Puis le iettent en pains, ou en verges fil leur est plus agreable. Et pour vous dire à ceste heure ce que i'ay veu, ie vous aduertty que i'ay volenté de vous en faire vn autre discours, attendu que i'ay veu, comme ie vous ay dit cy dessus, en Alemaigne, afiner en vn fourneau, qui auoit en chāge de chapeau vne voute murée, & à l'entour estoiet six maistres en six fenestres, pour trauailler. Et ioignant ce cendrier estoient posez trois grans soufflets à double canons longs & gros. Et à la bouche de l'issue du vent, le chacun auoit vne petite porte, laquelle fououroit quād le vent s'approchoit. Et quand lon cessoit de faire mouuoir les soufflets elle se refermoit: & gardoiet ces portes (ainsi que i'ay peu coniecturer) que le soufflet ne vint à tirer à soy le charbon embrasé, qui l'eust peu brusler. Ioint aussi que tels empeschemens mis en la bouche faisoient battre le vent droit au milieu du baing. Et si estoient encores par telle façon adaptez, qu'on les pouuoit faire tourner d'vn costé & d'autre: Et


faire que le vent venoit à donner au lieu ou il sembloit à l'ouurir plus à propos.




Les soufflets estoient posez au dessus du mur , & auoyent vne breche au mesme lieu, ou les canons venoient faire entrée , de la haulteur d'une brasse, & large d'une & demie. Et sur les deux flâcs estoit iointe à deux anneaux de fer vne grande piece de boys, sur laquelle les soufflets estoient soustenus, tellement que facilement




le vent par leur aide estoit plus frequent. Vous aduertissant que ceste façon me semble fort belle, & en considerant ie congny qu'elle ne pouuoit bien seruir sinon aux choses grandes & continues, comme lon faisoit en ce lieu-là, ou deux fois la sepmaine on y afinoit cent cinquante, ou deux cens marcs d'argent à chacune fois. Et en ceste mesme façon on travailloit en la cité de Spruch.



¶ L'autre façon ou est mis le chapeau de fer m'est plus agreable: pource que plus aisement le feu se peut diminuer, & peult-on afiner peu & beaucoup, ainsi qu'il plaist le mieux au maistre. Et cōment ie vous ay dit cy deuant, les cendres s'afinent avec certaines platines de terre cuitte espees de trois doigts, larges de demie brasse, & aussi longues comme est le cendrier. Vous assurant



qu'elle me plaissent beaucoup mieux qu'aucunes des autres que j'aye encores veu mettre en œuvre: pource qu'elles se carrent mieux aux cendres, auxquelles la chaleur est entretenue selon qu'elle vient à defaillir. Le semblable se fait encores avec les pieces de boys de chesne: mais non pas si facilement, ne tant bien comme avec les pieces de terre cuitte. Mais pour autant que les



considerations sont grandes en cest affaire, il faut estre aduerty pour bien conduire son œuvre à perfection. Car qui n'a veu par experience, ou que premierement il n'ait esté bien aduerty, il est bien difficile qu'il se puisse garder des inconueniens. Parquoy ie vueil que premierement vous sçachiez, si l'argent ou plomb que vous afinerez tient de l'estain: Car vous aurez bien fort grād peine à le conduire: Et la voye qu'il vous fault tenir pour le purger, si cela aduenoit, & certes il vous luy faut mettre fort bien le feu au dos, afin que le baing soit plustost eschauffé, sur lequel vous mettrez du charbon brisé. Puis luy donnant le vent avec les soufflets, il se viét à esleuer: pour raison dequoy il le vous fault decourir, & avec quelque broche de fer vous trauillerez d'oster le charbon puluerisé, lequel tirant dehors ameine quant & soy l'estain, qui ne s'estend ainsi subtilement, comme fait le plomb. Mais si l'aduenoit que le cendrier par trop grande chaleur vint a boulongner, vous ne ferez de faire eslargir le boys qui est à l'en tour, ou fermer les soufflets iusques à ce que le tout ayt este re-  
duit



duit en plus grande attrépance. Et si l'aduenoit que le baing tint beaucoup de cuiure, comme sont aucunes fois le reste des mines ou loupes, vous serez aduertis à vous superseder à ietter, iusques à ce que vous verrez prendre au cendrier vn bort de ce qu'on aura ietté : pource que les matieres du cuiure les font tendres. A cause dequoy elles sont à ietter perilleuses : parquoy il est necessaire à celuy qui taille les cendres estre subtil. Ioint aussi qu'il vous est necessaire de prendre garde à la pointe de vostre fer, & à la battre souuentefois, afin qu'elle ne viēne à s'endurcir. Aupres de vous ne faudra oublier d'auoir tousiours vne ou deux cueilliers sur la pointe desquelles faudra attacher vne piece de drap mouillé, pour fermer lors qu'on verra sortir du baing plus de matiere iettée qu'on ne voudroit: ou bien pour baigner à la fois quelque lieu du cendrier atendry à cause du plomb : ou bien pour rendre humide & plus facile le lieu ou vous voudriez couper si l'estoit par trop dur. Vous suppliant encores de ne mettre en oubly de rendre voz cendres semblables à la matiere. Car si elle est douce, il fault qu'elles soyent doulces : Et si elle est dure, il est necessaire que les cendres le soient aussi. Et à tout cendrier que vous ferez, il ne vous faudra oublier de frotter souuent la verge aux pieces de chesne, pour faire tomber ceste pouldre de charbon embrasée sur le baing. Et subitement vous apperceurez ouurir ce que vous aurez ietté qui viendra à se dilater & estendre, sans cesser de suyure iusques à ce qu'il sera arriué au terme de finesse, qui ne passera plus oultre qu'est le pouuoir de la cendre. Et si auez volonté de le forcer vn peu dauantage, saisissez vous, quand vous serez arriuez sur la fin, d'vn aix ou deux qui n'ayent point esté au feu & qui soient bien seichez: puis les mettez au dessus des cendres, tellement qu'elles puissent totalement couurir l'argent. Puis de nouveau viendrez à luy redonner à vostre volonté vne quantité de plomb. Et aussi tost que vous le verrez vny à l'argent, vous ne faldrez avec vne cueiller les assembler le plus subtilement & dextrement qu'il vous sera possible. Puis tout bellement faisant mouuoir les soufflets pour faire en aller le plomb en fumée, vous aurez la patience de bien laisser esclaircir l'argent. A la fin duquel


vous voyant estre arriuez ne faulta tarder à leuer les aix pour tirer vostre argent, lequel vous fondrez pour le nettoier des cendres, ainsi que ie vous ay dit cy deuant. I'ay encores à vous dire comment il fault proceder à leuer la cendrée œuurée, laquelle il vous fault garder de mesler avec les cendres des aix qui souuentefois restent au dessus. Vous aduertissant qu'elles vous gasteroient toute vostre composition. Et si vous aduertis d'auoir en memoire qu'il ne vous faut iamais avec fer froid, charbon ou bois qui ne soyent embrasés toucher vostre baing: pource que vous aurez fort grande peine à le conduire afin:& en lieu de vous estre vtile il vous pourroit porter dommage.

*La façon de conduire le confrustagno en cuiure fin & maniable.*

*Chapitre 8.*

**V**ous ayant montré la pratique de conduire l'argent à sa dernière finesse & perfection, il me reste encores à vous dire comment vous trouuez en la fusion que vous auez faite des mines deux especes de metaux, qu'il faut conduire à leur fin, L'une est cuiure, & l'autre est le plôb. Je vous ay dit que l'un des metaux s'appelloit confrustagno, l'appellant ainsi en la façon d'Alemaigne, pour ne luy sçauoir plus propre ny meilleur vocable pour le vous monstrier. L'autre est ghetta, choses qu'on a iettées des cendres, lesquelles sont pleines de plomb & de cuiure. Et si par cas fortuit on les delaissoit ainsi, elles feroient corps inutiles & sans aucune perfection: Mais ie vous vueil dire comment l'on y doibt proceder pour le conduire en cuiure fin. Je vous ay desia dict que c'estoyent deux matieres metaliques. L'une est le confrustagno, & l'autre la ghetta, ayant toutes deux au premier aspect apparence des choses à demye bruslées. L'une a esté desia metal finy, & l'autre est en chemin de l'estre. Mais selon mon aduis, le confrustagno est plus prochain de sa pureté, pourautant qu'il a esté pour la puissance du feu reseiché, & d'un autre corps reformé. Or laissons le discours de telle chose, ce confrustagno se prend bien euaporé pour estre conduit en vne fournaise

fournaise, la bouche de laquelle sera faite des pierres qui ne viennēt point à briser ou à fondre. Et pource faire il la fault bien recuire avec charbon. Puis l'auoir reduite à vostre fantasie, fault faire à l'entour de la bouche vn cercle de pierres pour retenir les charbons, desquels vous emplirez vostre edifice. Et apres que le tout sera bien embrasé par la force du vent qui viendra des soufflets, vous irez-saisir vn vase pour mettre vostre matiere, lequel auoir bien remply, vous mettrez dans la fournaise, pour le faire fondre peu à peu. Vous prenant garde que le vent des soufflets soit porté droittement sur le metal: tellement que la pointe d'iceux vienne à frotter sur le bort sil est possible. Et encores que la matiere soit promptement fondue, comme ie vous ay dit, si veult elle estre longuement maintenue dans le feu, par l'aide duquel & de celle du vent, l'odeur du plomb qu'elle tient, vient à s'euaporer: & doit on souuent changer de charbon frais, le maniant & nettoyant avec vne cueillier de fer de toute loupe de terre. Et l'auoir ainsi accoustree, apperceuant que la fumée du plomb sen est du tout allée, vous ne fauldrez de la descourir pour veoir si elle est claire, luyfante & fine.



Et si vous n'en pouuez auoir autre assurance, vous en tirerez avec boys & fer, pour en faire l'essay avec l'œil & marteau. Et l'ayant bien reduite à vostre volonté, vous l'arrouferez avec quelque peu d'eau. Au moyen dequoy vous la verrez couvrir subitement d'une peau froide. Et à l'heure vous prendrez vnēs

forches de fer pour ancer & mettre hors ce qui est dedás le vase, ne faisant autrement que ie vous ay monsté, tirant les loupes hors du fourneau. Et en ceste façon vous recouurez cuiure tresfin & beau au possible, appellé cuiure pelous, lequel vient cōmunement d'Alemaigne, qui est bon à faire bronze pour artillerie, ou pour faire figures, ou metal pour faire cloches.

*La maniere de fondre la ghetta, pour estre reduite en plomb fin.*

*Chap. 9.*

**Q**OMBIEN qu'il ne soit grandement necessaire à ceux qui trauaillent aux mines de retourner la ghetta en plomb, pource qu'ils s'en seruent au lieu de mine de plomb. Et d'autant plus qu'elle tient d'or ou d'argent, tant plus ils en vsent volontiers, pour autant que la cendrée ne se pourroit si nettement faire, que quelque peu ne vienne à y demeurer. Mais qui youldra conduire son labour à fin, & en recouurer sa despence, il pourra encores recouurer le plomb, en prenant la ghetta & en la battant, & si c'estoient cendres, les auoir battues, il les fault encores lauer : & les auoir baignées avec eau sallée & reduites en paste, vous en ferez petits pains, lesquels vous mettez seicher, pour puis apres les faire passer dedans le fourneau, afin que tout le plomb qui en viendra à sortir, & les loupes soient reduites en vn vase, qui sera posé au pied du fourneau pour le recevoir, là ou tout le plomb sera esté refroidy, & reduit en vn pain ou en plusieurs, ainsi qu'il sera plus agreable aux maistres. Vous aduertissant qu'on en doit faire essay, à cause qu'il n'esté à la compagnie de l'argent, pour veoir s'il en tiendrait assez pour meriter la despence qu'il faudroit faire pour l'en tirer, pour ne perdre le plus vtile par ignorance ou paresse. Je vous ay fait veoir la separation de ces trois metaux, parquoy il reste encores à tirer l'or de l'argent. Ce que ie vous vueil monstrier au liure suyuant: car pour le present ie vous vueil parler du charbon, chose qui est à tout exercice de feu grandement necessaire.

*De la*



*De la force & difference du charbon, & par quel moyen on s'accoustume de le faire.*


*Chapitre 10.*

**V**ous ayant recité plusieurs diuersitez de fusions & feux, ie suis content de vous amener la façon de faire quantité de charbon, sans lequel il seroit mal-aisé aux ouuriers de pouuoir mettre fin à leur œuvre. Parquoy il me semble chose necessaire de vous en dire quelque chose: tant pour la commodité de tels exercices, que pourautant qu'on en trouue plus aisement que du boys & en plus grande quantité. Car les mines viendront plustost à manquer aux hommes que le charbon ne viendra à defaillir: pourautant que nature nous produit des pierres en plusieurs lieux qui ont le mesme effect que le charbon: & avec lesquelles ceux de ce pays fondent le fer, & autres metaux, & si en cuisent les autres pierres pour faire chaulx à mettre aux murailles. Le charbon est vne des premieres matieres, qui est plus duisante aux fusions, & mesmement est requis qu'il soit de bonne qualité. Et pour ceste raison il faut choisir & eslire boys pour le faire: & si fault entendre le moyen pour y atteindre. Pour raison dequoy ie vous feray entendre tous les deux. Et premierement ie vous diray les differences des boys, desquels tout praticiẽ doit auoir la congnoissance: pource que toutes les operations qui ont disette & necessité de feu long, vis, & puissant, il faut qu'elles soyent aidées du charbon fait de boys vert & puissant, & non pas de celui qui est sec & legier, pource qu'il ne pourroit seruir. Car il faut auoir charbon fort qui vient à sortir du chesne, de l'orme, & autres semblables arbres grans & durs. Vous assurant que tout charbon, n'est autre chose que propre substance de boys chaude & seiche, conuertie par la vertu de celle introduction & entrée que le feu à faite en luy deseichant la plus grande partie de celle humidité aerée & vinctueuse, que tout boys est coustumier de tenir en soy, encores qu'il soit esté long temps gardé, coupé & réduit en lieu essuit au soleil, ou en vn four à la chaleur du feu pour le rendre sec. Iamais l'humeur tant qu'il est boys, n'est transmué en cendre, & est proprement celui qui vient à rendre flamme au

milieu du feu. De mesme façon est la propre vertu des substances elementaires, qui ont produit ce boys, qui est feu naturel, lequel augmenté de l'accidental vient à estre deuoré & conuertý en foy sil attent. Mais l'humidité qui est meslée vient à fuir & se conuertir en fumée, si que la partie de la terre vient à rester en cendre. Ce que ie vous ay recité du boys ie vous dy du charbon : lequel encores qu'il ne rende flammes ainsi viues, si ne delaisse-il à rendre le feu plus vehement que ne fait le boys, à cause qu'il est plus exempt d'humidité. Vous aduertissant que là ou les soufflets sont mis en œuure aux fusions, le boys sans compagnie de charbon ne sert aucunement. Et si fault encores eslire le boys & charbon à propos selon la matiere que l'ouurier a de poursuyure. Car si l'on failloit à y proceder en ceste façon, ils ne sçauroyent paruenir à la fin de leur entreprinse. Ioint aussi qu'ils viendront à se augmenter en trauail & despence. Et de ce ie vous en vueil donner exemple, prenant le cas comme si vous vouliez fondre or, argent, cuire, ou autre metal, & vous prinssiez charbon du boys duquel on fait balets, vostre trauail seroit employé en vain. Et semblablement si vous vouliez faire bouillir vn fer aucunement gros avec charbon de saulx, ou autre semblables. Il s'en brusleroit plus de deux chartées sans auoir force de le faire bouillir. Et generally ie vous dy que celuy du chasteignier ou d'arbre conforme à sa nature, ne peult seruir aux orfeures. Et de ceste heure parlant generally ie vous dy que ce n'est chose bonne de faire charbon de tout arbre, encores qu'on ne doit auoir ce respect en lieu ou lon a indigence: Car celuy qui est forcé de poursuyure son œuure, doit prendre de celuy qu'il peult recouurer. Vous aduertissant que tout arbre qui est de bonne nature ne fait pas tousiours bon charbon, & cela procede aucunesfois de ne garder l'ordre à le faire cuire: car lon voit en iceluy difference grande: & mesmement si le boys est ieune ou vieil: fendu ou plain de neufs: si la coupe est viue, & si le charbon est fait de boys vert ou sec. Encores y a il de grande difference quand il se fait des arbres qui naissent sur les haultes montaignes, là ou le soleil habite tout le iour, qui est la cause qu'ils sont enuironnez de plus de pouuoir que  
ceux

ceux qui naissent aux vallées ou aux lieux bas & pleins d'humidité, Mais pour ceux qui ont nécessité de charbon, n'est tousiours obseruée ceste façon d'eslire & choisir le boys. Et mesmement quand la nécessité s'y presente, à cause de l'indigéce qu'on a à recouurer des arbres pour faire charbon, auquel ie vueil faire entrée, & vous dire comment il est nécessaire qu'il en soit : pource que c'est la propre ame de plusieurs exercices de feu. Et si c'est chose tresnotoire que c'est boys brulé, ayant ceste propriété entre les autres, qu'il est de fort longue durée, & disposé de se maintenir bon, non seulement durât plusieurs années, ains à perpetuité s'il est reduit, logé & mis en lieu sec. Et encorès se garde-il en lieu humide, mais il n'est puis apres bon pour estre mis en œuvre à l'exercice du feu, à cause de l'humidité qu'il tire à soy. Car il s'abreuue d'eau, tout ainsi que fait vne esponge. Les architecteurs sont en coustume aucunesfois, à cause de sa longue durée, de le mettre en aucuns fondemens des edifices, & aucuns autres le mettent pour signe aux confins, bornes, & limites de leurs possessions. Et ay en memoire d'en auoir veu tirer d'un certain edifice ruiné, qu'on estimoit auoir esté sous terre plus de quatre cens ans, ayant encorès la forme de charbon, estant aussi peu corrompu comme s'il luy feust esté mis le iour precedent. Chose certainemēt qui me rend affectiōné à vous enseigner les moyēs de le faire ainsi durable, qui sont deux en nombre. Le premier, qui est le meilleur de tous, s'appelle paillier. Et pour le faire il faut eslire un lieu commode au boys, qui sera taillé pour cest effet vny & plein, qui faudra mettre au milieu de quatre picquōs ou de trois, posez en triangle, faisant de circuit un peu moins de demie brasse. Et à l'entour d'iceluy on viendra à poser le boys, le regeant cercle pour cercle, & en couurant le picquons ou perches en façon de pyramide, ou d'un pallier : tout ainsi qu'on le nomme. Et pour en faire bon charbon, il seroit de nécessité que le boys fust esté seiché, pour le moins six mois ou un an. Et faudra mettre de ce boys vne piece sur l'autre, avec quelque peu d'interualle, iusques à ce que vous serez paruenus à la largeur & hauteur de vostre charbonniere au milieu de laquelle entre les perches n'aura

chose quelconque. Et apres que vous aurez ainsi composé ceste charbonniere, vous la couvrirez des fueilles, au dessus desquelles vous poserez encores de la terre, luy en faisant couuercle de l'espeſſeur d'un pied, tellement clos & fermé que rien ne puisse respirer, sinon les trous qui seront dix ou douze, delaissez sur le coupeau de la charbonniere, pour donner issue à la fumée & à l'humidité, qui est contenue dedans le boys & la terre. Et auoir le tout ainsi accoustré, vous ietterez au fond par vne entrée, que vous aurez laissée entre les perches, quantité de feu, & aux coupeaux vous mettrerez certain nombre de petits rameaux, courrant depuis le pied iusques au coupeau des fueilles seiches, & semblables rameaux, afin que le feu se prenne plus facilement: sans mettre en oubly de fermer avec terre l'entrée, par laquelle vous auez ietté le feu sans rien laisser d'ouuert, fors les petis trous, & procedant peu à peu en ceste façon, dans six ou huit iours, toute la charbonniere se rendra embrasée. Et alors qu'on aperceura que la fumée ne sort plus par les issues & pertuis, il sera à coniecturer que la charbonniere est cuite. Et à l'heure avec terre, faudra fermer tous les conduits, tellement que chose quelconque n'aye pouoir de respirer, afin que le feu qui est au dedans n'ait aucun air, ne viène à estre suffoqué & estaint. Si q̄ vostre charbón restera composé sans auoir delaisſé aucune cédre ou humidité. Et si vous n'aez la patiēce de le laisser refroidir, vo<sup>9</sup> en pourrez faire tirer, faisant leuer vne bande de la terre, & vous le trouuerez du tout esteint.



Encores



Encores peult on faire le charbon en autre façon, faisant en terre vne fosse large d'une brasse & demye, & profonde d'autant, l'emplissant d'esclas & pieces de chasténier ou d'autre boys, delaisant toutesfois au milieu vne vuidange, depuis la sommiré iusques au centre pour y ietter le feu. Et ayant le tout couuert en la propre façō de l'autre grande charbonniere, & procedé à dōner feu & à l'eteindre, en la propre maniere le fault delaisser, mais nō pas si longuement cōme celuy du paillier, Car causant le peu de quantité il sera cuit dedans huit ou dix heures. Mais il n'est aucunement bon pour les fusions, ne seroit, encores qu'il fust fait de boys fort singulierement bon: sinon qu'on vinst à l'allumer avec soufflets puissans. Et ne sert ce charbō fors aux orfeures. Si est-ce qu'il maintiēt lōguemēt son feu. Cōcluant que le charbon qu'on doit appeller bō, veult estre fait de bō boys sec biē cuit, sans estre recuit, à cause qu'il deuiendroit petit & debile. Et s'il est cuit par raison il sera gros & fort, & le faisant choquer l'un avec l'autre, il ne faudra à resonner cōme vn voirre. Parquoy celuy qui le veult mettre en œuvre doit auoir esgard à toutes ces choses sās oublier s'il en veult estre bien seruy de le faire mettre en lieu qui soit couuert, afin qu'il ne viēne à prédre l'humidité de l'air ny de l'eau qui en tombe. Car le mettant puis apres au feu il deuient venteux, se rompt & pert quasi en petites scintilles, cōme l'expériēce se presente iournellement au deuant de noz yeulx.



PROHEME DV QVATRIEME  
LIVRE DE LA PIROTECHNIE:

DE SEPARER L'OR AVEC L'AR-


gent: & comme il doit estre conduit  
à sa derniere perfection.


**L**E vous ay demonstté le mieux qu'il m'à esté possible, comment les mines doiuent estre conduittes: Et semblablement comment les metaux sont parez & reduits au dernier terme de leur perfection, par le moyen des fusions & autres artifices du feu, excepté l'or, lequel demeure incorporé en l'argent: pource que la procedure qu'on vse enuers les autres ne sert à cest effet. Et encores qu'il le peüst faire, ce ne seroit sans penible trauail & sans grand dommage d'iceluy. Parquoy il est necessaire (voulant le tirer des liens de l'interieure substance de l'argent) y proceder par vn autre art industrieusement: car il demeure tout ainsi en luy comme faict l'ame dedans le corps des viuans. Si est-ce qu'il ne vous fault seruir en iceluy de la vigueur du feu, comme aux autres œuures, ains de substance tirée d'une composition de deux matieres puissantes, reduites en semblance d'eau par force de feu. Liqueur fort emerueillable à cause de ses grands effects & vertus. Et ce faict par artifice avec distillation, ayant propriété forte & puissante de reduire en soy l'argent, & tout autre metal excepté l'or, qu'on mettra en elle sans auoir autre apparence que d'eau pure. Chose certainement ingenieuse, & de laquelle on reste grandement obligé à celuy qui en a esté inuenteur. En icelle vous mettrez l'argent qui tient de l'or, & subitement le verrez combattre, tellement que ceste eau viendra à le deuorer & consommer, si que n'y aura autre apparence que d'eau. Et tout cela se reduit en bien peu d'espace, & avec peu d'aide de la chaleur du feu. Et l'or qui estoit parmy l'argent sera entierement au fond, comme sable, si qu'auoir ostée l'eau vous viendrez à recouurer ce que l'argēt en aura rendu, sans y faire aucune perte: & encores vous rendra-elle l'argent à vostre volonté: combien que vous le iugiez du tout estre cōsommé & gasté. Au  
moyen

moyen dequoy ie ne vueil faillir à vous monstrier l'ordre d'un art tant singulier pour le congnoistre, utile & profitable à celuy qui en sçait bien user, & poursuyure ce que j'ay commencé. Je vous vueil premierement declarer la façon de faire telle eau: Et comment il la fault mettre en œuvre, sans oublier de vous aduertir des plus grands inconueniens, qui vous pourroient succeder en chemin: Et semblablement comment se doiuent faire les essais de l'or: & generally toute autre pratique ordinaire, laquelle peult ayder par art à donner perfection à l'or, le cimentant & reduisant en sa vraye & propre couleur.


*La façon de faire l'eau forte commune pour departir.*

*Chapitre. I.*

 E L V Y qui se veult trauailler à faire l'eau, qui du vulgaire est appellée eau forte & commune à departir l'or & l'argent, se doit trauailler à se prouueoir de fioles & alambics pour receuoir & y mettre la quantité de matiere que vous voudrez. Puis apres faire vn fourneau long & si suffisamment large qu'on y puisse mettre trois ou quatre paires de fioles, ou bien autant comme on voudra. Mais ayant à faire telle chose par art, pour plus diligenter & hastier l'œuvre, vous pourrez faire dresser plusieurs fourneaux. Car mettant plus de trois ou quatre paires de fioles en vn, seroit trop: le fond d'icelles par dehors sera couuert de la terre, de laquelle on fait les pots, & y adioutera on vn bort pour bien fermer le tout, qui sera soustenu par vne verge de fer, mise à trauers du fourneau pour plus rendre assuré le lieu sur les deux coins, duquel & au milieu seront faittes petites bresches en façon de fenestre pour donner commodité à la fumée de pouuoir sortir hors du fourneau. La figure duquel ie vous ay fait icy tirer. Et fault que vous ayez vne quantité de ces fioles de voirre bien faittes au possible, toutes d'une grandeur, sans qu'elles soient couuertes de vessie: cas elles seroient perilleuses & peu seures. Et les faudra couurir iusques à trois doigts sur le col, & avec terre seiche, laquelle sera seichée, ayant respect & soing de n'y laisser aucunes fentes. Et pour plus en auoir d'assurance on choisy d'une terre maigre.



Et apres on en faict composition avec lisieres de drap de layne, en y adioustant la quatriesme partie de la fiente d'asne ou cheual, ou d'autre animal, prouueu qu'elle fust seiche: & ces choses meslées & incorporées, fauldra battre avec vne verge de fer ceste composition, que les alchumistes appellent lutum sapien-tiæ, avec laquelle on fortifie & couure on le cul des fioles qu'on veult mettre en œuvre. Il en y a aucuns qui luy adioutent ruilles brisées & cisailles de fer: & pour les seicher ils font faire vn bâc, au quel ils font faire quantité de trous, là ou ils mettent & plantent les fioles par le col, puis toutes ensemble les mettent au soleil, ou en quelque lieu chault pour estre seichées: & apres qu'on les aperceura estre fermes, vous en prédrez le nombre, lequel vous voulez mettre en œuvre.





Puis apres faudra prendre vne partie de sel-nitre bien rafiné, & autant d'alun de roche bien laué: & avec iceux vous mettrez en composition la huitiesme partie de sable, chaulx, ou tuilles reduits en paste: & de celle composition remplirez vos fioles iusques à quatre doigts pres du lieu que vous auez couuert de terre. Et apres les mettez aux fourneaux en leurs lieux. Et faictes mettre des cendres detrempées la largeur de deux doigts entre le cul des fioles, & le chapeau, que vous auez posé pour couvrir & boucher l'entrée des fioles, lesquelles vous ferez couvrir desdittes cendres iusques au col. Puis à la chacune presenterez vn alembic, sans oublier de faire vn cercle à l'entour du col de la fiole avec vn peu de cendres meslées avec glaire d'œuf, afin que le tout puisse estre vny & serré. Et le semblable vous mettrez au nez de l'alembic, vous prenant garde que la bouche d'iceluy qui doit receuoir la matiere, soit bien fermée. Et apres recouurez vn fuseau, pour avec la pointe duquel, pouuoir tirer & euaporer ainsi qu'il sera de besoing. Puis auoir posées les bandes de drap sur les fentes, afin que rien ne vienne a respirer, ne faudrez à donner feu au fourneau, y mettant charbon & boys tout bellement, afin que les matieres ayent pouuoir de s'echauffer. Et vous doit suffire si dans six heures la matiere commence à se conuertir en liqueur. Et alors vous ne faudrez à augmenter boys & charbon, durant autre six heures, continuant d'augmenter la flamme de six en six heures, iusques à ce que vous aperceurez sortir l'eau & les flammes, qui vous donneront indice de vostre œuvre: lors qu'elles commenceront à atteindre & couvrir les alambics d'une fumée iaine, à l'heure vous augmēterez le feu, & avec boys sec qui rende bonne flamme, continuerez à luy chauffer le dos l'espace de six heures. Si que par la vehemence & force de ce feu, viendrez à faire sortir tout interieur & puissant esprit. Ce que vous connoistrez auoir fait, quand au dessus des alambics, ne paroistra plus aucune teinture de fumosité: & que luy & celuy qui doit receuoir la matiere, commenceront à se refroidir. Mais encores que tous ces signes se presentent à vous, vous ne delaißerez à continuer le feu par l'espace d'une heure, mettant au dessus de la

fiole (qui doit receuoir la matiere) vne piece de linge mouillé en eau froide, afin que les esprits vagabons tenans de l'air, allans par le corps de celuy qui reçoit, sentant l'humidité & froideur, viennent à se laisser tomber dans l'eau, laquelle sans eux resteroit sans vigueur & vertu. Et à l'heure que vous sentirez que les fioles & autres instrumens appropriez à cela, seront faciles à manier, vous arroseriez avec eau commune toutes les iointures des fioles, & du vase qui doit receuoir la matiere, lequel vous deuellerez. Puis l'ayant mis hors de l'alembic, le mieux fermé qu'il vous sera possible, le poserez dans vn bassin plain d'eau froide, afin de sommerger les esprits susdits, qui se pourroient estre arrestez à l'entour de ce vase, lequel vo<sup>9</sup> laisserez reposer trois ou quatre iours: puis mettrez toute l'eau des vases qui auront receu la matiere en vn ou deux pour la peser. Mais souhaitrant qu'elle soit bonne, & qu'elle ait pouuoir de bien ouurer, il vous sera necessaire de mettre au dedans vn demy denier d'argent fin. Et pource faire il faut prendre de ladite eau en vne petite fiole d'une liure ou deux, tout ainsi qu'il vous plaira le mieux, & mettre au dedans tout le poix de l'argent que vous aurez batu, en la quantité que peut porter l'eau que vous auez faitte, laquelle viendra promptement à deuenir trouble & à resentir sa vertu, apres que vous aurez mis l'argent dedans. Et encores que vous vinsiez à la delaisser en ceste façon, si ne laissera-elle à faire l'effet de son operation. Mais elle le fera beaucoup plus promptement & mieux en la mettant dessus les cendres chaudes, là ou en bien peu d'espace, vous pourrez voir que l'argent viendra totalement à se resouldre en eau. Et estre ainsi conuertty en eau, apres l'auoir mise reposer quelque peu, vous verrez au fond vne blancheur espesse, laquelle auoir meslée, & l'eau faite claire avec ceste substance d'argent, la viendrez à distiller tout bellement dans le vase, auquel est toute l'eau forte: laquelle vous verrez alterer tout incontinent: & se iournant quelque peu, apperceurez aller au fond vne matiere grosse & blanche, tout ainsi que la premiere, laquelle auoir esté reposée & deuenue claire, vous vuiderez dedans vn autre vase tout bellement, auquel vous ferez bien fermer la bouche, afin qu'il ne puisse aucunement

cunement respirer. Vous aduertissant que c'est l'eau forte qui est disposée à departir, & laquelle sans ceste purgation estoit imperfecte : & ceste blancheur semblable à chaulx qui sera demeurée, vous ferez mettre à part dedans vne autre vase de voirre. Car ie vous enseigneray en autre lieu le moyen de retirer l'argent que vous auez employé pour la purgation de la susdite eau. Aucuns prennent plaisir d'adiouter à la composition de cest eau du vitriol. Chose qui ne m'est agreable. Autres y mettent de l'arsenic, disant qu'il peut tirer hors de l'eau les esprits des autres matieres. D'autres se trouuent qui n'y boutent aucun alun, ne mettent sable ne autre chose en compaignie. Plusieurs autres ne se vueillent trauailler de receuoir l'eau de la distillatiō, ains en change d'icelle, prēnent autant d'eau de pluye, comme ils pensent pouuoir tirer de telle matiere. Puis à discretion pour la chacune liure mettent du sel-nitre. Et aperceuant que les esprits commencent à sortir, ils se trauaillent de bien fermer toutes les fentes & iointures avec terre, tellement qu'ils les forcēt à se summerger en l'eau froide. Les alchumistes font par leur resolution de plusieurs sortes d'eaux fortes, en y adioustant sublimé, & autres matieres corrosiues à leurs opinions. Concluant les esprits de telle matiere, estre les choses qui operent. Et certainement i'en ay veu mettre en œuvre entre eux de si puissantes, que non seulement elles auoyent pouuoir de resouldre l'or & l'argent: ains croy pour certain qu'elles auoyent pouuoir de calciner les diamans. Encores ie vous vueil dire comment toutes les eaux peu fortes, peuuent estre accoustrées, leur faisant receuoir les esprits des matieres recentes, dedans le receptoire de l'alambic. Car elles en cest affaire sont beaucoup meilleures, & avec plus grand gain, elles se peuuent faire. Vray est-il que les eaux peu fortes, ont demonstrence d'auoir longuement trauaillé, mais si elles n'ont perdu totalement leur esprit, quelque peu de vigueur & force leur fait compaignie. Or toutes les eaux fortes à intention de departir l'or avec l'argēt, elles ont toutes besoing d'estre purgées de la crasse & fece qu'elles ont, par le moyen de l'argent, si vous voulez parfaitement departir vostre matiere.

**V**Ous ayant monsté la façon de faire l'eau forte, ie prés maintenant la volonté (auant que de vous enseigner à departir) de vous monstrier de faire essay d'un argent tenant quantité d'or: afin que vous alliez poursuyuant vostre œuure les yeux ouuerts, qui sera cause que vous congnoistrez vostre erreur, quand vous serez tumbés en faulte: ou bien de vous apercevoir si un autre vous aura trôpé & deceu. Et pour en auoir congnoissance, il vous est de necessité sçauoir combien pesant d'or doit auoir au lingot d'argent. Pource que si vous auez à le rendre à autrui, ou que le voulussiez achepter, vous puissiez auoir congnoissance du gain ou de la perte. Car y proceder autrement, vous iriez parmy l'œuure tout ainsi qu'un auetgle. Premieremēt il fault presupposer que vostre argent soit fin. Et pour d'iceluy auoir congnoissance, vous ne faudrez à l'essayer par voye de coupelle ou de cendrée. Et en auoir prins & couppé, avec un echampre, au deux bouts & au milieu, vous ne faudrez à remettre le tout en un creseul neuf, s'il vous semble bon de le fondre, ou bien en une coupelle, accompagné d'un peu de plomb, pour le reduire à plus grande finesse. Mais il fault premierement auoir pesé, & en faire tout quand vous le mettrez hors du creseul, ou de la coupelle, pour voir si seroit decallé aucunement. Car si l'argent est fin, il doit retourner à peu pres de son premier estat. Et si par cas fortuit vous le trouuez par trop decallé, vous aurez encores recours au poix pour en sçauoir la difference. Et pour ce faire il le vous fault subtiliser avec le marteau sur l'enclume, afin qu'on le puisse mieux cisailier pour estre pesé. Tellemēt que par ce moyé plus facilement la raison d'arithmetique sera faite iuste: Pour à quoy paruenir il fault prédre dudit argent un denier, & un huitiesme grain. Car le tout sera conuertý en vingt quatre grains & un huitiesme: pource que vostre fondement doit estre fait tant seulement sur vingt quatre grains, ainsi nommez comme sont les caratz de l'or, quand il est conduit à sa derniere pureté & finesse.

Puis



Puis apres vous prendrez vne petite fiole tenant vne pinte & demie, laquelle vous remplirez à moitié ou peu moins de vostre eau forte, y mettant la petite piece d'argent que vous aurez pesée. Puis la poserez sur les cendres chaudes, ou dessus vne quantité de charbons embrasés. Au moyen dequoy vous verrez promptement bouillir l'eau faisant transformer l'argent en elle, & l'or vous le verrez descendre au fond, tout ainsi que sable noir. Mais vous aurez la patience iusques à ce que l'eau bouillante montre auoir apparence de clarté: Et que à l'entour du col de la fiole viennent à se montrer fumées si iaunes qu'on les puisse iuger totalement rousses, signe certainemēt que l'eau n'a plus pouoir de passer outre. Au moyen dequoy vous osteriez la fiole, & l'auoir laissée refroidir, n'aperceurez autre chose que l'eau toute verte: & au fond le sable noir que ie vous ay dit. Alors vous mettez hors de la fiole l'eau tout bellement, tellemēt que l'or qui est au dedans ne s'en vienne à sortir par aucun mouuement. Puis derechef prendrez autant d'eau forte pour departir, & la mettrez dedans la fiole, la faisant rebouillir sur les cēdres chaudes, iusques à ce que vous verrez deuenir iaune le demeurant de l'or, qui auparavant sembloit estre terre noire. Et en apres vous tirerez semblablement cest eau, laquelle vous mettrez à part, à cause qu'elle est bonne pour departir, comme ie vous feray entendre cy apres: Car pour le present ie vous vueil aduertir qu'il vous fault ietter eau commune aucunement chaude sur la terre d'or, qui est dedās la fiole, en continuant par trois ou quatre fois iusques à ce que l'eau en viendra à sortir, sans auoir aucune apparence ny couleur d'eau forte. Et apres vous y mettrez si grāde abōdance d'eau claire, qu'en renuersant la fiole, l'or viendra à tomber tout à vn coup en vn cul de fiole, ou d'un autre vase, & l'ayant conduit en tel lieu ne fauldrez à le releuer. Puis l'auoir seiché le mettrez sur les cendres chaudes dans vn creseul ou cul de fiole, si bien accoustré & couuert qu'on en puisse vider toute l'humidité & l'echauffer, tellement qu'il vienne à reprendre sa couleur iaune, de sorte qu'il ny aye rien à redire. Et auoir le tout ainsi reduit, vous prédrez vos petites balances d'essay pour le peser. Au moyen dequoy vous

pourrez sçauoir la pesanteur de l'or que vous auez tiré. Et le semblable, gardât tel ordre, vous ferez de toute la quantité. Car ayant la congnoissance d'un denier, vous viendrez à entendre le semblable de l'once & de la liure.

*Moyen & propre pratique de separer l'or de l'argent en quantité avec eau forte. Chapitre. 3.*



PREs vous auoir monstré le moyen d'essayer vne quantité d'argent tenant or, ie me fusse bien passé de me trauailler pour vous enseigner à departir. Mais ie m'en suis voulu distraire pour vous garder de tomber en quelques accidens qui vous pourroyent porter dommage. Pour ausquels obuier, ie vous repliqueray de nouveau ( outre le moyen de reduire en corps l'argent seconde partie de tel art ) la pratique entierement. Et suyuant les aduertissemens, vous pourrez comprendre que cest art est subiet à plusieurs perils & dangiers: Et mesmement qu'il fault manier grans vases de voirre pleins d'eau & pesans, à cause de l'or & de l'argent qui est dedans, lesquels venant à se rompre ou à verser, pourroient rendre merueilleusement grand dommage. Parquoy vous deuez entēdre: que non seulement les effets extraordinaires, mais les ordinaires sans aduertissement, viendroient à vous faire perdre, par quelque subtilité, ou par le feu qui vient à rendre ses exalations: tellement qu'il en demeure vn peu en vn vase, & autant en vn autre, si que celuy qui n'est disert & expérimenté en reçoit honte & dommage. Et si par cas fortuit il luy fault rendre l'or à son maistre, & qu'il ne reuienne à l'essay premier, il restera chargé de son honneur, & dira on qu'il l'a desrobé. Pour aquoy remedier ie vous ay bien voulu faire ce discours auāt uant que d'entrer en pratique. Or vous est il necessité apres auoir composé voz euaes fortes, d'auoir toute la quantité de l'argent que voulez departir qu'il soit fort fin, pour le moyen de cendrée. Lequel vous mettrez dedans vne casse, ioignant laquelle vous ferez dresser les soufflets: ou bien mettrez l'argent en vn creseul de terre

de terre ou de fer, que vous porterez. Puis apres estre fondu dans vn fourneau, auant & aussi tost qu'il sera reduit en matiere fondue, vous ietterez dans vn coupon de boys ou de pierre, cest argent fondu, & l'auoir broyé quelque espace fort subtilement ne ferez faulte de le verser dans l'eau pour fuir trauail de l'aplatir avec le marteau. Et quand il sera esté mis en petites pieces & grains, vous les mettez dedans vn chauderon, estre seiché sur le feu. Et apres qu'il aura perdu son humidité, ayant vos fioles équipées, comme ie vous ay dit, en mettez en la chacune trois liures: sur lesquelles vous en ietterez neuf d'eau forte. Puis auoir mises les fioles sur les cendres chaudes, ferez le tout bouillir iusques à ce que l'argēt se soit totallemēt conuertty en eau. Et pour autant qu'elle se pourroit perdre, à cause des exalations, vous la pourrez mettre, (encores qu'elle ne sçauoit ietter hors les esprits qui importent grandement) sur l'alambic, pour estre puis apres coullée & passée dedans le vase qui la doit receuoir. Il y en a aucuns qui en font passer la moitié par l'alambic, pour aleger les fioles, & les rendre plus facile à manier. Autres sans mettre les fioles sur les cendres chaudes, les laissent reposer, tellemēt qu'en deux ou trois iours, on apperçoit la matiere qui vient à se resoudre. Vous prendrez iceluy des deux moyens, auquel vous aurez plus de fantasie. Mais celuy des cendres chaudes me satisfait le plus, car l'operation en est meilleure, & si vient à se resoudre plus promptement. L'ordre qu'il fault tenir est de laisser bouillir vostre eau iusques à ce que vous la voyez aucunement verte: Et que vous apperceurez sortir la fumée, ayant apparence de couleur verte & iaune: & encores que vous voyez diminuer le mouuement de l'eau, vous ne prendrez la hardiesse de vous haster iusques à ce qu'il n'y aura plus matiere, pour se resoudre, quel argent sera tout conuertty en eau, & l'or se sera allé rendre au fond de la fiole. A l'heure vous mettez hors des cendres la fiole: puis la reposerez en quelque lieu. Et apres qu'elle sera aucunement reposée, vous la viendrez à vider, ayant esgard toutesfois que l'or ne vienne à sortir par vostre negligence, puis viendrez à departir vostre eau egallement aux autres fioles. Car si vous y pro-

cediez autrement, les vnes seroient plustost deseichées que les autres. Si que vous seriez contrainct de chauffer quelque quantité d'eau forte, & par le bec de l'alambic, la mettre dedans la fiole qui en auroit necessité, afin qu'elle vinst à estre seichée au mesme temps des rutres. Vous aduertissant de pouuoir mettre aux lieux vuides que vous auez laissez aux fourneaux, fioles pleines de matieres nouvelles pour distiller & faire encores eau, Et le sable noir qui est demouré au fond des fioles, vous le mettrez dehors avec eau, le posant & faisant bouillir par l'espace d'une heure sur les cendres chaudes. Et apperceuant que ceste couleur noire se conuertit en iaune prenant couleur d'or, ne tarderez à mettre hors du fourneau & des cendres la fiole, hors de laquelle vous mettrez l'eau forte, laquelle vous y auez mise pour donner couleur, & la remettrez en la fiole, laquelle ie vous fais mettre à part pour estre gardée pour faire l'essay. Vous aduertissant que cest eau est bonne pour departir, mais elle ne peult plus seruir à donner couleur. Et comme vous auez veu desia faire, vous mettrez hors ceste sable noire, qui est au fond de la fiole avecques eau tie-de. Puis l'auoir reduit dans vn canal de voirre, & l'auoir laué & seiché le mettrez dans vn creseul, lequel vous poserez sur les charbons pour le faire seicher. Puis le mettrez au milieu de la braise, afin qu'il reprenne sa belle couleur: & l'auoir conduit & mené en ceste façon, le mettrez fondre dans vn creseul, auquel vous ietterez quelque peu de borraz. Et apres que le tout sera esté fondu, vous ne fauldrez à le ietter en verge: & par ce moyen vous retrouuerez tout vostre or. Les aucuns pour fuir travail, auoir faite la separation de l'eau, viennent à le lauer. Puis avec borraz sans luy donner couleur, se mettent à le fondre. Mais comme il se voit apertement, vous auez engaigé l'argent & exposé à la mercy d'un voirre fragile. Et encores l'auz fait cōuertir en eau, qui peult estre facillemēt repādue. Pour à quoy obuier il se fault travailler de le retourner en corps pour s'en pouuoir seruir. Et pource faire il est necessaire de separer par voye d'exalation, les parties subtiles des grosses & les faire tāt bouillir que toute liqueur s'estre absentée, l'argēt viēdra à tōber aux fōd de la fiole, là  
ou il



ou il deseichera & fera dur. Et pour attein- dre à ce que dessus, vous recouurerez l'eau, laquelle vous auiez mise au fourneau dâs les fioles. Et pourautant qu'elle est chargée d'argent, vous les mettrez ioignant les vases sur leurs alambics. Puis auoir bien fermé toutes les iointures, commencerez tout bellement à donner feu, y procedant en la mesme façõ qu'auiez fait, quand vous auez mis les esprits hors de l'eau. Vous aduertissant que de ceste pro- cedure viennent deux effects de grand importance, l'un desquels est recouurer l'argent, & l'autre est maintenir l'eau fort en sa pre- miere vertu, en luy conseruant les forces de ses esprits. Et se font ces deux choses par la vehemence du feu, lequel pour deseicher l'humidité leur doit estre donné quatre ou six heures, non pas tellement que la fiole & l'argent vinssent à fondre. Pour à quoy obuier vous mettrez le tout hors du feu. Et apres que vous sentirez que la fiole sera refroidie, vous ne faudrez à la rompre, pour mettre ce qui est dedans en vn creseul ou casse avec vn peu de sel nitre brisé ou bien de saumon noir ou borraz, avec lesquels vous fondrez vostre argent. Lequel par ce moyen sera rendu en son propre corps & en sa plus grande finesse, & semblablement les quatre metaulx qui estoient confus & meslez en la fusion de la mine du cuiure, vous les trouuerez separé en leurs finesesses. Pre- mierement le cuiure, puis apres l'argent, consequemment le plomb, & à ceste heure l'or: science certainement tresbelle, tres- utile & de grand esprit.

*Le moyen de retirer l'argent, & la bonne eau, de la purgation de  
l'eau forte. Chapitre 4.*

**L**E mieulx qu'il m'a esté possible ie me suis trauaillé à vous faire entendre & monst- rer la pratique ordinaire de departir avec l'eau forte. Parquoy auant que de passer plus outre, ie vous vueil enseigner le moyen qu'auiez à tenir pour vous retirer des pur- gatiõs calcineuses de cest eau, & encores retirer tout l'argẽt que vous y aurez mis. Pour raison dequoy ie vous feis mettre en vne

fiolle à part de cest eau, laquelle est par les maistres departeurs appelée eau & blâchiffemēt. Vous assurāt que ce n'est autre chose q purgatiō de fleumes d'eaux fortes blâches cōme chaulx, lesquelles n'estāt retirées de telle eau, les esprits des infusiōs materiales, cōme liez resteroyēt presque sās aucune force. Et encores qu'ils vinssent à operer par cas fortuit, les essays n'é pourroiēt estre faits parfaitemēt. Parquoy il est necessaire de venir à telle purgation. Mais pourāt q l'argent doibt estre recouuré par les maistres, il est besoing d'auoir quātité de fioles: & en prédrez le nōbre q penserez estre suffisant pour vostre matiere, de laquelle vous réplirez à demy les fioles, lesquelles doibuent auoir le collōg, & l'entrée de leurs bouches larges. Et apres q vous les aurez ainsi réplies, vous les irez loger en leurs lieux au fourneau pour distiller, mettāt tout à l'étour si vous estes en ceste voulūtē, les cédres: Et au dessus approprierez l'alābic & vase, gardant l'ordre, accoustumé, par ceux qui veulent distiller. Puis apres cōmencerez à donner le feu pour en faire sortir vne partie de l'eau, cōtinuant iusques à ce que l'alābic vienne à prendre couleur rousse causant la fumée qui en sortira. Et alors abandonnāt le feu porterez l'alambic reposer en quel que lieu: Et l'aperceuāt estre refroidy, viendrez à en tirer par distillatiō l'eau claire qui viēdra à sortir de la fiolle, sans prédre la hardiesse de la remuer, à cause que la bōne eau & claire sera toute au dessus séparée: vous assurāt en icelle estre tout vostre argēt. Pour raison dequoy vous la mettrez en vne autre fiolle retournant celle des blanchiffemens au fourneau, continuant en ceste façon tant que vous congnoistrez d'en pouuoir tirer eau. Puis à la fin l'auoir retournée au fourneau mise sur l'alambic, & bien fermé les iointures, ne faudrez à donner feu, tellement puissant pour en tirer tous les esprits, lesquels vous ferez rendre à l'eau qui a esté distillée la premiere, afin qu'elle deuienne vigoureuse & puissante. Et les feces qui resteront au fond des fioles, vous les mettrez au monceau ou seront esté reduittes les cendres, ciments, & autres choses tenant odeur d'argent ou d'or, que vous pourrez retirer avec la fusion du fourneau. Car il est impossible qu'elles ne tiennent quelque chose de ces deux metaux.

*Aduertissement qu'on doit auoir lors qu'on veut departir avec  
l'eau fort.*

*Chapitre 5.*

**A** Fin que vous soyez experimenter en toutes les parties de cest art, ie vous vueil noter douze especes d'aduertissemens toutes necessaires: afin q vous ayez pouuoir de remedier à ce qui vous pourroit succeder, & preueoir à ce que vous auez affaire, at-  
tendu que l'vtilité qu'on viét à tirer de cest art, ne gist en autre cho-  
se qu'à faire son oeuvre avec aduentage: & mettre telle diligence  
qu'on ne viène à perdre or, argent, ou autre substance de valeur.  
Car on ne scauroit perdre tât peu d'argët, ou or, que le pris n'en  
soit regretté. Et comme lon voit peu de quantité de ces deux, fait  
croire à l'vtilité, & augmenter la perte à la perte. Parquoy ne faul-  
drez à chercher de recouurer les matieres desquelles il vous fault  
seruir pour faire l'eau fort, & qui soyét de nature le plus que vous  
pourrez parfaite. Vous disant cecy pour raison que le sel-nitre est  
souuëtesfois plus debile & de plus mauuaise qualité q n'est l'alun.  
Pourquoy il est necessaire de l'auoir nō seulement reafiné & purgé  
de terre, ains de nature puissante cōme est celuy qui viét de leuât  
ou de Carthage, qui couste encore moins que ne fait le sel-nitre.  
Vousaduertissât qu'il vo<sup>o</sup> fault auoir vn bō nōbre de fioles, nō pas  
trop grâdes, mais toutesfois egales en grosseur, sās auoir aucunes  
vescies au fōd, ou au corps: car elles seroiét faciles à rōpre: pource  
q la grâde force & nature de l'eau viēdroyēt à les percer. Et pour  
ceste raison on fait quatre rancs de fioles. Le premier, pour y faire  
l'eau fort, le secōd, pour seicher les eaux, quād elles sont chargées  
d'argent, le tiers, pour retirer l'eau des calcinatiōs, le quatriesme  
ranc des fioles est cōme inutile. Car cōme perilleuses elles se refu-  
sent, ou gardēt pour serrer les blanchissemens ou faire autre serui-  
ce. Aduisiant celuy q veut suyure cest art qu'il ne mette en oubly  
de faire bōne munitiō de fioles, vases & alābics. Le troisieme ad-  
uertissemēt est de les biē fermer, & que la terre soit tellemēt bon-  
ne qu'elle ne se viène à fendre en la seichāt: & encores qu'elle ait  
pouuoir de resister au feu. Et pour la faire bōne, il la fault premie-  
remēt faire biē seicher. Puis l'auoir brisée la ferez passer, afin que  
aucune pierre ne viène à demeurer dedās. Puis l'auoir arrousée &

batue avec vne verge de fer, on l'accôpaignera de la mesme composition que ie vous ay dite, faisant mention de luto sapientiæ. La quatriesme est de couvrir avec ceste terre les culz des fioles, & les corps iusques à trois doigts pres du col, lequel sera mis dans vn banc persé, afin qu'elles se puissent seicher plus aisement.



La cinquieme est regarder que les fours soyent bien faits, & que les chapelles soyent surement faittes de terre qui resiste au feu pour supporter la pesanteur. Ioint aussi que les cendres, sur lesquelles les chapelles seront posées, soyent estendues subtilement: afin que les fioles puissent estre mieux assises pour prendre la chaleur.



La sixiesme, conduire le feu ainsi qu'il appartient: tant au commencement, au milieu, qu'à la fin, pource que c'est le principal acteur:



acteur: Vous aduertissant qu'il est necessaire de le scauoir accommoder. Car au commencement il le fault tellement moderer qu'on le puisse apres augmenter, afin d'en tirer les esprits materiaux: ou bien pour resecher l'argent departy, y procedant tellement pour la surté des fioles que la matiere ne vienne aucunement à se repandre. Et deuez auoir en memoire de regarder au col de la fiole, pour en oster ceste pointe de fuseau, que vous auez, mise entre le bec de l'alembic & la bouche du vase qui doit recevoir la matiere: & promptemét vous voirrez que le tout viédra à prendre son chemin au fond. Au moyé dequoy pour vous rendre plus assuré, vous viendrez à refermer avec la pointe du fuseau. La septiesme est de ne mettre iamais eau forte qui soit trop chaude dans vn vase de voirre qui soit froid. Ne semblablement eau froide en vase qui soit chault, pource que facilement ils se mettroiét en pieces. La huitiesme est de vous prouuoir d'un grand vase de voirre plain d'eau claire, ayant la bouche large pour y mettre toutes les laueures. Et ioignant iceluy en poserez vn autre plus portatif pour y mettre l'eau des fioles, qui par infortune viendroient à se rompre, & par ce moyen vous ne faudrez à trouuer vostre argent au fond sans faire autre perte que de l'eau forte. La neuuesme que vous getterez tout voirre ou autre chose, en laquelle argent aura esté mis, dans le monceau des cendres, ayât en memoire de ne mettre en ceste pratique voirre qui ayt esté autrefois mis en œuvre pour faire eau fort. Car encores que vous les eussiez bien laué, vous ne les scauriez priuer de ceste quantité d'eau mal purgée. La dixiesme est, que si par fortune aucune fiole se venoit à rompre: Et que pour faulte de bassin qui fust au dessous la matiere vint à se repandre dans les fours ou autre part, vous ne faudrez avec vn eschampre à leuer de la terre par tout ou elle aura touché: & l'auoir detrempée & pastée, ferez vn cendrier avec vn baing de plomb. Et apres l'auoir bien echaufé avec force charbon, vous ne tarderez à mettre peu à peu dedans ceste terre pastée: laquelle auoir esté affinée vous rendra tout l'argent que vous aurez peu recueillir. L'onzieme est que l'or & l'argent soit dans l'eau fort: l'un comme sable noir, & l'autre tant subtil qu'il est im-

possible à l'œil de le decouvrir. Je vous vueil aduertir de la quantité de l'or qui plusieurs fois va tournant dans l'eau, tellemēt que la force de l'eau en viēt à esleuer quelque petite partie. Et à l'heure vous ne mettez en oubly de retourner la fiole sur les cendres chaudes. Et apres qu'elle aura bouilly l'espace d'une demie heure, vous l'osterez pour la mettre en quelque lieu sur, pour estre refroidie. Et apres qu'elle aura esté reposée, vous apperceurez que vostre or est allé au fond. Et si vous le trouuez autrement, vous ferez retour à ce que qu'avez fait encores une fois suyuant l'ordre que ie vous ay dit de la manche. Et ne fault que les departeurs s'arrestēt si vient à leur faillir de leur or. Car l'eau ne faudra à leur rendre le demeurāt aux autres fournées. La douzième est, de se prendre garde que la fiole ou l'eau chargée fait residence, ne soit aucunement fondue. Car encores qu'elle fust bien couverte de terre, si n'auroit-elle aucun pouuoir de se bien seicher. Et l'arene & sable qui seroit dedans resteroit tousiours noire. Je vous vueil aduertir de vider la fiole: & puis l'auoir rincée d'eau cōmune, la getterez au lieu ou ont esté mises les autres laueures, & la fiole vous la mettrez au ranc des autres choses rompues. Or ay-ie encores à vous dire le moyē qu'il vous fault tenir pour congnoistre quand les fioles chargées sont vuides d'eau & d'esprit. Premièrement le chapeau de l'alambic vous en rend assez clair tesmoignage: pource qu'il viēt à perdre ses couleurs. Mais le voulant mieux certifier, il le fault leuer & ietter dans les estoupes qui aucune fois ne nous font congnoistre la verité. Parquoy pour plus d'assurance il le fault poser sur la pointe d'un baston, puis le mettrez le lōg de la bouche de l'alambic iusques au milieu. Vous assurant que le coton en sortira aucunemēt humide, vous priant de vouloir mettre ses aduertissemens avec les autres enseignemens que ie vous ay donné.

*Le moyen de separer l'or de l'argent par le moyen du soufre ou d'antimoine. Chap. 6.*

**V**ous avez peu comprendre la grande despēce qu'il faut estre faite, par ceux qui entreprennent à departir quantité d'argent

gent par l'aide de l'eau fort, pour à laquelle obuier certains alchimistes voulans fuir vn si penible trauail, ont trouué vne voye moins perilleuse & de moindre despence, si elle rédoit la substance de la matiere, aussi à point comme fait l'eau fort. Si est-ce que la voulant suyure elle ne vous trauaillera tant comme l'autre. Et pour y proceder, il faut auoir vn fourneau à vent pour fondre, tout quarré, posé dedans terre ou esleué en hault. Mais il est necessaire qu'il soit grand selon l'œuure que vous estes en volonté d'entreprendre. Puis faudra prendre vn creseul de terre, lequel vous remplirez iusques au bord de cest argent taillé en pieces qui rient de l'or. Et au dessus faudra mettre vne tuille de la grandeur du fond du creseul, lequel il faudra mettre au dessus des barres & droit au milieu du charbon, pour faire fondre l'argent qui est dedans. Et alors que vous aperceurez l'argent estre deuenue blanc, à cause de la chaleur, vous prendrez vn canon de soufre ou vne petite piece d'antimoine que vous mettrez dedans: & quand ces deux especes seront fondues, leuant la tuille vous ne ferez faute d'y en remettre, continuant iusques à ce que l'argent soit fondu & bien incorporé avec ces deux matieres, & alors vous y adiousterez vne demie once de cuiure, pour vne chacune liure d'argent que vous y aurez mise. Et apres que le tout sera bien fondu avec les molettes ou tenailles, vous mettrez hors vostre creseul: le tenant sur la braise, luy battrez le fond par deux ou trois fois, afin que l'or pour sa grauité & pesanteur vienne à tomber au fond du creseul, hors duquel vous viendrez à verser tout bellement l'argent fondu, que vous espuiserez iusques fort bien pres du fond: & aussi tost que vous aurez reduit l'argent en quelque chose à part, vous remettrez en son lieu le creseul, dans lequel vous mettrez encores d'argent. Puis apres du soufre ou d'antimoine, continuant & gardant le mesme ordre qu'avez fait au commencement, sans cesser à le refaire iusques à ce que tout l'argent soit passé en cuitte de soufre, ou d'antimoine, & que l'or soit au fond du creseul. Lequel pour estre mieux seiché du soufre, ou de l'antimoine, faudra mettre dans vne coupelle. Et aduenant qu'il ne se remist en sa belle couleur, & qu'il ne vous sem-

blast totalement net, vous le batterez & luy donnerez le ciment real vne ou deux fois, iusques à ce que vous l'aurez conduit au terme que vous souhaitez: & le semblable vous pourrez faire quand vous aurez desir de retirer vostre argent, faisant faire par le moyen d'un cendrier, & un bain de plomb, en y mettant tout l'argent corrompu, du soufre, de l'antimoine, ou du cuiure: & ne faldrez de l'afiner en la sorte que ie vous ay enseignée: & après l'auoir purgé du soufre & plomb, tournerez en faire essay, pour voir si au dedans seroit demeurée quelque substance, laquelle peult porter la despence, le tournant refaire: & si le tout succedoit ainsi que ie vous dy avec soufre & antimoine, releuerez le tout, continuant tant que l'œuvre le requerra, y adioustant tousiours du cuiure ou bas argent: pource que la nature du soufre & de l'antimoine, veut tousiours estre nourrie de quelque chose. Et ne trouuant matiere indigne & disposée à sa fantasie, s'atache à celle qui est rencontrée. Après que vous aurez trouué vostre argent estre purgé de l'or, vous le mettrez à la cendrée pour estre afiné. Vous aduertissant que le cuiure n'est mis fors pour sauuer & garder le soufre & l'antimoine, afin qu'il ne vint à consommer l'argent: ioint aussi qu'il donne occasion de mieux eschauffer le bain & de rendre la matiere plus subtile. Concluant que par ce moyē vous pouuez separer l'or d'avec l'argent, sans eau ne sans grand trauail.

*Le moyen de cimenter l'or, & de le reduire à son dernier point de pureté & finesse. Chap. 7.*

**L**E me suis trauaillé le mieux qu'il m'a esté possible de vous monstrier le moyen de conduire à la dernière finesse, les metaux de vos mines. Mais pourautāt qu'il ne se peult faire de l'or, se trouuāt en icelles, tout ainsi que des autres metaux, à cause qu'il n'est tousiours accōpagné avec argent fin, ne semblablement acousté en tel degré qu'il puisse estre conduit (sans faire autre chose) à l'eau fort. Parquoy les philosophes alchimistes, ont trouué avecques la force du feu vne mission de cer-



de certains mineraux atratifs, faisant effect miraculeux. Mais voulant abandonner tel discours, ie vous dy, y voulant proceder, qu'il vous faut faire vn fourneau à la semblance de celuy a vent & du costé ou se met l'eguille faudra poser deux fers gros & larges d'un doigt, qui tiendront en diametre tout le fond, & sera de haulteur d'une brasse & demie, ayant sur la partie de la bouche, par laquelle le feu doit estre mis, vne grille de fer qui tiendra le bois suspendu en l'air separé de la braise. Puis on fairsira vn creseul ou pot de terre, qui resiste au feu, de la grandeur que vous congnoistrez estre necessaire pour vostre besongne. Puis apres vous ne fauldrez à prendre tuilles vieilles, desquels vous ferez pouldre fort subtile. Et en y adioutant la quantité que vous congnoistrez estre necessaire, & vne troisieme partie de ce qui contient le tout du sel commun, pour estre l'un avec l'autre bien incorporé, ainsi qu'il appartient. Aucuns prennent fantaisie de mettre en ceste composition vne huitiesme partie de vitriol. Mais communement on y met autre chose que le thuille puluerisé & le sel. Et auoir apresté & battu l'or que voulez cimenter & reduit en lames subtiles comme papier, vous mettez au fond vn vase avec aucune quantité de la susdite composition de pouldre. Laquelle vous estendrez, & au dessus mettrez vn ranc pour la couvrir, de petites pieces de vostre or battu, qui aye esté premierement trempé en vin-aigre, ou en vrine, en laquelle ait esté resoult sel armoniac. Puis couvrirez cest argent des susdites pouldres, & en ceste façon continuerez de mettre vn lit d'or & vn autre de pouldre, iusques à ce que vostre vase soit du tout remply, ou bien que l'or vous vint à defaillir. Puis avec vne couuerte de tuille ou terre expressement faite, ayant le tout bouché & vestu avec lurum sapientiæ, mettrez vostre matiere à part pour estre seichée. Et apperceuant vostre vase reduit en l'equipage que vous soubaittez, vous ne fauldrez à le mettre au fourneau sur les deux fers, le couurant fort bien d'un tuille sans luy laisser que deux ou trois trous, afin que la fumée procedant des flammes ait commodité de pouuoir respirer. Et pour cōmencer on mettra feu tout bellemēt avec boys doux & subtil,

lequel on continuera d'augmenter durant vingt quatre heures, mais non pas si vehement que l'or & les matieres vinssent à se fondre. Car outre le peu d'auancement, le trauail, y seroit acreu & augmenté. Et vous doit suffire de le continuer tant que le vase fera rouge. Et alors qu'il viendra à perdre ceste couleur, vous le mettrez hors du feu. Et l'ayant descouuert, l'irez verser dans quelque lieu, ou soit posée vrine ou eau fraiche commune. Et apres qu'il sera tellement estaint qu'on le puisse manier, lauer & faire net, vous prendrez des susdites pieces d'or, & les parangonnant & frottant à la rouche, vous congnoistrez si vostre or reuiet au caras que vous auez desiré. Et succedant qu'il ne rencontraist, vous luy retournerez bailler vn autre ciment ou deux, avec les pouldres menues, suyuant le mesme ordre que ie vous ay monstre cy dessus. Et auoir conduit vostre or au point que vous desirez, avec vn peu de borraz le fondrez: puis le getterez en verge. Et en ceste façon vous aurez reduit vostre or à son dernier point de perfection & finesse, sans que sa couleur soit aucunement diminuée ne sa valeur semblablement, encores qu'il s'en faille le poix de l'argent ou cuiure, qui estoient premierement en sa compagnie, ne sans perdre aucun argent, pource qu'il reste dedans les pouldres qu'on met aux laueures, afin qu'on le puisse retirer, le fondant comme ie vous ay dit, & le passant au fourneau avec les cendres. Vous assurant que par ce moyen vous retirerez à peu pres tout l'argent qui estoit en l'or que vous auez cimenté.

PROHEME DV CINQVIESME  
LIVRE DE LA PIROTECHNIE,  
DES ALIAGES QVI SE  
font entre les metaux.



O v s auez desia peu veoir & congnoistre le trauail que i'ay prins pour vous monstres les moyens de conduire en leurs propres & purs corps tous les metaux. Lesquels si maintenāt ils ne pouuoient seruir aux operations humaines, tous les essaiz, despences & peines seroient inutiles & vaines. Parquoy il est necessaire que ie vous parle de toutes leurs operations, & selon que les œuures viendront à se presenter, ie vous enseigneray à bien disposer les metaux. Et pource qu'aucuns d'eux reduits à leur finesse & perfection, seruiroient mal aisement en certaines œuures, les doreurs, orfeures, & autres artisans voulans fuir despée, se cōtentēt beaucoup plus d'auoir en grande quātité de la chose qu'ils demandent, qu'ils ne font de sa perfectiō. Au moyē dequoy ils se delectent à mesler les metaux, comme l'or avec l'argent ou cuiure: l'argent avec le cuiure: & semblablement le cuiure avec l'estain ou plōb: & avec l'estain, pour gaster du tout sa nature, est accōpagné le plomb. Et le tout avec certaine proportiō de pois, & non à l'auēture: & s'appellent ses assemblemens par ceux qui font profession de cest estat, caracs en l'or, & en l'argēt aliages, qui en effect ne vueillent dire autre chose qu'un associement d'un metal avec l'autre. Et semblablement vn gastement de leur pureté & finesse, Mais voulant abandonner ce langage, ie vous vueil parler le plus brauement qu'il me sera possible en ce liure, comment l'or s'alie avec l'argent ou cuiure: puis apres vous declarer le semblable de l'argent avec le cuiure, comment vous pourrez voir.

*De l'aliage de l'or. Chap. I.*

**I**E vous ay dit en autre lieu qu'aliage ne veult dire autre chose, qu'un associement amiable d'un metal à autre. Mais il fault pre-

mierement considerer la fin qui vous meut à ce faire, si elle est pour augmenter la quantité, ou pour corruption. Puis apres fault prēdre ce que par nature a plus de conuenance avec ce que vous voulez alier, & avec la fusion luy en donner la portion que voudrez, ou qu'elle pourra supporter: afin qu'elle ne vienne point à fester totalement de sa premiere nature, comme fait l'eau mise dedans le vin: ou le blanc meslé avec grāde quantité de noir. Parquoy le tout se doit proportionner avec certaine raison de poix, afin que vostre œuvre puisse estre conduite à la perfection que vous desirez. Car qui va avec les yeulx fermez, n'est seulement en danger de choper ou trebucher, ains de tomber tout à plat. Pour à quoy obuier vous deuez premierement sçauoir que l'or ne s'alie avec autres metaux qu'avec l'argēt & cuiure, tellement que si vous voulez faire vn ouurage d'or, & que la despence vous soit fascheuse, ou que vous n'ayez la quantité de l'or, vous auez à conclure de combien de carracz, moins que parfaitement fin, vous voulez qu'il soit, ou en quelle quantité vous auez desir qu'il soit acreu: & pour ce faire vous peserez iustement l'or fin que vous auez, & de mesme façon l'accompagnerez d'argent ou de cuiure fin: & ayant le tout meslé ensemble viendrez à le fondre. Mais afin que ie vous donne mieulx à entendre ma conception, ie presuppose que vostre or soit tenant vingtquatre carracs, & que vous ayez en pēsée que toute la quātité soit diuisée en vingtquatre, pource que cest le dernier terme de la perfection de l'or. Orauenant que fust ainsi, vous en mettez vne partie proportionnée de vingtquatre, qui est la quantité du tout: en ayant osté de la vertu de sa finesse vn carac, & augmenté d'un autre en quantité. Et le semblable vous faudroit faire si vous en mettez deux, trois, quatre ou six, continuant iusques au terme de vostre periode & limite, vous auez tousiours or, selon la denomination d'icelle quantité & passant outre & qu'il y eust vnze partie d'argent, & treize d'or, il s'appelleroit argent à vnze qui tient d'or: & le semblable sera du cuiure, selon qu'il respondra à l'essay, & successiuement ainsi va procedant avec les autres metaux, specifiant l'or sous de nom de carracs par vingtquatre degrez, & l'argent



l'argent à douze d'aloy pour auoir congnoissance des termes & perfections des vns des autres.

*Comment falsie l'argent avec le cuiure. Chap. 2.*

**L**E mesme ordre que vous auez suyuy en aliant l'or, il vous fault tenir pour alier l'argent. Mais l'alilage d'iceluy est cuiure fin, lequel vient à diminuer & abesser la finesse de l'argent, tout ainsi que l'argent à l'or, & si vient à le multiplier en quantité tellement que si la moitié en est excédée, l'argent vient à perdre son nom, & s'appelle cuiure qui tient d'argent, tout ainsi comme ie vous ay dit de l'or, & selon mon iugement il se pourroit encores appeller argent à cinq, à quatre, & à trois. Mais telles denominations n'emportent aucunement en nostre effet: & suffit que vous proposiez que toute la quantité de vostre argent soit diuisée en douze parties: & si en le fondant vous mettez au dedans vne partie de cuiure, vous appellerez vostre argent à vnze d'aloy: & le semblable ferez en mettant deux à dix, à quatre huiet, continuant ceste denomination d'argent fin, tout ainsi comme vous auez fait à l'or, nōmant les poix du partiment de la liure d'or vingt quatre caracs, & de l'argent douze d'aloy.

*De l'alilage du cuiure. Chapitre 3.*

**L**E semblable façon on facoustume d'alier le cuiure, non pas pour le multiplier comme l'or ou l'argent, mais pour le corrompre & oster vne certaine visquosité naturelle, pour le respect de ceulx qui font profession de l'art de getter. Et pour ceste raison & effect il l'accompagne avec l'estain, & aucunes fois avec lettō. Vray est il que sa propre & vraye aloy est l'estain fin: non pas quand vous voulez faire oufrage suiet au marteau. Car pour c'est effect il est necessaire qu'il soit pur & sans aucune odeur, autrement il ne se pourroit reduire à subtilité ne durer au feu, ou faire vases. Mais quand il est acosté de leur compagnie, il change de nature & aspect, selon la proportion de l'estain qui luy est donné, & si change semblablement de nom, si que il est appellé brōze ou metal, à cause de l'estain qu'il tient. Dequoy on a facile congnoissance

à la blancheur. Ioint aussi qu'il est suiet à rompre comme voirre: & de doux il deuient dur: tellement que cest associement d'estain luy oste totalement sa premiere nature. Si que ceulx qui sçauent quelle chose est matiere composée, se font à croire qu'il soit engendré de nature au nombre des metaulx. Or afin que vous puissiez bien entendre ie vous aduertty qu'il s'en fait de plusieurs sortes, pour satisfaire à ceulx qui en font statues & figures, qui ne le vueillent tout ainsi comme ceux qui font l'artillerie, ou comme ceux qui font les cloches, mortiers, lauoirs, & autres semblables ouurages. Or pour le reduire en espee de bronze on met huit, neuf, dix, & iusques à douze liures d'estain en cét liures de cuiure. Et ceux qui en vueillét faire cloches y en mettét vingt trois, vingt quatre, vingt cinq, vingt six pour cét, à cause du son, ou selon qu'elles sont grandes, ou petites, ou selon qu'on leur veult donner le son pesant, ou haultain & clair, comme ie vous diray. Vous aduertissant qu'il vous fault ordonner l'aliage, selon que vous presupposerez vostre labeur. Et autre reigle ie ne vous sçau roye donner en cest affaire, sinon vous dire que vous auez à vser avec le poix de discretion selon vostre iugement & experience,

*De l'aliage du plomb & estain. Chap. 4.*

**L**E plomb & l'estain meslez ensemble fident l'un à l'autre par vne affinité naturelle qu'ils ont ensemble: tellement que quand ils sont meslez lon ne peut les congnoistre l'un avec l'autre qu'à bien grande difficulté, si on n'a passé l'essence de leur qualité. Et si aucun vient à les sçauoir, il aura premierement congnoissance de l'estain: à cause que outre sa durté & blancheur il rend vn certain odeur fort. Vous assurant qu'il est beaucoup meilleur qu'il n'est en son espee propre. Mais ie ne vueil passer plus outre. Je vous aduertty qu'il me suffit de vous auoir donné l'instruction de pouuoir congnoistre quand il sera pur ou meslé. Les marchans estrangiers disent qu'il se doit alier avec le plomb, & qu'il est meilleur à mettre en oeuvre quād il en tient quatre ou six liures pour cent, assurant qu'il est plus doux

doux au marteau & plus fluide coulant & net au ietter. Mais leur rapport ne m'est aucunement agreable : pource que ie voy celuy qui vient d'Angleterre excéder en beauté & bonté celuy qui vient de Venise. Et croy parfaitemēt qu'il soit meilleur, en tout ouurage estant pur que meslé. Si ce n'est pour l'aide du maistre, qui veult le plomb pour estain. Et trouue seulement qu'il sert à deux choses quād il est meslé. L'une est quand il veult soulder le cuiure: l'autre quād les maistres voirriers viennent à le calciner pour faire leurs voirres, & donner blāchissement à leurs vases. Vous assurant que ie tiens le plomb en tout autre ouurage de metal pour chose inutile, comme celuy qui ne s'accompagne d'autre metal que de l'estain.

PROHEME DV SIXIEME  
LIVRE DE LA PIROTECHNIE DE  
l'art de getter & mouler vniuersellement & particulieremēt.

**I**E croy certainement que ce que i'ay semé pourroit estre sans fruit, si ie ne me travailloye de vous declarer l'art de getter, qui est necessaire à plusieurs effets, & suis prouoqué à ce faire, à cause que ie vous ay monsté la pratique de congnoistre les matieres & lieux des metaux, de les fondre & reduire à leurs dernieres perfections, & finalement ie vous ay enseigné de les alier. Vous aduertissant que cest art & excercice de getter est peu congneu aux personnes, & mal aisement le peult faire celuy qui l'entreprend, si de ieunesse il n'a esté nourry dedans. Encores fault il qu'il soit de bon entendement accompagné d'un iugement fort grand. Pour raison dequoy cest art est fort estimée, outre qu'elle à grande proximité avec l'insculpture, les bras de laquelle sont le soustenement de sa vie. Et pour vous en descrire le tout, ie vous dy qu'au commencement, milieu & fin se trouuent tresgrands traualx d'esprit & de corps en ses operations. Mais pour auoir

en soy vne certaine attente de nouveauté, produitte par la grandeur d'un art, attendu le desir, conuertit en plaisir la peine. Si que l'ouurier comme affectionné ne se peult retirer de son ouurage, congnoissant fort bien son art estre non seulement loué par les doctes & vertueux, ains l'apperçoit estre plaisant & agreable aux imbecilles & ignorans. Or pour conclure cest art est suget à plusieurs inconueniens : & si ces moyens ne sont conduits avec grande consideration & diligence, tout se conuertira en rien, & deuiendra l'effet semblable & conforme à son nom. Pour raison dequoy considerant plusieurs fois tous les empeschemens estre ordinaires, ie prés vouloir au lieu de passer outre avec louange de vous dire qu'un homme noble, encores qu'il soit de gentil esprit, bien que le plaisir l'affectionne à cest art, ne sy doit adonner pour n'estre accoustumé à la chaleur, laquelle il fault souffrir en temps d'esté, & l'humidité & froideur en hyuer. Vous aduertissant qu'il fault estre ieune & fort pour manier choses pesantes, cōme bronzes, fer, boys, terres, eau, pierres, & autres choses semblables. Et s'il veult le tout bien cōsiderer, il congnoistra en icelle auoir quelque apparence de brutalité, pource qui sy exercent, ont tousiours leur accoustrement plein de pouldre & à demy brulé : & de terre molle & tēdre le visage & mains brouillées. Et s'il est necessaire que l'homme y employe toute sa force pour obuier aux dangiers qui pourroyent succeder tellement que cest art tient tousiours l'esprit de l'ouurier suspēdu & trouble iusques à la fin de son œuvre. Pour raison dequoy ils sont appelez fantastiques & tenus en reputation d'hommes legiers & de peu de sens. Si est-ce que cest art ne delaisse à estre vtile & delectable, comme ie vous vueil faire congnoistre par sa pratique, vous declarāt que cest art est encores plus subiet à deception que ne sont tous les autres exercices, si qui paroist plus estre soumis à la fortune qu'à l'ingeniosité ou pratique de l'art, ainsi comme les subiets & accidens d'icelle le monstrent souuētes fois. Parquoy n'ayant pouuoir avec les mains des hommes donner secours aux propres lieux de l'œuvre, estant offensée d'un si furieux & puissant element, ou pour perdre le cœur, aperceuant la fureur d'un metal embrasé : ou  
bien



bien pour manger quelque chose necessaire, tellement que l'entendement n'a aucun sçauoir de pouuoir donner ordre à ce qui se presente. Si que se voyant priué de tous secours, il semble que tels effets soyent produits de fortune, pour succeder à l'imperfection de l'oeuvre, tellement que le travail & temps viennent à estre totalement perdus, la despence faite. En sorte que le conducteur & maistre, demeure fâché au possible, & bien souuent ruiné: & si sa constance & fermeté, ne vient à excéder le marbre en fermeté, ou qu'il ne se vueille esgaler, parangonner & estimer en patience à vn autre Iob, il ne se pourra tenir de mauldire l'art & la fortune: chargeant aucunes fois sa negligence, là ou plusieurs fois il ne sera aucunement tōbé en faute. Et à la fin n'ayant autre remede commencera à penser le moyen de reparer & remedier au malheur qui luy est aduenu: ou bien de redonner commencement à l'oeuvre, ayant en pensée de se bien garder d'estre surprins de la chose qui luy a causé vne telle perte: & à ce sera encores prouoqué d'une certaine honte, qu'on vient à luy imputer, le iugeant peu praticien ou experimenté en son art, mais ils ne viennent à considerer que l'ouurier est fâché du dommage qu'il a receu: attendu que bien souuent vn ignorant & presumptueux, prendra la hardiesse de se mocquer de luy. Tellement que sa reprehension mal fondée, sera autant fâcheuse au pauvre maistre, comme si on l'auoit outragé & blessé grandement. Parquoy considerant ce que dessus, & par experience l'ayant esprouué, ayant de moy & de tels hommes compassion, ie dy qu'en tout exercice il fault estre accompagné d'heureuse fortune, sans laquelle il est bien difficile de pouuoir conduire vostre oeuvre au periode & fin de sa perfection. Or pour abreger le temps & fuir despence & travail, ie vous aduertiy que celuy qui veult entreprendre de suyure cest art, & le faire bien & seurement, doit fortifier le lieu de terre avec ferremens, là ou il veult mettre les metaux. Vous aduertissant que iamais chose ne vous aduiendra, si vous le considererez bien, que premierement vostre iugement ne la vous enseigne: & si en cest art est reputé le meilleur maistre, celuy qui sçait mieux prédre garde à ses erreurs. Et avec magnanimité de cœur

y prouoir quand elles viennent à se presenter, sans s'arrester n'auoir fiances à ses ministres, s'il ne les cōgnoist estre bien fort experimenter. Et pour obuier aux malheurs qui peuuent succeder, ie vous conseille de ne pardonner à travail, ny despence quelconque, & d'estre en toute part diligent & patient, pour conduire vostre entreprinse à perfection. Vous aduertissant que bien souuent en peu de chose le tout consiste: comme vous voyez pour vn peu de terre, charbon, ou autre chose, qui vienne tomber dans les formes, ou que l'entrée ne vint à se fermer des qu'on veut getter, lors qu'on remplit le moule. Parquoy ie conclud finalement qu'on doit fuir cest art le plus qu'il est possible: à cause que avec tant de coups & aduertissemens il t'est de necessité de combattre à luy, pour defendre ton profit & hōneur: & encores toutes les choses susdittes ne seront suffisantes à celuy qui veut faire tel art, s'il ne sçait bien ouurer en boys & en fer, sans aucunement estre ignorant de bien tourner & se sçauoir aider de la grosse masse, du cizeau des eschampres, limes, & de tous autres instrumens necessaires à pollir, & duisant à leuer terre. Et est encores necessaire de sçauoir massonner pour faire fours & canals. Car aduenant qu'autre vint à les faire, ils ne se peuuent si facilement donner à entendre. Et auant toutes choses, cest art veut estre pratiquée avec certaine discretiō de sçauoir bien entendre la nature & qualité des formes & moules, & de les sçauoir biē adapter & approprier avec la chose, laquelle doit estre faite: & si vo<sup>e</sup> fault entendre que la force de cest art consiste en trois passions principales: l'une est de faire bien les formes, & les sçauoir de mēme façon disposer. L'autre est sçauoir bien fondre: & la tierce est de sçauoir faire seurement les compositions, respondans aux effets de vostre entreprinse. Vous aduertissant qu'en y procedant autrement, toutes vos peines seroyent esté employées en vain. Pour raison dequoy ie ne fauldray à vous donner tous les aduertissemens qui vous seront necessaires. Et premieremēt ie vous monstrey & apprendray le moyen de faire les formes, comme le premier fondement de cest art. Et pource que cōmunement on les fait de terre naturelle, nous commencerons au premier chapitre à vous

à vous la d'escire. Parquoy vous ne pardonnerez à travail quelconque, pour en recouurer de la meilleure qui vous sera possible, puis la cōstitueriez en la façon que ie vous enseigneray. Et apres que ie vous auray parlé suffisamment d'icelle, ie poursuuyray à vous faire des fours, & des moyens qu'il fault obseruer aux fusiōs. Puis suyuamment des matieres metaliques, & comme il les fault conduire avec proportion ordonnée aux effets qu'on desire.

*De quelle qualité doit estre la terre à faire moules & formes pour  
getter & mouler en bronze. Chap. I.*

**D**E plusieurs & diuerses sortes se trouuent les terres, desquelles on veult composer formes ou moules, pour y getter en bronze, letton & autres metaux: pour le respect desquels on doit chercher de la meilleure, & q̄ sur tout elle puisse bien resister au feu: ioint aussi qu'elle soit disposée à bien recevoir les metaux, rendant ce qu'elle gette nettement sans estre fuiette à diminuer & à fendre, quand on viēdra à la seicher ou recuire. Chose certainement qu'on ne peult aisement mettre en lumiere sans l'experimenter: pource que la terre n'a en soy couleur ou signe suffisant, par lequel ie vous puisse mōstrer ce que ie vous dy: à cause qu'elles ne sont moins desguisēes en couleur que leurs natures se trouuent variables. Car vous en apperceurez vne blanche, l'autre noire, ceste-cy iauue: & l'autre qui est contigue & ioignante aura la couleur rouge. Et point d'icelles par leurs couleurs ne scauroyent par cas fortuit estre bonnes à cest effet. Et encores il pourroit succeder qu'elles fussent & apparussent toutes bonnes de couleur. Vous aduertissant que toutes terres sont sablonneuses, maigres, ou pleines d'argille, ou bien moles avec vne grosse visquosité. Les maigres rēdent leurs paste pleines de poul-dre & sans aucune force. Et apres qu'elles sōt seichēes ne se maintiennent longuement. Les grasses & visqueuses se retirēt & rompent: & souuentefois rendent tortues les formes, & se consient tellement au feu qu'à bien grande difficulté l'ouurage en vient à sortir nettement. Vous assurant que les bonnes doiuent estre celles qui ne sont ne grasses ny maigres, & qui ont leur grain subtil.

Ioint aussi qu'elles viennent facilement à seicher sans rompre, & depuis sont fermes. Tellement qu'elles sont resistance contre la vehemence du feu: & sont communement de couleur iaune ou rouge. Mais ie ne m'arreste à la couleur, ains ie vous conseille d'asseoir iugement sur leur qualité, tel que l'experience vous viendra à monltrer. Et pour conclusion voulant suyure vostre entreprinse, ie vous cōseille de recouurer de la meilleure qu'il vous sera possible, pour estre mis en œuvre. Car elle doit estre le fondement de vostre œuvre. Et pour la trouuer il vous fault chercher plusieurs caues, & mesmement celles qui sont au dessous des terres, qui n'ayent pas beaucoup esté labourées. Et apres que vous aurez encommencée vostre œuvre, l'ayant composée, la mettrez sur vn banc. Puis l'auoir arrousee & rendue en paste, commencerez à la battre bien fermement avec vne verge de fer tout ainsi que font les potiers la leur. Puis apres vous accompagnerez les deux tiers de toute la quantité d'escharpir le drap de lin, & le rebattrez iusques à ce que le tout soit tellement incorporé ensemble, qu'on ne puisse auoir apparence que d'une mesme chose, & que les petites pierres, qui par fortune seroient restées dedans, soyent brisées au possible. Si que la terre rendue ainsi maniable, vous puisse seruir à faire voz formes & moules. Ils sont aucuns qui ne pouuās trouuer terre ainsi parfaite, comme ils souhaitent par necessité, sont contrains de prendre de celle qu'ils peuuent recouurer. Puis l'auoir rendue en paste, en forment petits pains lesquels ils font seicher, & apres les viennent à briser, remouiller & battre. Aucuns autres se delectent de la mesler avec sablon & cendres. D'autres ayant la terre debile & peu forte, la detrampent avec eau salée, en y adioutant ou rouilleure, ou escaille de fer subtilement puluerisé. On en accoustre encōres avec fiente seiche de cheual, asne, mulle & bœuf, & d'autres avec fleur de cane ou paille bien subtilement coupée. Parquoy ie vous prie vouloir le tout bien considerer, afin que quelque mal-heur ne vinst à succeder à l'ouurage qu'avez entrepris par vostre negligence.



*L'ordre & moyen qu'on doit tenir en general à faire moules & formes pour y getter & mouler en bronze.*

*Chapitre 2.*

**D**OVS VYVANT à ceste heure de faire les moules, ie dy qu'on doit n'estre moins curieux à considerer la diuersité des choses que vous voulez former, que vous auez esté soigneux à eslire la diuersité des terres. Car au moule toute chose vuide est rendue plaine : & toute chose plaine à estre vidée selon la modelle originelle que vous auez. Laquelle doit estre faite d'un corps de matiere plus dure que la chose avec laquelle vous la voulez estre formée : & encores de chose que le moule la puisse defaire ou confier. Si qu'on doit faire le fonnement de marbre, bronze, plomb, ou de tout autre metal, & aussi de boys, de cire, suif, ou soufre. Et generally de ce qui se presente, & qui semble estre plus duisant à vostre œuvre. Car telle matiere vient à se presenter qu'il est necessaire de former les moules tout d'une piece. Mais il en y a aucuns qui les forment en deux, trois, ou quatre pieces, pour les rendre plus aisez : mais il fault qu'ils soyent de matiere dure. En semblable façon font encores les formes des grandes statues, lesquelles voulant faire de bronze, fault premierement, suyuant l'ordre commun, les former en cire, comme ie vous diray lors que ie monstrey ay aucunes formes difficiles à faire, comme sont histoires attachées sur un tableau ayant apparence d'estre bien releuées, là ou il est besoyn de proceder subtillement, pour ne rompre le moule ou la figure. Pour à quoy obuier, il est necessaire de remplir les lieux de la forme, afin qu'ils retiennent. Et encores fault qu'elle soit faite de plusieurs pieces, & les bien boucher & fermer, tellement que le tout puisse retourner à son lieu. Si est-ce que seroye d'aduis qu'on y procedast par un autre moyen, encores qu'il fust long, plus tost que de former le moule de plusieurs pieces : car encores que la personne soit diligente, si se trouuera elle estonnée, pour autant qu'on ne peut tousiours arriuer au lieu ou l'homme desire de se rendre, ne toutes les pieces ne peuvent estre si confor-

mes que l'œuvre ne vous en face veoir puis apres la difference. Mais pour autāt que plusieurs fois on n'y peult atteindre autrement, on est contrainct d'y proceder en ceste façon, tant pour necessité que pour donner auācement au metal, espargner despen-  
ce, ou pour le faire plus leger, comme il aduiēt à getter pour l'artillerie, cloches, mortiers, & pour toute antre espeece grande ou petite de vase. Pour raison dequoy, il seroit necessāire que la modelle fust de terre, & si bien appropriée qu'elle demeurast immobile dans le moule, encores qu'il y eust quelque distance entre eulx, pour ayder quād on vient à getter vn gros ouurage de brō-  
ze. Les maistres appellēt cela maintenāt masse & bien tost apres ame. Et en le faisant vn tient vn chemin, & l'autre prend vn' autre voye, tous selon leurs iugemēs, pour l'instructiō qu'ils ont aprin-  
se. Si que les aucuns font la partie dehors de leur modelle pre-  
miere de boys, les autres de terre, les antres de cire, de suif, ou de autres matieres fusibles: afin d'ē pouuoir sortir la chaleur, ou bien les brusler dans les formes, ou en tirer les pieces pour parfaitte-  
ment rendre la place vuide & nette, dans laquelle voulās cōduire vostre œuvre à sa fin, vous faudra mettre vostre terre, & pourrez  
facilement cōprendre l'ordre qu'il vous fault tenir, en faisant les  
formes & moules de l'artillerie & des cloches. Au moyē dequoy  
ie differeray à vous en parler dauātage, reseruāt à vous le dire au  
lieu ou ie parleray de l'artillerie & des cloches. Et pour le present  
suyuray à vous dire certaines differences & mesures des canons  
qu'on forme par l'artillerie, afin que vous les entendiez.

*Icy vous seront declairées les differences des canons & sem-  
blablement leurs mesures. Chap. 3.*

**P**Remieremēt que passer plus ourre, ie vous vueil mon-  
strer les differences de l'artillerie: l'origine de laquelle  
on congnoist estre venue d'Alemaigne. Et ay opinion  
qu'elle à esté causée par les faits de la pouldre. Et depuis selon la  
volonté & diuersité d'entendement de ceux qui se sont trauaillés  
à s'y exercer, les faisant maintenant grosses cōme couleurines,  
& puis apres petites & legeres comme pistolets. Et suyuant ce  
moyen


moÿen ont forgez de diuerſes ſortes. Les aucunes longues chargées d'un petit boulet pour tirer plus loing, & les autres courtes, chargées d'un grand, cōme les mortiers. Et pour les faire habilles à porter, les ont faittes de pieces iointes & aſſemblées: Et en ont compoſé & forgé de grandes & petites, leur impoſans diuerſité de noms à leur volonté. Tellement qu'on ne peut dire qu'anciens ny modernes y ayent iamais ſceu prefiger certaine meſure: ains les aucuns ont prins plaifir de les faire longues comme ſerpentines, ou vn peu plus grandes, approchantes en grandeur le paſſe-volant ou le baſilique. Mais à bien conclure il me ſemble qu'on y a touſiours procedé ſelon l'aage des hommes, ou ſelon le vouloir de ceux qui les font faire, ou de la fâtaſie des maiſtres. Mais meſurant la groſſeur de bronze, i'ay trouué certaine regle ſans eſtre encores certainement gardée: & croy qu'elle ait eſté trouuée par certaine experience des maiſtres, plus toſt pour moderer la choſe, que pour la rendre & faire meilleure. Attendu que par raiſon & experience lon voit que d'autant plus vne piece d'artillerie de bronze eſt groſſe, tant plus celuy qui la manie ſ'en doit aſſurer. Et ſe mettant en deuoir de la faire tirer plus fort & mieux, on ne doit craindre à la charger de plus de quantité & de meilleure pouldre que n'eſt la commune. Si eſt-ce que ſelon les lieux on peut retraindre beaucoup de la meſure commune, & faire l'artillerie de moindre pois. Choſe qui rend tresgrande facilité à la conduire, & ſi eſpargne beaucoup à celuy qui la fait forger. Et ay encores veu par experiences infinies qu'une piece de canon bien longue, chargée de meſme boulet & poudre qu'une courte, à tiré beaucoup plus loing contre l'opinion de ceulx qui armez de menſonge, diſent que le fort tirer, giſt au ſecret des meſures. Mais abandonnant ceſte raiſon, ie dy que les bōs entēdemens ayans apperceu les empeſchemens & incommoditez que rendent les choſes occultes, ont proportionné avec vn certain ordre & moyen ſuffiſant, & tellement moderées les longues & groſſeurs, & accommodé les meſures, qu'ils ont congnoiſſance de la groſſeur du boulet que le maiſtre veult que ſes pieces tirēt. Au moyē dequoy par experiēce eſt veuë & cōſiderée la groſſeur

de la bronze, à la force de la poudre, laquelle est toute enflammée avant que le boulet vienne à sortir. Car si la poudre voloit au dehors, la force de son feu viendroit à se separer en l'air. Mais laissant à part ce discours, ie vous dy que tout ainsi que les mesures & grandeurs sont faites à plaisir: de mesme façon impose-on le nom aux pieces d'artilleries au plaisir des capitaines, s'accommodant au temps & aux provinces qui les possèdent, ou ont possédées, ainsi comme vous auez peu voir & entendre par le rapport des anciens, qui appelloient ses grands & espouventables instrumens, bombardes, & vn long temps apres furent nommez basilics, d'autres les appelloient passe-volants, & les plus modernes les nomment arquebus. Mais pour le iourd'huy la ieunesse de bon esprit, à voulu moderer la surperfluité & augmenter ce qui estoit debile: car au lieu des bombardes mal-aisées qui tiroient gros boulets de pierre, & grand superfluité de pouldre, ils ont ordonné canons long pour les rendre plus legiers & faciles à conduire: & encores qu'ils tirent moindres boulets que les bombardes, si ne delaissent-ils à faire plus grand effet. Au moyen dequoy on vient à les mettre au deuât des fors, pour faire batterie. Vous aduertissant qu'on en fait de trois sortes: comme doubles canons, canons, & demy canons. Le canon est coustumierement de cinq brasses & demie, qui au nombre des boulets peuuent estre vingt & deux diametres, ou enuiron. Le pois du boulet de fer, qu'il tire est de cinquante à soixâte liures. Le demy canon les tire de la pesanteur de vingt cinq à trente liures. Le lieu ou se met la pouldre peut contenir en diametre les trois quarts du boulet. Outre ceux cy on fait encores des canons plus subtils, & qui portent beaucoup plus loing les boulets, lesquels sont de pierres, car on en tire point de fer. Vray est qu'ils ne sont bons à battre muraille, ains sont reseruez pour estre tirez cōtre l'infanterie & cheualerie, ou contre ceux qui drescent armées sur la mer. Pour le iourd'huy ce forgent couleurines & demies couleurines, faciles à charger & conduire, lesquelles tirent boulets de fer, pesant communement trente liures: & les demies ont leurs boulets de quinze. Et se font ses couleurines beaucoup plus grosses, de bronze, que ne faisoient les



les antiques, ayans de longueur communément de huit ou neuf brasses. Au lieu des cerbatines & chassécornilles, ont fait maintenant, sacre, faucons, & fauconneaux, tirans tretsous fer. Le sacre tire douze liures: le faucon six, & le fauconneau de trois à quatre liures. Apres ceux-cy se font esmerillôs, esmouchets, qui peuvent estre conduits presques par vn seul homme, au moyen de quoy les capitaines qui conduisent l'infanterie, les font volontiers conduire en campagne: à cause que ce sont instrumens qui peuuent grandemēt offenser l'ennemy. Car leur boulet de plôb & fer, est de la pesanteur de deux liures. Apres ceux-cy viennent en ranc, les arquebus à croc qu'on met sur les murailles, lesquels sont excellens, & sont grande faction à la deffence d'une forteresse. L'arquebus commun & arquebutes, suyuet ceux-cy. Et les fait-on pour le iourd'huy de mesure diuerse: & si tirēt les boulets du poix d'une once de plomb, ou quelque peu moins. Des mortiers ie delaisseray à vous parler, pource que les modernes les ont à mespris, il me suffira pour ceste heure de vous auoir fait description de leurs noms, lesquels ont apparence de frayeur & fierté. Mais il me semble que les maistres ont grandement failly, s'oublians de leur mettre les noms des oyseaux, comme sacres, faucons & autres semblables. Car on les deuoit plustost approprier le nom de diables infernaux. Pourautant que tout ainsi que ceux-cy viennent à foudroyer les hommes, au vouloir desquels ayant desir de satisfaire, ie suis content de donner fin à ce propos, pour suyure à vous faire entendre quel ordre doyuent suyure ceux qui vueillent auoir congnoissance de la pratique de getter. Et premierement ie feray discours comme se doiuent faire les formes pour faire les figures de bronze.

*L'ordre & moyen que particulièrement il fault tenir pour faire le moule à la figure, qui se doit faire de bronze. Chap. 4.*

ELVY qui entreprend de faire le moule, pour getter figures de bronze, doit considerer plusieurs choses. Et premierement si elles sont grandes ou petites, toutes rondes, ou en partie. Puis de quelle matiere elles sont faites, & si

le maistre n'est expérimenté, il doit auoir l'aduis de quelqu'un qui ait fait profession longuement en cest art. Car si les figures sont grandes, il est necessaire de faire leurs formes, tellement portionnées que vous les puissiez sortir à vostre plaisir, & tourner remettre en leur propre lieu. Mais si vous en estes l'ouurier, le moyen s'offrira plus facile à vous. Et prenant la voye commune, vous ferez sur vn fer la figure de terre du masse. Puis l'auoir seichée & recuite, l'augmenterez avec cire, & la rendrez en la mesme grosseur, que vous aurez fantasie qu'elle soit de bronze. Mais vous ne mettrez en oubly de vous saisir d'aucunes verges de bronze de la grosseur d'un doigt, & d'un pied de longuer. Lesquelles vous passerez par la grosseur de la cire, & ferez en sorte que la terre s'auancera trois ou quatre bons doigts par dessus, afin que la cire ostée, le masse figuré se puisse tenir au milieu de la forme: qui sera par dehors si bien iointe avec la figure, qu'encores qu'on vienne à manier la forme, le masse ne se bougera de son lieu. Et apres que le tout sera esté ainsi accoustré, vous prendrez d'icelle terre cimentée que ie vous ay enseignée, dans laquelle vous viendrez à incorporer escaille de fer bien puluerisée & passée. Puis l'auoir à force d'eau rendue molle, avec la main viendrez à couvrir totalement la figure, laquelle vous ferez seicher au soleil, ou à l'ombre par quelque temps. Et apperceuant qu'elle sera seiche, vous viédrez à la recourir encores de terre que vous ferez seicher, continuât en la mesme sorte iusques à ce que vous congnoistrez sa grosseur estre suffisante de pouuoir resister à l'impetuosité de la matiere fondue. Et pour plus aller seurement & besongner, il sera necessaire de mettre à l'entour cercles de fer. Et apres que vous l'aurez ainsi armée, vous aduiserez en quel lieu vous pourrez getter vostre ouurage, que la bronze aye pouuoir de cheminer par toute la forme sans aucun empeschement, afin qu'elle se puisse estendre pour faire entrée aux parties subtiles. Et pour plus d'assurance faudra faire aucuns conduits & certains lieux, sans mettre en oubly, de laisser deux ou trois trous parmy lesquels les ventosités & fumées, qui s'engendreront en la forme par la chaleur, ayent la commodité de sortir. Car la bronze ne pourroit nullement

ment entrer aux lieux ou fumées & vétoſitez fuſſent enfermées, qui ſeroit cauſe que matiere viédroit à manquer à l'œuvre. Apres que vous aurez procedé en ceſte façon par les lieux de l'entrée, ou par les trous, vous ne faudrez à donner feu dedans avec charbon ou bois, pour en tirer la cire. Tellement que la forme viendra à vous reſter ainſi vuide, comme elle ſera lors que la bronze viendra à en eſtre oſtée. Mais pour obuier de perdre la cire, on pourra mettre aucuns vases au deſſous, tandis qu'elle vient à ſe fondre: ſe prenant garde toutesfois à bien fermer la forme, & la couvrir tellement avec les tuilles, que le feu qui eſt au deſſus ne puiſſe cheoir dans la forme. Pour laquelle eſchauffer, on doit dreſſer à l'entour quantité de tuilles appropriées, en façon d'un fourneau, & le monter ſi hault que la forme en ſoit excédée, laquelle ſera eſlongnée de luy l'eſpace de trois ou quatre doigts. Et au milieu, de ſes tuilles on mettra du bois ou charbō peu à peu eſchauffant la forme, juſques à ce que la cire ſoit toute fondue & rendue dans les vases poſez au deſſous pour la recevoir. Et en ceſte façon vous rendrez acheué le moule de voſtre figure. Laquelle voulant remplir de bronze, vous faudra recuire & diſpoſer, comme ie vous diray lors que ie vous parleray de getter. Vous aduertifſant ceſte-cy eſtre la façon commune, qu'on accouſtume de ſuyure quand la figure eſt de terre. Mais quand elle eſt de bronze, marbre, ou terre cuitte, pource que ſe ſont matieres dures, il fault trouver autre moyē, & enſemble avec l'ordre, avec encores patience d'y proceder en deux façons. L'une eſt de la forme piece à piece avec du platre. Mais il eſt requis que le moule ne ſoit d'exceſſive grandeur, afin qu'on le puiſſe manier facilement: & dans icelle en faudra en getter vne de cire. Et ſi elle eſt grande, il faudra premierement bien oindre de greſſe de pourceau ou huile, ou bien la couvrir d'or ou d'argent battu. Et auoir formée la partie de l'iſſue la plus grande qu'il vous ſera poſſible, vous y adiouſterez quatre incaſtratures. Puis à l'entour d'icelle quand elle ſera ſeiche, vous ferez quatre pieces avec leurs incaſtratures. Et finalement pour faire rencontrer & faire reuenir les pieces, ne faudrez à les marquer toutes: & auſſi toſt que vous aurez

acheuée la couuerture & bien seichée, vous commencerez à en tirer la derniere partie que vous y aurez mise. Et suyuant les marques que vous y auez faites, remettrez diligemment vne chacune piece en son lieu, sans mettre en oubly de fermer & boucher avec terre tédre toutes les fêtes & iointures. Puis avec cerclés de fer, cordes & terre, la fortifierez, & l'ayant ainsi reduite, vous mettrez dedás par diuers lieux certains cloux faits de bronze, de l'espeſſeur d'un doigt. Lesquels seront de longueur, qui pourroit excéder quatre doigts, hors de la forme qui les voudroit pouſſer: & pour cest affaire, fault prendre de la cire, ou bien en faire composition avec du ſuiſ, ou autre chose qui par chaleur peult eſtre conuertie en liqueur. Laquelle vous mettrez par tout, ayant premierement proietté de quelle groſſeur de bronze vous auez vouloir que ſoit voſtre figure: laquelle auoir ainſi couduitte vous la couurirez de terre, faiſant vne forme de telle faſon, que quand les deux parties seront iointes enſemble, elles ayent ſemblance d'eſtre totalement vnies. Et apres les auoir bien liées & couuertes de terre, en la faſon que ie vous ay dit cy deſſus, mettrez la cire au dehors par la vertu du feu, tellement que la forme reſtera vuide, vous donnant la commodité de la recevoir, pour y former puis apres voſtre bronze. Aucuns autres voulans faire les figures de bronze creuſe, eſgale & ſubtile par tout, formēt vn maſſe de terre, & de la meſme ſorte qu'ils vueillent eſtre leur figure: & l'auoir recuite luy coupent vne peau au deſſus, de ſemblable groſſeur qu'ils vueillent eſtre la bronze, qui mettront au deſſus. Au lieu de la peau mettront de la cire. Et pour rēdre le tout mieux équipé, la taillent en pieces & parties, y remettant autant de cire comme en a eſté oſtée de terre, faiſant la forme & appropriant le tout comme il vous a eſté enſeigné cy deſſus. Il y en a aucuns qui font leurs figures ſur vn fer d'eſtoupes & paſte & ſils n'ont commodité de recouurer draps, on la veſtira d'une toille groſſe ou ſubtile, collée, tout ainſi que les peintres font les leurs quand ils veulent pourtraire. Puis la viennent à oindre avec cire & ſuiſ, accompagnez de tourmentine. Et l'auoir acheuée ſont au deſſus la forme, l'adaptant en deux



en deux, trois, ou quatre pieces. Puis en la façon que dessus se mettent en deuoir de l'echauffer, tellement que la composition des estoupes & de cire vient à se brusler, delaisant le demeurant vuide. On en trouue encores d'autres qui pour n'auoir le moyé, ou n'ayans volonté de former de platre, se trauaillent vser de croye pour faire vases, & la battent iusques à ce qu'elle soit ferme, tellement qu'on la puisse diuiser, en trois, quarre ou six, pieces, selon que l'occasion s'offrira. Et depuis en ceste place vyude on gettera cire fondue, si que voulant les figures pleines, on les remplira: Et si on les veult faire creuses, ils en mettront seulement aleutour. Et auoir le tout conduit ainsi qu'il est requis avec l'aide du feu au moyen que dessus, la cire en sera retirée, delaisant la forme de la figure en bronze creuse, subtile & semblable à celle de cire. Façon assez belle & facile, mais plustost à faire medalles ou petites figures que grâdes: Mais pour empescher à vos esprits ne dormir, ie vueil poursuire à ceste heure à vous dire les bas relieuemens & moyens des figures, fueillages & histoires, lesquelles se pourront faire de plastre, si ce ne sont choses d'importance. Car les voulans bien faire, il faudroit mettre en ieu la cire ou la terre mole. Vous aduisant quant à cest effet qu'aucuns sont en coustume d'vsar de colle faite de petites pieces de peau. Et avec icelle on vient à oindre l'histoire avec huile ou gresse de pourceau. Et alentour auoir mis certain nombre de bois ou terre aucunement humide & tiede, la gettent au dessus: & la delaisent iusques à ce qu'elle soit congelée: puis apres la mettent au dessus d'une table. Et l'auoir tournée en tirent l'histoire le portrait de laquelle demeure merueilleusement bien imprimé en la colle, dans laquelle on peult getter, l'auoir bien oincte avec un pinceau de cire, ou de plastre, qui est beaucoup plus ferme & plus durable. Et encores pour la retenir mieux on la peult corriger avec l'argile. Au moyen dequoy vous viendrez à recouurer le moule (sans gaster le premier) avec lequel vous pourrez geter en bronze. Mais pour abreger & obuier à faire tant de formes, on prend de la mesme colle, ou de plus forte, dans laquelle on met du plastre le plus subtil que les autres ayent bruslé, là ou il le


fault laisser refroidir, Puis la retournant on vient à mettre hors le creux de la premiere forme: puis avec vn pinceau trempé en terre cimentée & liquide, rendant la forme peu à peu de la grosseur qu'on la veult estre. Et à la fin avec vn peu de la chaleur du feu la retournez sans dessus dessous. Au moyen dequoy vous auez le moyē de pouoir faire, avec l'aide de la colle & plâtre, vn moule pour getter en bronze, Mais le chemin en seroit long & plein d'ennuy: mais si l'auoye affaire de conduire vn tel œuure, congnoissant le peril des formes, auquel ou met colle avec colle & terre, i'y appliqueroye estain ou argent. Car la voye me sembleroit beaucoup meilleure & plus seure, encores que la despēce en soit beaucoup plus excessiue. Ils sont aucuns qui font les formes pour getter en bronze de la terre dequoy on fait les vases. laquelle ils viennent à oindre de gresse de pourceau; ou bien luy faire vne peau de suif, & si la pourra on couurir d'estain. Puis l'auoir liée & ceinte avec fil & platines de fer, la rechaufferont en sorte que la gresse viendra à penetrer & à faire separation d'vne terre à autre. Et à l'heure de la departie qui se monstre plus decouuerte avec vn fer, vous viendrez peu à peu à oster toute l'argille. Tellement que vous recouurerez le creux de la chose que vous souhaitez. Vous aduertissant d'auoir vsé à la mesme façon en Florēce, au temps qu'elle estoit assiegée. Vray est-il que aux choses subtiles ce moyen est vn peu facheux. Si est-ce que ie pensoye me bien seruir d'vn tel moyē, encores que plusieurs soyent de cōtraire opinion, tant à cause de l'œuure, comme encores par l'ingeniosité, pratique ou iugemēt des maistres: aucuns desquels plaist vn chemin & aux autres est agreable de suyuir autre oyce.

*Les moyens pour faire les formes de l'artillerie en particulier.*

*Chapitre 5.*

**O** V R maistre de quel art que ce soit, pour faire son œuure plus facile, tiēt tousiours le chemin qu'il a apris, ou celuy que son entendement ou bon iugement luy font sembler estre meilleur. Si est-ce que pour faire les formes  
de

de l'artillerie, encores que les moyens soyent diuers, & que lon en vse selon qu'elles sont grandes ou petites, si y procede on presques en toute part par vn mesme moyen. Vous aduertissant que premierement il vous fault recouurer vn patron: de la façon que vous voulez vostre artillerie, & fault qu'elle soit de boys ou de terre. Et prenât le cas qu'on la vueille de boys, il vous fault recouurer vne piece qui soit de la mesure en longueur & grosseur. Et sil est possible plus lōgue que n'est l'artillerie, laquelle on mettra au dessus de deux billōs en la façon que vous est demonstrée en ceste figure.



Et l'auoir ainsi acoustree, & mise la bouche au lieu ou vous la voulez mettre, vous ne fauldrez à donner feu deuers le pied, au deuant duquel seront les corniches des pieces & autres choses qu'on delaisse en la forme faitte de terre. Mais premierement qu'on face au pied le rapportemēt & assemblee des pieces de ce cul qui doit estre biē lutē, vous dresserez de terre ou de boys vne rouē espesse de trois doigts bien iointe & assemblee avec suif ou cire. Et ioignant icelle par dessus de la taille de la bouche posée aupres de la corniche, ferez semblablement vn palon, au dessus duquel vous poserez vne autre rouē toute au contraire, & moindre que celle que vous auez fait mettre au piē, laquelle sera guyde du noyau du canon, tout ainsi que l'autre est du cul. Mais toutes deux seront adaptées au dessous avec cendres ou suif, tout ainsi comme les corniches. Et si referez deux moules longs &

rôds pour faire aide si l'artillerie venoit à verser, & avec des cloux longs seront sichez, tellement qu'ils pourront facilement cauer la terre à vostre volonté, apres que la forme aura esté faite. Et seront mis sur les deux costez la cinquiesme partie de la longueur de toute la piece, commenceant la mesure au pied, suivant iusques au lieu d'ou vienēt les renfors: & apres auoir bien cendré ce moule fort subtilement, & ointes vos rouës avec suif, ou autre gresse, ne fauldrz à donner feu, afin qu'elles viennent à seicher, pour donner plustost fin à la forme, sinon vous les laisserez essuyer au soleil, ou au vent, puis apres continuerez à les engrosfir iusques à ce que vous congnoistrez qu'il ne vous fault passer plus outre. Et quand vous serez arriuez à la dernière, vous mettrez alentour du fil de fer, de deux en deux doigts, separez en distance l'un de l'autre. Et ayant le tout acoustré en ceste façon luy donnerez encores vne main de terre pour fermer le fil, & ne sera plustost seichée, que vous prendrez huit verges de fer ou pour le moins six aussi longues comme toute la forme, & avec autant de cercles de fer, separez d'une brasse l'un de l'autre, la ceindrez fort estroittemēt afin que ceste armeure tienne plus fermemēt: vous y remettrez encores de la terre dessus, laquelle auoir faict bien seicher, vous donnerez feu sans cesser iusques à ce que vous penserez qu'il ait totalemēt penetré le moule, & que la cire ou suif en soit totalement ostée. Puis à force de gens la souleuez & mettrez hors de son noyau. Et avec vne poultre hurterez sur la pointe du biligue, ou estoit la piece d'artillerie, ayant premiere-ment leuée la superfluité de la terre, & ostez les cloux, ou autres fers, hurterez la partie exterieure, tellemēt que le stile qui est au dedans, viēdra à sortir. Et à l'heure vostre forme demeurera vuide & nette, selon la diligēce que vous y aurez faitte, & n'ayāt nécessité avec terre tēdre & subtile, fermerés les iointures que vous apperceurez estre dedans & au dehors: & en ceste façon vous recouvrerez vostre premiere forme, qui fait le dehors de la piece de l'artillerie, non pas totalement parfaite en toutes ses parties: pource qu'il fault encores aonstrer la gogue, qui soustiet au milieu le noyau: & les autres parties seront recuites, & en ceindrez  
comme



comme vous entendrez en leur lieu. Mais pourautant qu'il est difficile de pouuoir recouurer arbres assez gros & longs, qui seroyēt necessaires pour faire modelles, ou bien pour euitier despence, on les fait de terre. Et premierement n'ayant commodité d'arbres pour faire la grosseur ou longueur de la forme qui vous est necessaire, il vous fault assembler plusieurs pieces, & les rendre tellement accoustrées avec cloux colez, & cercles de fer, que vostre forme soit aussi forte comme si elle estoit toute d'une piece. Mais pour plus facilement y proceder, il ne vous fault auoir que la longueur, laquelle s'attache sur deux cheualets de boys, comme vous auez fait à l'autre, & ayant recouuré vn stile le plus gros qu'il vous sera esté possible, & couché, vous le couurirez d'une corde d'un bout à l'autre. Puis avec la main le couürirez de terre, tellement que vous le rendrez au terme de la grosseur que vous le voulez: & l'auoir avec vn equierre iustement compassé, vous tetournerez encores à le régrossir là ou vous verrez estre necessaire: & voulant poursuyure vostre œuvre vous leuerez la terre, tellement que vous trouuerez vostre forme comme si vous l'auiez fabriquée de boys. Mais pource qu'il seroit difficile, encores qu'on bastist le stile pour le mettre dehors, premierement que de le conduire au dernier point que vous luy voulez donner par le dehors, quand vous aprocherez aupres de la grosseur d'un doigt avec la petite table dessusdite, vous la polirez & rendrez egale: puis avec la main, mettez des cendres au dessus, lesquelles vous couurirez de terre, sans vous arrester iusques à ce que vous ferez arriué à la marque que vous aurez faite, apres en la mesme table sur laquelle vous auez poly vostre moule, ou en vn autre, vous ferez tailler depuis le pied iusques à la sommité vn soustenement qui fera le palone au dessus des corniches & rouë, pour guidon de l'ame ou noyau, & deuers le pied par le dessous vous ferez encores vn soustenement pour faire la forme de la couuerture du cul de la piece. Et voulant faire vostre artillerie, vous taillerez encores les corniches tant à la sommité, qui est ioignante de la bouche, comme au pié, ou lon donne le feu. Puis acostant le tout au moule que vous auez fait de terre, ferez en sorte qu'il

touche par tout: le palon se fera de terre, & les corniches semblablement, & ferez tourner en leurs lieux le moule, qui sera de la mesme forme en grandeur & grosseur que vous voudrez faire vostre artillerie: puis viendrez le tout à oindre de suif ou gresse de pourceau. Et le tournant sur la table l'acheuerez, si que vous y pourrez adiouster ou mettre s'il vous est agreable, fueillages ou armes. Puis couurirez le tout de terre suyuant l'ordre qui vous a esté enseigné cy dessus. Mais pource qu'en seichant les terres le feu vient à poulser l'humide tousiours au dedans, tellement que les terres & cendres viennent à se consier, en sorte que plusieurs fois on endure grand trauail auant que de pouuoir mettre la modelle hors de la forme. Je vous aduerty de ne vous arrester à cecy, ains qu'en battât la piece, la terre viédra à tomber dans la forme. Mais si par cas fortuit elle venoit à tomber dans les corniches, il vous faudroit avec vn fer lōg & oint la curer pour n'interessier aucunement la forme. La pratique desquelles ie vous vueil faire entendre, afin que vous les sachiez mieux composer. Vous aduertissant toute forme d'artillerie estre de trois pieces necessaires, & aucunes fois de quatre & de six. L'vne des trois principales est la forme premiere qui fait le dehors. En la seconde est l'ame, qui est celle place vuyde au milieu de laquelle est posée la poudre: par la force de laquelle le boulet vient à estre poulse dehors. Et l'autre est le culaçon qui viét à fermer & enclorre la forme au dessous, & qui soustient toute la charge du metal. Vous aduertissant qu'aucuns mettent deux fers en croix sur le culaçon, & le chacun d'eux fait vn pied en façon d'vn treppied, qui vient à se renuerfer & monter si hault, qu'il atteint là où l'ame est posée, & s'appelle ceste façon la roche de la forme. Vous assurant ceux cy estre tous les ordres des fers que ie vueil estre diuisans pour faire tel effect. Or ie presuppōse que vous ayez mis en la forme vn des dessusdits fers. Parquoy vous rangerez les autres tout à l'entour, telle mēt qu'ils soyent bien. Puis avec vne esponge attachée à la pointe d'vne canne fort mouillée avec eau ou glaire d'œuf, la nettoyez par dedans: puis l'auoir posée au lieu que vous souhaitez qu'elle soit, la laisserez tresbien seicher: ob

*Comme se doyuent faire les ames aux formes de l'artillerie.*


*Chapitre 6.*

**L**A seconde partie de la forme qui est duisante pour y faire l'artillerie, est l'ame où le milieu, sans laquelle il me seroit impossible de faire la vuydange, ou la poudre & le boulet doyuent estre mis. Et pour faire telle chose il est nécessaire d'auoir deux considerations. L'une sur quoy vous la voulez faire pour estre soutenue & maintenue iuste. L'autre de composition de terre qui puisse resister au getter, & qu'elle ne soit difficile à pouuoir sortir du corps de la piece de l'artillerie quand elle sera esté faite. A la premiere consideration on ne trouue autre difficulté fors qu'à trouuer vn stile ou verge de fer de moyenne grosseur & assez fort pour supporter la pesanteur de la terre, sans ployer aucunement, à cause de la chaleur du feu & aussi qu'elle ne coubbe point estant sur les beliers en la maniant, & fault qu'il soit plus long d'une brasse que n'est la forme de l'artillerie, ayant au dessus de la teste vn canal ou tuyau percé, & vn peu plus bas sur le terme qu'il a de seruir à la longueur de la forme, il fault faire deux ou trois trous pour passer les palettes & fabriquer l'ame, & la dessus faire la rouë. Or est-il nécessaire de faire poser ce fer au dessus des deux cauelets bien droitement & iustement lié & posé, tellement qu'il ne se puisse mouuoir, pousser ne reculler. Et apres cecy faudra faire & composer la terre pour faire l'ame qui soit ferme & non fugette à fendre; ne mettant en oubly de laisser aucune pierre dedans, & qu'elle soit composée avec peu de ciment & vn peu de cendre de lissine, lauées & nettoyées pour plus facilement les tirer hors du creux de l'artillerie. Et semblablement pour auoir encores la commodité de tirer le fer tout d'un trait: vous l'enveloperez totalement d'une corde de cõmune grosseur, laissant toutefois descouuert le fer d'un doigt sur vn chacun pied. Mais vous couurirez premierement vostre corde de cendre, ou vous la vestirez d'estoupe de chanure cendrée bien etroitement, ou vous echauferez aucunement vostre fer; puis couurirez toute la grosseur d'une bonne corde, laquelle vous couurirez avec

vn peu d'eau terreuse, ou plaine de boubier. Et l'auoir delaissee seicher, mettez vne pognée de vostre terre composée par tout. Puis avec vn peu d'estoupes viendrez à couvrir & lier vostre corde, laquelle estre seichée vous irez tousiours augmentant peu à peu en grosseur. Et l'auoir reduitte en l'estat que vous souhaitez, vous prendrez vne table de noir ou autre boys de la longueur de l'ame & quelque peu d'auantage, pource qu'il la fault former au dessus, & fault qu'elle soit de telle grosseur qu'elle ne vienne à ployer, ains ferme au possible, afin qu'on aye meilleure commodité de former ce que vous auez affaire. Et au temps que vous la voudrez getter, vous ferez vne recuite avec l'ordre que ie vous monstrey en son lieu. Aucuns maistres de cest art sont en difference sur la confection des ames des canons à cause d'vne partie qui fait dedans le creux certaine difference, qu'ils appellent chambre. Vous assurant que ce doute n'est encores bien resolu. Car les vns veulent proceder en vne façon, & les autres veulent totalement suyure leur fantasie. Et sous le voile de ceste affectiō ils persuadent aux gens d'auoir quelque grand secret au dedans. Mais si vous leur demandez qui les meut & incite à ce faire, à peine vous en sçauoyent-ils rendre raison. Et croy que les pires canons de tous, sont ceux qui sont estroits à l'entrée, & mesmemēt au creux ou lon veut mettre quantité de poudre: car ils abregent au boulet aucunement la longueur de sa course: car i'apperçoy errer ceux qui rendent l'entrée d'embas estroite, pource que le boulet ne peut passer. Au moyen dequoy le canon est en grand dangier d'estre interesse, à cause d'vne certaine place vuide qui reste entre la poudre & le boulet au canon, lequel ne faudra à tirer. Car tant plus vous mettrez de poudre en lieu estroit, plus sa violence & fureur viendra à se monstrier estant pressée par le feu. Parquoy il me semble que les chambres qu'on veut faire dās les canons, doiuent estre aucunement aisées, & mesmement au milieu plus tost qu'au fond. Aucuns autres sont qui ont opinion qu'on vient à oster la beauté aux pieces, soubliant de ne garder & obseruer l'ordre qu'on doit aux mesures, mais ils s'esloignent grandement du deuoir pource que ignorant doit estre reputé ce-  
luy



luy qui avec ornement des corniches ne sçait couvrir ce qu'il congnoist estre desaggreable à la veüe,



*Moyens pour faire la troisieme partie des formes & moules  
de l'artillerie, apellée le rapportement & façons  
pour luter le cul de la piece.*

*Chapitre 7.*

**D**Es deux parties des formes de l'artillerie, vous reste encore la troisieme, laquelle on est en coustume tousiours d'ouurer pour embellir la piece, à cause que c'est le cul & fond d'icelle serrât toute la forme: & c'est la propre qui reçoit la charge de toute la brôze. Au moyē dequoy on doit mettre diligēce à la faire bien forte, autāt de terre cōme de liens de fer. Et pour atcindre à cest effect, vn chacū des maistres se travaille de faire son œuvre la plus belle qu'il luy est possible. Aucūns autres font la forme de cul du canō de boys ou de terre, & mettent en sorte les fueillages faites de terre ou cire, qu'on ne les peut oster avec les mains ou feu: mais ayant fait le moule tel que vous voudrez, il vous faut mettre au dessus la terre; & diligemment peu à peu engrossir la forme, & la rendre plaine au dessus comme vn siege. Au dessus duquel poserez vostre masse, le tournant d'un costé & d'autre sur la forme, & ostant avec vn eschampre la superfluité, ou y adioutant de terre aux lieux ou elle seroit

E

necessaire: & l'auoir acoustrée en ceste façõ & liée tout à l'étour de fil de fer, vous la fauldra encores armer de cercles & plastrons de fer, couurant toutes les choses vuides de terre, ou pieces de tuilles. Puis avec l'aide du feu, ou autre moyen ferez vostre deuoir de tirer vostre masse, laissant la place vuide, laquelle vosu racoustrerez encores avec terre molle, aux lieux que vous cõgnoistrez la necessité sy offrir. Vous aduertissant n'auoir pratiqué ces choses tout seul, q̃ ie vous escript, mais i'ay tousiours prins plaisir à veoir choses singulieres. Et ayant charge sur l'artillerie, i'ay tousiours fait faire le proiet des figures que ie vouloye y estre affigées de cire, ou de la terre que les faiseurs de pots d'estain vsēt. Et pour ce faire i'ay fait de boys vn moule vuide au dessus d'une table, de la hauteur de la rouë qui fait la vuidange du pié: & au milieu d'iceluy, i'ay mis le masse du bacolle du col, & l'ay couuert de terre suyuant la forme autant en grosseur, comme tout le diametre de la grande forme le pouuoit comporter: & auoir le tout armé avec fer, cõme dessus & bien seiché, i'ay tiré le masse dehors avec feu, & ferremens: & en ceste façõ ie feis la vuidange & creux du masse de l'Elephan en Florence, qui estoit chose bien difficile à pouuoir iustement conduire: encores pour fuir despençe de boys, i'en ay fait plusieurs fois de terre, ayant oint le cul des pieces de gresse ou suif, au dessus duquel ie faisoie encores remettre terre. Puis par forces des mesures & eschampre, ie reduisoie l'œuure à ma volonté. Or en quelle façõ que vous faciez les formes des culs à canon, faites qu'elles soient bien seiches & de terre bien composée, armée en façõ que ie vous ay dit cy dessus, puis à la fin les cendrez: & quand vous les voudrez getter, il sera de besoing de les faire recuire comme est de coustume, & en vsér par le moyen que ie vous enseigneray.

*Moyen de faire la rouë pour donner sostenement aux  
noyaux au milieu des formes de l'artillerie  
sur la partie du chef.  
Chapitre 8.*


Si vous

**S**I vous ne faites la rouë, lors que vous ferez l'ame ou noyau, il la vous faudra necessairemēt faire separement au dessus d'une table ou autre chose plaine & faudra getter vne platine de terre grosse & large selon le tour. Et quand elle sera seiche, ne faudrez à la tailler avec vn eschambre, faisant au milieu vn trou autant large, qu'est la grosseur de l'ame. Mais si vous la voulez attacher avec icelle, il fault tailler vn relieuement au dessus pour le remplir de terre. Il en y a aucuns autres qui au dessus d'un boys rond, de la grosseur de l'ame posé sur vn mōceau de terre se prennent à crier, ou à tournoyer avec vn fer, tellement qu'ils en tirēt deux, trois, ou quatre rouets toutes à points, pour mettre aux lieux ou elles doyuent seruir.

*Moyens de consolider les ames ou noyaux, posées sur le pied des formes de l'artillerie. Chapitre 9.*

**E**Ncores que ie vous aye parlé cy deuant plustost de faire les formes de l'artillerie, que de consolider les ames d'icelle, afin que vous l'entendiez mieux, ie vous vueil de nouveau repliquer le fer qui est fait en cercle, lequel a quatre brāches en croix pour soustenir l'ame ou noyau, qui est celle sans laquelle la piece de l'artillerie est debile: & ne peut tirer iustemēt. Il en y a encores vn autre pour retenir l'ame, lequel est fait en arc, sur lequel est posée vne roche de quatre fers, distāt l'un de l'autre en largeur, autant cōme est gros le diamettre de l'ame ou noyau, & les nettoient au dedans la forme qui est posée sur le cul du canon: mais le moindre de tous selon mon iugemēt, est de faire vn cercle avec quatre cheuilles de fer, passées par quatre trous & mis en la forme. Je louē grandement la rondelle qui est faite à part & entre les fers qu'on met au pié de l'ame. Je trouue les plus agreables ceux qui sont colloquez & logez dedans la forme estant la rouë couuerte: pource qu'a moy l'offrent deux difficultez: l'une est que premierement pour mettre l'ame en son lieu, il est necessaire de mettre la forme bien lurée sur le cul, & la fermer tresbien: puis pour mettre l'ame il fault getter au dedans chandelle de cire, & se mettre en deuoir de decourir le fond fil

est possible. Car facilement charbon, terre, ou quelque autre chose y peut tomber, Pour à quoy obuier i'ay trouué tousiours bon, auant que de loger en son lieu le masse dans ladite forme, & faire serrer & boucher avec estoupe tous les conduits & petits trous qui seruent à respirer, ains suis d'auis qu'on couure le tout avec vn drap. Or pouuez vous aisement comprendre comme il faut conduire & mettre l'ame au dedans, mais ie vous feray mention de l'ordre qu'il fault tenir à getter.



*Des gets & petits trous des formes en vniuersel.*

*Chapitre. 10.*

**T**OUTE forme doit auoir, (voulant estre remplie de bronze ou autre metal) ses trous & conduits pour respirer, pour autant que nulle chose, (encores qu'elle soit appelée vuide) ne scauroit estre qu'elle ne fust pleine d'air. Au moyen dequoy si la matiere chaude qui est fondue, venoit à se récontrer de l'air qui est leās enclos, se trouuât fermée elle viendroit à rompre la forme. Pour à quoy obuier il est necessaire donner par l'un des coings, entrée à la matiere terrestre & au feu, & de l'autre costé issue à l'eau & à l'air, afin que sans empeschemens de vostre matiere fondue, le creux de vostre forme soit plein. Mais apres cecy, il vous faut encores vser d'une certaine discretion, & premierement vous mettrez l'entrée en lieu tel que le metal puisse courir par tout facilement, & que de main en main,



main, ainsi qu'il se remplit, il vient à sortir, ou bien à s'estendre par toutes les extremitez vuides qui sont à la forme: & encores pour vous y aider & assurer d'auantage, vous ferez vn pertuis qui viendra à respirer depuis le chef iusques au dehors de la forme, concludant que tant plus vous donnerez les entrées larges à vos formes, & les respirements en grande quantité, tant mieux & plus seurement vostre matiere viendra à se getter.

*De recuire les formes pour getter bronze en uniuersel. Chap. II.*

**V**ous ayant monsté cy dessus comme c'est qu'on deuise les formes des figures & celles de l'artillerie: à present pour les getter de bronze, ie vous vueil declarer comme il vous fault les disposer, afin qu'amiablement & sans alteration elles viennent à receuoir l'effusion des metaux, estans bien aduertis que vous sçauiez toutes matieres chaudes estre ennemies de toute chose froide & accompagnée d'humidité. Parquoy estant la forme de terre, qui est de sa propre nature froide, & par l'eau qui s'y met pour la rendre plus maniable & tendre, vient, outre l'humidité, à s'augmenter en froideur. Il est donc necessaire si vous voulez iouyr des fruits de l'oeuvre, & receuoir contentement de vostre travail, vser de separation: pource que deux contraires ne peuuent aisement loger ensemble. Et pour les desassembler fault auoir recours au feu. La force duquel vient à les chasser, parce moyé qu'on appelle recuire. Vous assurât que vous ne sçauriez autrement (sans bien grande alteration) faire entrer & mettre la bronze fondue dans la forme: pourautant quelà ou se trouue le froid & l'humide reclus & fermez, & que la chaleur vient à facoster d'eux, elle se cōuertit en vapeur aeriare, si grosse & venteuse, qu'elle seroit toute seule suffisante d'empescher l'entrée à la brōze, laquelle viendrait à se cōuertir en matiere aqueuse, terrestre & dure. Pour à quoy obuier il est necessaire de recuire toute forme, en laquelle on veult getter, pour fuyr les dāgiers & grans emouuemens que fait la bronze fondue, & outre le domage que la forme viendrait à receuoir: & ce que vous voudriez

getter ne viendrait point entierement, ou ce seroit avec grande violence, tellement qu'au sortir vous ne pourriez euitier à faire grande perte de matiere, sans le malheur qui pourroit succeder à vous & à ceux qui pour vostre aide, ou pour plaisir de veoir, se seroyent assemblez en ce lieu. Pour raison dequoy ie vous dy que celuy qui prendroit la hardiesse de getter sans bien recuire, commettrait ignorance si grande qu'il seroit impossible de la pouuoir celer. Si est-ce que les maistres y procedent selon leur opinion, mais communement toutes les formes se recuisent par dehors, ou dedans avec charbon ou flamme de boys sec, tout ainsi qu'il est plus agreable à l'ouurier. Celles des figures se recuisent par dehors, pource qu'il n'y a moyens de mettre dedans du charbon, & le pouuant faire on le doit euitier. Et semblablement on se doit garder d'y faire passer les langues des flammes, à cause que le lieu est fermé & sans air aucun. Mais quand on le veut recuire on fait à l'entour à quatre doigts loing vn cerne de tuilles de la hauteur de la forme, lequel on remplit de charbon, qu'on laisse brul-  
 ler & cōsumer peu à peu, iusques à ce que le feu vienne à s'esteindre sans aide de personne. Mais vous ne mettez en oubly de faire vn trou sur la sommité de la forme, si vous congnoissiez le pouuoir faire sans vous incommoder & porter dommage. Aucuns sont en coustume faire vn petit fourneau de terre muré tout à l'entour, & presques couuert au dessus d'une voute plainne, & avec flammes de boys peu à peu les recuisent. Et autre façon de recuire les formes ie n'ay veu ny entendu. Celles de l'artillerie qui sont de trois pieces, recuisent en trois differentes façons, ou au moins en deux. La piece premiere se recuit avec boys sec par dedās. Et encores est on en coustume de le faire en deux manieres: L'une est que on vient à coucher la forme, & par dedās avec boys subtil & sec mis en pieces & esclās on donne feu dedans, qui durant trois ou quatre heures, le tout semble estre embrasé. Il en y a aucuns autres qui recuisent telles formes par derrieres, les mettant au dessus d'un fourneau, sur le milieu duquel a vn trou large de la tierce partie du diametre du rond de la forme, afin que les flammes puissent entrer dedans & monter par le milieu,

milieu, tout le long de la forme iusques au coupeau, sans aucunement toucher d'un costé n'y d'autre, afin qu'on euite de brusler la terre & d'offenser la forme, & ainsi continuant, le feu vient à tellement s'eschauffer que la forme vient à s'embrafer, tellement qu'elle se fait rouffe, & se maintient en ceste couleur iusques à ce que les flammes viendront à sortir par la bouche qui est au dessus: qui est signe que la forme est recuite. Au moyen dequoy on ne tarde à la boucher & fermer par dessus, pour la laisser refroidir, mais ie vous vueil aduertir que le feu que vous luy donnez soit plustost baillé lentement que trop hastiuement: ioint aussi que vous deuez estre curieux que les flammes ne viennent à prendre vent au lieu ou vous recuisez. Pource que cela seroit cause que la forme viendrait à se gaster ou à se fendre par dedans. Pour à quoy obuier, quand les formes estoient grandes, ie les recuisoye pour ma commodité dedans vne fosse: pource que la terre recuite se rompt facilement, & se racoustre avec grande difficulté quand elle est rompue. Les ames qui sont les secondes parties des formes, pour bien estre recuites doyuent estre couchées en terre & posées dessus deux treteaux de la grosseur de tuilles, mis à trauers l'un de l'autre vne demie brasse. Puis à l'entour se fait vn rond de tuilles qu'on emplit de charbon, dans lequel on met le feu, lequel lon laisse continuer iusques à ce que de luy-mesme il vient à s'esteindre. Et quand l'ame est tellement refroidie qu'on à pouuoir de la manier aisement, on la prend pour la detremper avec cendres & glaires d'œuf, ou du vin & d'eau. Puis la faudra lier de fil de fer, par le dessus de deux en deux doigts. Et en ceste façon l'auoir acoustrée, vous la pourrez mettre sur la forme en son lieu. I'ay encores veu recuire de ces ames d'artillerie par derriere à vn autre maistre Geneuois, qui ne les pouuoit garder de se tordre à la recuite. Mais il les pendoit en haut avec vne bonne attache de fil de fer. Et à l'entour il faisoit dresser vn gabion en haut d'une demie brasse, percé par le dessous iusques à la grosseur de l'ame, & sur les flancs semblablement. Puis l'auoir remply de charbon, & donné feu, alloit faisant sa recuite par toute sa longueur de demie brasse en demie brasse:

engin certainement assez suffisant pour le faire moquer. Car outre la longueur du temps, & la grandeur du travail, ie ne puis encores croire qu'il eust eu la commodité de bien recuire. L'autre partie, qui sont les formes des culs de la piece, les voulans recuire doyuët estre mises en terre vnüe: & à l'entour on dresse vn circuit de tuille excedât en hauteur deux doigts le bort de la forme, là ou on met le charbõ qui demeure embrasé au dedäs iusques à ce que on aperçoit la forme bië embrasée. Et en telle façon & maniere se recuient les formes, lesquelles auoir esté ainsi cõduittes, il vo<sup>s</sup> faut prendre garde auant que les getter qu'elles soyent bien froides, & si à la recuite se seroyent point fendues. Car vous les remettriez en leur entier avec oignement fait de glaire d'œuf mellee avec tuille brisée & chaux viue: ou au lieu de tuilles, terre de formes recuittes & gettées. Et apres les auoir bien nettoyyées, racoustrerez diligemment ce qu'auoit esté interessé à la recuite. Or vous auoir monstré & declaré comme il fault accoustrer le tout, vous ferez mettre vn drap au dessus, afin que charbon, terre, pierres, ou quelque autre chose ayant pouuoir de vous porter dommage, ne vint à entrer, & auoir conduitte vostre forme à ce point, ie vous conseille de la getter le plus tost qu'il vous sera possible, afin qu'elle ne vienne à tirer de la terre aucune humidité, à laquelle elle est merueilleusement disposée. Or ayant reduit vostre forme en la fosse susditte, vous l'adapterez contre l'issue de la bronze, y mettant la matiere qu'on doit getter par vn canal: Se prenant garde toutefois que le fond de la fosse soit dur, sans aucunement pouuoir reculler pour la pesanteur. Et auoir bien droitement posée vostre forme, vous ne tarderez de battre avec pilon la terre, qui est à l'entour, tellement qu'elle se conuertisse en durté. Et en telle façon continuerez d'y en mettre sans vous ennuyer iusques à ce que vous aurez vnüe toute la fosse. Et afin que telle terre aye pouuoir de se mieux vnir, elle vouldroit estre aucunement humide, mais non point molle. Car sil estoit possible il seroit de besoing qu'elle deuint vne masse de pierre. Apres que vous aurez vnüe vostre fosse, vous ferez vn canal entre la forme & l'issue de la bronze du fourneau de tuilles ou d'os clos tout à l'entour



l'entour de terre de la largeur d'un quart de brassé & de haulteur semblable. Puis l'auoir couuert de cendre avec charbon ou boys, le recuirez tresbien : afin que quand la bronze sera fondue on la puisse conduire par tel chemin à la forme, sans aucunement sentir humidité ne froideur. Et auoir le tout conduit en ceste façon, & recuite encores la coupe, vous verrez vostre bronze estre arriüée à sa vraye & bonne disposition. Au moyen dequoy auoir nettoüyé le canal & la coupe, vous frapperez avec un fer le trou de vostre four, qui est adapté pour issue, tellement que vous aperceurez sortir vostre matiere aussi liquide que huile : si que vous pourrez emplir vos formes tant des figures d'artilleries, de cloches, ou de quelque autre chose, que vous les aurez faites. Et y procedant avec tel ordre: vous ne fauldrez à receuoir le fruit de vos peines.

*Aduertissement & respect qu'on doit auoir faisant l'artillerie.*  
*Chapitre 12.*



Il sembleroit l'artillerie chose de plus grande importance, qui soit subiette à l'art de getter, encores que ie vous en aye amplement parlé, si ne delaisseray-je à vous repliquer en ce chapitre, certains aduertissemens vtils & necessaires. Le premier desquels est de faire le moule, là ou elle se doit edifier dessus la principale forme de l'artillerie, & le vous faut faire d'un arbre sec long & gros, ainsi qu'il est requis pour la piece d'artillerie que vous voulez faire: & encores dauantage cōme vous auez entendu & entendrez. Et pour conclurre, il vous fault faire attacher le stile ou noyau, sur deux cheualots posez en terre. Ce faisant ouurer à la mesure iuste, comme vous voulez la piece d'artillerie estre faite de bronze: & n'ayant la commodité de recouurer boys si gros, comme il est requis, vous l'augmenterez de terre par dessus, le faisant ouurer tout ainsi que s'il estoit de boys. Puis vous ne faudrez à faire le tout ceindre & bien fermer avec cercles de fer. Mais s'il est necessaire de le faire de boys, le chesne

seroit merueilleusemēt bon, & semblablement le chasteñier, pin, & cypres. Mais ils veulent estre liez par le milieu. Puis ayant volonté de faire vostre moule de boys, vous regarderez de recourir petites tables vnies, comme sont les aiz, desquels on fait les luz. Et si par cas fortuit vous prenez vouloir de le faire de terre, vous mettrez premierement par dessus vne corde grosse d'un doigt, tellemēt ioīte que le bois ne sēte chaleur n'humidité: ioīnt aussi que les iointures, commissures, & fentes en tiendrōt beaucoup mieux, qui est le premier aduis & aduertissement qui m'a semblé bon de vous donner. Si est-ce que vous faudrez à mettre ce moule ainsi cōposé au dessus de deux cauelots fermemēt posez en terre, & attacherez le moule, le mettāt à propos de la bouche des corniches. Puis après de la bande dehors vous ferez faire deux rouēs posées cōtraires l'une de l'autre de grosseur sortable, & outre vn pié d'auantage plus que n'est l'ouurage. Et entre icelles & la bouche, ferez vn palon ou masserotte faite en la mesme centine de la rouē. Car en vne d'icelles se met le rouet ou chapel le, qui tient l'ame au milieu, & en l'autre la culasse. Et ferez encores aduertis à mettre les liens aux deux coins à la mesure de l'artillerie: car autrement ils ne seroyent point en leur propre lieu, si qu'on les pourroit quasi estimer pieces inutiles, ne pouuāt tirer ne battre la ou le canōnier prend sa visée. Et fil vous fault encores prendre garde d'aproprier la forme de telle sorte, que depuis le chef iusques au pied elle soit trouuée iuste, afin que l'ame puisse estre mise droittemēt au milieu. Car fil en aduenoit autrement, la grosseur de la bronze ne seroit point trouuée raisonnable au pied, ny au chef: ainsi la piece de l'artillerie seroit perilleuse & fort dangereuse pour celuy qui la voudroit faire tirer, nō seulement semblant difforme à l'œil, ains encores faisant noter de honte & reproche celuy qui l'auroit faite. Encore ne mettrez en oubly faisant corniches de boys ou de terre, de les faire comme ie vous ay dit: & en sorte qu'estās mises hors de la forme, les moules qui sont dedans le creux, ayant premierement osté les cloux qui les tenoyent, toutes viennent à tomber: ou que vous ayez la commodité de les tirer facilement: autrement la beauté de la  
forme

forme vient à se rompre & gaster : & ferez derechef aduertis de encendrer vostre moule l'auoir acheué, ou l'oindre avecques suif ou gresse de pourceau, afin que la premiere terre n'ait pouuoir de s'y attacher, qui seroit chose puis apres fascheuse de l'en separer à vostre plaisir. Vous aduertissant de bié vnir la terre en faisant les formes, & l'auoir assemblée la rompre & briser avecques la main & eau, afin qu'elle ne soit tilleuse, mais vn corps mesme fil est possible. Et prendrez esgard à les mettre subtiles & egales, pource qu'elles viennent à seicher plus facilement, & si ne sont tant fort subiettes à fendre. Mais si par cas fortuit la terre estoit de mauuaise nature, & que vous n'eussiez la commodité de en recouurer d'autre pour la corriger, vous ferez de la terre tendre, & eschauferez la forme : puis estendrez vostre terre pour la seicher fort subtilement : & le semblable ferez de la forme avec l'aide du feu. Et apres avec peu de chanure, ou fouaré bien long, la lierez & enuoloperez tout alentour Mais quand vous ferez arriué presques à la grosseur, de laquelle vous la voudrez faire, pour plus d'assurance vous l'environnerez totalement avecques fil de fer, au dessus duquel vous mettrez la derniere terre. Et apres qu'elle sera bien seichee, vous l'armerez en la sorte que ie vous ay dit & enseigné cy dessus. Vous aduertissant de bien bouscher avecques terre vostre forme, aussi tost que vous l'aurez mise hors du moule, sans mettre en oubly d'acoster la culette & la rondelle du chef, afin que l'ame en soit pl<sup>us</sup> iuste. Puis apres vous preparerez vostre matiere pour getter, laissant pl<sup>us</sup> tost les trous pour respirer trop larges que nō pas estroits & petits, finablemēt avec vne esponge cendrée viendrez à le couvrir & fermer. Puis avec boys ou charbon, ne faudrez à le recuire, ainsi que ie vous ay monstré. Apres vous recommencerez à assembler diligemment toutes voz pieces pour les vnir avec la forme : & commencerez à y mettre la rondelle. Puis apres l'ame, & finablement la culette, & aux aneaux de fer faits expressement, les attacherez avec fil, afin que la bronze ne vint à l'esleuer. Et auoir le tout acoustré en ceste façon, vous emplirez peu à peu la fosse de terre aucunement humide & brisée, la reduisant en sorte que le tout puisse

auoir apparence d'estre d'une piece. Vous aduertissant d'auoir esgard premierement à vostre fournaise qu'elle soit bien recuite, vostre metal bien enfourné: & semblablement que vostre boys soit sec, sans vous oublier de vouloir forcer les effects plus outre que outre que l'art ne commande: & alors que vous aurez desir de cōgnoistre si vostre matiere est fondue, vous mettrez vn baston par l'une des entrées, & avec iceluy vous mettrez en deuoir de sentir si toutes les pieces de brōze sont fōdues: & trouuāt le tout sans aucune durté, vous vous pouuez asseurer que vostre matiere est fondue. Mais pour en auoir plus d'assurāce, vous ne fauldrz à mettre vne verge de fer, & si en la tirant vous l'aperceuez estre nette, vous ne tarderez à nettoyer vostre matiere, la superfluité de laquelle auoir mis hors, vous prendrez & mettrez dedans vne cassette de la matiere pour en faire essay. Et trouuant à vostre iugement qu'il est besoing d'y adiouter de l'estain dauantage, vous luy en dōnerez la quantité que vous cōgnoistrez estre suffisante: & apres que le tout sera bien incorporé & meslé, vous augmenterez aucunement le feu, si que le tout sera conuertty en liqueur & disposition que ie vous ay dite. Au moyen dequoy vous ferez bien nettoyer les canals pour cōduire la matiere dās les formes, lesquelles vous n'apperceurez plustost estre pleines iusques au deffous de la bouche, que vous ferez getter quelque quātité d'estain en la fournaise, afin que rencontrant la bronze, la matiere se vienne à engrossir à l'entrée de la bouche, vous assurant qu'outre les aduertissemens que ie vous ay donné, i'en trouue cinq: le premier desquels est de faire les formes avec l'ordre que ie vous ay dit. Le secōd de les biē recuire: le tiers de les adapter propremēt en la fosse: le quatriesme de biē fōdre. Et le cīquiesme est de mettre tant de matiere en vostre fournaise, que vos formes en soiēt tellement réplies qu'elles viennent à verser. Et suyuant cest ordre & reigle generale, vous ne fauldrz de vous acquerir honneur indicible & vtilité grande.

*Le moyen de faire les moules des cloches, mortiers, & autres vases semblables, de toute grandeur & mesure. Chap. 13.*

Lame-





A mesure certaine à esté trouuée pour faire les cloches des maistres plustost par experience que par raison de geometrie. Vous aduertissant que ce luy qui fut inuëteur des cloches, descript qu'au son on congnoist à peu pres de quel poix doit estre la cloche. Pour raison dequoy ils en ont fait vn certain portrait, que ils ont appellé l'eschelle campanale, avec laquelle commençant aux petites de dix liures, vont montât de degré en degré iusques à ce qu'il les peuent rendre à vingt cinq ou trête milliers. Et pour faire cecy, ils ont poix pour leur guidon & fondement le bort de la cloche qu'ils vueillent faire: pource que c'est le lieu ou le batail vient à donner pour la faire sonner: & afin que plus seurement ce bort vienne à supporter le coup, on le doit faire de metal & d'espeſſeur beaucoup plus grande qu'en autre lieu: & avec ceste reigle on vient à figurer en terre, & au dessus d'une table, la cloche suffisamment haulte & large, accompagnée de toutes ses parties, luy donnant sa vuidange selon le bon iugement que l'art vous enseignera. Puis apres vous viendrez à considerer la cause du son, qui est vn certain effet, procedât de l'acoustremēt de l'air, qui viēt à la toucher tout à l'entour par dehors. Les modernes les cauent les faisant longues & larges à l'equipolent deuers le pié. Mais celles qui sont plus lōgues que larges, me plaisēt les mieux. Mais afin que plus facilement vous entendiez l'ordre, il vous fault retourner à l'equierre, avec lequel vous ferez au dessus du papier vne ligne, sur laquelle pour faire vostre haulteur, vous estendrez quatorze fois la mesure que par l'espeſſeur du bort vous est donnée par l'eschelle cāpanaire au respect du poix. Puis droittement sur le pié ~~en~~ mettez six & demie au dessus d'une ligne qui trauersera pour faire la largeur. Et sur la sommité aura vn autre ligne, sur laquelle vous estēdrez la moitié de la haulteur, qui seront trois & demy d'une chacune part. Puis sur les quatre ances vous tirerez deux autres lignes, qui vous rendront la sommité d'une pyramide taillée enpointe, & dans l'espace de sept lignes vous ne faudrez auoir designée la vuidange de vostre cloche à faire vostre forme. Les extremittez de laquelle seront figurez par

deux lignes, sur la fin desquelles sera posé vn demy cercle qui les touchera toutes deux, lequel pour estre posé en lieu eminent est appelé ciel. Apres on fera le pié de l'ouurage au deffous du siege, lequel vient à soustenir la forme par le dehors, & à se ioindre tellement à elle que le metal fondu n'a aucun pouuoir de sortir cōme ie vous monstrey. Er pour faire ceste partie, il fault tirer les deux lignes pyramidales en hault au dessus de la ligne qui prefigure la largeur telle que vous voulez estre donnée au bord. Puis au dessus de ceste pleine, vous proietterez la haulteur, & en ferez autant depuis les extremitéz iusques à la superiorité des pōs, sur le dehors desquels vous tirerez vne ligne qui en fera la diuision, tout ainsi que l'equierre vous en designera le portrait. Et ceste partie s'appellera le cane, qui est au deffous du bord, qui est la plus basse partie de la cloche. Au dessus de laquelle est tousiours communemēt posé le bord, la mesure duquel ne doit estre aucunement diminuée: pource que c'est le lieu qui endure le travail du batail. Et afin que la cloche ne se rompe on doit proceder en ceste façon. Et premierement deux tiers de mesure au dessus du bord vous deuez commencer vostre montée, luy donnant encore deux tiers de bord en grosseur. Puis sur la troisieme partie, deux & demye continuant à l'egalité de ce bord iusques à douze, là ou il vous faudra mettre les lettres: au dessus desquelles il faudra former la chappe qui doit soustenir tout le fardeau. Pour à quoy paruenir vous prendrez la mesure pour faire vn stile de boys sec, de la longueur & grosseur qui est necessaire pour vostre ceuvre, & le mettrez au dessus de deux caualets bien fermes, tellement attachez que les deux bouts viennent à passer outre: & que commodement on ait la faculté de pouoir seicher au feu la terre mise sur le derriere des formes, sans brusler les caualets. Et au dessus du stile vous composerez vne forme de terre quelque peu plus courte, que ne doit estre la longueur de la cloche, qui doit estre dressée en forme pyramide, grosse deuers le pié, & subtile deuers le chef. Plusieurs maistres ayans desir d'auancer leur ceuvre les font de bois pour les grandes cloches, appellans ceste premiere partie la roche: à cause qu'ils l'esgallent avec la terre

terre. Et la nomment ainsi, pourautant que la grosseur respond par tout autant comme le tiers du masse. Et auoir le tout ainsi acoustré, mettent au dessus terre & cendres, iusques à ce qu'il approche pres du terme, duquel ils veulent rendre esgal en grosseur leur masse. Or l'auoir rendu vny vous commencerez à faire de la terre des formes, la chemise, qui est le moule tel que doit estre la cloche, quand elle sera formée de metal. Et mettez se moule au dessus de la mesme table pour l'acoustrer, tout ainsi que vous avez faitte celle du masse. Ioignant laquelle vous ne faudrez de la mettre sur les mesmes caualets, là ou vous prendrez peine de les rēdre les plus subtiles qui vous sera possible. Sās toutefois vous oublier de changer vos mesures. Car la grosseur trop excessiue rēd peu de son, & si represente vn ie ne sçay quoy de triste. Et la trop grande subtilité (oultre le dangier qui luy en peult succeder) semble sonner fort rudement. Apres vous ne faudrez à faire deux places vuides au dessus du coupeau de la cloche, pour y mettre lettres à vostre volonté. Et le semblable ferez sur le pié du bord: puis au dessus de la terre de telle chemise, remise la table dessus les caualets & bien acostée du massé, vous commencerez à mettre au dessus suif foudu, meslé avec huile ou greffe de pourceau: apres aux lieux designez, ou qui vous apparoiſtront les plus agreables, vous mettrez lettres, fueillages, armes, ou autres ornemens pour embelir & rendre plus de decoration à l'œuure: & auoir le tout conduit au point que ie vous dy avec vn pinceau, vous viendrez à verser au dessus vne terre liquide & subtile, qui aura esté passée & composée avec escaille de fer, laquelle vous laisserez tresbiē seicher au vent, ou au soleil. Puis luy en donnerez continuant par trois ou quatre fois en ceste façon: puis enuelopperez la terre du filet, & l'approchant tout bellement du feu, pourrez commencer à la seicher, & l'auoir reduitte à la grosseur qu'elle doit auoir, on viendra à lier le tout avec fil de fer. Puis avec cercles de fer, ne faudrez à la cēdre pour pl<sup>e</sup> grāde assurance. Et aussi tost que vous aurez acheuée vostre forme & bien seichee, vous la mettrez en son lieu, battant la poincte du chef & au milieu, qui s'appelle la roche, tellement que vous

viendrez à retirer vostre forme, au dessus de laquelle vous accoustrez le lieu du ciel, pour pouuoir former iustement le coupeau, chappe, ou courronne, ainsi appelée du vulgaire: & en la vuidange du milieu, la ou estoit la roche, vous mettrez le feu, apres l'auoir remplie de charbon & boys pour la seicher, & ayant congnoissance qu'elle soit reduitte à son deu, vous ne faudrez avec quelque instrument d'oster les armures & filet, pour mettre au dehors vostre forme, laquelle vous poserez sur quelque chose ferme, ou la soustiendrez en l'air, donnant commodité aux ouuriers qui la regarderont dedans, de la pouuoir accoustre s'il est necessaire, sans mettre en oubly de retirer avec vn fer la chemise, ou bien la briser si vous n'avez la commodité de la pouuoir retirer entiere. Si est-ce que vous la mettrez à part: & apres que vous aurez deuestu & rendu nud vostre masse, vous le racoustrez encores s'il est de necessité, & en ceste façon vous pourrez recouurer vos deux formes presques acheuées, sans qu'il s'en faille fors que lance au masse, & à la tunique la forme de la couronne. Lesquelles choses ie vous enseigneray, afin que vous puissiez dōner fin à vostre œuvre. Ces deux formes paracheuées & iointes ensemble, rendent le creux & vuidange de la cloche, tellemēt que la mesure de sa grosseur vient à se trouuer en la mesme qualité qu'on l'auoit souhaitée & proiettée au commencement. Mais pour autant que l'eschelle campanaire pourroit varier, à cause de la diuersité des mains, entre lesquelles elle pourroit tomber, ou pour ne la garder songneusement, ou pour oublier la longueur & largeur. Mais pour obuier aux accidens qui en pourront succeder, voulant y proceder seurement, il fault peser la terre de la chemise iustement, & vous fault entendre que toute liure fait en vuidange de liures, sept de metal, & aucunes fois sept & demy, selon que la terre est pure ou composée de quelque chose qui la rend legiere. Au moyen dequoy vous ferez à vostre vouloir le poix de la courronne, proiettant de l'eschet de la matiere, prenāt garde s'elle est neuue ou vielle, de cuiure ou d'estain fin. Car aucunes fois elle vient à d'escaler, quelques fois de six, sept & huit pour cent. Mais la coustume des maistres est de le iuger à dix  
pour




pour iouer au plus sur. Ioint aussi que par ce moyen ils viendront à sçauoir la quantité de la matiere qu'ils auront mise dedans la fournaise : pource qu'ils auront congnoissance à peu prest de quel poix pourra estre la cloche. Or reste il maintenant à faire la tierce partie de toute vostre forme, qui sont les soutenemens avec lesquels la cloche se peult attacher. Et pour les faire il fault tenir deux chemins. Le premier est de les faire de cire au fond<sup>o</sup> d'un chauderon de cuire. Et l'autre est de les faire de terre pour fuyr despençe, faisant l'aneau & manettes. Puis les ayant formé au milieu viennent à les oindre & assembler & lier avec terre, laissant sur vn chacun bras de manette vn respirement & sur le milieu laisserez vn certain rōd pour emplir la forme & sa coupe grande de la matiere qu'on y voudra getter. Et apres que vous aurez nettoyée & paracheuée ceste premiere forme, vo<sup>o</sup> formerez dedans le creux du masse vn mōceau de terre, dās lequel vous aurez posé vn fer en façon d'un grand clou. & renuerserez les extremittez d'iceluy: Car le batil de la cloche y sera attaché. Au dessus duquel vous mettrez quantité de terre mole & tendre, ayant en memoire de mettre vostre fer au contraire des manettes de la cloche. Car si elle venoit à battre aux lieux non acoustumez, la cloche seroit en dāgier de se renuerser. Apres que vous aurez le tout cōduit ainsi qu'il s'appartient, & que vous aurez fantasie de getter, vous ne faudrez à faire recuire deux formes mettāt à l'ētour du masse quantité de tuilles, rengées en façon de fourneau, de la mesme hauteur du masse. Et mettrez dedans à force charbon, cōtinuant le feu iusques à ce que l'une & l'autre forme soiēt recuittes. Et si par cas fortuit quelque ouuerture venoit à se monstrier, vous ne faudrez avec glere d'œnf d'y remedier. Et si ne faldrez à les mettre en la fosse au deuant du fourneau, apres que vous les aurez encores recendrées. Et premierement vous faudra commencer au masse, au dessous duquel sera posée quantité de bois en façon de croix. Et s'il est necessaire que ceste fosse soit tellement profonde qu'elle puisse couurir toute la forme. Vous aduertissant qu'il vous fault remplir la fosse de terre, l'abattant peu à peu au dessus des formes, en la propre maniere que

vous auez vſé faiſant l'artillerie, à laquelle eſt requis vn plus grand trauail que n'eſt aux cloches. Pour-autant que les petites n'ont point la neceſſité d'eſtre liées ainſi que les grandes, aufquelles giſt aucunes fois grand peril, pour auquel obuier ie vous aduertiy qu'il la vous fault armer outre les armes ordinaires de cercles de boys, & ſerrer fort bien voſtre forme avec filets de fer ou cordes, ſi vous congnoiſſez de n'auoir faiſt voſtre forme aſſez forte, au get de laquelle vous donnerez ordre, & mettrez diligence que voſtre matiere viēne tout bellement, faiſant en forte que le metal ſoit bien parfaitement fondu ſans auoir en ſoy chaleur trop exceſſiue. Et ſi vous deſirez le ſon de voſtre cloche eſtre plaiſant, vous la alierez avec bon eſtain, qui ne tienne aucunement du plomb, à cauſe qu'il luy pourroit oſter aucunemēt le ſon. Les formes des cloches qui ſont d'exceſſiue grandeur ſont miſes par les maiſtres au milieu d'vne quantité de boys poſé en façon de ciſterne, ayant tout à l'entour vn cercle de fer pour bien ceindre & garder que la forme ne vienne à reculer. Ioint auſſi qu'il fault mettre vn autre cercle au dernier du maſle pour le garder de reculer. Et ſera le tout attaché à deux aneaux qui aurōt eſté poſez ſur le coupeau du maſle expreſſement pour ceſt effect. Et auoir conduit voſtre œuvre en ceſte façon, faudra cauer au milieu, faiſant vne place en forme de pyramide pour mettre le feu: ſans mettre en oubly de laiſſer ſur la ſommité quelque petite breſche, afin que la fumée ne vint à ſ'enfermer: & eſt neceſſaire que ceſte place ſoit faite & murée de tuilles, ayant vne foſſe au deſſous de la profondeur de deux braſſes. Et au deſſus d'icelle faudra trauerſer aucuns fers, afin que le charbon & cédres du boys puiſſent tōber dedās. Vous aduertiffant qu'il faut engroſſir ceſte pyramide vuide peu à peu de terre, iuſques à ce que les meſures des formes y ſoiēt totallemēt parfaites. Aucūs maiſtres ſont d'opiniō qu'on doit laiſſer refroidir la matiere en terre, autant de iours comme elle contient de milliers en peſanteur, mais il me ſemble pour faire bonnes les cloches, qu'il vous fault auoir bon metal, & qu'on les gette eſgale par tout, ſans qu'il demeure au deſſus aucune macule de cendres ou terre, & que le batail ſoit proportionné à la

grandeur


grandeur de la cloche, laquelle faudra attacher en sorte qu'on la puisse facilement mouvoir. Or me reste-il maintenant à vous mōstrer les degrez de l'echelle campanaire sans laquelle les maistres pourroyent malaisément trauailler.



Et comme vous voyez ie vous l'ay commencée de dix liures pour degré iusques à dix milliers, non point par mon experiēce, ains pour le rencontre d'aucunes que i'ay veuēs entre les mains des maistres. Vous assurant que ceste inuention a esté plus tost trouuée par l'experiance des maistres, que par reigle de Geometrie, comme ie vous ay desia dit.

*Reigle pour congnoistre de quelle pesanteur doyuent estre les batails selon la grandeur des cloches. Chapitre 14.*

**T**Out ainsi qu'on ne peult donner de l'eschelle campanaire reigle determinée, le mesme ie vous dy des batails. Parquoy il est necessaire, si vous voulez que les cloches sonnent, qu'elles ayent le coup proportionné. Car si la cloche est battue avec batail plus legier qu'il ne luy conuient, elle ne rendra entierement le son qu'elle doit:& si vous la battez avec vn plus gros & pesant qu'elle ne peult porter, elle rendra vn son aspre & rude au possible, outre le dangier auquel vous trauaillez de l'exposer pour estre rompue. Pour à quoy obuier on doit faire les batails proportionnez aux cloches.




Et afin qu'on y procede ainsi qu'il s'appartient, j'ay trouué que les maistres praticiens ont donné aux cloches de dix liures, le batail d'une liure & demie. A celles de 20.2.liures. A celles de trente deux & demie. A celles de quarante 3. & demie. à celles de cinquante 4. à celles de 60. quatre & demie. à celles de 70.5. à celles de 80.5. & demie. à celles de 100. 6. & demie. à celles de 105.9. à celles de 200.12. à celles de 250.13. à celles de 300.15. à celles de 400.19. à celles de 500.23. à celles de 600.27. à celles de 700.30. à celles de 800.34. à celles de 900.37. à celles de 1000. les aucüs luy dōnent le batail pesant 42. & les autres 44. à celles de 1200.46. à celles de 1300.48. à celles de 1400.52. à celles de 1700.63. à celles de 1800.67. à celles de 1900.75. à celles de 2000.80. à celles de 2500.100. à celles de 3000.125. à celles de 4000.




de 4000. 140. à celles de 5000. 160. à celles de 5500. 175. à celles de 6000. 190. à celles de 6500. 200. à celles de 7000. 220. à celles de 7500. 235. à celles de 8000. 250. à celles de 8500. 280. à celles de 9000. 290. à celles de 9500. 285. à celles de 10000. 315. à celles de 11000. 315. à celles de 12000. 340. à celles de 13000. 370. à celles de 14000. 390. à celles de 15000. 410. à celles de 16000. 430. à celles de 17000. 450. à celles de 18000. 490. à celles de 20000. 510. à celles de 21000. 530. à celles de 22000. 550. Vous aduertissant d'en auoir trouué bien peu approchant ou excédant vn tel nombre. Car en nos prouinces on ne se delecte de les faire tât fort excessiues. Et suis d'aduis que les maistres ne se doyuent obliger à suyure ces reigles des batails, ains y proceder selon la grandeur des cloches, avec vne certaine discretion, la particularité de laquelle ne vous peult aucunement estre donnée.

*Le moyen d'attacher les grosses cloches, tellement qu'on les pourra facilement mouuoir pour les faire sonner. Chap. 15.*


**L**n'est ia besoing de faire long discours des cloches communes, pourautant que tout maistre charpentier est assez pratiec de trouuer le moyen, par lequel il fault mouuer & guyder les cloches. Et pour ce faire on met dedans les cloches, certaines grosses pieces de boys sur lesquelles on vient à



poser les cloches, mettant le rond des deux ances en certains canals pour c'est affaire appropriez d'õnant ordre que la cene en laquelle la corde sera attachée, soit l'õgue: afin qu'accõpagnée de la pesanteur qu'elle doit auoir, celuy qui la sonne, ayt pouuoir de la faire mouuoir plus facilement. Mais la difficulté le trouue cõmunement en celles qui sont de pesanteur extraordinaire, si que plusieurs fois on ne peult trouuer aisement la cõmodité de les pouuoir loger. Parquoy il est necessaire avec engins industrieusemẽt inuentez de loger la cloche, & faire mouuoir le batail en ceste façõ qui vo' est descrite cy dessus. Aucuns ont trouué moyen de les faire brâsser par le moyẽ qui ce presente à vo' en ceste figure.



Et aucuns autres avec engins se sont trauaillez de faire mouuoir seulement le batail, tellemẽt qu'ils luy font donner d'v-




ne bande

ne bande à autre. Vous assurant que i'en ay vsé en ceste façon pour garder la cloche du chasteau S. Ange, laquelle pour estre rōpue i'en ay faict refaire par plusieurs fois au temps du pape Paul.

*Ordre & moyen de soulder les cloches fendues. Chap. 16.*

**A** PRES les matieres susdites ie vous vueil apprédre à soulder les cloches, qui ont esté fendues. Vo<sup>r</sup> aduertissant qu'il vous faut former au dedás de vostre cloche, & la fortifier avec trois ou quatre verges de fer. Puis l'auoir faitte recuire la mettrez en son lieu courrât fort bien avec terre mole toutes les extremitez. Et apres ayant remply la vuydange de la cloche de terre brisée aucunement humide, vous la mettrez dedans vne fosse, ne laissant rien de decouuert, fors le lieu ou elle sera fendue: afin de receuoir les flâmes qui viendront à sortir d'une petite fournaise, lesquelles vous cōtinuerez iusques à ce que vous congnoistrez à la blancheur du feu que la cloche est bien echauffée. Et alors vous prendrez quelque quātité de metal fondu, & mis dedás vn creseul, le getterez dedans la fente: & de nouueau laisserez eschauffer les deux metaulx, afin qu'ils se puissent ioindre & vnir ensemble. Et quand vous serez d'aduis que le tout est bien incorporé, vous ferez esteindre le feu. Et apres que vous luy aurez donnée la commodité de le refroidir, vous trouuerez vostre cloche estre souldée.





Mais le lieu ou elle estoit interessée en sera plus gros, à cause de l'abondance du metal que vous y aurez mis. La superfluité duquel vous leuerez avec eschampres, & la reduirez en bonne forme, si que vous trouuerez vostre cloche d'une piece, tout ainsi que si elle fust esté regettée, & non moindre en bonté qu'elle estoit au parauant, comme l'experience vous en rendra clair tesmoignage,

PROHEME DV SEPTIESME  
LIVRE DE LA PIROTECHNIE, DES  
moyens & ordres des fusions.



Le second effet de l'art de getter, est de bien fondre vostre matiere, & de preuoir à quatre necessitez. La premiere desquelles est la fournaise qui tient le feu & metal conioint ensemble. La seconde est le boys ou charbon, necessaire & propre nourrissement du feu, de la force duquel vient à sortir l'effet que vous allez cerchât. La tierce sont les matieres disposées aux fusions par corruption, aliage, ou de leur propre nature. La quatriesme est le travail corporel du maistre & de ces ministres, qui se doyuent estudier à faire fournaises, machines, casses, & autres instrumens propres pour conseruier les metaux fondus, & qui soyent tellement regeez que le feu n'ayt aucun pouuoir de les empirer: car ils viendroyent à se gaster, & seriez empeschez de pouuoir paruenir à ce que vous desirez. Et pour ce faire il vous fault mettre les instrumens en lieu ou la force du feu puisse operer, si que le tout soit proportionné selon la quantité de la matiere, laquelle est besoing de forcer pour vaincre la durté, laquelle y est représentée. Et avec les dons de vostre bon iugement, vous ne faudrez d'ateindre au but auquel auez pris visée: mais pour autant que la lumiere du iugement ne peult estre monstrée sans la pratique, laquelle est maistresse des ars, ie me garderay de vous en faire long recit: pour ce que i'ay en pensée de vous satisfaire quelque  
iour &




iour & donner contentement à vos desirs avec l'aide de la susdite pratique.

*Comme on doit faire les fourneaux à reuerberer pour fondre bronze & tout autre metal. Chapitre 1.*

**V**ous ayant cy dessus monsté le moyen de faire les formes pour getter, & comme il les fault disposer pour leur faire receuoir la fusion des metaux, il est maintenant necessaire que ie monstre avec quels instrumens, ils sont rendus tendres & conuertis en liqueur fluante comme eau, afin qu'ils puissent facilement entrer par tous les creux des formes que vous auez faittes. Vous aduertissant qu'outre le feu qui est le premier acteur, il vous fault faire dresser vne fournaise puissante & forte, laquelle ne s'eslit tant seulemēt pour la commodité, ains pour la necessité qu'on en a lors qu'on veult getter grande quantité de matiere. Et la fault bastir de briques ou d'autres pierres qui puissent resister au feu, pour la reuerberation duquel, aucuns maistres la font tout ainsi qu'est vn four à cuire pain. Aucuns autres la font en forme d'un œuf, laissant vn trou pour donner chemin aux flammes. Vous aduertissant qu'aucuns font la voulte de ceste fournaise basse, & d'autres prennent plaisir qu'elle soit haulte, donnant ordre de laisser vne entrée au dessous à l'air, afin que les flammes se puissent estendre, & demeurer plus ardentes & viues: mais voulant eiter que telle diuersité ne vous vint à cōfondre, ie vous aduertty que premierement il vous fault faire à l'election du feu vne place vuide de la grandeur que vous connoistrez estre necessaire, laquelle vous ferez ceindre de muraille de deux brasses & demye en diametre, sur lesquelles vous en creuserez vn autre longue de deux brasses & vn quart, & sur l'extremité vous laisserez les bresches pour donner sortie aux flammes, puis vous ordonnerez le lieu par lequel vous mettrez le feu & boys. Vous assurant d'auoir fait autresfois murer vne semblable place de tuilles la faisant dresser en pendant, afin que la bronze fondue, ne s'arrestast. Et au dessus d'icelle pleine, i'ay faict mettre vne couuerte de semblables tuilles, ressemblāt presque la


forme d'un luc comme pourrez appercevoir en ceste figure.



Il fault tailler la premiere partie de ceste fournaise, ioignant deux tuilles, dans lesquels vous enchasserez l'espine de fer tellement, que le plus gros d'icelle soit plus prochain de la bronze. Vous assurant d'en auoir vŕ en plusieurs faons & moyens. Et mesmement me suis seruy plusieurs fois de pierre, qui auoit pouuoir de resister au feu. Et suyuant cest ordre i'ay fait delaisser des bresches aux fenestres du mur de la largeur d'une demie brasse par dedans. Et à vn quart de brasse faisoŕe commencer la couuerture de la voulte pour couurir le four, au dehors duquel ie faisoŕe dresser les murailles toutes droittes, y faisoŕe mettre au lieu des fenestres petites bresches approchantes la faon des canonnieres estans larges par le dehors, & estroittes par le dedans. Et auoir le tout reduit en cest estat, faisoŕe dresser le lieu auquel se deuoit mettre le bois pour flamber dedans la fournaise En laquelle ie faisoŕe premierement faire vne grande fosse profonde & longue selon l'estendue du four, & plus basse d'une demie brasse que la plaine de l'entr e du feu. I'ay faict trauerŕer à force bois, s'approchant du lieu ou le feu doit estre mis, afin que les flammes ayent pouuoir de faire enrr e sans violence au lieu ou la bronze est pos e. Et au dessus d'icelle i'ay donn e ordre de faire laisser quelques fenestres pour donner commodit  aux flammes de sortir. Et semblablement deux petites voyes dans l'espeŕeur de la


muraille

muraille pour manier & veoir la bronze: à laquelle vous pourrez faire faire vne telle forme, ou bien telle qui vous sera plus aggreable. Vous aduertissant de laisser les lieux ou vous mettrez le boys les plus espacieux qu'il vous sera possible. Et le semblable ferez de celuy ou la bronze sera logée. Et afin que ne tombiez en erreur, ie vous vueil donner trois aduertissemens principaux, Le premier desquels est qu'il vous fault faire la fournaise de bonnes tuilles ou pierres, qui puissent resister à la vehemence du feu. Et si les fault couvrir avec terre blâche, & mesmemēt de celle que les voirriers vsent faisant leurs fourneaux. Le second aduertissement qu'il vous faut recuire vostre fournaise, si elle est neuue auant que d'y mettre la bronze. Et principalement le fond d'icelle pour obuier au dommage & pertes qui vous pourroyent succeder. Le tiers est qu'il vous fault prendre garde si aucune fente seroit esté faite au fond en la recuisant: pour la racoustrer avec chaux & tuille brisé, luy faisant vne chappe & deffense contre les flammes des cendres. Et afin que la chaleur d'icelles ne vienne à faire entrée au fond pour interesser la bronze fondue il vous fault dresser iceluy en sorte qu'il se puisse soustenir sans s'appuyer au fond de l'autre. Vous assuraat qu'il m'est impossible de vous declarer davantage des fournaises à reuerberer, avec lesquelles il vous est loisible de fondre plus grande quantité.




Ie ne vueil passer outre sans vous declarer quelque chose de

ceux qui font leurs fournaïses en façon d'œuf, estans prouquez d'une raison qu'ils mettent en auant, disant que de l'entrée iusques à l'espine à certaine distance, si fort large, qu'auant que les flammes viennent apparoir hors des fenestres, qu'elles ont passé par deux fois au dessus de la bronze.. Ceux qui ont opinion & trouuent bon ceste façon de faire, assurent qu'il est plus facile à manier la bronze dedans telle fournaïse.




Mais ceux qui s'arrestent sur la forme ronde amènent deux raisons. L'une qu'ils s'arment de l'expérience, si par cas fortuit ils se sont longuement exercitez en cest art, conduisans & accompagnans ceste raison de plusieurs autres.



Au moyen dequoy, ie croy que toutes les lignes inserées dedans



dedans ce cercle, viennent à se rendre à vn seul ceintre. Ioint aussi que le feu estant reduit en ceste concavité, ne fait autrement que le soleil en vn miroir creux, auquel nous voyons le feu s'embraser. Qui est tout ce que vous ay peu trouuer sur la diuersité des fours: dans celuy desquels qui vous viendra plus à souhait, ne faudrez de mettre la bronze en son lieu esleuée & esloignée du fond sur certains tuilles à vn quart de brasse. Et l'ayant enfournée, bien large avec bois sec, mettez le feu par son conduit, le continuant iusques à ce que le tout soit rendu en liqueur. Laquelle (apres auoir ostée l'espine de fer) vous ferez entrer dedans les formes par canals, si que les parties vuydes d'icelles viennent à se remplir comme ie vous monstreray en leur lieu.




*La façon de fondre à creseul & autres diuers moyens à conuertir & reduire en liqueur metaux avec charbon & soufflets.*

*Chapitre. 2.*

**F**ONDRE en casse & en panier est presque vne mesme chose, & à tous deux est necessaire le charbon & soufflets. Vous aduertissant que la cassette, ou affinement que les maistres appellent, doit estre murée avec tuilles & terre en la propre façon qu'est vne forge. Et au milieu d'icelle fault laisser vn creux rond, ayant l'entrée large & le fond estroit, sans oublier d'y laisser vn trou, par lequel on y pourra mettre vne piece de brique taillée expressement pour le fermer. Et apres que le


tout sera bien cendré & seiché, & que les soufflets seront esté accommodés, il vous faudra la remplir de charbon pour la faire tresbien recuire. Et l'ayant reduitte à ce point, la tournerez remplir de charbon, luy faisant prendre feu peu à peu, iusques à ce qu'il soit totalement embrasé. Puis auoir mis la matiere que vous voulez fondre, commencerez à mouuoir les soufflets sans cesser, iusques à ce que vous la cognoistrez estre fondue. Et alors ostant l'espine que vous auez mise au fond, enuoierez vostre bronze dedans les formes par la conduite d'un canal. Le pennier doit estre posé en lieu espacieux, & se compose en terre avecques bois fiché & couuert de verges de chastener, faules, & autres semblables arbrisseaux. Et se forme tout ainsi qu'un gabion, de la haulteur & largeur que cognoistrez estre duisante à vostre entreprise. Puis le remplirez de terre bien battue au milieu, de laquelle vous ferez un creu autant profond & large que vous cognoistrez estre suffisante pour tenir la matiere que vous voulez fondre, sans mettre en oubly d'accoustrer les fonds & faire un trou pour donner issue à la bronze, puis auoir mise l'espine de fer, viendrez à la cendrer avec cendres, qui ayent esté destrempees avec eau, ou le sel aye esté fondu. Puis apres auoir fait recuire vostre gabion, & logez vos soufflets, y procederez tout ainsi que vous auez fait, fondant en cassette. Vous aduertissant d'auoir veu ceste façon de fondre en plusieurs & diuers lieux, & avec cest instrument les maistres fondeurs de cloches en gettent une qui



peut peser enuiron mille liures. Certains maistres François en faisans leurs cloches au lieu des verges, des arbres & boys, font dresser vn mur en façon d'vne petite tour. Ce que ie trouue tellement agreable, que ie ne faudray d'en vser ainsi, quand la commodité l'y offrira.

*Le moyen de fondre en casse. Chap. 3.*

**L**A casse à fondre metal, est communement posée sur vne petite cage faite de verges de fer ayant vn manche, avec lequel on la peut facilement mettre dehors de la forge. Vous aduertissant que c'est vn instrument duquel les maistres vsent souuentefois, & mesmement ayans peu de matiere à getter. Et est semblablement requis qu'elle soit composée de bonne terre bien recuitte & cendrée, ayant tout à lentour du bort vne coronne de deux ou trois testes de tuilles, pour mieux retenir le charbon pour faire fondre la matiere qui est dans la casse, laquelle vous porterez pour getter au lieu ou voz formes ont esté dressées. Vous aduertissant que i'ay encore veu fondre au milieu d'vne chambre dedans vne casse, couuerte, sans estre aucunement mise en forge quelconque ne enuironnée de cendre, ains estoit seulement posée sur vn tripier de fer, sur lequel les canons des soufflets qui estoient longs, venoyent à donner. Si que la bouche d'ou le vent sortoit, venoit à estre appuyée sur le bort de la casse, laquelle auoit la bouche large, & si estoit plus haulte sur le derriere qu'elle n'estoit sur le deuant, ayant tout alentour du bort vn




sercle de fer de la haulteur de quatre doigts, posé expressement pour retenir le charbon. Et en ceste façon i'ay veu plusieurs fois fondre quantité d'argent, lequel on pouuoit manier facilement & si par cas fortuit quelque grain d'argent venoit à sortir hors de la casse, par les lieux qu'on auoit delaissez pour donner air, le maistre faisoit mettre de l'eau en vne cassette qui estoit au dessous dans laquelle se retournoit tout ce qui venoit à sortir hors de la casse.

*La façon de fondre en creseul. Chap. 4.*




A fonte de creseul se fait en deux manieres, l'une se fait avec l'aide du vent des soufflets, & l'autre avec l'aide du fourneau æré. Mais ie vous vueil mōstrer maintenant celle des soufflets, comme plus vsitée, & avec laquelle on vient à fondre plus diligemment. Ce qui est tresnotoire aux orfeures, & autres faisans profession de cest estat. Or pour y proceder en ceste sorte, il vous fault premierement dresser vne forge, & l'accompagner d'une paire de soufflets, au dessous desquels vous mettrez la quantité de charbon que vous penserez estre suffisante pour couvrir vostre creseul, lequel vous mettrez plein de matiere au milieu des charbons embrasez. La ou vous le laisserez iusques à ce que vous ayez congnoissance que la matiere soit fondue. Et si vous fault mettre diligence de le tenir tousiours droit au milieu & esleué entre les charbons, si bien couuert, que chose quelcōque n'y puisse entrer,






afin que vous puiffiez getter nettemēt vofre matiere fur les formes. Il en y a aucuns qui pour plus de commodité font vn crefeul muré tout alentour, & mefmement les fondeurs de leton: & au fond d'iceluy font trauerfer deux ou trois fers, donnāt ordre que le vent des foufflets vienne à les battre par deffous. Puis au deffus des fers mettent leur crefeul avec la matiere. Et l'auoir rempli & couuert de charbon, fe trauaillent de faire mouuoir les foufflets, iufques à ce que la matiere foit fondue, & affeurent les maiftres d'auoir trouué par experience, que le leton vient à conferuer fa couleur beaucoup plus par ce moyen qu'il ne fait autremēt. Ioint auffi qu'il fe vient à fondre plus proprement fans y employer trauail exceffif.

*La maniere de fondre avec fourneau à vent. Chap. 5.*

 E moyen de fondre à fourneau à vent, eft de plufieurs appellé acré, & fi procede fans bien grand trauail avec vn fourneau de la grâdeur qui vous fera plus agreable: & vous fault eftre pourueu de crefeul & de charbō fans y adiouter vent de foufflets, ny d'autres inftrumens, fors de celuy qui procedera de l'air. Et pour paruenir à vofre deffeing, il vous fault premierement murer vofre fourneau, & le pofer fur vn gril de fer, tellement qu'on le puiffe porter au milieu de quelque fale ou le vent fera deuoir de fouffler: & doit eftre ce fourneau quarré, large d'une demie braffe, & hault d'une braffe, ayant la bouche large de trois quars de braffe: ou plus fi vous y prenez fantafie, & à fleur de terre en ferez vn autre de la largeur d'un quart de braffe ou plus, & de la haulteur d'un pié: & au deffous d'icelle fera faict vn creux, fur lequel on trauerfera verges de fer, en façon de gril, fur le milieu duquel vous poserez vne tuille quarrée, taillée fur la forme de la grandeur du crefeul. Sur lequel il fera mis, lors qu'on voudra fondre. Vous affurant que la matiere fera plus promptement fondue qu'avec les foufflets, fi le crefeul eft enuironné de charbon & que le vent ne vienne à luy manquer. Le vous ay defia dit qu'on peult porter ce fourneau, & le pofer en façon d'un panier couuert de terre fur vn grand tripier de fer, au fond duquel fera fait vn gril: & qui voudra que la matiere vienne à fe fondre

plus promptement, il faudra mettre vne grande coupe pleine au deffous, dans laquelle les charbons ardens viendront à tomber, & à se esteindre : tellement que leur frissonnemens & exhalations ietteront quelque vent qui sert de commodité, sans l'aide que ceste coupe fait à ceux qui fondent or & argent, les grains desquels se trouuent facilement dans l'eau, qui est posée dans ceste coupe.



*Des fusions de bronze & autres metaux. Chap. 6.*

**L**E vous ay monstté & escript l'art de getter, la façon de faire les formes, de les recuire & de fondre les matieres avec soufflets & sans iceux: & m'y suis trauaillé le mieux qu'il m'a esté possible. Et maintenant ie vous vueil aprendre de conduire & mener à fin les œuures, par lesquelles les instrumens se font. Et premierement i'ay desir de vous declarer le moyen qu'il vous fault garder aux fournaïses, lesquelles reuerberent lors que vous voulez fondre. Ausquelles ne suffist estre parfaittes & bien faittes, ains est requis qu'elles soient meublées de boys sec, tant pour maintenir la flamme, qui est l'ame, que pour estre la cause efficiente de l'effet. Dauantage il vous est requis d'auoir l'opinion d'un maistre experimenté, qui vous donne la congnoissance des effets qui procedent du feu, & que les matieres de leur propre nature soyent bien disposées à fusion. Ie vous dy qu'il vous fault recouurer du boys qui soit plus disposé à flamber qu'à rendre braise. Puis apres il vous fault auoir le four bien recuir, ceint, & enuironné de cédres, & le trou bien bouché & cendré

& cendré ainsi qu'il appartient, & enfourner vostre matiere le plus aisement & au large qu'il sera possible. Puis ayant fermé les deux fenestres que vous avez delaissées au dessus pour respirer, commencerez à donner feu, mettant premierement le boys sur la bouche de l'entrée, continuant de l'augmenter peu à peu, iusques à ce que vous l'aurez conduit à l'endroit de la fenestre, par laquelle les flammes ont entrée dedás le four, là ou vous viendrez à recharger sur le feu quantité de boys, sans cesser d'augmenter la force du feu, iusques à ce que vostre matiere soit inclinée à fondre. Et à l'heure avec plus grande diligence renforcerez le feu, iusqu'à ce que vous apperceurez vostre matiere estre en estat de pouuoir estre conduite dedans vos formes. Vous aduertissant qu'aucunefois la longueur du feu laisse quelque peau sur la matiere, qui ne laisse penetrer la force du feu. Mais on y peult remedier en rompant telle matiere ainsi congelée, donnant entrée plus facilement au feu. Lequel ayant fait augmenter, refermerez vostre four iusques à ce que vous verrez vostre matiere estre totalement fondue. Et alors vous y adiouterez telle quantité d'estain qu'il vous semblera estre assez suffisante pour la pouuoir corrompre, & avec vne piece de boys ou baton de fer, vous trauaillerez de nettoyer vostre matiere, mettant au dehors d'icelle les pieces de tuilles que vous y avez mises pour tenir la bronze suspendue, ou autre superfluité qui seroit tombée au dedans. Puis avec vne cassette, vous en prendrez quelque quantité pour en faire essay. Et vous semblant ne satisfaire au deuoir, vous y adiouterez ou diminuerez, sinon & qu'il vous semble en estat pour pouuoir estre gettée, l'ayât faite rechauffer, viendrez à getter hors vostre matiere. Mais premierement vous serez aduertis de chercher par la fournaise la broche de fer, & autres choses, pour veoir si le tout seroit bien fondu. Et trouuant que le tout soit reduit en liqueur fluide, comme eau ou huile, vous viendrez avec vne cuillier de boys pour nettoyer. Puis getterez au dessus gresse de pourceau meslée avec du sel-nitre. Et auoir encores donné augmentation de feu, & nettoyé vos canals, ne fauldrez à frapper sur l'entrée ou la broche est posée, tellement que vous

l'enuoyerez dedans, donnât passage à la bronze, laquelle vous ferez vuider tout bellemēt & à vostre discretion dedans les formes que vous remplirez. Mais il vous fault auoir consideration en toutes sortes que vous voudrez getter, que voz formes soyent composées de bonne terre, & que voz entrées soyent meublées de la largeur & trous qu'il leur fault. Ioint aussi qu'il vous fault prendre garde si vostre matiere est suffisamment corrompue, ou non, & si vostre forme est bien recuite. Car si il estoit autrement vostre matiere seroit alterée. Pour à quoy obuier, vo<sup>r</sup> aurez tousiours l'aduis de quelque maistre experimēté. Et si ne vueil mettre en oubly de vous aduertir que quant vous voudrez en geter artilleries, & que vous aurez réply vostre forme, d'estre curieux à faire mettre quelque quantité d'estain dedans le fourneau, ou dedans les canals, afin que l'abondance soit tellemēt que la matiere viēne plustost à monstrier & estre grasse que maigre. Et si vous vueil encores aduertir, pource qu'aucunes fois on gette chauderons, coupes, & semblables vases, des cuiures vieux, & pour eui-ter fascherie & despence, on prend fantasie de les fondre au fourneau qui reuerbere, à cause que pour estre matieres visqueuses & subtiles, elles viennent à tomber au fond, aussi tost que la chaleur leur à fait sentir sa force. Et si par cas fortuit le fond ne se trouue mouillé, elles viennent à se ioinde, tellement que le feu n'a puis apres pouuoir de les separer, encores qu'il leur fust continué l'espace d'un moys. Parquoy quād vous aurez à faire vne telle entreprise, vous ne faudrez à recouurer vne partie de matiere bonne & bien aliée, laquelle auant toutes choses vous vous mettrez en deuoir de fondre. Puis apres peu à peu y adiouterez du cuiure que vous auez. Et si par cas fortuit vous estiez indigent, & que vous n'eussiez matiere aliée, donnez ordre de ce que vous auez premierement enfourné soit au large & à l'aïse, & qn'il y ait distance du fond. Auquel apperceuant tomber quelque peu de matiere, y adiouterez aucune quantité d'estain pour haster plus promptement la fonte. Mais pour le deuoir, le cuiure que vous voulez estre mis en œuure, se deuoit cōtraindre avec prôptitude de soufflets & ardeur de charbōs, à cause de l'aliage qui est en luy.

Duquel



Duquel f'estre asseuré, vous ne f'audrez à le mettre au fourneau pour en faire getter la matiere, aussi tost que vous aurez congnoissance qu'elle sera assez disposée. Fondre à loupe, panier ou casse, se fait premierement à vostre volonté en iceluy qui plus vient à fantasie, comme ie vous ay enseigné. Puis se remplissent de charbôs pour estre recuittes. Et apres que vous auez cōgnoissance que le tout est en disposition de recevoir matiere, y auoir adiouté les soufflets, & y auoir rendu le charbon embrasé, vous ne f'audrez à mettre vostre matiere sur le milieu pour estre fondue. Et ainsi que le charbon viēdra à se consumer, vous prendrez vne cuillier pour decouirir vostre matiere. Laquelle auoir nettoyée, vous en tirerez la quantité qui vous sera agreable, pour en faire essay, pour congnoistre si elle a necessité d'estre aliée avec l'estain ou leton pour luy donner couleur. Et vous accommodant à ce que la matiere vous fait congnoistre, ne tarderez à recourir avec les mesmes charbons. Puis ferez mouuoir les soufflets pour la rechauffer, afin d'accelerer la fonte, à laquelle vous voyant estre arriuez ne differerez d'ouurir la bouche de vostre fourneau, pour faire prendre à vostre matiere chemin aux formes, en vsant tout ainsi comme ie vous ay dit cy dessus, vous faisant mention de fondre en coupe, à laquelle la casse ne differe, fors qu'elle est conduite avec la matiere fondue aux lieux les plus commodés pour adapter formes & instrumens. Pour raison dequoy les maistres qui ont à fondre quantité petite, en vsent volontiers pour euitter despence & fascherie de faire canals & fosses pour soubsterrer les formes les moyens de fondre à creseul avec l'aide des soufflets ou du vent, ne se peuuēt enseigner sans vous declarer l'ordre des instrumens & la pratique. Parquoy ie suis deliberé de ne passer plus outre, fors que d'adiouter en ce discours aucunes aduertances pour obuier que les soufflets, ne viennent à interesser vostre creseul. Aquoy faudroit remedier si par cas fortuit la terre se venoit à fendre avec vne piece de voirre, lequel encores qu'il soit debile vous donnera secours suffisant, comme ceux qui ont fait profession de fondre en ont congnoissance fort grande, ainsi que l'experience vous demonstrera.


*Dé la bronze & metaux composez & alliez en vniuersel.**Chapitre 7.*

**L**E vous ay dit cy deuant quatre choses estre necessaires à celuy qui veult faire professiō de getter. La premiere est de bien faire les formes des fourneaux. La seconde de les recuire. La tierce d'estre meublē de boys sec : & la quatriesme que la matiere soit bien disposée à fondre. Parquoy voulant suiure l'ordre que ie vous ay promis, ie vous dy qu'il vous fault mettre le plus abondamment de metal qu'il vous sera possible dans vostre œuvre : & si le trauail ne vous est facheux, l'alierez & reduirez en pains d'une nature, afin qu'ils soient plus maniables, & qu'ils se puissent fondre tous ensemble dans vn fourneau. Ioint aussi qu'on le fait avec moins de trauaux & si donne on corruption comme il est necessaire. Car si vous pensiez fondre cuire fin dans fourneau qui reuerbere, vous ne sçauriez y acquerir honneur : pource que vous le trouueriez ainsi percé & plein de trous qu'est vne esponge. Pour raison de quoy il est necessaire premierement le fondre avec vn des moyens dessus dits, sans y espargner charbon ne vent, & si fault qu'il soit accōpagné d'estain ou de leton. Les aucuns voulans fuir despence y mettent quelque quātité de plomb. Et appelle on ceste matiere ainsi cōposée, bronze, de laquelle on fait figures & autres ouurages. On fait encores d'une autre sorte de cuire composé, qui s'appelle metal, & si n'est autre chose que bronze, mais il chāge son nom en ce vocable vniuersel, à cause de la plus grande, ou moindre quātité de l'estain qui est meslé parmy, lequel excède douze pour cent iusques à vingt cinq, & est appellé des maistres plus ou moins fin. Et est celuy duquel on fait cloches, mortiers, & lauoirs : & pour cōclusion on les appelle bronze & metal, pour connoistre la differēce qu'on doit obseruer & garder aux ouurages.


*Le moyen de faire diuers engins pour accommoder les soufflets pour fondre les metaux. Chapitre 8.*

**L**A chose plus requise pour l'effait des fusions, sont les soufflets. Parquoy il vous est necessaire de prédre garde que leur peau soit longue & large, & que le vent qu'ils prennent, ne vienne à se

ne à se perdre, si par cas fortuit voz soufflets se trouuoient perchez. Mais pour ne m'arrester sur ce propos, ie vous vueil enseigner de les faire mouuoir aucunesfois avec force d'eau, & aucunesfois avec aide d'homme, afin de vous en pouuoir seruir quand l'occasion sy offrira.




Vous aduertissant qu'aucuns font acoustre vne roue grande en diamettre de six à huit brasses, selon l'opportunité du lieu & la quantité de l'eau.




Mais il fault que le stile passe au dessus de la pointe de la table qui est au dessus des soufflets du costé droit, & qu'en icelle soyent posées deux trauerces contraires l'une à l'autre: & que la table qui est au dessus des soufflets soit ferme, mais non pas celle qui sera au dessous, pourautant qu'elle empescheroit aux sou-

flets à s'estendre & ouvrir, si qu'ils ne pourroyent atteindre au dessus de la rouë, laquelle est tournée par la force de l'eau, tellement que les soufflets viennent à souffrir & fermer, ainsi comme la presente figure vous demonstre.

Encore peut on accoustrer les soufflets en l'eau, mettant vne




rouë & vn ais tortu au pied de la trauerce avec vn manche cōme celuy des roues ou l'õ aguisé les cousteaux, lequel haulsera & abaissera les soufflets. Les tables desquels seront attachées, afin que l'une soit tousiours suspendue, lors que la rouë tournera.




De mesme façon sy peut encotes proceder, mettant sur l'un des bouts vn ais, & en l'autre vn contrepois pour haulser & baisser ainsi que la roue vient à tourner. Vous aduertissant que plusieurs maistres se delectent d'attacher leurs soufflets avec vne corde






corde: & auoir trauersé au dessous vne buche, ne faillent à marcher, maintenant sur l'un, puis apres sur l'autre, tellement qu'ils




les font mouuoir en sorte que leur matiere viét à estre fondue.

Encores peut on faire haulser les soufflets, procedant en la fa-




çon que vous apperceuez cy dessous. Vous asseurant que ie vous ay demonstté vne partie des moyens de faire mouuoir les soufflets, tant avec l'aide de l'eau qu'avec celle des hommes. Le secours desquels doit estre employé quâd la necessité le requierr.




*De la definition de l'artillerie & ordre des chariots.  
Chapitre. 9.*

**E**N C O R E S qu'il vous soit auis que i'aye rompu l'ordre pour auoir fait entrée au chemin qu'on doit tenir pour dresser les soufflets, qui sont les principaux membres, lesquels aydent à conduire la barque de vos trauaux à port, si ne l'erray-ie pourtant à vous aduertir que apres auoir tiré hors de la fosse vostre forme, vous ne fauldrez à mettre hors le stile de fer qui est logé au milieu de l'ame. Ce que vous ferez facilement en donnant secousse, & mesmement s'il a esté reuestu de cendres ou chanures. Puis apres avec vne cie d'acier ayant les dents subtiles & oinctes d'huile ou autre greffe, ne faudrez à tailler la superfluité qui est au dessus de la bouche. Puis apres ferez leuer diligemment la terre qui est attachée alentour, & vous trauillerez avecques eau iusques à ce que vous aurez decouuert les armes & corniches, qui pour embellissement de l'ouurage auroient esté mises sur la piece. Puis ayant le tout reduit ainsi qu'il s'appartient, ne tarderez avec vn fer long & pointu à passer parmy vostre piece pour la nettoyer de la terre, sans s'oublier.

blier de bien fermer avec vn fer à ce duifant, le trou par lequel vous viendrez à mettre le feu. Et serez aduertis d'y proceder en sorte que vostre piece ne se vienne à rōpre. Et si vous auez l'heur de la pouuoir conduire à ceste perfection, vous vous pouuez asseurer d'auoir acheuée vostre piece d'artillerie, si le canal ou le boulet doit passer, a esté deuëmēt netoyé. Mais pour mieux tirer à seureté, plusieurs soldats & maistres canōniers, ont pris fantasie de faire percer leurs pieces en la mesme façon, qui ont en coustume faire les haquebutes. Pour raison dequoy ie vous vueil apprendre comme autresfois ie m'y suis cōduit. Vous aduertissant d'auoir fait faire pour cest effect vne roüe grande double: affin qu'vn homme eust la commodité de cheminer dedans pour la faire mouuoir. Et quand ie ne me pouuoye seruir de ceste inuention, i'ay fait composer vne roüe de chariots à canon. Et au milieu du trou d'icelle i'ay enchassé vne piece de boys, dans laquelle i'ay mis vne broche de fer, ayant le manche tortu. Et sur l'extremité de l'autre bout, i'ay fait poser vn carreau d'acier bien trenchant de tous les quatre coings. Puis i'ay fait adapter la piece d'artillerie que ie vouloye faire percer au dessus d'vne modelle de boys construite en façon d'vn chariot, là ou ie l'ay faite attacher, ainsi que i'ay congneu estre necessaire d'y proceder. Puis i'ay mis la piece sur vn lit de bois, ayant deux fois autant de longueur cōme a l'artillerie. Puis avec l'ayde de trois ou quatre hommes qui tournent la roüe ay fait cauer ma piece iusques au fond.




Mais ie trouue beaucoup plus agreable la rouë double, dans laquelle peult cheminer vn ou deux hommes, que ne fais celle des chariots à canon. Car en vn mesme temps on peult cauer & percer deux canons. Ce qu'est impossible à ceux qui en veulent faire l'espreuue sur la rouë des chariots à canon, ausquels on ne peult si aisement acommoder les hommes.




Encores me suis-ie trauaillé d'entendre plusieurs moyens & fortes de percer & cauer l'artillerie, laquelle est grandement auancée lors que quatre hommes viennent à marcher dedans la rouë, donnant force au fer d'acier qui a les quatre coings trenchés de faire son operation. Vous assurez de vous auoir declaré tous les moyens que i'ay experimenté, pour faire percer pieces d'artilleries. Lesquelles estre nettoyyées de toute superfluité, vous ne faudrez à faire tirer deux ou trois fois pour assurer celui qui les fait faire. Et puis apres les ayant esprouuées ne tarderez à les faire monter, pour les faire conduire aux lieux ou la necessité le requerra. Et afin que vo<sup>s</sup> ayez la commodité de le faire plus aisement, ie vous vueil donner le moyen pour faire dresser vos chariots. Lesquels ont coustume d'estre faits avec proportiō & mesure, & mesmement pour plus d'assurance on doit imiter les maistres les plus experimētez au fait des chariots. Car pour ce deuoyer aucune fois de la congnoissance de l'art, on vient à former les rouës si debiles qu'il est impossible de pouoir soustenir la charge. Et si par cas fortuit on les fait trop lourdes & pesantes, on vient



on vient à tomber en plus grand danger. Pource qu'on ne peult conduire les chariots aux lieux ou les maistres veullent faire barquer leurs pieces pour faire baterie. Tellement qu'il vaudroit beaucoup mieux en estre desaisy, que de se trouuer reduit en si grande perplexité. Pour à quoy obuier on y doit proceder avec discretion, s'accostant de quatre consideratiōs. La premiere desquelles est qu'il fault que les rouës soyent d'un bois merueilleusement dur, long & gros selon la charge qu'elles doyuent porter. La seconde est de bien preuoir la place sur laquelle la piece d'artillerie doit estre estendue. La tierce d'estre pourueu d'émorce singulier & bonne au possible. Et la quatriesme qu'il ait distance aucunement entre la rouë & le lit sur lequel le canō doit estre posé: afin que les rouës ne puissent rompre le bois sur lequel la piece est barquée. Et afin que vous ne puissiez excéder la longueur & grosseur, ie vous ay laissé la forme du pourtrait cy dessous.



Les lits de l'artillerie doyuent estre faits de la longueur, grosseur & haulteur des pieces. Plusieurs maistres les mettent entre deux pieces de boys larges au possible, & mesmement quand on a deliberé d'en armer galeres ou nauires. Les roues des chariots viennent à se mouuoir plus facilement quād leur diametre & circuit est aucunement spacieux & large, mais elles en sōt plus foibles. Pour raison dequoy il fault considerer la grosseur de vostre poix à la haulteur de vostre liēt, & au chemin q̄ vous auez à faire afin que vous soyez bien aduertis du fer qui doit faire entrée



en vn chariot d'artillerie, auquel n'entrera gueres moins si c'est pour vn canon de 5000 liures de fer. Mais pour autant que les cloux des roues sont differens ie vous en vueil faire discours de trois sortes:& mesmement de celles de ceux qui conduisent l'artillerie, vsent. Laquelle doit estre menée par montaignes ou terre pouldreuse & pierreuse. Pour raison dequoy les cloux qui sont par trop aduancez, viennent à tellement s'enfoncer en lieu plain & boueux, qu'à bien grande difficulté les cheuaux peuuent tirer leur charge. Parquoy ie trouue beaucoup meilleur en tels passages, les cloux qui ont la teste enfoncée bien auant dans le boys. Vray est-il que ceux qui ont la teste à pointe de diamant, sont beaucoup plus vtiles pour trauerser montaignes. L'autre sorte de cloux qui ont la teste ronde, sont faits pour les chariots qui portēt boulets. Or auoir le tout biē preuē & reduit en l'estat que ie vous ay dit, vous ferez dresser vostre limon, & attellerez vos cheuaux pour faire conduire vostre piece là ou il vous plaira.

*Moyens pour faire par l'ayde des fusions, les boulets de l'artillerie tant grosse que petite. Chapitre 10.*



Our n'abandonner l'ordre commencé, ie vous vueil monstrier le moyen de faire les boulets de fer, inuention certainement non seulement belle, ains terrible pour l'effect qui monstre contre ceux qui suyuent l'art militaire. Vous asseurant que le Roy Charles, fut le premier qui nous feit voir les boulets

boulets de fer en Italie, alors qu'il alla assieger Naples, pour en chasser le Roy Ferrád, qui fut l'an mil quatre cens nonante cinq. Vous aduertissant qu'il vous fault recouurer (oultre les soufflets, charbon, & fer) les formes, sans lesquelles il vous seroit impossible de getter vos boulets. Vous assureât que les maistres du tēps present, qui resident en Italie pour euitier despence, font leurs formes de mesme fer, duquel ils gettent leurs boulets: & pour ce faire, il fault premierement former vn boulet de boys ou de terre, lequel vous enseuelirez dans vn creux de table puis formerez la bouche pour getter és quatre trous pour faire les rencontres. Et au derriere laisserez vne bresche pour attacher vos tenailles. Puis cendrez le tout & les auoir ointes d'huile chacune à part soy, formerez vos boulets, ainsi qu'il vous plaira, ne mettāt en oubly quand vous getterez, de cendrer par dedans aucunement voz formes, ausquelles vous ioindez vne grande paire de tenailles, avec lesquelles vous manierez voz boulets quand l'occasion s'y offrira. Apres vous donnerez ordre à recouurer fer qui soit disposé à fusion, & mesmement d'iceluy qui est aigre & corrompu: pource qu'il est beaucoup plus suffisant de purger la terre, à cause qu'il a passé parmy le fourneau: & aussi tost que vous en aurez fait bonne & suffisante prouision vous ferez puis apres vostre deuoir de dresser vne forge à laquelle vous adiousterez deux soufflets pour faire vent sur les canons, lesquels serōt droitement posez sur la bouche de la casse. Au fond de laquelle vous n'oublierez point de faire vn trou pour conduire vostre matiere fondue dedās les formes: & alors que vous aurez le tout bien recuit ayant desir d'aduancer vostre œuvre, la remplirez de charbon, alentour duquel vous mettrez tuilles pour le retenir. Puis commencerez à donner vent pour l'embrafer, apres avec vne pelle ou casse, mettrez les petites pieces de fer que vous voulez fondre, mais il vous faudra estre curieux de tenir avec vne verge de fer vostre matiere esleuée sur le feu iusques à ce qu'elle soit fondue. Et donnerez ordre de nettoier les bouches dont le vent procede: & apres que vous aurez fondue la quantité du fer qui vous est necessaire vous adapterez & ioindez vn canal de

fer à l'issue de la casse, par lequel le fer fondu s'ira rendre dans les formes des vases & boulets, lesquels vous porterez avec les grandes tenailles, & remplirez les formes de fer, formant voz boulets en ceste façon: & si par cas fortuit vous prenez vouloir de rendre vostre fer plus fluide & de liqueur coulante, vous y adiousterez quelque quantité d'antimoine. Et aucuns autres y mettent du cuiure: & les autres pour le corrompre y gettent de l'arsenic & du reagal, mais ils se deuoyent du droit chemin, pour ce qu'ils rendent plus foibles leurs boulets.

## P R O H E M E D V H V I T I E M E L I V R E .



Pres que ie vous ay monsté les moyens qu'il fault suiure aux œuures grandes, ie suis content pour euitier trauail & despence excessiue de vous monstrier la petite art de getter. Et premierement ie vous declareray plusieurs moyens de faire la pouldre, & comment elle doit estre disposée, pour estre iettée en sec & frez. Puis apres ie vous apprēdray les secrets que les maistres gardent pour rendre leurs metaux coureux & fluides aux fusions, afin que plus facilement ils ayent pouuoir de remplir les lieux & places vuides de leurs formes.

*Diuers moyens de faire pouldre pour getter dans la bronze gardant l'art de getter. Chapitre 1.*



E vous aduertie que tout sable & arene de fleuve lauée, & semblable terre, ayant le grain par nature subtil & maigre, sont propres à faire telle pouldre: pource qu'à l'effet de getter elles sont disposées à bien receuoir les metaux: à cause de certaine seicheresse qui est contenue en icelles. Si est-ce qu'il s'en compose encores avec l'artifice de plusieurs façons, lesquelles ie ne faudray à vo<sup>r</sup> narrer, & mesmement celles que par experience i'auray trouuées estre bonnes. Mais premierement ie vueil que nous retournions aux naturelles, pource qu'on a la commodité d'en recouurer. Ioint aussi qu'elle me plaise mieux, à cause quelles sont facilement à reduire pour leurs




leurs dispositions. Vous aduertissant qu'on en fait de terre barue & meslée avec cendres de lissue & fiente de cheual. Puis on en fait des pains lesquels estre seichez on fait recuire dedans vne fournaise. Et apres on vient à les briser, & les auoir arrosée d'eau on les fait reseicher au feu. Puis on prend autant d'eau ou est dissout du sel calciné, qu'il est requis pour les abreuer. Et les ayant reseichées & les auoir passées à vostre volonté, quand vous les voudrez mettre en œuvre: ne faudrez à les baigner avec eau, vin, vrine, & vinaigre, tellement que les ayant reduites dans le poing, elles se tiennent tout ainsi que paste. Et quand vous les aurez ainsi reduites, vous les formerez ainsi que vous entendrez. Encores fait on poudre de tuilles brisez, de cendres de ferment, de papier bruslé & de plusieurs autres choses. Et toute la bonté consiste en trois parties. L'une en bien receuant les metaux. L'autre à les rendre subtiles & presques impalpables. Et la tierce à les faire pures & tenantes quand elles sont seichées. Vous asseurant que ie me suis tousiours bien trouué d'y proceder en ceste sorte.

*La façon de preparer le sel pour donner l'alaison aux pouldres, afin de receuoir mieux l'impression du moule. Chap. 2.*

**B**ien qu'il soit necessaire aux pouldres d'auoir vne liaison de eau ou soit dissout du sel, & que sans icelle les pouldres n'auroient puissance de se maintenir en leur estre encores qu'elles fussent seichées, ie ne delaisseray à vous dire qu'il fault prendre vne quantité de sel, & la mettre dans vn pot de terre, lequel vous couurirez fort bien. Puis mettez à l'entour tuilles en forme d'un fourneau laissant entre deux vne place de trois doigts vuide, laquelle vous réplirez de charbon, dans lequel vous laisserez le feu, iusques à ce que tous les charbōs soiēt esté reduits en cédre. Puis prendrez de ce sel bruslé la quantité que vous congnoistrez estre suffisante. Et avec eau la ferez bouillir dās vn pot, de laquelle vous abreueruez vostre pouldré, & avec son aide la formerez.

*Le moyen & ordre de faire les cassés ou instrumens de boys seruant à mouler petites figures, ou lon doit mettre la pouldre pour les y getter. Chapitre 3.*


 N'est en coustume de former communement les choses petites en terre, casses de bois, ou en instrumēs faits de bronze avec pouldre de terre naturelle ou faite par artifice: & cela se fait selon que la chose est grande ou petite. Et si vous voulez former avec terre mole, il vous fault oindre vostre patron, avec huile ou greffe de pourceau. Puis avec terre molle aucunement endurcie, en ferez vne platine autant grosse & grande, comme a de contenu vostre patron, duquel vous occuperez la moitié. Puis viendrez à oindre & pulueriser l'autre. Et quand toutes deux vous sembleront estre seichées vous viendrez à oster vostre patron. Et au dessus commencerez à getter, & en ouurant donnerez ordre de faire seicher & recuire. Puis getterez vostre matiere vsant de toute la pratique que ie vous ay dite, quād ie vous ay parlé du leton. Mais celuy qui a à faire grande quantité d'ouurage d'une sorte semblable, il luy est necessaire pour sa commodité d'vser & prendre le chemin de la pouldre: pource qu'il est bref & de moindre despence. Parquoy y voulant proceder en ceste sorte, il vous est necessaire d'auoir plusieurs des instrumens susdits, de boys ou de bronze, ou casses de boys plus haultes la moitié que n'est vostre patron, que vous voulez former. Ioint aussi qu'elles soient commodement longues: & au dessus d'une table plaine tiendrez tousiours la moitié d'une des dessusdits instrumens plains de poudre aucunement humide: afin qu'on la reduise avec les doigts, tellemēt qu'on la puisse nettoier avec vn fer, & l'auoir parée la mettrez sus vne table la tournant d'un costé & d'autre. Puis formerez ce que vous aurez en fantasia, & le semblable ferez de l'autre moitié. Et si par cas fortuit, ce que vous entreprenez ne vient à succeder à vostre plaisir, vous tournerez remettre dedans, le beignant avec eau de sel, glaire de œuf, & eau de gomme arabique, ou autre qui soit visqueuse. Puis les mettrez au feu pour seicher, pour les mettre & loger aux places vuydes des casses, ainsi comme le signe vous demonstrera. Apres avec la flamme d'une chandelle de suif ou de tourmētine, viendrez à les conioindre ensemble, les fermant estroittement entre deux tables liées & attachées seurement avec vne corde.

Et ainsi

Et ainsi conduites & menées à leur fin, vous mettrez en deuoir d'y getter le metal qui vous sera plus agreable. Et les mesmes termes que ie vous ay dit des susdits instrumens petits, faudra garder & vser aux casses & grands instrumens, ausquelles i'ay veu getter mouchettes de trois cens liures en pesanteur, & autres ourages de grâde importâce, pource que ce moyen est prompt & facile au possible.

*Le moyen de faire pouldre pour mouler tous metaux en terre humide:  
& la maniere de l'acoustre en forme deue. Chap. 4.*

**P**OUR fuir trauail a esté trouué contre l'ordre naturel de l'art, de getter en terre humide. Chose cerraînement de plusieurs desirée & de peu pratiquée, comme chemin mal asseuré, ainsi que l'aparence le demonstre à ceux qui ont desir de paruenir en tel effet. Auquel voulant ataindre il vous fault prendre vne partie de sable subtilement laué, & qui soit esté recuit en fournaise. Puis apres se prend la tierce partie des cendres, faites d'os de pieds de moutons, & vn douziesme de toute la quantité de farine vieille, subtilement passée, laquelle sera incorporée & petrie pour estre composée avec les autres choses. Puis seront arroufées d'vrine ou de vin. Et ainsi humides seront mises dedans les casses de bois. Et auoir ostez vos moules, ferez les gets & aspiremens. Puis avec fumée de tourmentine, ou de chandelle de suif, viendrez à la suffumigation acoustumée. Et auoir assemblé les formes qu'auiez faictes, aperceuant vostre



on du, ne faudrez à getter à vostre plaisir. Aucuns maistres, qui avec l'aide de cest art font cloches, mortiers, & autres ouurages, sont cōtrains par necessité de faire leurs formes de trois pieces en la propre façō que le portrait, qui est cy dessus, vous demōstre. Le siege duquel vous faict veoir toute l'œuure, pour le commencement de laquelle le corps vient à se former sur le milieu delaissant au dedans vne partie dans laquelle la matiere sera reduitte & logée.

*Le moyen de mouler diuerses sortes de relief. Chap. 5.*

**L** aduient souuentefois qu'il est necessité, encorés qu'on aye les matieres bien disposées de les scauoir cōgnoistre & bien entendre, & par force d'engin scauoir adapter vne forme, pourautant qu'on ne peut tousiours aller par le chemin ordinaire. Ioint aussi qu'aucunefois on se trouue en lieu qu'on ne peult aisement recouurer ce qui est duysant. Pour raison dequoy i'ay deliberé de vous dire encores plusieurs moyens qu'on doit tenir: & mesmemēt de faire vne caue à vn relief, lequel peult estre reduit en caue: & se font tels effects de paste, ou autre chose liquide, laquelle par desechement de chaleur, ou extremité de froideur se fait dure, tout ainsi que le suif, soufre, plomb, cire, & autres choses semblables, conchuant pour faire cauer vne chose plaine qu'il vous faut premierement considerer si l'œuure est petite ou grande, si c'est figure ou fueillage, & cōbien de pieces vous sont necessaires pour la former avec suif ou farine: & si cest matiere dure la formerez avec le marteau dās vne platirine de plōb. Mais si c'est autremēt, vo<sup>r</sup> le ferez avec cire ou soufre reduit en liqueur, ayāt premieremēt oint la chose d'huile ou gresse: ayāt ainsi accoustré vostre cas formerez en poudre, gettāt brōze ou metal bien fōdu, au dessus duquel vous getterez la matiere que vous voudrez y mettre encores vous seroit il necessaire faire la forme & la couurir de terre: mesmemēt aux parties que vostre iugemēt vo<sup>r</sup> fera cōgnoistre estre necessaire, sans mettre en oubli d'oindre avec huile ou gresse de pourceau toutes les pieces que vous craignez de se ioindre: & à chacune forme ferez ses rencontres & signes, pour auoir la cōmodité de les retourner



plus facilement en leurs lieux:& quād vous aurez taillée la superfluité, vo<sup>9</sup> ne faudrez à tirer vostre relief, tellemēt que la place cauée vo<sup>9</sup> demeurera, en laquelle vous pourrez getter cire, ou autre cōposition molifiée & incorporée avec suif brulé, charbō d'amādes, tuille brisé acompagné d'un peu de farine vielle. Et le tout bien brayé dedans vn mortier de bronze, & apres que vous aurez fait voz formes, les laisserez seicher & endurcir, tellement que vous les pourrez reduire en pouldre à vostre plaisir: encores se font elles avec diuerfes gommēs ou colle, de laquelle ie me suis seruy autresfois. Puis faut prendre vn vase grād, & de la hauteur mesīme de la chose que vous voulez former, laquelle faudra remplir de terre & reduitte à liqueur, la faudra laisser reposer iusqu'à ce qu'on aura bonne congnoissance qu'elle se veut congeler: & alors vous romprez la petite peau, qui est au dessus, pour getter dedans la figure que vous voudrez former, laquelle vous retirerez incontinant, continuant en ceste sorte quatre ou cinq fois. Puis l'auoir laissée refroidir & endurcir en eau froide, & taillées les pieces que vo<sup>9</sup> voudrez oster, la retournerez en son lieu, estoupant avec drap subtil ou cire les iointures & fantes, que le fil auroit faittes. Et apres auoir bien baignée ceste forme avec l'eau dessusdite, l'emplirez de cire fondue moderemēt chaude, & la vuideriez tout subitement en continuant ceste façon cinq ou six fois: iusques à ce que vous congnoistrez que vostre figure est reduitte à la grosseur que vous voulez dedans vostre forme, laquelle vous ferez mettre en eau froide, iusques à ce que vous pourrez retirer sans danger la figure, laquelle vous trouuez telle qu'est son original. Vous aduertissant que ie ne vueil delaisser en arriere vn autre façon de former que i'ay veu exercer à Rome à vn chaudronnier, formant l'Hercules de bronze: & pource faire il prit du papier couuert de paste & l'ē couurit, tout ainsi qu'on fait vn masque. Puis le feit seicher au feu, adioutant au dessus colle faite de farine. Sur laquelle il posa pour l'engrossir plusieurs fueillerts posez l'un sur l'autre & finablemēt luy feit vne couuerte d'un linseul, & autres draps de lin. Lesquels ayant bien fait seicher, il coupa avecques vn cousteau toutes les pieces lesquelles paroyssoyent au dehors: & en ceste façon dressa sa for

me, en laquelle il mit cire & poix. L'acoutrant tellement qu'elle pouuoir resister à toute humidité. E ainsi estans coniointes ensemble, meit dedans du suif par plusieurs fois: & trauailla en sorte que toutes les choses paroyssoyent proprement à la chose qu'auoit esté formée:& estoient telles formes faittes en assésure, & à peu de despence faciles à porter aux lieux ou luy estoit plus agreable. Inuention certainement belle au possible selon mon iugement.

*D'aucunes matieres qui ont propriété de faire fondre & cou-  
rir les metaux. Chap. 6.*

**I** ne suffit de sçauoir bien fôdre & auoir soufflets & charbon à souhait: car voulant getter choses petites & subtiles, il est besoing d'aider aux metaux avec matieres corruptibles, comme estain, arsenic, sublimé, & reagal ou bien avec autres matieres moins fusibles. Semblablement il en y a qui operent par voye de purgation, comme boracz, sel nitre, & armoniac: & mesmement aux matieres onctueuses, fault mettre en œuvre toute gomme, huile commun, ou saumon mol. Car ce sont choses que le metal cherche. Parquoy il est de besoing de s'en seruir, tout ainsi que apparence des metaux nous vient à estre manifestée.

**PROHEME DV NEVFIESME  
LIVRE DE LA PIROTECHNIE DE  
plusieurs exercices & effets du feu.**

**I** E vous ay iusques à present môstré le mieux qu'il m'a esté possible les pratiques des exercices, qui vous estoient duifans aux fusions, tant aux œuvres grandes que petites. Parquoy ie vous vueil à ceste heure parler d'aucunes autres appartenans purement aux operations & puissances du feu, & qui ne conuiennent totalement avec l'art de getter. Et premierement ie vueil commencer à vous faire entendre quelle chose est en substance l'art d'alchumie, laquelle est si curieusement cherchée & desirée

desirée. Puis comme chose vtile & ingenieuse, ie vous donneray congnoissance de l'art distillatoire. Et apres vous monstreray l'ordre qu'on doit tenir quand on veult mettre en oeuvre vne zeche sans charge de conscience. Puis vous parleray de l'orfeure, du chaudronnier & d'aucuns autres ainsi que l'occasion s'y offrira.

*De l'art d'alchumie en general Chap. I.*

**P**ource qu'en plusieurs lieux de ce mien traicté ie vous ay faite mention de l'art d'alchumie, ie ne vueil passer outre sans vous en parler, encores qu'aucuns l'asseurent n'estre veritable. Et y suis affectionné, pourautant qu'on voit les effets dependas de l'operation & vertu du feu. Ioint aussi que ie voy bien que plusieurs n'ont autre congnoissance d'elle, que celle que la renommée vulgaire fait resoner par tout, disant que celuy qui la sçait conduire, fait par son moyen l'or & l'argent. Au moyen dequoy plusieurs la cherchent avec travail, perdemment de temps, & despence, ainsi que vous m'avez ouy dire au chapitre de l'or. Vous priant de vouloir esloigner de vostre pensée que ie me voulusse trauailler de vous l'enseigner. Car ie suis l'un de ceux qui l'ignorent totalement. Mais ie vous diray bien que ceux qui se trauaillent à la chercher, cheminent seulement par deux voyes: l'une desquelles est celle qui prend sa lumiere aux parolles des sages philosophes, avec lesquels ils se font à croire de pouuoir atreindre à ce qu'ils cherchent. Et appellent ce chemin voye teinte & equitable, disans qu'en icelle ils ne sont que imitateurs & coadiuteurs de nature: & vray medecins des corps minéraux, les purgeant de leurs superfluités, & leur donnant secours en chassant leurs defaux & imperfections, en les conuertissant en nouuelle substance, & les accompagnant d'autres esprits qu'ils n'estoyent au commencement. Si que par ce moyen ils se mettent en deuoir de conduire telles matieres à certain terme de corruption, separation des elemens, à priuer ou rendre leurs esprits aux matieres, ou bien à les rendre subtiles ou grosses. Et vous laisse coniecturer que tels hommes courent iour & nuit sans auoir aucun repos, sans qu'il nous soit notoire qu'aucuns d'eux soit iamais arriué à sa fin desirée. Si est ce que cest art est

tant delectable à ceux qui prennent plaisir de s'y amuser, qu'ils ne veuillent pardonner à travail quelconque, & ne font cas aucun de la despence. Car ils ont espoir de posséder quelque iour vn riche tresor, que cest art leur promet. Vo<sup>9</sup> assurent que cest exercice est beau au possible, pourautant qu'elle produit iournellement outre l'vtilité humaine plusieurs beaux & nouueaux effets, comme sont les extractions des substances medicinales, des couleurs, odeurs, autres infinies compositions. Secret certainemēt qui nous fust esté caché sans l'aide & soigneuse industrie de ceux qui font profession de cest art. Laquelle doit estre à bon droit appellée la source de plusieurs autres: parquoy on la doit estimer & suyure. Mais celuy qui a fantasie de s'y exercer, ne doit aucunement estre ignorant ne pauvre: afin qu'il puisse aisement porter la despence. Si est ce qui ne doit prendre son chemin en cest art prouoqué d'auarice, ains seulement pour auoir la iouissance de la beauté des fruits de ses effets & congnoissance de la nouueauté ingenieuse & belle que cest œuvre demōstre. L'autre voye qui est grandement esloignée de la precedente, s'appelle sophistique, violente, & non naturelle, & en laquelle les vitieux & praticiens de trōperie ont coustume de se exercer. Et cest art seulement fondé en apparence & faulxeté, laquelle corrompt les substances des corps metaliques, & les transmue tellement qui les fait paroistre autres qui ne sont. Tellement que plusieurs fois le iugement & l'œil en demeurent trompez & deceuz. Mais il desplaist grandement à ceux qui se voyent trompez, encores plus à ceux de qui l'infamie est decouuerte. Pour raison dequoy ceste voye pauvre & miserable, n'est suyue fors par gens de mesme nature, si que cest art vient à estre blasmée d'vn chacun. Mais abandonnant le respect de l'vne & l'autre que vous voudrez suyure, il est necessaire d'auoir congnoissance de la nature des metaux, des matieres simples & composées, & de leurs effets, encores de sçauoir ministrer le feu, faire fourneaux, & adapter vases selon les effets que vous auez en pensée de faire. Lesquels en mon iugement ne font autre apparence que fait celle du leton aupres de l'or, celle du voirre aupres du cristall. L'inuention de  
cest art



cest art donne apparente raison de croire qu'elle n'a esté imprimée en la pensée des ingenieux & sages anciens, ainsi qu'elle est maintenant en celles des modernes: & mesmement Aristote, Platon, & autres grands philosophes, qui se sont trauaillez de sçauoir les choses possibles, n'en ont fait aucune mention. Mais les modernes alchumistes disent qu'elle a esté trouuée apres eulx, comme chose possible, & assurent d'en pouuoir trouuer encores de celles qui non seulement sont pour le iourd'hui, ains n'ont aucune ombre de pouuoir estre purement.

*De l'art distillatoire en general, avec les moyens d'extraire eaux, huilles, & faire sublimations. Chapitre 2.*

**C**'Est chose necessaire à tous les hommes qui veulent cōduire leurs entreprises à fin, de considerer la nature de la matiere laquelle ils veulent mettre en œuvre, & regarder si elle est disposée à rendre ce qu'en voulez extraire: & si vous n'estes meublé de ce qui vous est duisant, vous perdrez temps. Car si le tout n'estoit d'accord, en vain seroit employé vostre trauail. Parquoy si vous voulez faire eau ou huilles par voyes de distillation, mettant en œuvre instrumens qui sont disposez à autres effects vous seriez en danger de faire vne chose pour autre, encores que la matiere fust disposée à vostre volonté. Car malaisement peult on tirer la matiere telle qu'on veult l'ayant mise mal disposée & en instrument incommode pour la recevoir: & vous fault penser que toute chose crée & trouuée au dessous du Ciel, n'est autre chose que substance elementale d'icelle composée. Pour raison dequoy il vous fault penser que si elle tient de l'eau, ou de l'air, on en peut tirer eau & air, & autant du feu, & la partie qui demeure de telles choses au fond du vase grosse & seiche, donne congnoissance certaine d'estre la terre, de laquelle se vient à faire extraction beaucoup plus difficilement que celle des autres, ce qui peut succeder par faute de l'art, ou de la negligence de l'ouurier. Vous aduertissant d'auoir congnoissance d'aucunes choses, desquelles il seroit impossible de tirer eau, huile ou de les sublimer, comme chaux, voirre, or, argent, cuiures, plantes, & pierres semblables à tel effect. Mais discourât comme l'on voit,


on trouue aucunes choses desquelles on tire facilement eau, & difficilement huile, à cause de la grande humidité qui les accompagne: & semblablement aucunes autres, comme gommès, os, escorces, pierres, & semblables autres, si disposées à certaine seichereffe qu'elles sont faciles à rendre l'huile, & difficile à rendre l'eau: & le semblable aduient encores des sublimations. Vous aduertissant pour conclurre, que ce sont toutes pratiques inuentées des alchumistes, & sans lesquelles leur art seroit sans aucune esperance: & si par cas fortuit on vient à extraire huilles, & eau, cela peut seruir vniuersellemēt pour conseruer la vie des hōmes, & les odeurs peuuent donner plaisir. Les sublimations sont tres propres aux alchumistes, car avec icelles ils rēdent subtiles leurs matieres, & assemblent leurs substances, tellement les rendant viues qu'elles sont permanentes, puissantes & penetrables, si que en voulant reciter le discours des dessusdits alchumistes, & mettre en lumiere leur contrarieté, se seroit nauiger de l'Ocean au chemin du Ciel, sans s'arrester ne rencontrer port. Mais pour autant que ie vous vueil faire perdre l'opinion de croire que ie sois alchūmiste ie suis content de m'en taire pour le present pour suivre la pratique de nos effectts, ausquels n'est seulement iussifante la disposition des choses, pource que souuent esfois nous trouuōs l'huile du lieu qui par distillation est coustumier de rendre l'eau, & consequemment l'huile de là ou l'eau sort: ce qui est causé par les instrumens & ordre des feuz. Et pour cest effectt sont adaptez vases de voirre ou de terre, & semblablement fourneaux pour eschauffer & enflamber selon les effects, ou resistēces des matieres. Lesquelles n'estant par leur nature disposées totalement, les faudroit calciner ou accōpagner de quelque autre chose au iugemēt de l'ouurier experimenté, qui par force viendra à separer la cinqiesme substāce de la chose qui sera cōtenue dans les elemēs. Mais les simples qui sont disposées à rēdre eau, cōme racines d'herbes, fueilles, fruits, fleurs, & choses semblables qui sont tendres & moles, à cause de l'humidité laquelle leur fait compagnie, eaue en peult estre tirée sans grande difficulté, pour autant qu'en leur substance elles sont flematiques, subtiles & pleines de vapeurs.

Telle-

Tellement qu'avec bien peu de chaleur de feu, elles viennent à fesseuer, courrant le vase d'un air nebulenx & grossier, qui pour la vertu & frescheur de l'air exterieur, qui red froideur sur la chappelle, se conuertit en eau. Laquelle estant sortie, ce qui demeure s'appelle fesse ou residence, de laquelle on tire la seconde liqueur qu'on nomme huile, qui n'est autre chose que la partie laquelle a plus d'air meslé avec l'element du feu: & depuis les esprits, qui est l'essence propre. Mais de la premiere partie terrestre, qui est restée morte, & presque ayant semblance de cendres & sans ames, ie suis content de ne passer plus outre. Si est ce que pour paruenir à cest effet, il est de besoing vser vn peu plus de l'art que l'ordinaire ne commande. Et par ce chemin distillatoire plusieurs disent qu'on y va tellement d'element en element, subtilisant & separant, qu'à la fin les matieres sont tellement reduites qu'elles n'ont plus de similitude avec aucune chose des substâces des quatre elements. Si qu'ils assurent les auoir reduites en vne appelée quinte essence: assurent qu'elle a puissance diuine qu'on nomme celle qui a pouuoir d'estre permanente & incorruptible. Pour raison dequoy ayant fantasie de vous faire entendre particulièrement le moyen de proceder en tels effets, ie suis content de le vous monstrier le mieux qu'il me sera possible. Et mesmement pour autant que les philosophes qui font profession de cest art, se fondent en ceste chose pour conduire à perfection ceste glorieuse pierre, pour laquelle trouuer ils prennent plaisir d'endurer toute peine & trauail, & disent que ceste substance est conduite par leur industrie en vne autre vitale, ayant nourriture si grande que presque elle retourne en vie les corps humains extenuez par maladie, ou affoiblis, tellement de vieillesse qu'on n'a plus aucun espoir de leur vie. Or abandonnant ceste essence, ils disent encores que tel or ou argent conduit en ceste celeste & diuine liqueur, est celle vraye & naturelle semence que l'or & l'argent produisent. Et si aucuns ont opinion telle semence estre origine en chacune chose. Au moyen dequoy plusieurs alchumistes par leur fondement cōmencent à prédre plusieurs choses diuerses, les accompagnans de leur calcinatiōs, solutions, putrefactions &




sublimations. Et les ayant conduites en certains termes, demonstrents effets de la chose qu'ils ont en pensée, viennent à l'appeller leur mercure, & aucunes fois leur soufre. Et en ceste façon accompagnez se mettent en deuoir de proceder, se faisant à croire de faire leurs pierre philosophale. Mais si la fiole dans laquelle leur matiere est posée: vient à se rompre, ou que par trop grande abondance de feu la substance s'en aille en fumée, en eschange & lieu de multiplier l'or ou l'argent, ils perdent ce qui estoit dedās, sans qu'il leur reste autre espoir que de refaire & recommencer leur entreprise. Mais puis que ie vous ay recité de ceste matiere si abondamment, que ie vous en puis auoir causé fascherie, ie suis en volonté de vous reciter comme les effets de telle chose viennent à estre composez & formez. Parquoy vous remettant au premier degré la ou ie vous ay parlé des moyēs communs, avec lesquels on vient en distillant à tirer eau facilement de plusieurs choses, ie vous diray qui vous est necessaire d'auoir diuersité d'instrumens, & entre les autres vn qui s'appelle la forme de la cloche, laquelle se fait de plomb, ou de terre de laquelle on fait les voirres, ou bien de cuiure estagné, duquel non seulement vsent les apoticares pour tirer caues, ains les dames pour se lauer & rendre leur taint clair & net. Le couuercle chappe alentour vn retenement d'un cercle creux, & fait en façon d'un canal, lequel reçoit toute l'humidité que la fumée par la chaleur du feu fait exhalé en hault en l'air de la cloche, & au ciel du couuercle qui fer-






me se conuertit en eau, laquelle est ostée dehors par le bec de la chappe, qui est ioint à ce canal creux. Au moyen dequoy elle est conduite facilement en la bouche du recipient, qui pourroit tenir la matiere, & bien estoupée sans qu'aucune chose aye pouuoir d'y respirer. Et si par cas fortuit, vous ne prenez plaisir d'en vser en ceste façon, vous ferez faire vn fourneau long ou quarré avec ses aspiremens, lequel vous ferez couvrir d'un tuille ou d'autre chose qui resiste au feu, faisant mettre au dessus cendres ou arene de fleuues. Puis mettez vostre cloche la faisant pancher quelque peu deuers le costé de la sortie de l'eau, réplissant vostre creux superfluz de cendres ou sable, iusques à ce qu'il viennent à la superficie & extremité de vostre four. Puis dōnez la chaleur par tout esgale pour en tirer la quantité d'eau qui vous sera possible: Les autres moyens de distiler pour tirer eau des choses plus seiches, se font avec alambics de voirre, de terre ou de cuiure estagné. Lesquels doyuent estre lutez selon la quantité des natures, & selon la matiere dequoy sera vostre vaisseau. Les aucuns desquels alambics ont bouches larges, les autres estroittes selon le plaisir & l'industrie de l'ouurier. Lesquels vaisseaux doiuent estre mis dedans leur four, enuironnez de sable ou cendre iusques à la moitié de leur hauteur, pour resister à la force de telles flammes violentes, afin que le vaisseau ne rompre & qu'on puisse extraire plus asseuremēt ce qu'on pretend desdites matieres. Mais auant toutes choses il fault que les iointures de la chappe du receuteur




soyent fort bien bouchées, à ce que rien ne respire, & par ainsi on ne faudra à distiler ce qu'on voudra.

Vous aduertissant que toutes distilations sont faites par deux voyes selon le iugement des maistres. L'une est avec chaleur & seicheresse qui est assez commune. L'autre est chaude & humide: & par la chacune chemine ou par trois degrez. Le premier desquels est la force modérée. Le second c'est l'augmentation intemperée. Et le tiers est violent au possible. La voye du hault & humide est celle qui se fait par bain, mettant vne ou plusieurs fioles avec leurs alambics dans vne chaudiere d'eau bouillante, ou autre vase propre pour ceste affaire.




Aucuns ayans besoing de faire distiler quantité de matiere, ont trouué le moyen de faire vne tine grande, laquelle est posée sur vn pillier, & au dedans d'icelle mettent vn vase en façon d'un l'auoir de cuire. Mais il est percé tout l'entour du corps. Et par le foud de ceste tine, sera mis le feu en vne place vuide prochaine du fourneau, tellement que la chaleur viendra à donner continuellement au fond du vase de cuire qui est ioignant la tine, laquelle on remplira d'eau. Puis mettez le feu au fourneau, & l'eschauferez le plus qu'il vous sera possible, sans mettre en oubly de renger voz fioles & leurs alambics, accompagnez de instrumens qui doyuent recevoir l'eau laquelle vous laisserez bouillir iusques à ce que voz matieres soyent toutes distillées

Par vn



Par vn autre moyen, on fait vne casse de bois longue de six brasses, & large tellement qu'elle puisse commodement tenir le corps des fioles, par le col desquelles la distillation viendra à se rendre en l'instrument qu'il la doit receuoir.




Vous aduertissant qu'on peut encores distiller aucunes choses aux iours caniculaires, ou en autre temps chaut, en mettant les fioles alencontre des rayons du Soleil, ou bien contre vn grãd miroir qui soit merueilleusemẽt grand & creux, mais selon mon iugement la meilleure voye est d'y approprier le feu, pour l'aide




duquel vous conduisez vostre matiere ainsi qu'il vous plaist. Et pour y paruenir il seroit de necessité que ie vous feisse mention des formes & de la diuersité des fourneaux, mais ie me suis auisé de vous en parler cy apres. Et pour ne rompre l'ordre distillatoire ie suis content de vous declarer particulièrement les moyens qu'il vous fault tenir pour faire l'eau de vie, laquelle estant faite par gens inexperimentez, doit estre à bon droit appellée eau de mort. Vous aduisans que c'est la mesme substance que les alchumistes appellent quinte essence, la conduisant à si grande subtilité, & luy attribuant tant vertueuse puissance, qu'à grand peine les cieux auroient pouuoir d'en ouurer d'auantage. Vous asseurant que qui veult le tout bien considerer, elle fait effet merueilleux & digne de louange fort grande. Et si est vray que les alchumistes font les metaux si vegetables, qu'ils puissent faire reprendre vie aux corps demy mors, il fault croire & adiouter foy à ce qu'ils nous disent. Vous aduertissant que cest eaue doibt estre faite de bon & puissant vin rouge ou blanc, & pourautant que tel effect de faire l'eau de vie à certaine puissance de faire esleuer plusieurs gros esprits, il est necessaire de les moderer par vertu des instrumens, & les subtiliser en les faisant passer par chemins estroits, longs, & tortus, non pas seulement par diuersité de refroidissemens, mais aussi en lieu ou l'eau froide ait propre puissance, afin que visquosité ou grosseur aucune, ne puisse estre conduite au lieu auquel est l'alambic. Et pour cest effet le meilleur instrument de tous ceux que i'ay veu, est celuy que le portraictcy desso<sup>us</sup> vous presente, fait en forme de vase de cuiure estaigné duquel part le lieu mesme ou lon met le vin, vient à issir vn canon long de quatre ou six brasses, au milieu duquel est posée vne trompe entortillée en forme de serpent, qui est faite de cuiure ou de boys. Laquelle montant en hault, vient à entrer en vne chapelle de voirre, par laquelle l'eau de vie se va rendre en l'instrument qui la doit receuoir. Et est logé ce vase en vn fourneau, là ou il est remply de vin par vn canon qui est posé sur l'un des coings. Et au dessus du creux de l'eau là ou est le canal tortu, que le vulgaire appelle serpent, on vient à remplir d'eau froide l'alambic, puis on met



met le feu totalement au pied du vase ou le vin a esté mis.



Aucuns autres font l'eau susditte plus legerement, la commenceant en vn vase semblable à vne cloche de cuiure estagné, ayant le fond beaucoup plus hault que l'ordinaire des autres. Et au col d'iceluy s'attache le canal appellé serpent, lequel prend son cours & passage par vn rafraichissement d'eau. Et à l'issue de ce canon on met l'instrument qui doit receuoir l'eau. Laquelle ainsi fait n'approche la perfection de l'autre. Car outre qu'elle n'est tant subtile, si vous la voulez mettre en œuvre pour luy faire penetrer quelque chose, il vous est necessaire de la subtiliser en la faisant passer par autre distillatiō. Si est ce que les curieux chercheurs de ceste eau ne se contentent de ceste façon ny de l'autre, ains la mettent encores en autres vases, & la font tant de bois distiler qu'ils la rendent presque aussi subtile comme est la fumée. Tellement qu'en ouurant le vase, elle s'en va en l'air sans tomber en terre, pour autant qu'elle est consumée de l'air. Et afin que vous ayez la commodité de veoir la forme des vases qu'ils mettent en œuvre, ie vous les ay fait portraire cy dessous. Apres le tirement de l'eau suyuent ceux des huilles, qui viennent à estre extraits de la substance des choses naturelles onctueuses, comme sont gommess, bois, fruits, & aucunes pierres. Choses totalemēt lesquelles en eschange d'humidité semblent auoir certaine seicheresse interieure. Or pour faire les huilles & les disposer à putrefaction, ou calcination, il est de besoing d'y proceder avec




les instrumens & feu qui sy doyuent accommoder. Mais pour conclure on trouue plusieurs choses desquelles on ne peut tirer l'huile, & encores fault il trouuer moyen de l'extraire. Vous aduertissant que la voye plus cōmune se fait par exhalation, tout ainsi que les eaues. Mais non pas tant avec la force du feu, mais avec autres instrumens. Entre lesquels les plus cōmuns sont les fioles qui ont le col tortu, & le demeurant formé en façon qu'est le sac d'une cornemuse. Et fault couvrir leur col de terre auant que les mettre dans le fourneau, qui ne doit estre excessif en haulteur, ne par trop large. Encores doit il auoir sur le milieu deux fers, sur lesquels le cul de la fiole sera posé; & le col viendra à sortir au dehors du fourneau, qui sera muré tout alentour, & au dessus tout le creux sera couuert d'un tuille, delaisant sur les deux coins deux bresches pour donner commodité à la fumée & aux flammes de pouoir sortir. Et auoir ainsi accoustré vostre fourneau, avec feu de charbon, par la bouche qui est au dessous commencerez tout bellement à le seicher, tellement que toute l'humidité qui sera en luy & aux matieres lesquelles sont dedans les fioles, viendra à seuaiper. Puis peu à peu augmenterez le feu avec bois, sec le maintenant en force l'espace de huit ou dix heures, ou iusques à ce que vous apperceurez au dessus de voz fioles tomber par le col une fumée grosse & noire. Vous aduertissant que cela deuient puis apres en liqueur onctueuse que les speculatifs appellent huile. Vous assurant qu'on tire ceste liqueur en  
ceste

ceste façon de plusieurs choses, & mesmemēt de vitriol, que les alchumistes appellent matiere de quinte essence minerale, ayant renommée d'auoir plusieurs vertus & proprietiez pour aider a plusieurs infirmitiez & maladies, encores que de sa propre nature il soit plus chault & corrosif que tous les autres.



On trouue aucunes autres choses, desquelles voulant tirer huile est necessité de prendre autre chemin, mesmement pour faire celuy de l'antimoine, ou du fer, desquels les alchumistes vsent aux teintures sophistiquées. Et fault premieremēt les calciner & oster la substance huilleuse par le moyen de l'eau, du vin aigre qui à esté distillé. Du soufre, qui est matiere plus aduste que l'antimoine, on peult tirer huile plus facilemēt par deus moyēs. L'vn par esmouuemēt des chappelles faittes de cendres & chaux. L'autre par les flāmes qu'on met au dessous de la cloche. L'huile du sel nitre, sublimé & arsenic, se fait par voye de calcination mise en solution humide, & celuy de tous arbres rendans gomme, se fait par le moyē d'un vase semblable a vn pot de terre, au fond duquel on fait quantité de plusieurs trous: pource que au dessous on ne fault d'en poser vn autre pour receuoir l'huile, qui sort de la matiere qui est mise dedans l'autre. Lequel est couuert tellement qu'air aucun ny peult faire entrée. Puis on fait vne fosse en terre, en laquelle les deux pots sont posez, n'ayant apparence sur terre plus hault de quatre doigts, la ou le charbon & le feu viennent à faire tellemēt leur deuoir, que ceste liqueur gom-


meuse vient à tomber au fond de l'autre pot qui est au dessous. L'huile des grains se fait en le faisant flamber au dessus d'un fer embrasé. Et le semblable est fait des huilles des œufs, d'amandes, noix, lin, chanure, noix muguettes, & semblables choses odoriférantes. Et est nécessaire à celuy qui se veult exercer en cest affaire d'auoir la congnoissance de la nature des choses qu'il veult mettre en œuvre.



Vous aduertissant qu'il me reste encores à vous dire des sublimatiōs, lesquelles voulāt exposer ne signifie autre chose qu'une yssue & separation faite entre les parties subtiles & grosses. Pour raison dequoy les alchumistes, asseurent ceste sublimation ainsi purifiée, n'estre eau ne ligueur vinctueuse, ains une partie du tout reduite en plus de vertu & puissance, que n'estoit celle qui a esté mise pour estre sublimée. Les alchumistes voulant disposer leurs metanx à bien recevoir ce qu'ils veulent mettre dedans, se delectent de proceder en cest effet par deux moyens, cest à sçauoir par ascendant & descendant. Et en tous deux vsent de fioles de verre, ayans le collong bien couuert de terre. Pour l'ascendant fault faire un fourneau carré ou rond, semblable à celuy qui est fait pour distiller: & apres que vous aurez formées deux bresches, vous y adiouterez un chapeau de terre, la ou vous pourrez mettre les cendres ou la fiole. Et en ceste façon vous y pourrez proceder commodement, quand vous mettrez au milieu de vostre fiole un bord de terre. Puis mettrez dedans icelle la  
quantité




quantité de la matiere, de laquelle vous voudrez faire extraction. Puis ayant posé vostre chapeau de terre sur les deux fers qui trauesent dedans le fourneau. Et au dessus ferez vne couuerte de muraille, afin que les flammes venantes des trous ne puissent passer oultre: Et auoir le tout equipé en ceste façon mettez le feu tout bellement, puis congnoissant que le four a pris sa chaleur, l'augmenterez & continuerez iusques à ce que vous aperceurez totalement que la fumée ne sort plus par la bouche de la fiole: & en ceste façon ne subliment tant seulement les alchumistes ce qu'ils veulent, ains par ce mesme moyen ils font l'arsenic artificiel, orpiment, mercure, soufre, & plusieurs autres choses. L'autre moyen se fait en descendant, mettant la fiole tout au contraire de l'autre, & la composition qui en vient à sortir se trouue attachée au col de la fiole. Mais afin que vous puissiez auoir meilleure congnoissance des instrumens susdits, ie vous les ay fait portraire en la sorte que vous voyez,



Parquoy vous ayant monstré les moyens de faire, eaues huilles, & de sublimer, ie vous vueil enseigner aucunes formes en particulier, lesquelles outre leur beauté sont grandement commodés: pource qu'avec vn seul feu elles peuuent seruir en vn mesme temps à faire, eaues, huilles, & sublimé avecques moins de charbons & trauail. Et appelle on ces formes, fourneaux à tours: pourautant que la chacune d'elles a semblance de tour. Lesquelles sont cōstruites au milieu d'une place de brique cuite ou crue.

Et les peult on esleuer en quarreure ou rondeur, tout ainsi qu'il fera le plus aggreable au conducteur de l'œuvre. L'auertissant de la faire grande & espacieuse, afin que le feu y soit plus abundant & puissant. Et vn pied & demy en bas au dessus du paué sera mise vne grille pour retenir le charbon, delaisant en l'vn des costez d'icelle vne ouuerture au dessous & ioignant la terre, afin que le fourneau puisse prendre air, & que le vent ait pouuoir d'enflammer & maintenir en vie le feu. A l'entour duquel & ioignant la grille, ferez dresser vn mur de la mesme hauteur de la grille, & large autant comme seront les fourneaux. Et en chacune façon de la tour faudra faire bresche quelque peu grande pour donner entrée au feu, & vis à vis ioignant des tours ferez edifier plusieurs fourneaux, ayāt formes de tournelles ornées de carneaux, canonnières & autres bateries. Et ayant conduit vostre œuvre à ce point, apres auoir mis feu, poserez au deuant des bresches vne platine de fer, en laquelle vous ferez trois ou quatre trous d'vne mesme grandeur pour donner air, ou couper le chemin au feu, Et au dessus de la tour ferez mettre vn conuercle ioignant tellement, que l'air qui entre par dessous, n'ait pouuoir de respirer par le hault. Et qui soit tellement approprié qu'on le puisse oster & mettre à point nommé. Puis remplirez tout le creux de la tour de charbon, mettant le feu par le moyen d'vne buche au dessous. & tant plus les buches seront haultes, plus viuement s'embrasent les charbons pour estre priuez de toute exalation. Vous asseurant que ceste façon de distiler est ingenieuse, belle, & assez commode: mais il sy fault traualier l'espace d'vn iour. Encores ay- ie veu vn autre fourneau ayant vne tour au milieu quarrée, accompagnée de quatre vases & de ses registres. Et si ay eu encors ce bien d'en auoir veu vne toute differente des autres, accompagnée de plusieurs vases, posée sur vn fourneau, de la hauteur de deux brasses & large en diametre de trois, estant presque semblable à vne estuue seiche. Et là ou elle estoit voutée deuers le pied estoient trois respiremens. Et sur la grosseur estoient murez par ordre plusieurs yrinaux de terre, vernissez par dedans. Les fonds desquels auoyent entrée dans le fourneau.

Et la



Et la bouche qui estoit large sortoit au dehors, sur laquelle estoit mis vn chapeau de voirre avec vn alambic. Sur la sommité duquel estoit posée vne petite cloche. Vous aduertissant qu'il faillloit cōtinuer le feu à ce fourneau iusques à ce qu'il fust eschauffé. Puis on y remettroit du charbon pour la maintenir. Vous asurant qu'au commencement ceste façon me sembla belle. Mais apres que ie m'y fuz aucunement arresté, ie ne sçauoye si ie la deuoye louer ou non: pour auoir plus d'aparence de beauté que d'utilité. Car i'apperceu que ce qui se faisoit avec si grande quantité de vases, alambics, & autres instrumens, se pouuoit faire avec deux ou trois cloches mises dans vn fourneau. Et si par cas fortuit i'auoye à dresser vne chose semblable, ie voudroye que la place vuide fust vne tour, par laquelle les fons des vrinaux seroiēt eschaufez, & au coupeau auroit quelque peu d'issüe pour donner occasion à la chaleur de pouuoir sortir & monter en hault. Mais outre les fourneaux pour distiller, ie vous vueil monstrier le portrait des formes des deux autres fourneaux, afin que vous en ayez congnoissance quand vous les entendrez nommer. Et premierement celuy qui est faict pour reuerberer, lequel à esté inuenté des alchumistes pour cimenter. L'autre est bon à distiller & sublimer, & mouldre à vent, comme vous pouuez cōprendre apperceuans les portraits cy deffous attachez, que i'ay pris plaisir de vous faire veoir. Et encores suis-ie en volenté de vous enseigner celuy par lequel on a pouuoir de distiler à tous effets.



*Discours & aduertissemens pour ceux qui veulent ouurer & mettre la main à leur aduantage sur vn zecche.*

*Chapitre 4.*



PRES que ie vous ay parlé des distillations des eaues & huilles, voulant suyure mon art, il m'est venu en pensée de vous faire discours, cōme vous auez à vous conduire, voulant entreprendre d'ouurer ou faire ouurer vne zecche: afin que vous ayez pouuoir de vous y conduire quand l'occasion sy offrira. Vous assurant que celuy doit fort bien entendre qui prend volonté d'entrer en l'estat & prendre le soing & cure d'une monnoye. Et vous promettre que le maistre d'une monnoye deueroit sçauoir faire tout ce que font les ouuriers s'il estoit possible. Car ce qu'ils manyent le plus souuent, est or ou argent mis en petites pieces faciles à perdre, & ne sçauoyent estre de si petits poix, qu'elles ne portent dommage au maistre. Parquoy celuy qui vient faire profession de cest art, se doit prendre garde à son poix. Pource que la substance ee tel art, n'est autre chose qu'une quantité de poix diuisé en plusieurs pieces à point limité, & vn caratement d'or & aliage d'argent tel qu'il plaist au prince d'ordonner. Et si par cas fortuit ou par negligence tu viens à augmenter la monnoye plus outre que du deuoir, tu demeures interessé, & si tu viens à commettre faulte, tu ne faulx à estre noté de reproche du peuple, qui t'a en reputation de personne infame: tellement qu'outre



qu'outre la honte & infamie que tu t'es acquise on ne differe à te punir & chastier asprement: & si tu veulx y proceder ainsi que le deuoir commâde, le proufit que tu en rapporteras sera bien petit Car en plusieurs choses on est contraint de faire despence. Pour à quoy obuier vous ne deuez pardonner à travail quelcōque pour gaigner le proufit de ceux qui manient vostre argent, au poix du quel il vous fault soigneusement prendre garde, tant à le deliurer qu'à le receuoir. Et semblablement en achetant or ou argent, bas ou fin, sans mettre en oubly de bien ouurir les yeux afin que vous ne soyez trompez. Pour à quoy obuier vous en ferez la preuue avec la touche & à la coupelle. Et ne serez paresseux à regarder & sçauoir combien ils tiennent de fin: & le semblable ferez à cimenter l'or & affiner & departir argent. Vous aduertissant d'auoir tousiours recours à voz balances & à vostre plume, avec l'aide de laquelle vous ne faudrez à trouuer la faulte, que voz ministres auront faite. Et premierement des fondeurs vous faudra prendre garde, & semblablement avec les ouuriers & monnoyeurs, sans vous reposer sur les gardes. Car s'il estoit possible il seroit proufitable que vous fîsiez tout: & est necessaire que tel personnage qui veult entreprendre telle charge soit vigilant, & qu'il entende bien l'arithmetique, pour ne faillir à faire ses comptes. Et luy est necessaire encores de sçauoir bien faire essay d'or & d'argent, ou d'auoir vn homme experimenté qui sache fondre, affiner, & entendre les moyens selon les matieres de faire les cendres: pource qu'on y peut faire plusieurs tromperies. Et ne doit le maistre estre paresseux de se trouuer quâd lon met en grains l'argent d'oré, afin que l'eau ne luy soit diminuée au departement, & que l'ortiré soit rotalement rendu. Vous aduertissant d'estre curieux & auoir l'œil sur tous voz ministres: pource que communement l'or vient à estre emporté. Mais pour venir à l'ordre de la pratique, ie vous vueil premierement dire celle de l'or, l'ayant conduit au carat par voye de ciment, ainsi que le prince a ordonné. Puis fault prendre la quantité que vous voulez faire ouurer, & l'ayant fondue & gettée en verges, ne faudrez à les battre & estendre avec vn marteau, iusques à ce que vous les

aurez reduites en vne certaine vtilité. Puis apres les taillerez en pieces carrées en façon de dets, faisant en sorte qu'elles excédēt dequelque peu le poix de la monnoye que vous voulez faire: & apres que vous aurez le tout cisaillé, le ferez recuire dedans vne poille, pour le donner aux ouuriers, qui les reduiront à la largeur de la monnoye que vous aurez entreprise. Et alors les faudra oster aux gardes pour estre reduittes iustement à leur poix: & cela fait seront remises entre les mains des ouuriers, qui les ayant reduittes à la rondeur qu'elles doyuent auoir, les auoir encores recuittes, seront gettées dans vn blanchissement commun composé avec terre & sel. Et afin que la blancheur soit plus excessiue, vous y adiouterez quelque peu d'alun. Puis ayant laué voz pieces avec eau claire & seichées, les enuoyerez estamper. La monnoye d'argent sera conduite en la propre façon que celle de l'or, mais il luy fault donner plus de coups, à cause de sa durté. Celle du cuiure ne se fait totalement du metal mesme, car il le fault alier avec argent. Vous aduisant qu'il vous fault fondre ceste monnoye de cuiure dās vne casse ou creseul. Et pour l'alier fault mettre pour chacune liure de cuiure, autāt d'argent fin, qui soit d'aussi grande valeur que vault la monnoye que vous en voulez faire, ou biē distraire ce qui vous est permis par le prince, qui est communement pour vne chacune liure vne once de trois deniers: & aussi tost qu'il sera fondu, vous le getterez sur tables de fer, chaudes &ointes de greffes pour faire mieux courir la matiere le long des canals: & apres que vous aurez retiré voz verges & reduittes en pieces de la pesanteur d'un quadrain, vous les ferez recuire: & quand les ouuriers les auront estampées, on les tournera recuire pour y proceder en la façon des autres. Aucuns princes vueillent telle monnoye estre blanche, & d'autres prennent plaisir qu'elle soit noire. Je vous aduertty encores d'auoir quelque bon ouurier & tailleur pour faire voz coings, lesquels aucunefois sont cause que la monnoye est aggreable, & que le peuple en donne louenge à celuy qui la fait faire. Or vous vueil-ie encores repliquer ce qui est necessaire à celuy qui veult pratiquer en tel art. Et premierement il luy est necessaire de sçauoir passer vn essay, c'est à dire, faire

ter, faire cendrées, departir, & fondre quand il est de besoing, sans mettre en oubly de bien greffer & oindre avec gresse ou lissue forte les tables de fer, afin que vostre matiere vienne mieux à fluer & couler en gettant. L'ointure qu'on fait pour oindre les formes à getter, se fait en prenant fientes de vache, laquelle fiente fault detramper avec lissue forte. Mais meilleur seroit celle dequoy on fait le sauon à cause de son acuité, & encores celle qui vient la derniere en faisant la buée n'est pas mauuaise. De laquelle selon la quantité qu'en prendrez, vous faudra autāt de fiente de bœuf: & fault que ladite lissue soit fort espeffe. En apres le tout sera coulé par vn sac, deux ou trois fois, iusques à ce qu'elle soit biē subtile. Et en trois ou quatre fioles pleines de telle lissue, mettrez demie liure ou plus de sauon dequoy on laue les linges, & tant plus en y mettrez, & meilleur sera: ou bien en lieu de sauon mettrez du vieux suif ou quelque autre gresse. Et de telle composition engresserez voz formes, & quand elles seront chaudes getterez vostre metal à vostre plaisir. Et encores si vous les oingnez d'huile de sublimé, ce que getterez viendra tresbien, mais cela est fort cher.

*De l'art des orfeures. Chap. 4.*

**V**oulant faire discours sur l'art de l'orfeure, ie vous aduertuy qu'ils est necessaire à celuy qui en fait professiō, d'auoir congnoissance de plusieurs arts: pource que la diuersité des ouurages, qui luy viennent en main, est infinie. Mais ceux qui ouurent en or, ou argen (qui excèdent en noblesse de matiere les autres metaux) il fault aussi qu'ils auancent en sçauoir tous les autres ouuriers. Parquoy ils doyuent estre experimentez plus que tous les autres ouuriers. Parquoy ils doyuent estre experimentez tant au marteau, burin, & cisaille, que à adoulcir l'or quād il est cru, & luy donner couleur, quand il en a necessité: mais par sur tout celuy qui veult bien faire son deuoir en cest art, il luy conuient estre armé de patience pour conduire son œuure à la fin ou il tand: & fault qu'il soit proueu de bon iugement, pour auoir congnoissance de ce qui luy est presenté, Leur pratique commune est de fondre en petite fornai-

se, en creseul de terre accompagné de petits soufflets, qui se peuvent aisement manier avec vne main. Et sont trois choses en cest art, lesquelles sont fort estimées. La premiere est de bien tailler & faire figures. L'autre de sçauoir bien former vn vase d'argent ou d'or avec le marteau, & la tierce de sçauoir bien mettre en œuvre vne pierre en vne bague. Mais si ne vueil-je encores fail-  
 lir à vous dire le secret qu'ils ont pour adoucir l'or. Vous aduertissant qu'ils fondent en vn creseul, mettant au dessus voire brisé, ou vn peu de sel alchali avec vn petit de cire, ou quatre petits morceaux de sublimé broyé. Puis luy fault donner le feu asprement. Et si l'ouurage que vous avez fait, n'a tellement la couleur iaune, comme il doit auoir, vous ne faudrez à l'oindre avec la composition du vert de gry, du sel armoniach detrempé avec vrine ou vinaigre. Et apres tel or se met sur le charbon pour l'eschauffer, & puis le mettent dans le pissat, la ou on le frotte pour veoir sa couleur, & sçauoir sil est beau. Il se laue encores en autre façon, faisant bouillir eau avec soufre broyé, mais tel laumēt est plus propre pour l'argent d'oré, qu'il n'est pour l'or seul. On donne encores couleur à l'or dedans l'eau ou sera bouillie la limature des cornes de mouton, ou bien avec la fumée de certaines plumes, ou bien avec la fumée des cornes susdittes: mais telles couleurs mises sur l'or ne durent pas long temps. Semblablement quand vostre argent est aigre vous le pouez adoucir en le passant par la coupelle ou cendrée, ou en le fondant, avec sel nitre ou tartre, ou voire pillé, ou sel alchalis, & par plusieurs autres compositions trouuées par les alchumistes. Et ainsi la peau qui est au dessus se nettoye & blanchit avec eau ou on fait bouillir tartre ou sel commun, en y adioutant alun de roche. Et le soulder en cest art, est vne partie qui est fort necessaire. Parquoy aussi est besoing en vser avec grande discretion. Et est necessaire que la soudure soit plus douce à la fusion que la chose qu'on veult soulder. Pour autant qu'elle se fondroit, & la soudure demeureroit en son estre: encores que l'or fin, & l'argent fin, estant rompu se puisse soulder avec vn peu de vert de gry & boracs sās adiouter de soudure. Pour soulder il fault faire vn fourneau propre, au dessus duquel faudra laisser vne place vuide pour  
 mettre



mettre le charbon. Et avec les molettes prenez vostre ouurage alié avec la soudure faite d'argent fin, moitié leton, & la quatriefme partie de cuyure broyé, rompu, & taillé en pieces, avec vn peu de borras. Et quand vos charbons seront bien embrasés, vous ne faudrez à continuer le vent par le mouuement des soufflers, iusques à ce que la soudure soit totalement estendue, & reduitte, tellement qu'on n'y puisse congnoistre apparence de piece. Et en ceste façon toutes choses qui sont rompues se reunissent & faites de plusieurs pieces sont mises en vne. Encores il est necessaire d'vser d'esmail en cest art: pour ce que toute espeece d'or, argent ou cuiure veult esmail conforme à sa nature. Pour à quoy atteindre & paruenir, il les fault subtillement lauer & maciner, mettant vne chacune sorte de couleur à part dans vne ecuelle vernicée: en laquelle vous aurez fait mettre quelque peu d'eau. Puis avec vn fer aucunement playé deuers la pointe, prenez la couleur qui vous sera plus agreable, la mettant sur l'ouurage, couurant les places vuydes qu'il faudra seicher avec quelque peu de coton. Et auoir ainsi couuert vostre labeur, tout ce que vous aurez en fantasie d'esmailler sera mis en feu de charbon dressé dans vn fourneau, fait en la façon de ceux dans lesquels on passe les essais. Encores s'amuse on à y proceder en attachant au dessus de l'ouurage fil d'or ou argent. Lesquels auoir esté coupez & mis en vn creseul pour fondre, estans refroidis, on peut cōduire l'œuvre tellement attachée avec borras & soudure qu'elle tiendra d'or ou d'argent. Mais en cest affaire il vous fault ensuyure l'industrie des alchumistes, lesquels donnent apparence d'argent fin à leur ouurage, encores qu'il soit au contraire. Et pour ce faire ils suyuent deux moyens: L'vn desquels est avec fueilles d'or battu, attachées avec argent vis. Et l'autre faisant or fin avec le mercure, l'estende avec vne verge de cuiure au dessus de l'ouurage, tellement que le feu fait cōuertir le mercure en fumée. Et si c'est or, il vient à se peindre en l'vrine: mais estant argēt mis au dessus du leton ou cuiure, il se pourra getter en huile. Tout ouurage d'or ou d'argēt & cuiure se peult ouurer à chauld & à froid, pourueu que vous ayez discretion de recuire l'œuvre battue autant qu'elle en a de besoing. Et tant que touche à cest art, ie pense vous en

auoit dit suffisamment. Si est-ce que ie trouue inuention belle & ingenieuse à celuy qui fut inuenteur de faire les fueilles, qui se mettent au dessous des pierres qu'on veult mettre en œuvre, lesquelles donnent merueilleusement grand lustre à leur beauté.

*De l'art de ceux qui besongnent de cuire. Chap. 5.*

**L**E iuge le travail merueilleusement grand de celuy qui fait le cuyure. à cause qu'il ne petit tirer son ouvrage n'y ouurer aucunement sans l'aide de grosses masses ou pesans marteaux. Avec lesquels il est tousiours contrainct de cheminer pour le battre, maintenant par dehors, & bien tost apres par dedans pour donner grace aux vases qu'il entreprennt de faire. Vous asseurant que ce metal est rude au marteau encores qu'il soit doux & fessible. Quand les maistres sont contrains de soulder, ils le font avec argent bas, ou cuire bruslé, meslé avec borras, & souuentefois avec estain & plomb, meslez avec vn peu de pege grecque: & afin que ces vases de cuire ne puissent rendre quelque mauuaise odeur à la viande, on les couvre par dedans d'une peau d'estain faite de la mesme soudure, laquelle ils font bouillir avec vn peu de sel & du vinaigre, ou lon met vne quatriesme partie de plomb accompagné de quelque peu de pouldre de pege grecque. Puis avec des estoupes attachées à la pointe du fer, vous allez attachant ceste peau d'estain à vostre volōté. Vous aduertissant que le cuire se gette en pains toutes les fois qu'on le veult mettre en œuvre: & pour conclure ie vous dy ne sçauoir en cest art aucun secret notable, & ne le sçauroye iuger autrement qu'œuvre manuelle.

*De l'art de ceux qui besongnent du fer. Chap. 6.*

**D**E plus grand peine i'estime l'exercice du faiseur de fer que le dessus dit: pource que continuellement il luy fault manier fardeaux pesans, & demeurer tousiours au deuant du feu de la fournaise, car autrement il luy seroit impossible d'amolir la durté du fer, sur lequel il fault tousiours estre vigilant, & avec grosses tenailles le remuer & oster pour le veoir: & mettre au dessus  
fable

sable ou autre terre, à ceste heure remettant nouueaux charbons, & maintenant gettant de l'eau dessus pour restaindre le feu pour le nettoyer, & à la fin avec puissantes masses & pesans marteaux battent tellement le fer qu'ils le tirent dehors, si qu'il est aisé à iuger le peu de repos que ces ouuriers ont loisir de prédre. Mais voulant considerer les parties de cest exercice, ie le trouue merueilleusement diuisé en plusieurs especes. Car les aucuns sont maistres seulement des ferremens gros, comme ancrs, anclumes, chaisnes, ou artilleries, Les autres se delectent à faire cognées, picz, houes, & autres semblables instrumens pour labourer la terre: & d'autres s'amusent à fers plus gentils: comme sont cousteaux poignars, espées, & autres armes, tant offensibles, que deffensibles, mais toutes ensemble doiuent estre tresbien trempées & boulies, afin qu'on les puisse plus facilement avec le marteau ou lime, conduire à leur fin terminée: & si l'oeuvre doit estre faite de fer & acier, on doit estre soigneux de les bien alier. Vous asseurant que plusieurs maistres se trouuent grandement interessez, car pour n'estre aucunesfois assez experimenter, ils viennent à brusler la masse du fer, lors qu'ils ont opinion de la faire bouillir. Aucuns maistres se trouuent sachans tresbien ouurer en fer, qui sont ignorans à ouurer sur l'acier & d'autres en y a qui font tout le contraire. Mais il me semble que le tout consiste en propre pratique, attendu que ceulx qui sont professiõ de cest art, sont toutes personnes rustiques: si que les aucuns se dedient à sçauoir faire vne chose sans pouuoir auoir congnoissance de l'autre, pour auoir l'esprit trop gros. Si est-ce que cest art est accompagné d'aucuns secrets comme de soulder, de luy donner sable ou autre terre pour le defendre du feu, & semblablement d'entendre bien les couleurs qui demonstrent en gettant. La premiere desquelles a apparence blâche, pour raison dequoy il est appellé argent. La seconde qui est iaune, est appellé d'aure. La tierce qui est azurée, est nommée violet. Et la quatriesme est de couleur cendrée: vous aduisant que tout ainsi que vous les voulez temperées, de mesme façon, il vous les fault emorcer, en y adioutant quand le fer est chauld saumon, ongle de bœuf,

voirre brisé, & sel commun, le tout destrempé en vinaigre, & de ceste composition vous ne faudrez à oindre tout du long vostre lime. Puis apres y mettrez le feu, lequel vous esteindrez en vin aigre ou eau froide: & si par cas fortuit vous voulez soulder vne faulx rompue, ou vne espée, vous prendrez vn peu d'argent bas & du borracz, que vous mettrez au dessus de l'arnois rompu, lequel vous empoignerez avec tenailles embrasées sans le lascher, que la rompure ne soit reunie & la soudure refroidie. Encores vous veulx-ie donner vn secret quand le fer auroit tiré à soy quelque odeur de metal, & qu'il ne se veult laisser à subiettir au marteau. Pour auquel faire prester quelque obeissance, il le vous faut faire bouillir sur les cendres d'eicorce d'œufz, ou sur pouldre de chaux viue. Vous aduertissant qu'on le peult faire doux comme plomb, en luy donnant vnction avec huilles d'amandes ameres, le couurant apres de cire meslée avec assa selida, puis le fault vestir de terre composée avec voirre brisé, le delaisant l'espace d'vne nuit, ou iusques à ce que le feu soit du tout esteint. Puis le mettant dehors vous le trouuerez doux au possible: encore auez vous pouuoir de le faire dur en le trempant dedans le ius de reffort, ou dans le suc de la rosée qui se trouue au dessus des fueilles de cece: & si luy peult on donner lustre en le calcinant: encores vous: pouuez rendre d'ore vostre fer, par la vertu d'vne autre eau faite de vert de gris, tartre, & sel commun, y adiontant du vin blanc: & dedans ladicte eau faite par ebulation baignerez vostre fer iusques à ce qu'il soit de la couleur du cuiure, mais il fault que le fer soit premierement bien poly & net, puis encores remis dedans ceste eau & bien seiché: & apres étant eschaufé, vous le frotterez de mercure, dans lequel soit dissolu de l'or, & luy donnerez feu iusques à ce que le mercure soit euaporé. Pour grauer le fer, on fait vne autre eau forte avec du sel armoniac, sublimé, vert de gris, & vn petit de galé avec vinaigre: & de ceste eau on escrit sur le fer. Lequel doit estre premierement couuert de verny ou de cire, pour retenir ladicte eau qu'elle ne puisse aller ça ne là, sinon au lieu ou voulez que vostre ouurage soit gravé: & y doit demeurer ladicte eau cinq ou six heures. Et finalement voulant  
donner



donner fin à la pratique des operations subiettes au marteau, i'ay opinion qu'en celle du fer a plus de secrets & d'ingenieuse industrie, qu'en tous les autres ars dependans des metaux: & sans le trauail qui le suit, ie le iugeroye exercice digne de louange indigne. Et pour conclure sans la noblesse de la matiere de l'or & de l'argent, ie ne fauldroye à le parangonner à l'arr de l'orfeurerie, attendu que par le seul iugement de l'œil, ils forment leur ouurage sans auoir aucun portrait,

*De l'art de ceux qui besongnent d'estain Chap. 7.*


**V**Ous ayant declaré les pratiques qui suyuent l'art des autres metaux, ie vous vueil encores dire celle de l'estain: à cause que c'est vn metal qui est facile à fondre, & lequel est assez en vsage, non seulement en vases, ains en escuelles & plats: Et d'auantage à faire lettres vtilles & commodes pour estamper liures. Les pots se gettent en vne forme faite de terre blâche. Puis l'ayant mise au dessus d'un fer on vient à ouurer avec l'aide d'une rouë tournée par main d'homme: & avec vn fer tranchât & tortu venez à former vostre vase. Lequel vous brunissez avec pouldre apres que vous l'avez paracheué. Les lettres pour imprimer les liures se font premierement en composition de trois parties d'estain fin, vne huitiesme partie de plomb noir, & autant de margasite & d'atimoine fondue & meslée ensemble. Et de ce metal prenez la quantité que vous aurez en fantasie de fôdre. Et apres que vous l'aurez gettée en verge, vous trauaillerez de la pouoir facilement tailler: Puis dedans vne forme faite de bronze, vous mettrez en deuoir de pouoir adapter la grosseur & l'ogueur des iâbes de voz lettres. Puis avec certains moules faits à viz fondrez toutes les pieces, & dedans vne cassette de fer seront gettes l'une apres l'autre sans cesser, iusques à ce que vous aurez retiré la quantité de voz lettres, lesquelles vous rēdrez egale en mesure de l'estain, tout ainsi que du plôb se font platines pour couvrir eglises & autres edifices, & semblablement orgues & canals pour conduire l'eau. Mais premierement que fondre vostre estain ou plomb, il vous fault dresser vne forme au dessus d'une table, autant longue & large que la platine

que vous voulez faire pour couvrir. Puis au dessus de la table ferez du fable de la haulteur d'un demy doigt. Et apres l'auoir bien vny poserez au dessus vne autre piece de table, pour tenir la matiere estroittement serrée, afin qu'elle ne puisse sortir hors de la table. Au coing delaquelle vous mettrez obstacles pour luy empescher la sortie. Puis commencerez à remplir de plomb la forme, faisant remouuoir la table, retournant ce qui est dessus au dessous. Tellement que l'estain viendra à tomber sur le lit fait de fable, duquel seront formées les platines, esgalés pour le moins de ceste forme. Encores forme l'on flacons & salieres de semblable matiere, & puis apres on les rend poliz avec fer. Vous aduertissant qu'on le peult battre comme l'or, & si en fait on fueilles aussi subtiles comme sont celles du papier, & avec un pinceau on les vient à oindre & à donner la couleur d'or.

*La pratique de reduire l'or, l'argent, le fer le cuiure, & le leton en fil. Chap. 8.*

**T**OVT ainsi que ie sçay qu'il vous est notoire estre necessaire de tirer l'or en fil, pour faire linges d'or ou recaniures de semblable façon. On pourra tirer tout ainsi que de l'argent & estain, fil du fer, du cuiure & leton, lequel vient à s'estendre, encore qu'il ne soit mol, comme les autres, tellement qu'on en fait les bendes subtiles, que le vulgaire appelle orpeau. Et finalement on peult tirer par artifice fil de l'estain & plomb, aussi long & subtil comme est celui de lin & de laine. Leton & acier qui sont metaux plus forts, encores rendent ils fil pour faire cordes d'instrumens musicaux. Concluant ne congnostre en tout cest exercice autre chose notable fors certaine pratique accompagnée de grande patience: Et en icelle fault proceder en deux moyens. L'un est de tirer aux treteaux gros avec l'arganete, & l'autre est à la petite rouë: ayant premierement reduit en longueur avec le marteau, la verge le plus qu'il vous fera possible. Puis apres recuite l'attacherez sur les engins: puis commencerez à le tirer & estendre de la longueur d'un demy pied. Puis apres avec vne paire de tenailles cōmencerez à tirer vostre fer, qui sera attaché à un aneau. Et en ceste sorte tirât à soy vous ne faudrez


ne faudrez à tirer le fil desdits metaux, en le faisant passer par tous les trous de la trancheville. Et pourautant que quand il est reduit à certain terme les instrumens grans y seruent mal aisement, on fait poser deux rouës sur vn banc, au milieu desquelles on met l'instrumēt, par lequel on tire le fil qui est tout couuert de petits trous pour mieux rendre le fil subtil, lequel par l'aide de ces deux rouës, est conduit à sa perfection. Mais finablement selon mon iugement l'apperçoy que cest art consiste en deux choses: L'une, que les trous de l'instrument soyent maintenuz rons, l'autre est que l'or & l'argent que vous voulez tirer soyent fins, de nature douce, & qui soiēt maintenuz bien recuits. Et ce mesme moyen se tient encores en tirant tout autre metal, comme acier, leton, fer, & cuiure. Mais ie vous vueil encores cy apres parler du fer plus particulierement.



De l'or & de l'argent se fait encores ouurage, de fil, qui a apparence d'estre fin à toute perfectiō: & en chacune liure on met tant seulement d'or fin le poix d'un ducat, mais ceux qui ont desir de faire tromperie, ne font la trame seulement d'argent fin, ains de cuiure & d'or. Et pour conclure on fait getter vne verge de cuiure ou d'argent fin, & l'auoir battue & arondie avec le marteau, & biē nettoyée avec la lime, l'estédrez tellement qu'elle ait de lōgueur trois quarts de brasse, & au dessus d'icelle fondrez vne couuerture d'or fin battu: ou si c'est cuiure, la pourrez faire encores d'argēt de la quātitē du poix que vous y voudrez mettre. Puis

la mettez dans vn fourneau avec charbon, le cōduisant presques à poinct de se fondre auāt que de le froter avec boys sec, comme on est en coustume de faire: ou bien avec calcidoine: afin que la couuerte soit pōlie & mieux acostée de la chose, avec laquelle elle doit estre soudée: & apres que vous l'aurez ainsi reduitte, vous le ferez refroidir, recuire, rebattre, subtiliser, & adapter à l'engin ou les petits trous, pour passer les fils, sont ainsi que vous ay dit. Vous asseurant pour certain cest art estre beau au possible & de grande cōsideratiō, quand il est fait sans tromperie, & mesmement est il plus à estimer quand l'or qu'on y met vient à estre rendu subtil au dessus de l'ouurage, sur lequel il est soudé, & tellement posé, que mal aisemēt l'œil ait pouuoir de choisir le fil quād il est tiré, pourueu qu'il soit doré par tout: & pource faire quand or & argent sont adioutez à l'ordre du fil, il fault dresser vn edifice à eau avec vne rouë sur la teste du mäche de laquelle sera posé vn fer tortu alentour d'un aneau, & vn peu plus loing vous mettez en terre ferme vn cepz avec l'instrumēt, par les trous duquel le fil vient à estre tiré: & au milieu de luy & de la rouë, se fait vne fosse en terre si profonde, qu'un hōme ait pouuoir d'y entrer iufques au genoil, afin qu'avec ses tenailles puisse tirer & eslargir, ainsi que l'eau qui fait tourner la rouë attachée à l'engin luy en donne la cōmodité d'auancer & reculer. L'hōme qui est dedans la fosse, est assis sur vne table atchée à deux fers qui la soustiēnent & sont tellement longs & ioints à vne poulie, que tout ainsi que la rouë fait auancer ou reculer l'homme, de mesme façon les tenailles viennent à s'attacher, à cause de la vertu du mouuement. Et avec cest ordre & edifice, recuisant souuentefois le fer, l'or, l'argēt & cuire, vous ne faudrez à tirer vostre fil de la longueur & grosseur que vous voudrez. Et outre ce moyen i'ay encores veu tirer le fer sans l'edifice de la rouë à eau, avec deux petits rouets, tout ainsi que ie vous ay dit cy dessus en tirāt l'or: Mais il leur est necessaire d'auoir fer delié & bien recuit. Le semblable se pourroit faire avec vne rouë sans eau, pourueu qu'on meist vn homme au dedans pour la faire tourner, ou vn cheual qui la feist remouuoir.





*Le moyen d'aproprier l'or pour filer. Chap. 9.*

**Q**Uatre les moyens dessusdits de tirer de l'or ou de l'argent, il s'en approprie encores vn autre, qui s'appelle or ou argent filé, non pas qu'il s'afile comme est l'etimologie du vocable, ains pourautant qu'il se couure avec vn fil de lin tant subtilement qu'il semble chose filée, & s'appelle argent ou or filé. Et pour le faire on prend vne quantité d'argent de coupelle, & d'iceluy on iette vne verge quarrée longue d'vne brassé ou plus. Puis fault prendre la quantité d'or que vous voulez mettre à vostre batue, qui est communement de quinze liures, pour la chacune desquelles fault mettre vn ducat d'or, qui est necessaire de mettre en verge subtile. & autant longue & large qu'elle puisse courir celle d'argent d'vne bande à autre, Et apres que vous les aurez iointes & liées ensemble, les mettrez dans vn fourneau, ou, avec l'aide du feu, & charbon, vous ferez vostre deuoir de les faire soulder, & assembler. Puis l'auoir batue sur l'enclume, avec force ou petits ciseaux, mettrez tout en pieces de largeur tel qu'vn verteil qu'on met au pié d'vn fuseau, puisse tout courir & assemblant les pieces avec fil de lin, subtilement le couurirez ne faillant à le teindre en couleur iaune au vouloir du maistre. Puis apres le donnerez aux femmes pour estre filé, lesquelles se trauailleront de le couurir iustement & egalemment. Le bateur d'or, attent tousiours en le battant, qu'il aye vne belle

couleur iaune & reluyfante, vous aſſeurant de vous auoir declaré l'ordre qui ſe tient pour faire l'or filé.



*Comme on vient à dedorer l'argent & tout autre metal.*

*Chapitre 10.*

**G**Rande vtilité & proufit vient à rendre l'or qui eſt dedoré, ſans intereſſer l'ouurage ſur lequel il eſt mis: & pour ce faire ie trouue trois moyens, l'un deſquels il nous fault enſuyure. Le premier ſi l'or eſt trouué ſur choſe ſubtile, il le fault plier ſur vn creſeul, lequel vous remplirez de mercure. Puis apres le mettrez dans vn fourneau, & quand vous aperceurez qu'il commence à friſſonner, vo<sup>us</sup> mettrez dedás voſtre ouurage doré, lequel ne ceſſerez à remouuoir iuiques à ce que vous verrez le mercure auoir tout beu & conuertý à ſoy l'or: & à l'heure vous prendrez le mercure, lequel vous paſſerez dedans vne bourſe de cuir, au fond de laquelle vous trouuerez voſtre or comme grains de ſable, lequel vous ferez euaporer en le mettant ſur les charbons embrazez dans lecul du creſeul. L'autre moyen de dedorer l'or, eſt qu'il le fault couvrir de ſoufre briſé, au deſſus duquel vous mettrez le feu, & quand vous verrez voſtre or bien enflambé, vous le prendrez & le getterez dans vne coupe de boys: & en ceſte façon vous recouurirez l'or le purgeant dans les cendres avec plôb. Le tiers moyen eſt toucher l'or qui eſt poſé ſur les ouurages avec eau forte, faite avec ſalpetre, alun de roche, vitriol, & ſel armoniac, en y adioutant quelque peu de roſette. Laquelle eau par ſa vertu corroſue

rosiue mange l'or, lequel auoir touché, vous mettrez dans vne fiole, la tenant au dessus du feu dans le fourneau, tout ainsi que ay enseigné en le departant.

*Moyen de tirer toute substance d'argent ou or des lopes, monceaux des mines, rongneure de monnoye, de bateurs d'or, ou d'orfeures, & d'autres substances metaliques que peuuent contenir les minieres. Chapitre. II.*

**G**Rande consideration eut celuy qui fut inuenteur de tirer l'or des loppes des ars, auquel on manie l'or ou l'argent, & semblablement toute substance que les fondeurs des mines ont laissée, sans operer trauail de fusion ne autre chose, fors que le mercure: & pour ce faire il fault auoir vn mortier de pierre ou de boys, dans lequel vous mettrez vne meule pour estre tournée, tout ainsi que celle d'un moulin à moutarde, ou autre instrument conuenable pour broyer: & au fond du mortier faudra mettre vostre matiere contenant or ou argent pour estre brisée. Laquelle toutesfois au parauant, doit estre lauée & purgée de sa grosseur minerale, de sorte qu'apres auoir esté seichée, il n'y apparaisse que le moins qu'il sera possible, de son impurité. Et l'auoir cōduite au point que vous deuez, la ferez tresbien lauer & seicher, sans oublier de l'arrouser (ainsi que vous la briserez) avec eau ou vinaigre, dans lequel soit resolu sublimé, vert de gry, & sel commun. Et dessus telle matiere ainsi abbruée, mettez tant de mercure qu'il puisse le tout couvrir. Puis ferez tourner la meule à vn homme, ou à vn cheual l'espace de deux heures. Car tant plus que le mercure se frottera avec la matiere, plus il viendra à tirer des substances, qui sont contenues dans ladite matiere. Cela fait soit separé vostre argent vis de la terrestreté de vostre matiere. Et ainsi ayāt vostre mercure à part, pour auoir l'or, l'argent, ou autre metal qui contient, vous le ferez passer par alambic, ou bien par vne bourse de peau: au fond duquel ou de laquelle trouuerez l'or & l'argent, que le mercure peult auoir attiré de voz susdites matieres. Et pour sçauoir tel secret i'ay donné vn diamant de vingt cinq ducats. Et encores promis donner la huitiesme partie que feroye en pratiquant tel

secret: Et pource ie vous prie la tenir cher.



*La pratique pour faire les miroirs de metal. Chap. 12.*

**V**oulant delaisser à vous declarer les effets & disputes qui ont le commencement de perspective, pour faire les miroirs tant fort estimez & tenus en admiration par la beauté & lustre qui leur fait compagnie, ie suis content de vous declarer le moyen de les pouuoir faire, afin que le secret que les maistres tiennent celé, vous soit decouuert. Vous certiorant plusieurs y proceder diuersement selon l'experience qui les accompagne. Si que les anciens souloient en leur composition propre, vser de metal fin, tout ainsi que celuy des cloches, en y adioutâr trois quars de cuiure & vn d'estain: & pour luy augmenter sa clarté luy adioutoient vn dixseptiesme d'antimoine, & les aucûs vn vingtquatriesme d'argêt fin, pour le faire meilleur & plus espois, Et outre ceux cy pour les faire bons, i'en ay veu faire de diuerses compositions. Mais nos maistres modernes qui les font à present, prennent trois parties d'estain & vne de cuiure, puis le fondent ensemble: & apres on gette sur la matiere fondue vne once de tartre, & demye d'arsenic puluerisé pour vne chacune liure: & apres que le tout est bien incorporé, on le gette en verges en vne autre forme, pour les mettre sur les tables de pierres pour getter, lesquelles seront espoisses de trois doigts, & au milieu pour les bien separer mettez vn fer de la grandeur & grosseur que vous entreprenez faire vostre miroir. Apres que  
vous



vous aurez getté voz miroirs, & laissé refroidir, vous les mettrez hors de la forme pour les faire tenir avec colle au dessus d'une table. Et auoir reduite vostre matiere en cest estat, vous vous trauiillerez d'oster au miroir vne pitite peau qui paroît au dessus, avec l'aide d'une rouë que vous ferez tourner sur l'eau: sans oublier de la tourner tousiours, afin que le miroir soit esgalé & vny par tous les endroits. Autrement l'esfigie qui sy presenteroit, se monstreroit longue ou l'arge, tellemēt qu'on ne pourroit asseoir iugement de bonté sur le miroir. Apres que vous aurez bien nettoyé voz miroirs, vous les osterez & mettrez hors de la rouë, & osterez les rayons qui sont au dessus subtilement avec esmeril. Et les auoir rendus clers & reluisans, les ayans ostez de la table, sur laquelle ils sont collez, les enchasserez dās vne piece de bois, laquelle vous couurirez, afin quel'humidité de l'air n'ait pouoir de l'interessier. Vous asseurant de vous auoir déclaré entierement l'ordre qu'on tient à faire les miroirs qui sont plains & vnis. Pour raison dequoy ie vous vueil declarer la proportion des formes, ausquelles se doyuent getter les miroirs qui sont creux, lesquels Vetellius mathematicien dit qu'il fault faire pour les cōmencer vne distance d'une ou deux brasses de diametre: & apres faut tirer la corde à l'arc, selon la grandeur du miroir que vous voulez faire. Lequel doit estre de bois ou de plōb, selon la grosseur que vous le desirez, & rōt, ou quarré, le fermerez en terre mole. Puis auoir bien nettoyyées les formes de la compositiō susdite, ne faudrez à getter. Puis viendrez à ioindre vostre miroir à vne rouë semblable à celle des estaigniez. Et avec vn baston de saule, ainsi que la rouë tournera, ne faudrez à le pollir & oster toutes les tumeurs qui paroissent au dessus, nettoyant la vitre avec vne houpe de laine, pour tousiours mieux luy donner clarté & lustre.

*Comme se font les bons creseuls & les petites couches pour fondre les metaux.*

*Chap. 13.*

**V**Ous ayant promis cy dessus de vous enseigner à faire les creseuls & petites couches ou coupelles, ie n'y ay voulu faillir. Parquoy il vous est necessaire d'auoir de la terre qui soit de bonne nature, & que par sa propre ver-


tu elle ayt pouuoir de resister à la force du feu. Ioint aussi qu'elle veult estre biē nette de pierres, & battue au possible avec vn fer. Et apres l'auoir longuement maniée avec la main, vous y fault mesler la huitiesme partie d'escaille de fer subtilement brisé & passé: & autāt de cendres des cornes ou os de moutons. Lesquelles choses se doyuent bien incorporer avec les mains. Et si ceste composition n'est assez forte, vous y adiouterez terre maigre, ou bien quelque autre pierre, comme la Silice qui resistast avec tel effet. Et ces choses soyent formées sur vne rouë basse, la faisant tourner avec la main, ou bien sur vne grande, qu'on remue avec les pieds( comme se font les plats) en les formāt grans & petits, leur laissant la bouche propre pour pouuoir remuer les metaux estant fondus. Et ainsi faits les fault laisser seicher, & puis se recuisent comme les pots & vases de terre: puis on s'en sert à la fusion quand il est de besoing. Les instrumens susdits viennent à se former au dessus d'une rouë, qui se tourne à main semblable à celle sur laquelle on fait les plats: sans mettre en oubly de faire la bouche triangulaire aux creseuls, & aux petites couches aucunement renuerlées pour plus aisēmēt mesler les metaux. Et apres que vous les aurez ainsi formées & fait ainsi seicher, vous les ferez cuire dans les fournaies, comme on fait les pots & autres vases. Et apres vous les mettrez en œuvre quand vostre commodité sy offrira.

*Discours sur l'art qu'on doit suyure pour faire les pots avec aucuns de ses secrets.* Chap. 14.

**L'**Ay pris vouloir apres que ie vous ay monsté faire les creseuls & couches, de vous enseigner toute la pratique des potiers & faiseurs de vases de terre, encores qu'au premier aspect cela vous semblera estre hors de l'ordre & intention de mon entreprise. Si est ce que ie ne vueil delaissier à vous en parler, pour autant que cest art est grādemēt loué pour son artifice & beauté. Ioint aussi que sō principal fōdemēt a deux deriuations & sources. L'une desquelles viēt de la prospectiue de l'art, & l'autre des secrets & cōpositiōs d'alchumie: & finablemēt apres toutes ces raisons ie trouue la totalitē de cest art consister en qua-

en quatre raisons. La première en bon iugemēt vniuersel. La seconde en faire beaux en toute perfectiō les vases. La tierce de les bien cuire & donner la couleur qui leur est duisant. Et la quatrième est de recouurer terre subtile par ouuriers appelée terre de crette, & par aucuns autres terre d'argille. Laquelle fault recuire & mettre en certain lieu pour estre mouillée & arroulée. Puis estât mise sur vn bāc la fault battre avec vne verge de fer, & mettre hors les pierres qui pourroyent estre demeurées dedans. Et cela fait la poserez au dessus d'une rouē: sur l'une des extremités de laquelle vous ferez dresser vn tour, lequel vous ferez tourner avec le pié, tellemēt que vous ne ferez à former voz vases, ainsi qu'il vous plaira. Lesquels vous ferez mettre sur vne table pour estre seichez. Et si par cas fortuit vous les voulez rouges, il ne fault que les faire seicher & cuire. Mais si vous les voulez aorner de peinture & faire beaux, il est necessaire de leur dōner, quād ils sont secs vne couuerte de terre blanche. Et mesmement leur la conuient donner auant qu'ils soyent totalement seichez. Or auoir conduit vostre ouurage en cest estat, pour le cuire fault dresser vne fournaise large de quatre brasses, & de cinq en haulteur. Et au dessous d'icelle cauerez pour former, vne fosse parfonde de trois brasses, & large d'un tiers, ou pour le moins la moitié autāt qu'est la voute de la fournaise, au fond de laquelle seront posez certains arcs boutās, & sur la sommité & flancs serōt ordonnées les faillies du feu, lequel sera cōtinué tout bellemēt l'espace de douze heures, augmētant sa force de quatre en quatre heures. Et quād les pots sont refroidis on les met dehors. La terre blanche que ie vous ay dit qu'il failloit mettre au dessus, veult estre detrempée avec eau, & est celle qui sert de fondemēt au blanc qui se met au dessus. Et pour le faire, il fault prendre du sable ou biē du tartre vne partie, laquelle meslée avec alun, mettez dedans vn vase couuert au dessous de la fournaise, lors qu'on fait cuire les vases: là ou elle deuiendra dure comme pierre. Avec laquelle vous adiouterez cent liures de plōb, & vingt d'estain, que vous ferez calciner dans vn four, ou les flāmes viennēt à reuerberer. Puis prenāt de ladite pierre cuite avec de la matiere susdite deux tierces parties, faites

le tout subtilemēt brisé & reduire en eau, avec laquelle vous viendrez à toucher tous les ourages, ayant en memoire que le blāc est tousiours plus beau, lors qu'il est accompagné de grāde quantité d'estain, & en default de luy du plomb calciné. Et vous assurez que les terres monstrent auoir plus grande force les vnes que les autres, & mesmement aux couleurs. Mais plus grande difference est monstree à biē informer & proceder au feu qui les cuit. Et encores que cest art vienne à se rendre suget la pratique, la fortune qui veult participer en tout, conduit l'art. Tellemēt que souuentefois l'ouurier voyant les differences, auoir vsé d'extreme diligence, s'esbahit au possible. Si qu'il prend la hardiesse de proferer & dire que cela procede des influēces celestes, qui peuvent autant bien operer sur les vases comme sur les hommes, Tellement que vous pouuez apperceuoir au milieu d'un grand nombre deux ou trois pieces, qui excedent en beauté toutes les autres. Concluant que la perfection de cest art consiste & depend tant de la diligence du maistre que de la bonne terre, du feu & des couleurs singulieres & excellentes.



*La pratique de faire chaux & brique, & pour quelle raison la chaux d'elle fut trouuée. Chap. 15.*



YANT fait discours au chapitre precedēt cōmme procede en l'art de poterie voulāt passer outre ie vous veux dire cōme on fait chaux & brique: pourquoy, & à quelle fin elles furēt trouuées. Vo<sup>r</sup> aduertissāt qu'il vo<sup>r</sup> faut entendre



entendre que tous arts ausquels les hommes se exercent, ont esté demonstrees & comprises, ou par raisons naturelles, ou par les effets des animaux, tant par cas fortuit ou contrainte de quelque necessité, que par doctrine de quelque precepteur. Ce que par conclusion nous viendrions à ignorer, sans l'auoir appris de quelque personnage. Et pour vous persuader à le croire plus facilement, ie vous mets en auant vos premiers parens & autres anciens, lesquels vindrent à les succeder, qui par faute de bon iugement alloient diuagant parmy les forets nudz, tout ainsi que les autres animaux. Et par faute d'experience faisoient leurs habitations dans escorces d'arbres, ou sous cauernes cauées dedans terre naturellement: edifices certainement qui n'estoient assez suffisans de les garder destre molestez de l'apreté du temps, ou cruauté des bestes. Au moyen dequoy la necessité & crainte d'estre trauaillez d'aduantage, leur enseigna de fabricquer cloches de terre, & de les fortifier & murer à l'entour avec pierres. Si que se voyant reduits en quelque asseurance, ils commencerent à prendre desir d'augmenter leurs habitations, & conuertir leurs loges en maisons, chasteaux, palais, & grandes citez. Et pour contenter leurs desirs, ils furent contrains de penser dequoy il les pourroyent faire. Car il ne s'offroit au deuant d'eux autre chose que terre, pierres, & bois. Qui leur feit prendre volonté de donner quelque commencement à leurs entreprises. Mais voyant que la terre ne leur seruoit qu'à se rendre tendre à la pluye, & que le bois duquel ils vouloient bastir estoit en dangier d'estre reduit en cendres par le feu. Ioint aussi que les pierres ne se pourroient adiouter sans industrie de les rendre vnies, encores qu'on se trauaillast avec instrumens de fer. Parquoy se voyans conduits en si grande perplexité, ils trouuerent moyen de brusler les pierres & de les cōuertir en cendres. Et apperceuant que c'estoit terre seiche avec eau, la cōuertirent en mortier pour y auoir meslé chaux & arene. Mais en murant voyent que l'air & soleil venoient à seicher la terre & mortier, donnant à vn chacun apparence de pierre. Chose certainement vtile quand vous aurez indigence de pierres pour bastir. Le semblable les dessusdits anciens

de la brique, laquelle ils se trauaillerent de faire en sorte qu'elle peust durer longuement, Or ayant desir de faire chaux, il vous fault dresser vne fournaise, & la remplir tellement de ceste matiere: que le feu ait pouuoir de vaincre la nature de ce qui est mis dedans la fournaise: dans laquelle il fault faire vne fosse & la cauer en forme d'ouale, luy faisant telle largeur par le bas, qu'elle puisse contenir la quantité de ce que vous y voudrez mettre au fond. Et le demeurant s'éplira des pierres que vous auez, ou voulez auoir. Mais premierement que venir à ce point, vous donnerez ordre de mettre au dessoubs des plus grosses, afin qu'elles ayent mieulx pouuoir de resister au feu, lequel vous faudra continuer sept ou huit iours: & quand vous verrez que les pierres mises en l'air, sont couuertes d'une certaine rougeur claire & sans fumée, assurez vous alors que vostre chaux est merueilleusement bonne. Vous aduertissant que les inuenteurs de faire la brique, n'eurent moins de consideration que ceux qui commencerent à faire la chaux, attendu qu'on voit endurcir par feu la terre meslée avec l'eau, & faire tout le contraire de ce qu'elle a demouré sur la pierre, qui estant dure s'est brisée & reduitte en pouldre, & la terre que premierement sans eau estoit pouldreuse mise dans le feu, est devenue dure & presque faite semblable à la pierre. Parquoy ie vous dy que cela ne procede d'autre chose, fors de la parfaite mistion de l'eau & de la terre qui est de nature subtile & visqueuse, comme celle qu'on appelle argille. La pratique de faire vostre brique est tant congneue que ie m'ahonty de la vous declarer: pour ce que ie sçay bien que vous sçauiez qu'il vous fault prendre & reduire en masse ceste terre, de laquelle vous mettrez hors toutes pierres. Puis ayant formées vos briques au dessus d'un banc couuert de sable, afin que la terre molle ne vienne à s'attacher au boys, vous ferez seicher vostre brique. Puis la mettrez dans vne fournaise semblable à celle ou vous auez faicte la chaux. Mais au lieu que l'autre est ronde, vous ferez ceste cy quarrée. Mais beaucoup plus haute que large. Et seront faictes deux bouches avec leurs arcs pour mettre le feu, qui sera cōtinué sept ou huit iours, selon la quantité & force de l'ouurage que vous aurez enfourné, laissant

laissant vostre brique refroidir sans la toucher : pource qu'autrement elle viendroît à se rompre en la maniant. Vous aduertissant qu'en visitant & lisant ce chapitre, vous pourrez cōprendre les moyens qu'il fault tenir pour faire chaux & brique. Pour à quoy atteindre & paruenir, il vous fault sçauoir eslire terres, pierres, formes, fournaïses, & semblables autres choses que ie delaisséray à vous dire pour euter prolixité.



PROHEME DV LIVRE DIX-  
IESME DE LA PIROTECHNIE, DES  
MATIERES QVI PAR ARTIFICE SONT  
disposées aux feux, & de l'ordre qu'il fault tenir à faire feu arti-  
ficiel pour mettre en œuvre, tant contre l'ennemy que pour  
donner resiouissance au lieu ou quelque feste est assemblée.

**V**ous ayant montré au cinquiesme liure la pratique de faire l'artillerie & le moyen de la conduire, ie vous vueil à present montrer cōme se fait le salpêtre, & vous faire entendre apres l'auoir congneu, que sans luy l'artillerie & plusieurs effets des feux violens & artificiels auroiēt esté trouuez en vain. Puis apres ie vous apprendray de faire la poudre à canon: & finalement ie vous aprédray de les charger & faire tirer. Et si vo<sup>9</sup> vueil encore dire cōme se font les mines, trompes, pots boulets, fusées, lances & autres semblables artifices de tirer feu

pour bruler nauires, munitiōs, ponts rempars, & pour battre forteresses, sans me vouloir retirer que premieremēt ie ne vous aye monstré & enseigné à faire certains boulets de bronze portans feu, qui estre arriuez aux lieux ou lon les gette, se mettent en plusieurs pieces, faisant grande occision de ceux qui se trouuent rengez en bataille. Et si ne vueil mettre en oubly de vous faire congnostre comme se font les feux artificiels difficiles à esteindre. Chose certainement que tout capitaine & soldat doit sçauoir pour s'en seruir en tēps & lieu: & vous autres ne la deuez ignorer tant pour l'enseigner à ceux qui se delectent à faire feux aux festes & triumphes, que pour vous en donner plaisir.

*De la nature du salpêtre, & comme il vous fault proceder pour le faire.   Chapitre I.*

**L**E salpêtre, comme ie vous ay dit, est vne mistion composée de plusieurs substances extraite avec feu & eau des terres seiches: ou de la fleur q̄ les murailles neuues posées en lieu humide viennent à produire: ou bien de celle terre qui se trouue moisie dans les fosses & spelonques, auxquelles la pluye ne peut faire entrée: Ausquelles selon ma fantasia & iugement vient à s'engendrer humidité aérée que par la seicheresse terrestre. Parquoy voyant la nature & effects d'iceluy, n'ose proprement asseurer quelle chose se peult estre. Les sages physiciens pour le trouuer salé au goust, disent qu'il est de nature chaude & seiche. Mais d'un autre costé apperceuāt que c'est vne chose engendrée de l'air, & qu'au touchement du feu, elle vient à s'enflamber s'esleuant impetueusement, comme fait la poudre à canon, faisant demōstrance d'estre de la nature de l'air, l'assurant estre chault & humide. Puis le voyant chargé d'une couleur blanche luisante au possible, le iugent tenir de la nature de l'eau, à cause de la frescheur qui l'accompagne. Laquelle fait trouuer le vin froid cōe glace, quand on le met tréper dedās en temps d'esté. Et qui le voudra rompre & conuertir en poudre, il doutera qu'il soit de nature terrestre, & mesmement qu'il se conuertit en pierre dure & blanche, quand il se brusle avec soufre, tellement qu'il a demōstrance de participer en toute qualité avec quatre elemēs, si que



si que les anciens qui en ont escrit l'appellent nitre. Et Pline en son histoire naturelle au liure trête vniesme dit que cest vne substance, qui n'estoit pas de beaucoup differente au sel. Et assurent les medecins que le meilleur se trouue en Macedone. Or comme ie vous ay dit, le salpêtre se trouue communement aux fosses & spelonques qui sont profondes en terre. Mais celuy qui le veult mettre en œuvre, n'en ayant trouué grande quantité, il luy est necessaire de recouurer chaudières, fours, tines & casses: & semblablement bois, chaux, & cendres de chesne. Mais premièrement il luy fault faire provision d'une cloche grande ou autre instrument muré alentour & assez prochain d'un lieu ou lon aye la commodité de recouurer eau, de laquelle vous aurez assez necessité. Et semblablement de la terre de laquelle il vous faudra faire voz fourneaux, qui seront mis sur les chaudières, tout ainsi que ceux des teinturiers. Apres faudra eriger vne quantité d'aix, sur lesquels faudra mettre tonneaux enfonchez, casses quarrées & tines en nombre de cinquante à soixante, ou bien selon la capacité du lieu. Et entre deux chaudières faudra mettre vne tine pour recevoir l'eau, laquelle viendra à sortir. Et aux tonneaux enfonchez vous ferez vn trou d'un costé de moyenne grâdeur, & le boucherez avec vn peu de toille desliée, afin que la terre soit retenue, & que l'eau se puisse escouler, laquelle sera reduite aupres de la terre que vous voulez mettre en œuvre. Et de telle composition remplirez voz tines à vn pied pres du bord. Et ce qui sera demeuré vuide ferez remplir d'eau. Laquelle ayant percé la terre ferez conduire aux instrumens, qui la doyuent recevoir. De laquelle mettant quelque quantité sur la langue, & la trouuant salée, vous pouez certainement la iuger estre bonne. Et si cest au contraire, la remettrez encores vne autrefois sur la mesme terre, ou sur vne autre, continuant iusques à la tierce fois. Puis les reduirez dedans vn autre vase, sans mesler la seconde & tierce avec la première. Et en ceste sorte irez procedant, & reduisant ceste eau en bonne quantité, estant aduertis de les bien charger de substance nitreuse. Et quand elle ne vous semblera estre reduite en la perfection que vous voudrez, retournez la au dessus des mesmes terres, &

continuez iusques à ce que vous soyez contens & satisfaits. Et apres vous ferez vn fourneau muré au dessus de deux grâdes chaudieres de cuire, semblables à celles des teinturiers, lesquelles vous remplirez de l'eau susdite, & continuerez de la faire bouillir iusques à ce qu'elle soit reduite à vn tiers moins. Et alors vous la mettrez dans vne tine couuerte, & bien ceinte estroittement de cercles de fer. Et quand telle eau est tellement reposée que sa clarté premiere vient à se presenter au devant de voz yeux, vous ne faudrez à la purger & nettoier. Puis dans la mesme chaudiere ou autre la retournerez faire bouillir, vous prenant garde que l'escume ne vienne à verser, craignant qu'une partie de la bonne substance ne vint à se perdre. Pour à quoy obuier on fait vn chapeau de fonte, ou de cendres de chesnes, faux, ou oliuier. Et avec la quatriesme partie de chaux, faite dissouldre sur cent liures d'eau, quatre d'alun de roche. Et de ce qui est cōtenu dās le chapeau, getterez quātité lors que vous verrez l'eau du salpêtre s'eleuer & former en vne escume. Laquelle tout en vn momēt verrez abaïsser & deuenir claire, prenant vne couleur azurée & belle. Et continuerez de la faire bouillir, iusques à ce que les parties aqueuses & subtiles viennent à sortir, & celles du salpêtre à s'engrossir, tellement que mises en casses & refroidies viennent à se congeler. Et l'aperceuant ainsi reduitte vous la mettrez dans vases de boys, la ou la laisserez reposer trois ou quatre iours: & toute l'eau qui ne sera congelée, vous l'osterez & mettrez hors par le moyen d'un canon qui sera posé au fond du vase, & la garderez pour estre recuite. Et le salpêtre que vous trouuerez congelé en quantité, sera selō la vertu qui estoit en l'eau, ou en la terre. Mais la clarté viendra de la composition qui est dās le chapeau, laquelle a puissance de le purger, & de le rēdre comme raffiné en la premiere cuite. Apres que vous l'aurez leué avec vn eschampre, & mis sur vne table pour estre seiché, prenant desir pour amuser à quelque effet de le purifier. D'auātage pour faire pouldre ou eau forte pour departir, vous y procederez par deux moyens, le premier avec eau, & le second s'affine avec feu & eau. Et en ceste façon premierement il vous fault prendre de la susdite composition

tion faite de chaux, cendres, & alun. Et apres pour vn chacun baril d'eau que vous aurez versé en la chaudiere, vous mettrez au dedás quatre ou six gorgées de ceste eau forte, dans laquelle vous mettrez la quantité de salpêtre que vous congnoistrez pouoir estre conuertie en liqueur. Puis la ferez bouillir & bien resoudre: & quand vous apperceurez haulser l'escume, à l'heure vous la getterez hors de la chaudiere pour la verser dans vne tine: au fôd de laquelle vous aurez fait mettre quatre doigts de sable bien laué. Puis ayant mis vn drap au dessus, dônerez conduite de faire tomber l'eau dans vne autre tine, qui sera au dessous, par vn petit trou que vous aurez laissé au fôd: & ne fudrez à mettre cest eau en vne autre chaudiere pour la faire rebouillir iusques à ce que vous apperceuiez qu'elle vient à se diminuer, & alors vous la retirerez hors de la chaudiere, la mettant dans les casses ou vases pour estre congelées, ainsi que ie vous ay dit cy dessus, tellemēt que vous auez vostre salpêtre plus blanc, beau, & meilleur que celui de la premiere cuite. Encores se peult affiner le salpêtre avec le feu: & pource faire on préd vn vase de fer ou de cuire, lequel fault remplir de salpêtre. Puis l'ayāt couuert d'vn couuercle fait expressement, ne fudrez à le mettre au milieu des charbons ardás. Et quand le maistre pèse à peu pres qu'il doit estre fondu, il viēt à le decourir, mettāt dedás soufre puluerisé fort subtilemēt. Au moyen dequoy le feu s'attache au soufre tout incontinent, & ne l'abandonne qu'il ne l'ait du tout consumé, sans brusler autre chose que la superfluité & grosseur vnētueuse du salpêtre. Lequel demeure clair & net, tellemēt que l'ayant séparé du feu & laissé refroidir, vous le trouuez dans le vase tout en vne piece blanc comme marbre, & au fond restera toute la terre du salpêtre, qui n'est à autre chose bonne qu'à faire la pouldre.

*De la poudre qu'on met en œuvre pour faire tirer l'artillerie, & la façon comme il la fault composer & faire. Chap. 2.*

**T**Resgrande & incōparable consideration doit on auoir en celui qui fut premier inuēteur de composer la poudre à canō, encores qu'ō die le diable en auoir esté premier inuenteur, attendu qu'avec l'operatiō d'icelle on

offense les hommes, leur faisant dommage qui ne peult estre reparé. Si que par conclusion, on voit toute chose terrienne estre vaincue par la force & violence du canon. Tellemēt qu'on trouuera ceste inuention en la bien considerant, beaucoup plus nuisante que toute poiso & venin, & plus pernicieuse que la propre foudre du ciel: Comme celle qui est encores plus dāgereuse que n'est toute autre arme de fer, tāt egue & trēchāte soit elle: attendu qu'on a quelque espoir en estāt blessé d'en eschaper. Mais lon est hors d'espoir la ou est monstřé l'effet de ceste poudre. Laquelle est composée des quatre forces elemētales, & estant en la plus grande partie de sa plus grande seichereuse, gettant le feu au milieu du soufre, vient à se multiplier d'air & de feu, faiscāt avec l'humidité meslée avec la terre subtile vne vapeur grosse & enflammée: tellement que la nature d'un chacun element combattant avec l'autre, se conuertit en humeur & en grande ventosité à cause du chault & humide. Si que ne pouuāt durer ensemble, est necessaire qu'ils s'efforcent de saillir dehors, l'air s'adressant à l'air, & le feu tiré de sa nature se traueille de monter en hault: encores qu'il soit acteur superieur & excédant en pouoir tous les autres, lesquels il cōuertir en soy auant que de sortir. Au moyen dequoy vient à naistre impetuosité si grande, qu'il est necessaire que la chose en laquelle ceste poudre est recuite, soit mise en pieces, ou que le plus foible vienne à ceder au plus fort. Ce que auenant le boulet qui se met dedans le canon fait les effets que nous voyōs. Lesquels seblēt miraculeux à ceux qui par raison ne les entēdent. Aucuns autres sont esbahys du bruit que fait le boulet sortāt hors de la bouche du canon. Mais voulant considerer l'effet de la poudre, ils delaisseront à s'esmerueiller de cecy qui est fait de l'art, & qui procede en partie de l'air, qui est au dehors de la bouche du canon, ayant son corps par nature vny & resistanr à sa partie basse, au respect de la proximité de leau, laquelle a en soy quelque froideur accidētale. Au dedās du boulet est le feu qui s'engēdre avec la poudre contraire à l'autre qualité elementale, & de seblable corps par sa subtilité qu'est celuy de l'air, Mais abādōnant & laiscāt toutes ces raisōs à part sans dispute q̄lcōq̄ ie vueil decēdre en la



en la pratique de faire la pouldre, laquelle se fait cōme chose necessaire en plusieurs sortes. Et trouue trois simples seuls de faire le fondement de toutes: C'est à sçauoir, salpêtre, soufre, & charbon, avec l'aide desquels on la proportionne selon les instrumens dans lesquels vous la voulez mettre. Car aux haquebutes à bras n'est requis poudre commune, & aux langues, pots, & boulets à feu ne vœult estre fine. Car si vous mettiez dans le canon celle de laquelle vous chargez les haquebutes, le boulet ne sçauroit esloigner le canon plus de dix brasses. Et pour conclurre voulant faire bonne pouldre, il fault qu'elle soit cōposée de matiere exente de grasse terre. Secondement qu'elle soit subtilement brisée & la matiere bien incorporée avec elle. Tiercemēt qu'elle soit vidée de toute humidité. Mais le salpêtre est celuy duquel depēt toute force. Parquoy il vous en fault auoir abondāment, & qu'il soit pur & de nature forte: ce que vous congnoistrez en le bruslant. Or pour faire pouldre commune à canon, il fault prēdre trois parties de salpêtre afiné dans du charbon de saule, & vne de soufre: & le tout auoir broyé & pestry, faudra incorporer ensemble, en desechant & mettant hors toute humidité. Mais voulāt faire pouldre pour la moyēne artillerie, il fault prendre cinq parties de salpêtre reafiné, vne & demie de charbon, & vne de soufre. Puis ayant le tout petry ne faudrez à l'incorporer subtilement, pour en apres laisser conuertir en grain & seicher vostre poudre. Mais voulant faire celle des haquebutes, il vous fault prendre dix parties de salpêtre, vne de charbon de noyer, & vne autre de soufre. Aucuns autres sont qui pour le faire meilleur mettēt treize parties & demie de salpêtre, deux de charbons, & vne & demie de soufre: & tout cela bien meslé s'incorpore cōme la dessusdite. Mais à cause que telles pouldres viennent à s'enflāmer facilmēt, pour obuier au mal-heur qui en pourroit sortir, il les faudra baigner avec eau cōmune, iusqu'à vne certaine quātité d'humidité qu'elles puisset estre tenuēs à la main. Aucuns sont qui l'arrousent avec du vinaigre, & aucuns autres pour la faire plus forte l'arrousent avec eau de vie champrée. Mais toutesfois quand i'en ay fait, i'ay tousiours vſé d'eau commune, pource que i'ay congneu qu'elles estoient

toutes d'un mesme effect, comme l'experience me la monstré: pourautant que pour le peu d'eau de vie & peu de vinaigre qui s'y peut mettre, elle ne peut auoir plus de force, & ne font plus d'operation en tel oeuvre que l'eau commune: pource qu'ils seuaporent & qu'il en reste bien peu. Parquoy vous ferez aduertis de ce faire alors que vous les viédrez à petrir. Pour faire le charbon, les aucuns prennent fantasie qu'il soit de faule, & les autres le font de noyer, de sermens, de l'aurier, & de canes, descorces de fruit de pin, & generally tous charbons de boys doux & tendre, est bon à tel exercice. Et se fait en diuerses sortes. Vous aduertissant que celui qui en veult faire petite quantité, met en pieces les verges des arbres dessusdits. Et les auoir reduites dans un grand pot ou vase, le fait tresbien couvrir. Puis alentour & au dessus fait mettre le feu, lequel il fault continuer iusques à ce que la chaleur soit totalement bien entrée dedans, & que le boys, lequel y a esté mis soit embrasé sans rendre flamme aucunement ains bruslé seulement par la vertu d'un tel rechaufement. Et apres l'auoir laissé refroidir, vous trouuerez le charbon de vostre boys. Aucuns viennent à le briser dans un mortier de pierre avec un pillon ou maillet pour le plus faire subtil pour l'incorporer avec la matiere. Mais pour le briser plus promptement, il fault prendre la quantité du salpêtre que vous voulez mettre en oeuvre, puis l'auoir mis dedans une chaudiere, l'accompagner de autant d'eau que vous peferez estre suffisante pour le resoudre sur le feu, duquel vous le separerez pour y mettre & incorporer vos pieces de charbon: puis remuant le charbon & salpêtre avec un baston, vous getterez vostre soufre reduit en poudre au dessus. Et ayant reduite vostre composition en ceste sorte la mettrez seicher, & l'auoir arrousee avec eau commune ou quelque peu de vinaigre, la remuant vous trauaillerez de la greuer, & pour vous en aider à vos affaires la seicherez. Puis la ferez mettre dans un caque pour estre gardée, la faisant loger au plus hault de vostre edifice, tant pour plusieurs respects que pour auoir meilleure commodité de se maintenir seiche. La bonne pouldre se congnoist par les personnes experimētées quand elle est grandement noire qui est signe qu'elle n'a eu faulte de charbon, ou bien

bien quand elle est humide, & quand elle s'aparoit subtile, lors que vous la tirerez avec le doigt. Vous asseurant que la pouldre mal faite, fait tomber en grand deshonneur les canonniers qui la mettent en œuvre. Plusieurs asseurent de sçavoir faire ceste pouldre blanche, & les autres rouges, & d'autres pour la faire plus agreable & puissante, disent estre tresutile & profitable de mettre en vne chacune liure de soufre, vne once de mercure: aucuns autres y mettent vn quart d'once de sel armoniac sur vne chacune liure de salpêtre, & d'autres asseurent le charbon de ionctz brulez, ou de toile de lin, exeder en bonté tous les autres qu'on sçauoit mettre en œuvre.

*Des moyens qu'il fault vser voulant charger l'artillerie & faire qu'elle vienne à tirer iustement. Chap. 3.*

**A** Pres que ie vous ay avec grand trauail cauées les mines, & extraits les metaux, formez canons, chariots, & composé boulets & pouldres, ce seroit chose inutile si ie failloie à vous en apprédre l'vsage. Parquoy il est necessaire premieremēt apprendre de faire tirer vostre piece d'artillerie. Ce qui ne se peut faire sans prendre telle quantité de la pouldre, qu'avec la violence du feu vostre boulet soit conduit au lieu ou vous souhaitez, & que la piece d'artillerie soit telle qu'elle puisse supporter la charge sans dangier d'estre rompue. Et si est encores necessaire que le canon soit droit dedans & dehors, bien nettoyé & braqué en lieu plain & vny: & si est de besoing d'observer & garder deux autres considerations avec industrie & pratique de l'art. L'une est de sçavoir bien charger sa piece pour luy sçavoir donner sa force & puissance effectiue. L'autre de la sçavoir tellemēt dresser que celui qui tire, puisse aller iustement au lieu ou il a pris visée. Pour charger vostre piece, on fait vn instrument que les canonniers, appellent vne quaisse, de lames de fer, ou de cuiure. Laquelle est aussi longue trois fois, comme est le diametre du boulet, dans lequel on met la pointe d'une broche, sur laquelle avec la quaisse, on met vn moule plain de pouldre qu'on poulse iusques au fond du canon: & tournant la main vostre pouldre vient à tomber & à sortir hors de la quaisse que vous retiterez pour continuer en

ceste façon deux ou trois fois selon la finesse & bonté de la pouldre, ou selō la grādeur de la quaiſſe. Vous aduertissant d'y en mettre les deux tiers de la pesanteur du boulet. Mais si vostre piece d'artillerie est faite de bon metal, de grosseur proportionnée & de longueur telle que la poudre soit enflambée auant que le boulet soit dehors, tant plus vous y mettrez de pouldre, plus grand sera le bruit, & plus la vigueur de sa force sera demonstrée: Car la force de l'artillerie procede de la pouldre. Laquelle doit estre faite du meilleur salpêtre qu'il vous sera possible de trouuer. Et auoir esté brisée & seichée de toute humidité vous la mettrez en la façon que ie vous ay dit dans la piece de l'artillerie. Puis y poulerez vostre boulet sans aucune force. Et pour vouloir venir à l'effet de telle chose, vous ioindrez vostre artillerie à la canōniere, si vous estes dedans forteresses. Mais premierement il vous fault considerer si vostre piece pourra porter iusques au lieu ou vous auez fâtaſie de tirer. Puis vo<sup>us</sup> mettāt sur le plain de la queue de vostre piece, & prenant droite viſée, faisant accorder la bouche de vostre canon droittement à la chose que vous voulez frapper, vous ne faudrez à tirer tant pour esprouuer vostre piece & ſçauoir si elle est iuſte, que pour experimēter la bonté de la pouldre. Et si par cas fortuit le boulet ne peut arriuer au lieu assigné, vous haulſerez en aprochant la bouche de vostre artillerie de degré en degré. Et vous aſſeure que grande louange vient à estre donnée au canonnier qui ſçait braquer sa piece à propos. Et encores luy est beſoing d'auoir bōne poudre, le boulet iuſte, & l'inſtrument bien fait. Je ne vueil encores faillir à vous aduertir que ſi l'artillerie est droite, toute la faulte qu'elle fera, procedera de vous, Il est bien vray que l'artillerie ne peut tousiours estre pouſſée au lieu ou vous auez deſir, ne approchée pour faire aller le boulet autant loing que le deſir vouldroit pour le contentement de l'œil. Parquoy aucuns canonniers commencent à donner au commencement vn doigt franc à leur artillerie, puis deux, trois, quatre, & quelquefois d'auantage. Et pour conclurre ie dy que celuy qui veult faire profeſſion de ceſt art doit estre ieune bien diſpos, ayant bon iugement, ſeure veuë, & qu'il ſoit patient.

Encores




Encores vous en diroye-ie d'auantage, & mesmement vous enseigneroye les moyens desquels noz anciens vsoyent en faisant tirer leurs bôbardes & grosses couleurines, qui pour n'estre en vſage à preſët, me les fera abândonner, me contentant de vous auoir monſtré ceux que les modernes ont en vſage pour le iourd'huy



*Des mines & contremines, pour l'aide desquelles avec le feu on viët à ruiner les forteresses imprenables, & desquelles on ne peut approcher l'artillerie. Chap. 4.*

**A** Pres les emerueillables effets de l'artillerie, non moins pleins de frayeur, se môstrent ceux que la poudre vient à susciter dans les mines qui sont dessous terre, & par la force du feu & veheméce de la poudre, sont tant fort esbranlées, qu'aucunefois elles sont tomber en ruine les edifices qui sont au dessus. Et de ceste malheurté fut premier inuenteur en Italie François George architecte excellent, natif de la cité de Siennes, encores qu'on en donnast la louange au capitaine Pierre de Nauarre. Vous aduertissant que le susdit François demouroit en ce temps à Naples fort bien apointé, lors que le Roy d'Espaigne mis hors des mains du Roy de France le royaume de Naples, là où il fut requis de monſtrer son industrie par le capitaine Pierre de Nauarre, en l'entreprise qui se feit pour prendre le chasteau de leuf, ou il demeura trois iours à miner: & avec poudre tout à vn coup mise au dessus la chappelle de l'Eglise du chasteau, fist ruiner & tóber en mer vne partie de la forteresse, avec

vne quantité de François qui estoient dedans pour la garder & defendre contre les Espagnols, lesquels sans grande resîstence entrèrent dedans. Or pour vous declarer l'ordre pour y proceder, vous devez entendre que l'effet est d'autât plus grâd que la poudre y est employée en grande quâtité, pourueu qu'elle soit mise en lieu que l'exhalatiõ du feu ne puisse sortir facilement: puis devez chercher pour faire les mines lieu assez eslongné de la place que vous voulez offencer, à celle fin qu'e sortât ceux qui sont dedans ne vous donnent empeschement, & faire par contremine que vostre entreprise soit de nul effet. Les mines susdites se fõt le plus qu'il est possible estroites & tortues, & mesmement aupres du lieu que vous voudrez ruiner, au dessous duquel proprement vous caurez & ferez vne fosse pour le moins haulte de quatre brasses ou plus, & large de deux, dâs laquelle vous mettrez petis caques enfoncez par le dessus, lesquels vous réplirez de poudre, & au milieu d'eulx mettre vne table sur laquelle vous getterez à force poudre. Et au pied des caques vous mettrez vne grosse pelotte de cotõ fillé & retors qu'õ aura fait bouillir en vinaigre, loufre, & salpêtre: & l'auoir couuert de bõne poudre à canõ tresbien seiché, & mis au lieu que vous aurez proposé, vous ne fâdrez à faire vne trainée de poudre, & le semblable ferez iusques à la sortie, laquelle vo<sup>9</sup> ferez estouper avec pieces de bois, sur lesquelles vous ferez murer pour plus faire de resîstance au feu. Et auoir rendue ceste entrée forte, quâd il vous semblera de pouuoir gre-



uer l'ennemy, ferez mettre le feu sur la trainée: & alors apperceuez l'exécution que fera vostre poudre. Les aucuns voulant monstrier d'estre bons maistres parlât de telles choses, se trauail-  
lent de la decorer pour mieux coulourer leurs mensonges. Mais laissez les dire: car la perfection de cest effet, gist en la bonté & quantité de la poudre, laquelle rend le feu grand. Et que la fosse ne soit point trop grande, & que l'entrée soit bien fermée: & tout le demeurant que ces vendeurs te pourront dire, seront paroles inutiles.


*En quelle façon se doiuent faire les trompes à feu, pour defendre ou offenser forteresses & ponts, & pour brusler munitions, ou faire festes pour se resiouyr aux assemblées. Chap. 5.*

**L**Es trôpes à feu sont en coustume d'estre faictes pour donner frayeur aux cheuaux, & pour nuire aux ennemis qui n'osent prendre la hardiesse de s'approcher de vous, iusques à ce qu'elles soyent du tout esteintes, tellement que pour conclure l'offense d'icelle, & telle qu'elle se voit au parauant, si qu'on peult obuier & auoir temps d'y remedier. Et vous aduertis que ce sont choses belles à voir, & le nom desquelles red esbahyssemēt à celuy qui n'a les deffenses en mains pour resister à ses trôpes de feu, lesquelles sont bonnes pour forcer vn pont quand il est gardé, ou tenir vne porte, ou chemin estroit, lors que vous en auez en main grande quantité. Et semblablement pour mettre feu aux maisons, chariots, ponts munitions, & autres choses qui sont faictes pour le seruice de l'ennemy. Et en peult on faire encores d'autres qui tirēt certains boulets, qui au sortir s'enflambent: & sont assez suffisans, quand ils sont de pierre pour rompre vne grosse & bonne porte de bois. Et afin que vous puissiez entendre comme l'une & l'autre se font ie vous vueil enseigner les deux façons, vous aduertissant que les trompes se pourrôt faire & se font encores de bâdes de fer lombard, ou de lames de cuiure. Et pour les faire on fait vn canō de bois long d'une brasses & demie, lequel on cie par le milieu. Puis on met dans vne chacune partie vn autre canō. Mais au dessus on viēt à les enueloper tout à l'étour d'un fil de fer. Puis au fōd vous

ne faudrez à mettre la haulteur de quatre doigts de poudre à canon. Au dessus de laquelle vous mettrez vn boulet fait d'estoupes ou de pieces de toille, au milieu de laquelle vous auez mis quantité de poudre. Et au dessus vous mettrez pour le couvrir quatre doigts de grosse poudre cōposée avec poix grecque, voire brisé, gros sel commun, salpêtre & escaille de fer aucunement brisée. Et au dessus de ceste composition vous semerez deux doigts de poudre fine. Et dessus ce boulet en mettrez vn autre fait de la mesme façon. Puis réplirez tout le canon de la trompe de quatre doigts en quatre doigts iusques à la bouche. Laquelle vo<sup>us</sup> estouperez avec du papier, afin que la poudre ne viēne à sortir en maniāt les trōpes. Lesquelles se mettēt sur la pointe d'une pique, ou autre haste lōgue, & attachée avec deux cloux au pied. Et quād vous les voulez mettre en œuvre vous gettez le feu par la bouche avec vn peu d'estoupe. Mais celles que ie vous ay nōmées qui tirent le boulet de pierre, se font de bois de noyer blāc & sec, ayāt trois brāsles de lōgueur, & leur creux tel qu'aisēmēt on pouuoit mettre le poing dedans. Premièrement ie fis accoustrer & arondir en façon d'artilleries deux buches grosses deuers le pied, & subtiles deuers la teste, lesquelles auoir fait crier par le milieu, ie les fis cauer iusques à quatre doigts pres le pié. Depuis ie prins bendes de fer lombard, & en fis en chacune partie vn demy canō, les faisāt pointuz sur l'extremité du pié, en façō d'une pyramide vuyde, Et sur la pointe ie formay vn petit canon tellement subtil, quād le repliāt ie le faisoie entrer dedans & dehors, & fil me seruoit d'étrée pour mettre le feu. Et auoir iointes les deux parties ensēble & collées tresbien, le fis ceindre avec cinq gros cercles de fer: donnant ordre d'en faire mettre trois depuis le milieu en bas, & les deux autres ie fis poser deuers la teste. Et avec vne grosse masse de fer, me trauaillay de les serrer & ioindre le plus qu'il me fut possible. Apres ie fis faire les boulets de pierre que ie voulu esproouuer au festin d'un mien amy. Tellement que i'en tiray neuf fois, faisant effect tel qu'eust fait celuy d'une moyenne piece d'artillerie: & au bruit il sembloit proprement estre de fer ou de bronze. Vous aduisant qu'un



qu'un tel instrument facile à porter est propre d'aller volder vne maison mettant les portes en bas. Et trouue ce moyen beaucoup meilleur de vouloir entrer q̃ pour brusler les portes, pource qu'il est plus soudain. Et ne luy scauroit on empescher de ietter la porte dedans, encores qu'elle fust garnie de bendes de fer.



*Moyens de faire boulets de metal pour tirer au milieu d'une bataille qui se mettent en plusieurs pieces. Chap. 6.*

**C**oustumierement vous auez tousiours veu les gens de bō entēdemēt par gētilleſſe, ou pressez de neceſſité eſtre inuēteurs de plusieurs choses singulieres, abregēat les aucunes, ou s'estudiant de les augmēter en puissance, & s'en aider en diuers effets. Trestous lesquels recitez en ce dixiesme liure, prēnent leur source de la poudre à canō de laquelle voyant les effects, i'ay pris fantasie de faire vn canon de bronze ou de fer. Et l'auoir bouchē avec vn coing de boys & donné feu, i'apperceu volder le cōing hors du canon fort impetueusement. Au moyen dequoy ie fy faire vn instrument de bronze ou de fer, lequel ayant chargē de poudre & mis vne piece au dedans, commençay à le faire tirer, tellement que plusieurs maistres canonniers se sont trauaillez de l'ensuyure: & non contens de ceste inuention pour plus greuer & molester l'ennemy, ont trouuē moyen de faire boulets creux par dedās, tellement forgez qu'ils se peuent mettre en plusieurs pieces. La moindre desquelles est assez suffisante pour outrager celuy qui en est atteint, Mais


pour les tirer plus seurement, & leur donner moyen de se diuifer en plusieurs pieces, il les faut mettre dedans vn canon pour les getter au milieu d'une armée & multitude d'hommes. L'autre façon que j'ay veu pour faire ces boulets, se faict en ceste sorte, premierement il fault reduire vn mōceau de terre, de la grosseur que vous voulez former vostre boulet. Puis apres le faire de poudre, & apres l'auoir couuert de pointes de cloux de chariots, enchasserez les testes dedās, fort ferrées l'une aupres de l'autre: couurirez les pointes de suif ou cire, puis apres les mettrez en leur forme, en vous assureāt qu'à mon iugemēt ceux cy me semblent plus assurez que les premiers & de moindre despence. Encores en fait on d'autre sorte gettant du fer fondu entre deux moitez creuses, ausquelles fault ioindre vne chesne pour les tenir ensemble vnīs. Et vous assure qu'en les gettāt en troupe, ils font beaucoup plus grande execution que ne font les boulets entiers. Et pour conclurre ie vous ay declaré toutes sortes de boulets que j'ay veu pour seruir aux grosses pieces extraordinaires de l'artillerie. Mais voulant tirer pour faire dommage à plusieurs personnes, j'ay veu mettre sur la poudre petites pieces & grains, lesquels ne seruent tant seulement aux canons & autres grosses pieces, ains aux hacquebutes. Mais qui voudroit nuire & rompre avec frayeur grande, vne compagnie de gens de pied, ou bien vne bataille de cheuallerie régée en campagne, ie seroye d'auis de faire charger plusieurs pieces, & dans la chacune faire mettre huit ou



neuf grains d'acier ou fer. Puis auoir mis grosse poudre, mettre encores au dessus vn desdits boulets de pierres, & l'auoir logé & accoustré ainsi qu'il est requis, donnerez feu, & regarderez de braquer vostre piece pour la faire tirer droittemēt au milieu de l'infanterie ou cheualerie. Là ou vous ne pourrez faillir de veoir faire execution fort grande, à cause que le feu qui sort des boulets est composé avec tel artifice, qui court longuement parmy eux ne leur dōnant seulement facherie & frayeur, ains perte fort grande, pour se mettre aucune fois dans les caques de la poudre, ou la gendarmerie a fait dresser la munition.

*Moyen de faire langues à feu pour getter ou il vous plaira, attachées à la pointe des lances. Chap. 7.*

**P**our la defense d'une forteresse, ou pour dresser vne escarmouche de nuit pour assaillir vn camp, c'est chose vtile d'atacher à la pointe des lances des gens de cheual, & sur la cime des picques des gens de pié, certains canons de papier posez dans autres de bois longs de demie brasse. Lesquels vous réblirez de grosse poudre avec laquelle vous meslerez pieces de poix gregoisē, de soufre, grains de sel commun, lames de fer, voirre brisé & arsenic cristalin. Et le tout pousserez dedane à force & auoir mis quelque chose au deuant, tournerez l'issus du feu contre voz ennemis. Lesquels resteront effrayez au possible: aperceuant vne langue de feu, excédant en longueur deux brasses, faisant vn bruit espouventable. Et peut ceste façon de lan-



gue grandement seruir à ceux qui vueillent faire profession des armes sur la mer.

*En quelle façon s'ordonnent les pots & boulets à feu pour tirer à la main, Chapitre 8.*

**L**Es capitaines experimentez sont en coustume faire porter à leurs soldats certains pots ou boulets pleins de poudre, ou autres liqueurs vntueuses, disposées à prendre feu facilement, pour mettre en desordre leurs ennemis estant ioints & serrez. ausquels la fumée donne beaucoup d'empeschement: mais non pas du tout si grand comme fait le feu. Et se font ces pots de terre seiche. Puis on met dedans de grosse poudre meslée avec poix gregoise & soufre brisé. Puis on met au dessus gresse de pourceau pour couvrir la poudre, & l'incorpore on dedans icelle l'epaisseur d'un doigt, afin que la poudre ne vienne à se resprendre, & que le feu s'y empoigne plus lentement, iusques à ce qu'il soit arriué auprès des ennemis. A l'encontre desquels le voulant getter, mettent vn peu de poudre les tenās en main iusques à ce qu'ils soiēt totalement enflambez. Encores fait on vne autre composition liquide & coulante dans vne chaudiere, en laquelle fault mettre gresse de pourceau, huile de soufre vis, salpêtre deux fois reafiné, eau de vie, poix gregoise, tourmentiné, & quelque quantité de grosse poudre. Et le tout auoir esté reduit en liqueur, remurez la matiere avec vn bastō, puis en réplirez les pots à demi. Et au dessus mettez quantité de pouldre, afin que le feu se puisse prendre



plus fa-



plus facilement. Et quand vous les voudrez mettre en œuvre vous les getterez avec vne fonde. Encores peult on remplir de ceste mesme composition certaines bourses de drap de lin, lesquelles on enuironne avec cordes. Et les auoir formées comme boulets, on les met dedans sarbatennes de fer, pour estre tirez tout ainsi que ceux des trompes. Vous assurant que telle composition peult embraser & brusler facilement ponts de bois, chariots & munitions. Car cest matiere facile à s'enflamber, & qui maintient longuement son feu.

*La façon de faire plusieurs compositions de feuz appelez par le vulgaire feuz artificiels. Chap. 9.*

**T**oute chose seiche & qui se brusle facilement, multipliant le feu pour quelque propre & interieure nature, se peut mettre à composition de feu. Et pour cest effet sont faittes les compositions, desquelles le soufre & son huile s'ot chauldes & seiches, ayant quelque subtilité cōme est celle du salpêtre. D'autres sont vntueuses, cōme celles des gresses & huilles quels qu'ils soyent, aucuns autres par seicheresse. Mais mettant à part toutes les differences des compositions susdites, ie me suis trauillé le plus que i'ay peu de trouuer celles que ie vous vueil declarer. Et premierement depuis le temps du Roy Alexandre le grand, iusques à celuy de Marcus Gracchus, parauenture inuenteur ou grand experimenteur de telles choses, desquelles entre ses escrits i'ay fait election d'aucunes. Lesquelles voulant faire il prenoit poix gregoise alchilcan, soufre vis, tartre, sercocolle, salpêtre, huile petrole, & de chacune part de ceux la vn petit plus que de chaux viue. Et le tout il composoit avec huile de torteau d'œuf, dans vn vase de voirre ou de terre vernissée. Lequel ayant bien fait fermer, il faisoit mettre au dessous d'vn fumier qui fust chault l'espace d'vn moys. Sur la fin duquel tenant le vase bien fermé sur le feu, faisoit le tout bellement conuertir en liqueur. Laquelle il mettoit dans des pots ou autres vases, au milieu desquels il laissoit vn petit trou pour mettre le feu. I'ay trouué vn autre moyen de faire feu avec du soufre, ou de son huile, & de celuy de genere, accompagné de salpêtre, de gresse d'hoye, de poix noire,

de vernis & fiente de coulomb puluerisée, & telle quantité d'eau de vie qu'elle vienne à couvrir la composition susdite. Laquelle auoir mise dedans vn pot ou vase de voirre, & fermée la bouche avec cire, vous le mettrez au dessous du fiant ou fumier de cheual, chaut, l'espace de vingt cinq ou trente iours. Sur la fin desquels, à ce que le tout soit mieux incorporé, vous ferez mettre le vase sur vn petit feu. Puis remplirez de telle composition batons qui seront creux dedans, pots & semblables vases propres & faciles à tirer à la main. Encores prend on vn boulet de pierre, sur le milieu duquel est posé vn anneau, auquel est attachée vne corde de la longueur d'vne brasse & demie. Et au dessus de ce boulet vous mettrez estoupes ou pieces de lin bien trempées & imbues de telle composition, sur lesquelles vous mettrez le feu. Et avec la main commencerez à la getter de toute vostre force: encores peut on faire vne autre composition de feu, prenant vernis reduit en liqueur, huile de soufre vif huile de moyeuf d'œuf, huile de tormentine, de geneure, & de semence de lin. Puis la moitié que peut tenir la composition de poudre subtile, de laurier sec, & autant de salpêtre: & toutes ses compositions assemblées, seront mises dans vn vase de terre vernisé, ou dans vn voirre ayant la bouche estroite, & tellement fermée avec cire, que air aucun n'ait pouoir d'y faire entrée. Et apres le tiendrez trois moys en fumier chaut, le remuant tous les moys quatre ou six foys. Puis voulant mettre en œuvre vostre composition, en remplissez le pot que vous voulez employer. Vous assurant que le feu n'est plus tost acosté de la poudre, que le tout se convertit en flâme, qui ne se peut esteindre, iusques à ce que le tout soit consommé. Et si vous la gettez sur harnois, celui qui l'a sur le dos, sera cōtraint de se desarmer, s'il ne veut estre toalemēt bruslé de ce feu. Lequel se fait encores d'autre sorte avec vne liqueur subtile: de laquelle vous oindrez aux iours caniculaires vne piece de bois ou autre chose propre à brusler. Sur laquelle la chaleur du soleil sās autre chose à pouoir de faire prēdre le feu. Et dit on qu'en ceste façō Marcus Gracchus fit brusler l'armée nauale des Romains. Et assure on ce feu

ce feu estre inextinguible, sil n'est couuert avec sable & arrousé d'vrine vieille ou fort vinaigre. Et pour le faire Marcus Gracchus prenoit canfre, huilles de soufre vis, tourmentine, alterin & geneure, & semblablement cire, gresse, & salpêtre, en y adioutant le double de toutes ses cōpositions d'eau de vie, & la huitiesme partie de toute la cōpositiō d'arsenic & sel armoniac. Puis toutes ses drogues subtiles il mettoit dās vne fiole bien fermée, laquelle estoit posée au dessus du fumier chaut, l'espace de deux mois, sur la fin desquels il faisoit distiler sa composition, & la rendoit en liqueur fort subtile: & voulant brusler quelque chose il ne faisoit que l'oindre de ladite liqueur, sans que la matiere se vint à brusler aucunement. Vous asseurant qu'une telle composition me fut donnée par vn alchimiste fort experimēté, lequel m'assura luy auoir esté seuremēt enseignée. Au moyē dequoy i'en ay voulu faire essay, poursuyuant lequel ie n'ay iamais trouué chose de plus grand effet, ne de laquelle vous puissiez faire plus grande execution, ayant volonté de vous seruir de feu.


*Moyen d'aproprier le feu artificiel aux festes & triumphes. Chap. 10.*

**P**Our ne vouloir laisser en arriere chose quelconque, ou le feu soit requis d'estre mis en œuvre, j'ay pris vouloir de vous dire aucunes compositions qui rendent plaisir au lieu de frayeur, tellement que le peuple s'activationne d'aller veoir les festes & triumphes, ou l'on prend plaisir à donner resiouyssance aux compagnies avec ce feu artificiel, duquel on souloit autres fois vser en Florence, & à Sienes aux iours dediez à la saint Iehan Baptiste & à l'Assumption nostre Dame: car ils n'auoyent plus tost acheué le service diuin, qu'ils commençoient à dresser la chasse des lions, des taureaux sauuages, & de plusieurs autres bestes sauuages: & en la mesme place dressoyent vn edifice de boys, lequel ayant reduit aux termes de la grosseur qui luy vouloyēt dōner, ils le faisoient courir avec papier collé, sur lequel on auoit fait premierement peindre vases l'un sur l'autre, avec demōstratiōs de plusieurs figures ornées, representās quelques sens fabuleux ou historial, afin que leur spectacle ne donnast indice d'auoir esté fait à plaisir, ou

sans auoir congnoissance ou intelligence de ce qu'ils auoyēt mis  
 en auant. Alentour de cest edifice on mettoit quātité de trōpes,  
 fusées, boulets, chādelles enflambées, & autres sēblables choses  
 duisantes à cest effer. Et ausquelles on mettoit le feu avec coton  
 bouilly avec poudre. Mais ie vous vueil faire congnoistre la façon  
 comme ils ordonnoyent leur affaire. Premieremēt ils faisoient  
 electiō de la fable ou histoire qu'ils vouloyēt represēter. Et pour  
 la demonstrier ils faisoeyēt quatre, six, ou huit figures, & les esten-  
 doyent en largeur pour monstrier & dōner cōgnoissance de leur  
 fable ou histoire. Pour laquelle represēter ils cōpassoyēt de bois  
 vn portrait d'effigie, luy faisant bras & iābes avec du platre. Puis  
 apres le vestoyent de gros drap de lin. Et l'auoir accōmodé ainsi  
 qu'il leur sembloit le mieux, mettant les compositions des vases  
 les vnes sur les autres, en venoyēt à dresser vne quātité de la hault-  
 reur de trente ou quarāte brasses. Et ayant le tout paint & ébelly,  
 adaptoyent au dessus deux ou trois milles fusées, les vnes prenās  
 leur vilée au Ciel & les autres en terre. Parmy les fusées estoyēt  
 posées les figures, dans la bouche desquelles on mettoit lāgues à  
 feu longues de deux ou trois brasses, ou trōpes qui gettoient les  
 boulets ordonnez de la façō que ie vous ay dit cy dessus. Et vous  
 assēure qu'ē telle façō on pourroit grādemēt interesser ceux qui  
 entreprendroyent de faire defēce sur les murailles quād on veult  
 faire baterie. Car outre la beauté, ces fusées vōt tournoyāt & ne  
 sōt plustost finées, que cinq ou six autres viennēt à naistre. D'auā-  
 tage ils cōposoyent pour embraser tout à vn instāt dix ou douze  
 chādelles d'vne poudre faite avec tourmentine, racines de pin,  
 poix nauale, poudre à canō & de l'aurier. Et pour cōclure, ils met-  
 toyēt feu avec cotō bouilly avec vinaigre, soufre, & salpetre. Or  
 de toutes ces festes & triōphes n'est pl<sup>9</sup> de memoire en l'Italie,  
 fors qu'à Rome au chasteau saint Ange, lors qu'on vient creer ou  
 coronner le pape. Mais ils font estēdre par tout le chasteau ceste  
 composition de feu, ordōnāt en tous les carnaux deux lâternes  
 faites de papier, posées sur vn rond de terre, ayāt la chacune vne  
 chādelle de suif pour esclairer la nuit. Et pour la distāce de la veuē  
 vous apperceurez la blancheur si tres reluyfante, que c'est plai-  
 sir indicible de la contempler. Apres que les chandelles sont



allumées, on fait charger vn grād nombre de pieces d'artilleries, & leur fait on tirer à deux fois en l'air boulets de feu, fait comme ceux que ie vous ay dit, qui se mettent dans les trompes. Et vous aduertis qu'estans en l'air, apres auoir rendu vn feu excédant en clairté vne estoille, ils viennent à se rôpre. Et cela fait on se prend à tirer plusieurs fusées, lôgues d'vn pié, lesquelles ne sont plustost en l'air, q̄ la chacune d'elles, sur le point qu'elle veut finer, en viēt à rendre six ou huit. Encores s'estudient ils à faire trompes, lesquelles ils font poser sur la sommité du chasteau ou l'âge est attaché à l'arbre de l'enseigne, là ou est posée la formé d'vne grande estoille, sur laquelle sont semées fusées en grande quantité, & les armes du Pape, tellement que le tout vient à s'embraser. Et quād l'artillerie, les fusées, trompes, & boulets ont tiré, on apperçoit autre chose que fumée & feu, tellement que cela me prefigure proprement le feu infernal. Vous assurant de n'auoir onques veu chose plus singuliere ne plus digne d'admiration.



*Du feu qui consomme & ne rend point de cendres, beaucoup plus puissant que tout autre, & duquel on dit estre forgeron le grand fils de Venus. Chap. II.*

**A**Yant discoursu avec ma petite & foible barque par toutes les Isles de la profonde & spacieuse mer, pour vous sçauoir deuiſer de tous les exercices du feu materiel, ie me suis tellement conduit avec l'aide de Dieu, que ie suis arriué au port & fin terminée de mon voyage. Au moyen de quoy congnoissant de ne

vous sçauoir bailler les moyens de passer plus outre, i'auoye proposé de hauser les voilles & getter les ancrs dedans l'eau pour auoir la commodité de iouir du repos de ma nauigation. Lors que ie fuz aduertie par mon maistre pilote, que i'eusse auant que descēdre à regarder derriere, pour cōgnoistre si ie me pourroye auiser d'auoir mis en oubly de vous mōstrer quelques lieux par animaduertence. Parquoy desirant satisfaire à son vouloir, me vint soudainement en memoire la ruine cuisante & aspre que le puissant feu d'amour auoit faite, non en lointain païs, ains dedās mon estomach, l'indisposition duquel me fait facilement congnoistre qu'autre feu n'approche en rien, l'ardeur de celuy d'amour, les scintilles & viues flambes duquel residēt cōtinuellemēt en mon estomach. Encores que la vieillesse & froideur me soient venu faisir. Pour raison dequoy ie suis prouoqué en ce mien trauail de feu, de vous escrire plus tost de celuy d'amour que des autres: attendu l'effet prochain & grande congnoissance que i'en ay. Mais pour auoir pris & posée la visée de tout mō desir en chose lointaine: & fait cōme celuy qui voulāt regarder au ciel, ne peut voir en quellieu il pose les pieds: ou cōme celuy qui pensant aux choses d'autrui, viēt à mettre en oubly ces propres affaires. Au moyen dequoy ayant desir de ne passer outre sans corriger mon erreur, & mesmement pour dōner à mon œuvre plus ioyeuse fin que de rester au milieu du bruit des canons, poudre & salpêtre, qui semblent estre beaucoup plus aspre à nommer que n'est le feu amoureux, qui est intolerable & peu agreable à celuy qui par experiēce le sent. Attendu que sa force excède toute autre chose, & se peut à mon iugement accomparer au feu qu'on assure de trouuer au fond d'enfer ordōné pour le dernier supplice des ames damnées: & ceste telle conformité se demonstre facilement pour estre l'un & l'autre spirituels. Car si en l'un les ames son affligées & desesperées pour auoir perdu la grace pour leurs pechez. En l'autre pour le desir d'aquerir ce qu'on pretēd, non seulement l'ame, ains le corps vient à estre tormenté. Parquoy si ce feu d'amour vient à excéder celuy des enfers, on ne me sçauroit nier droittement qu'il ne surpasse le feu elemental, & les autres composez par artifice: &

fice:& si ne me ſçauoit on nier que quād vne ſource procede de choſe excédant en nobleſſe l'autre, que l'effet ne ſoit accōpagné de dignité plus grande. Parquoy il ne fault doubter que ce feu ne ſoit ſpirituel,& que actuellement il ne ſoit iugé avec la ſubſtance du cœur, au lac de l'entēdement, ſi que ceux qui en ont cōgnoiſſance l'aurōt en reputation grāde: & meſmemēt les poētes voulant demonſtrer ſous voile de poēſie, ſes effets admirables, l'ont figuré en forme d'un dieu ieune, nud, & portant aeſles & triomphant ſur un chariot de feu inextinguible, ayant l'arc en main & quantité de ſagettes au coſté, le nommant Cupido, qui ne repreſente autre choſe à mon iugement fors un penſer conſceu & imprimé en la congnoiſſance de ce qu'on deſire. Si que ſouuentefois noſtre eſprit peu ruſé & aueuglé de la raiſon, vient à ſe laiſſer engluer & prendre de la beauté, ou deſir de poſſéder la choſe aymée. Et ſi par cas fortuit ce qu'on a en penſée vient à ſuccéder à bien, ils viennent auſſi à dire qu'amour eſt au ciel, ayant pris ſon origine & naiſſance de Vulcan & Venus. Et ſi on a opinion qui fait encores reſidence en terre accompagné de la gentilleſſe & particuliere election de la clarté qui fait cōpagnie à ceux qui ſont douez de beauté ſinguliere, laquelle eſt, ou doit eſtre communement accompagnée des chaines qui procedent du regard de la choſe aymée, ſignifiant les graces, vertus, hōneſtetez & mignardes careſſes, deſquelles on ne ſe nourrit ſeulement, ains accroit on l'experiance, qui à la fin ſe cōuertit en feu, lequel brule & deuore d'autant plus qu'on vient à le charger des choſes ſuſdittes. Aucunes deſquelles ſont plus faciles à embraser que ſoufre: cōme celles qui non ſeulement ont puiſſance de faire ce feu irreparable puiſſant & grand, ains de le multiplier & rendre ſemblable à vne peſte contagieuſe, tellement que non ſeulement ſans auoir reſpect à la ſageſſe, force & richeſſe, les Roys & Empereurs, ains les animaux irraiſonnables, tant terreſtres qu'aquatiques en viennent à eſtre infectez. Parquoy on cognoiſt facilement que la puiſſance de ce petit dieu pharetré, deſcend du ciel pour inſtuer ſur toute choſe naturelle viuante. Et encores fait on doute que ſon pouuoir ſ'eſtend iuſques deſſus les planettes, ſi que pour n'auoir

pouvoir de sçauoir congnoistre comme il se conuertit en ardëte passion de cœur, vn chacun vient à le nommer le feu amoureux. A quoy nous ne voulons contrarier, ains le voulons delaisser en l'estat auquel il a esté si longuement maintenu. Et si ie ne vous ay peu mieux donner cōgnoissance de sa nature & cōdition, ie vous supplie de vouloir receuoir & accepter pour agreable mon bon vouloir & vous prendre garde de sa pratique & de ses instrumēs, tout ainsi comme i'ay fait des autres, non pas que pour exemple succedé & auenu en moy, ie vous en puisse donner quelque notice. Car c'est vne mer trop large. & tāt pleine d'innumerables sentiers, qu'il est difficile de pouuoir faire descente au port du repos qu'ō desire: & est necessaire à vn chacun d'auoir sa propre barque acompagnée des instrumens appropriez pour nauiger, au lieu, là ou par sort ou engin estant arriué on trouue les ardentes fournaïses des fusions les soufflets, marteaux & enclumes, lesquels ne signifient autre chose qu'altercations, ialousies, craintes, & plusieurs autres effets pleins d'ennuy & fascheuse amertume. Et lesquels estant ioints & bandez par ensemble, ont pouuoir de rendre embrasées les cruelles flammes, desquelles peut porter asseuré & clair tesmoignage celuy qui les a esprouuées, ou a desir de les approuuer, Qui sera cause pour le peu d'enuie que i'ay de luy tenir compagnie, que ie mettray fin à ceste œuvre.

FIN DE LA PIROTECHNIE,

OV ART DV FEV.


92/1

92



11-30/1000

225







an. epov

